

გ. გასვიანი

დასავლეთ საქართველოს
მთიანეთის ისტორიის
საქიტხები



გამომცემლობა „საბჭოთა საქართველო“
თბილისი — 1979

~~9(C 41)~~

9(47.922) 3

გ-221-

ნაშრომი ეხება საქართველოს მთიანეთის ერთ-ერთი კუთხის, სვანეთის მოსახლეობის ყოფა-ცხოვრების ხასიათსა და თავისებურებას, სვანეთის რუსეთთან შეერთებას და მის პროგრესულ-ისტორიულ მნიშვნელობას. აქვე გაშუქებულია სვანეთის გლეხთა მოძრაობა, მისდამი ქართველი საზოგადოებრიობის დამოკიდებულება, აგრეთვე, „ვარგის“ სოციალური წოდების დახასიათება და სხვ.

10604.88-162

Г ————— 88.79

M.601 (88)-79

შ ე ს ა ვ ა ლ ი

ქართველი ხალხის ისტორიულ ცხოვრებაში მნიშვნელოვან როლს ასრულებდა როგორც საშინაო, ისე საგარეო-პოლიტიკური ფაქტორები. ამას საქართველოს რუსეთთან შეერთების უდიდესი ისტორიული მნიშვნელობაც ადასტურებს.

პოლიტიკურად დაქუცმაცებულ საქართველოს კუთხეებს შორის სვანეთი რუსეთს შედარებით მოგვიანებით შეუერთდა. რუსეთთან საქართველოს ურთიერთობისა და საქართველოს კუთხეების რუსეთთან შეერთების ისტორიის კვლევაში თვალსაჩინო წარმატებებია მოპოვებული, თუმცა ამომწურავად არ არის გაშუქებული. /მოცემულ კონტექსტში ყურადღებას იპყრობს სვანეთის რუსეთთან შეერთება, ასევე სვანეთის მოსახლეობის ბრძოლა ეროვნული და სოციალურ-ეკონომიკური ჩაგვრის წინააღმდეგ, რომლის უბრწყინვალეს ფურცელს 1875—1876 წლების სვანეთის აჯანყება წარმოადგენს.

სვანეთის რუსეთთან შეერთებას სხვადასხვა იდეურ-პოლიტიკური მრწამსის არაერთი რევოლუციამდელი ავტორი შეეხო, მაგრამ მისი ღრმად გაშუქება და ობიექტური შეფასება მათ არ მოუციათ. მაგალითად, სვანეთის რუსეთთან შეერთება მიმოიხილეს ვ. ტეპცოვმა¹, მ. ილინამ² და სხვებმა, თუმცა ისინი მოვლენის ზოგად აღწერას დასჯერდნენ, ისტორიული ფაქტის შეფასება არ უცდიათ.

ხსენებულ საკითხს შეეხო ე. გაბლიანი³, რომელმაც გაა-

1 В. Я. Тепцов, Сванетия, Сборник материалов для описания местностей и племен Кавказа, вып. X, Тифлис, 1890.

2 М. Иллина, Поездка в Сванетию, Петербург, 1913.

3 ე. გაბლიანი, თავისუფალი სვანეთი, თბილისი, 1927, გვ. 30—56; მისივე, ძველი და ახალი სვანეთი, თბილისი, 1925.

შუქა სვან ზავადაზნაურთა და რუს მოხელეთა ურთიერთობის არაერთი ფაქტი. ე. გაბლიანმა აღწერა სვანეთის რუსეთთან შეერთებისას დადიშქელიანთა ორ შტოს შორის გამწვავებულ ურთიერთობა, ასევე ჩუბეხევის დადიშქელიანებისა და დადიანების მტრობა, ე. წ. დადიშქელიანთა სამთავროს შესვლა რუსეთის მფარველობაში. ავტორი შეეხო ადგილობრივ აზნაურთა მცდელობას თავიანთი ნებასურვილისათვის დაქვემდებარებინათ „თავისუფალი“ სვანეთის გლეხობა და თაოსნობა დაჩემებინათ სვანეთის რუსეთთან შეერთებაში. ე. გაბლიანი დასძენდა: მიუხედავად აზნაურთა ამგვარი მეცადინეობისა და მეზობელ სამეგრელოს და რაჭის მფლობელთა აქტიური ჩარევისა, ბალსზემო სვანეთი XIX საუკუნის შუახანებამდე დამოუკიდებელი რჩებოდა, ბოლოს კი 1853 წელს თვითმპყრობელობის გამგებლობაში შევიდა.

სვანეთის რუსეთთან შეერთებასთან დაკავშირებული ფაქტების შეფასებას ე. გაბლიანი იშვიათად იძლევა. ირკვევა, რომ ავტორს შეერთება არც თუ ისე პროგრესულ მოვლენად წარმოედგინა. მან ერთმანეთისაგან ვერ განასხვავა ორი რუსეთი — მეფის თვითმპყრობელობა და რუსი ხალხი. შეერთება ისტორიულ-პერსპექტიულად ვერ შეაფასა.

სვანეთის რუსეთთან შეერთებას შეეხო აგრეთვე ბ. კოვალევსკი, რომელიც ამ აქტთან დაკავშირებულ ზოგიერთ ფაქტს არაზუსტად აღწერდა. ასე მაგალითად, მისი აზრით, სვანეთის სამთავრო („სადადიშქელიანო სვანეთი“) რუსეთს 1846 წელს შეუერთდა.

სვანეთის, როგორც პოლიტიკურად დაშლილი საქართველოს ერთ-ერთი კუთხის, რუსეთთან შეერთების ისტორიული მნიშვნელობა სწორადაა დახასიათებული საბჭოთა მკვლევარების ნაშრომებში, ასევე XIX საუკუნის საქართველოს ისტორიის სხვადასხვა პრობლემისადმი მიძღვნილ კონკრეტულ გამოკვლევებში.

რუსეთთან სვანეთის შეერთებაზე ნაკლები დაიწერა, ვიდრე სვანეთის გლეხთა 1875—1876 წლების აჯანყებაზე, რაც ბუნებრივიცაა, რადგან ეს უკანასკნელი იმპერიის მასშტაბით გახმაურდა.

საქართველოში XIX საუკუნის მეორე ნახევარში გაშლილ

ეროვნულ-განმათავისუფლებელი მოძრაობისა და „საერთო დემოკრატიის“ წარმომადგენლები გაბედულად გამოეხმაურნენ სვანეთის აჯანყებას, გამოეჭომაგნენ აჯანყებულებს, რომელთა დაცვასაც ისინი პრესის ფურცლებზე და ოფიციალურ საქმედრო სასამართლო პროცესზეც არ მოერიდნენ.

სვანეთის გლეხთა ხსენებული აჯანყების თვითმხილველია ბ. ნიჟარაძე, რომელმაც „თავისუფალი სვანის“ ფსევდონიმით „სვანეთის აღელვებაზე“ 1892 წელს რამდენიმე სტატია გამოაქვეყნა გაზეთ „ივერიაში“¹. იგი საინტერესო ცნობებს გვაწვდის სვანეთის გლეხთა მღელვარების დაწყებაზე, მსვლელობასა და შედეგებზე. განსაკუთრებით აღსანიშნავია აჯანყების მონაწილეთა (ყ. შერვაშიძე, ა. ფარჯიანი და სხვ.) გამოსვლების გადმოცემა, რომელიც შუქს ჰფენს აჯანყების დროს სვანეთში შექმნილ სიტუაციას, აჯანყებულთა მიზანსწრაფვებს, მეფის მთავრობის მოხელეთა ვერაგობას. საყურადღებოა ასევე აჯანყების მსვლელობისას მეფის მოხელეთა და სოფ. ხალდეს წარმომადგენელთა შორის ბ. ნიჟარაძის მონაწილეობით მიმდინარე მოლაპარაკების დეტალური აღწერა.

სვანეთის აჯანყებაზე ზოგიერთ ანგარიშგასაწევ ცნობას გვაწვდის ე. გაბლიანიც. აქ ყურადღებას იპყრობს აჯანყების თვითმხილველთა (გ. მარგიანი, ბ. გუჯეჯიანი და სხვ.) ნაამბობის ჩანაწერები. ე. გაბლიანი სვანეთის აჯანყებაში და მისი მძიმე შედეგებით დამთავრებაში მეფის მთავრობას ადანაშაულებდა.

სვანეთის გლეხთა აჯანყებას ერთ-ერთი პირველთაგანი შეეხო ვ. ტეპცოვი, რომლის აზრითაც 1878 წ. (?) სვანეთში აღგილი ჰქონდა გლეხთა არეულობას („უწყსრიგობას“). მისი დაკვირვებით. ის გადასახადების შემოღებაზე გავრცელებულ ქორებს მოჰყვა. ავტორი სოფ. ხალდეს მცხოვრებთა აწიოკებისათვის მთავრობას ხოტბასაც კი ასხამს².

ბ. ტუროვეროვას აზრით, „სვანეთის არეულობა“ იქ გადა-

1 იხ. ბ. ნიჟარაძე, ისტორიულ-ეთნოგრაფიული წერილები, 11, თბილისი, 1964, გვ. 173—199.

2 В. Я. Т с п ц о в, Свапетия, стр. 7.

სახადების შემოღების მცდელობის დროს ორი ჯარისკაცის მოკვლამ გამოიწვია¹.

სვანეთის გლეხთა აჯანყება მიმოიხილა ბ. კოვალევსკიმაც. მან სამართლიანად აღნიშნა, რომ მეფის მთავრობამ სვანეთის მიმართ არავითარი დაპირება არ შეასრულა (გზა არ გაიყვანა, სასწავლებლები და სავაჭროები არ გახსნა და სხვ.), სამაგიეროდ, პოლიციური რეჟიმი დაამყარა და მოსახლეობის ექსპლუატაციას ეწეოდა².

ბ. კოვალევსკიმ აღწერა აჯანყების მიზეზები, მსვლელობა, სოფ. ხალდეს დარბევა და მის მცხოვრებთა გაციმბირება. მისი შეფასებით, სვანეთის გლეხთა აჯანყება მეფის მოხელეთა და დადიშქელიანთა ძალმომრეობამ გამოიწვია.

XIX საუკუნის საქართველოს გლეხთა სოციალურ-ეკონომიკური და ეროვნულ-განმათავისუფლებელი მოძრაობის მეცნიერული კვლევა-ძიება სწორი მეთოდოლოგიური პოზიციიდან და ფართო გეგმით მხოლოდ 30-იანი წლებიდან გაიშალა. სვანეთის გლეხთა შეიარაღებული აჯანყების შესწავლასა და გაშუქებაში წვლილი მიუძღვის ა. კოკლავაშვილს, რომელმაც ამ საკითხს სპეციალური ნარკვევი უძღვნა და სარკივო მასალების ერთი წყებაც გამოაქვეყნა.

ა. კოკლავაშვილმა ზოგადად სწორად დაახასიათა სვანეთის გლეხთა აჯანყების მიზეზები, მსვლელობა და შედეგები. მისი აზრით, სვანეთის გლეხთა შეიარაღებული აჯანყების მიზეზი იყო ცარიზმის კოლონიური რეჟიმი, რასაც მეფის მთავრობის მოხელეთა პროვოკაციული მოქმედებაც ამძიმებდა.

ა. კოკლავაშვილი მართებულ შეფასებას აძლევს აჯანყების დამარცხების მიზეზებსაც: „...სვანეთის შეიარაღებული აჯანყება ვერ ასცდა იმ საერთო ნაკლს, რომლითაც იმ დროის გლეხთა შეიარაღებული გამოსვლების მეტი ნაწილი ხასიათდებოდა: სტიქიურობა, არაორგანიზებულობა, პოლიტიკური გაუთვისებლობა, მცირე მასშტაბი და მუშათა კლასის ხელმძღვანელობის უქონლობა“³.

¹ Н. И. Туроверова, Цанука, Загиз., 1931.

² Б. Ковалевский, Страна снегов и башен, М., 1930, стр. 101.

³ ა. კოკლავაშვილი, გლეხთა შეიარაღებული აჯანყება სვანეთში 1875-1876 წწ., ჟურნ. საქ. სსრ შსსკ საარქივო სამმართველოს საისტორიო მთაბე, თბილისი, 1945, გვ. 130.

მიუხედავად იმისა, რომ სვანეთის გლეხთა აჯანყება მარცხით და მძიმე შედეგებით დამთავრდა, — აღნიშნავს ა. კოკლავაშვილი, — მას დადებითი მნიშვნელობა ჰქონდა საქართველოს ეროვნულ-განმათავისუფლებელი მოძრაობისა და სოციალური ბრძოლის შემდგომი განვითარებისათვის.

სვანეთის გლეხთა შეიარაღებული აჯანყება შეისწავლა ვ. ონიანმა, რომელმაც ამ საკითხზე თავი მოუყარა ზოგიერთ უცნობ საარქივო დოკუმენტს და საყურადღებო დასკვნებიც წარმოადგინა¹.

სვანეთის გლეხთა გამოსვლას სპეციალური ნარკვევი მიუძღვნა გ. გულბანმა, რომელმაც საარქივო მასალისა და ლიტერატურის მომარჯვებით აჯანყების მიზეზები, მსვლელობა და შედეგები განიხილა².

სვანეთის რუსეთთან შეერთებას და გლეხთა აჯანყებას გარკვეული ადგილი დაუთმო ა. ჩარკვიანმა, რომელმაც რიგი საარქივო დოკუმენტისა და არსებული ლიტერატურის საფუძველზე მოცემულ საკითხებზე სწორი დასკვნები გააკეთა³. მისი შეფასებით, სვანეთის გლეხთა მოძრაობაში ორი ეტაპი გამოიყოფა: პირველი ეტაპი მოიცავს 1875 წლის მაისიდან — ციტოვიჩის ექსპედიციის სვანეთში წასვლის პერიოდს; მეორე — 1876 წლის ივლის-აგვისტოს, როდესაც შეიარაღებული აჯანყება ხალდეს ტრაგედიით დამთავრდა.

სვანეთის აჯანყება აისახა მხატვრულ ლიტერატურაშიც: ა. გელოვანის „სვანეთის თეთრი ქული“ (თბილისი, 1976 წ.) და თ. მაღლაფერიძის რომანში „გაულ გავზე“ (თბილისი, 1976 წ.).

ჩვენთვის საინტერესო საკითხები სხვა ავტორთა მონოგრაფიებში, გამოკვლევებსა თუ ნაწარმოებებშიცაა მოხსენიებული. ამის მიუხედავად, სვანეთის გლეხთა 1875-1876 წლების აჯანყება, ისევე როგორც სვანეთის რუსეთთან შეერთება, კვლავაც შეუწინაღებელ ინტერესსა და მონოგრაფიულად გამოკვლევას მოითხოვს.

¹ იხ. ვ. ონიანის საკანდიდატო დისერტაცია — თავისუფალი სვანეთის გლეხთა აჯანყება 1875-1876 წწ. (ისტორიის, არქეოლოგიისა და ეთნოგრაფიის ინსტიტუტის ბიბლიოთეკა, 1941 წ.).

² გ. გულბანი, ეს იყო მთაში, თბილისი, 1966.

³ ა. ჩარკვიანი, სვანეთი, თბილისი, 1967.

შუა საუკუნეების სვანეთის ისტორიის გაშუქების ცდა რევოლუციამდელი და საბჭოთა ხანის არაერთი ავტორის ნაშრომშია მოცემული. იმჟამინდელი სვანეთის სოციალური ურთიერთობის საკითხებს სხვადასხვა დროისა და მრწამსის ავტორები ერთმანეთისაგან განსხვავებული მეთოდოლოგიური პოზიციიდან განიხილავდნენ და, ბუნებრივია, სხვადასხვანაირად აშუქებდნენ. ერთმანეთის საპირისპირო თვალსაზრისთა ხანგრძლივ ქიდილში მკაფიოდ გამოიკვეთა და ჩამოყალიბდა შუა საუკუნეების სვანეთის ე. წ. „პირველყოფილურობის“ თეორია, რომელიც სათავეს XIX საუკუნის რუსეთის ოფიციალური (თავადაზნაურული და ბურჟუაზიული) ისტორიოგრაფიიდან იღებს და შემდგომ ტენდენციურ დასაბუთებას არაერთ ეთნოგრაფიულ გამოკვლევაში პოულობს. ამ თეორიას თავიდანვე დაუპირისპირდა მეცნიერული თვალსაზრისი, რომლისთვისაც უცხოა შუა საუკუნეების სვანეთის ცხოვრების ხელოვნური გაშუქება, მისი სპეციფიკის გაზვიადება და საქართველოს ამ კუთხეში ფეოდალური ურთიერთობის ჩამოყალიბების ფაქტის უგულებელყოფა. ხსენებულმა თვალსაზრისმა დასაბუთება და გარკვეული აღიარება პოვა უახლეს სამეცნიერო ლიტერატურაში.

ამავე დროს, ფეოდალური ხანის სვანეთის ე. წ. „პირველყოფილურობის“ და „გვაროვნულობის“ თეორიის გავლენამ თავი იჩინა ზოგიერთი თანამედროვე ავტორის ისტორიულ გამოკვლევაში. ასეთია, მაგალითად, მკვლევარ მ. დუმბაძის ნაშრომი — „დასავლეთ საქართველო XIX ს. პირველ ნახევარში“, სადაც აღებული ხანის საქართველოს ისტორიის გაშუქებისას ფეოდალური ხანის სვანეთი არსებითად არ არის განხილული და, ამის მიუხედავად მოცემულია ფეოდალური ხანის სვანეთის ისტორიული პროცესის შეფასების ცდა სვანთა „პირველყოფილურობისა“ და „გვაროვნულობის“ თეორიის თვალსაზრისით. ამ ნაშრომში სვანეთი რამდენიმე ადგილას არის მოხსენიებული. აი ეს ადგილებიც: „სოციალურ-ეკონომიკური განვითარების თვალსაზრისით უალრესად სპეციფიკუ-

რი მოვლენა იყო თავისუფალი სვანეთი. იგი წარმოადგენდა გვაროვნულ-თემური წყობილებისა და სამხედრო დემოკრატიის სერიოზული გადანაშთების შემცველ პოლიტიკურ ერთეულს“ (იხ. დასახ. ნაშრ., გვ. 188). შემდეგ: „საქართველოს ცენტრალურ რაიონებთან სუსტად დაკავშირებულს, შედარებით ჩამორჩენილი სოციალურ-ეკონომიკური წყობილებისა და სულ რაღაც 51 სოფლის შემცველ პოლიტიკურ ერთეულს — სვანეთის სამთავროს არც შეეძლო ეთამაშნა რაიმე სერიოზული როლი მე-19 ს. დამდეგის საქართველოს პოლიტიკურ ცხოვრებაში“ (გვ. 252).

ოტა ქვემოთ: „საქართველოს მთიანეთმა, საერთოდ. დიდხანს შემოინახა ძველი გვაროვნულ-თემური წყობილებისა და წარმართული სარწმუნოების ნაშთები. ამ მხრივ. მთიანეთის სხვა რაიონებთან შედარებით, სვანეთის მდგომარეობა კიდევ უფრო სპეციფიკური იყო. კავკასიონის მთის კალთებში მომწყვდეულ სვანეთს ჩრდილო-დასავლეთიდან ოსმალეთის გავლენის ქვეშ დიდი ხნის განმავლობაში ნამყოფი და გამაჰმადიანებული რაიონები ეკრა (ყაბარდო, ყარაჩაი. ნაწილობრივ აფხაზეთიც). შესუსტებულ ქრისტიანულ სარწმუნოებასა და წარმართობის ძლიერ გადმონაშთებს იქ ისლამის გავლენაც დაემატა. მაჰმადიანური წეს-ჩვეულებები გზას იკაფავდა დადიშქელიანთა სამთავრო სახლშიაც. სხვადასხვა სარწმუნოებრივ კულტურათა ასეთი აღრევა სვანეთში საფუძველს აძლევდა ზოგიერთ დამკვირვებელს ეთქვა, რომ იქ ქრისტიანული რელიგია დაკარგული იყო“ (გვ. 253).

ავტორის ნაშრომში მოტანილი აქვს შემდეგი განცხადებანი: „მეშინ მიყრუებული სვანეთი...“ (გვ. 405), „სვანეთის კულტურული ჩამორჩენილობა...“, „იქ არსებული ძველისძველი დახავსებული წესჩვეულებები...“ (გვ. 377). მ. დუმბაძის გამოკვლევაში მსგავს კვალიფიკაციებს თან ახლავს სვანეთის ისტორიასთან დაკავშირებული ფაქტების დამახინჯებანი. ამ მხრივ ნიშანდობლივია დადიშქელიანთა საგვარეულოს გამოცხადება სვანეთის ერთადერთ სათავადო სახლად (გვ. 73), გელოვანებისა და გარდაუხვადების სათავადო სახლებს სამეგრელოში მოქცევა (გვ. 76) და სხვ.

ეს არის და ეს! ხსენებულ წიგნში სვანეთზე არსებითი სხვა

არაფერია ნათქვამი. ვფიქრობთ, ზემოაღნიშნული კომენტარს არ საჭიროებს. ისტორიის ასეთი გამუქება ყოვლად მიუღებელია.

როგორც ცნობილია, სვანთა „პირველყოფილურობისა“ და „გვაროვნულობის“ თეორიას მისი ყველაზე თავგამოდებით დამცველი სწავლული ეთნოგრაფებიც განუდგნენ. ეს თეორია თავის დროზე დაუნდობლად გააკრიტიკა აკად. ნ. ბერძენი-შვილმა. დღესაც მოწოდებად ჟღერს აწ განსვენებული დიდი მეცნიერის ნაშრომში — „სვანეთის ისტორიის ზოგიერთი საკითხი“ (1964 წ.) ჩამოყალიბებული მოსაზრება, რომ „დღეს საჭიროა მეთოდოლოგიურად სწორი დიდი კრიტიკული მუშაობის შესრულება: პირველწყაროთა, ძველისა თუ ნაგვიანევის, მონაცემებისა და მეცნიერთა მონაპოვრების ყოველმხრივი კრიტიკის ცეცხლში გატარება და აგრე გამობრძმედილი მასალის ურთიერთისადმი შეწყობა-შეთანხმება.

თუ ეს არა, მეტისმეტად დიდია და თვალსაჩინო ის შეუთანხმებლობა, რომელიც საფუძვლიანი ექვის ქვეშ აყენებს ჩვენი ცოდნის სისწორეს სვანეთის ცხოვრების რიგი არსებითი მხარის შესახებ.

ერთი მხრივ სვანეთის სამეურნეო და სულიერი კულტურის ნაშთები, როგორცაა მსოფლიოში ხმაგანთქმული „მითი“ სვანეთის („კოლხეთის“) სიმდიდრის შესახებ, მის სამეურნეო-მეტალურგიულ მიღწევათა შესახებ და ამის დამადასტურებელი არქეოლოგიური მონაპოვრები, მაღალი ხელოვნებით შემუშავებული სასოფლო-სამეურნეო წესები (მიწათმოქმედება და მესაქონლეობა), ხით-ხურობის განსაცვიფრებელი ნიმუშები, ქვით-ხურობის საერო და საკულტო ნაგებობათა მაღალგანვითარებულობა, სამეურნეო და საომარი იარაღის ჰქედლობა და სამკაულთა ოქრომკედლობა, უაღრესად განვითარებული ფერწერა, ხოლო მეორეს მხრივ, ჩვენი ვითომც-და ცნობა-ცოდნანი სვანთა სამეურნეო კარჩაკეტილობისა და კულტურული ჩამორჩენილობის შესახებ, სვანეთის „პირველყოფილობის“ შესახებ¹.

¹ ნ. ბერძენი შვილი, სვანეთის ისტორიის ზოგიერთი საკითხი (ისტორიულ-გეოგრაფიული სამეცნიერო ექსპედიციის შედეგებიდან), პირველად დაიბეჭდა გაზ. „მებრძოლში“ (ზუგდიდი), 1964, № 155, იხ. საქართველოს ისტორიის საკითხები, V, თბილისი, 1971, გვ. 67.

თანამედროვე მკითხველი საზოგადოება შეუწინაღებელ ინტერესს იჩენს ჩვენს ქვეყანაში ახლახან გამოქვეყნებული ბრწყინვალე ისტორიოგრაფიული გამოკვლევებისადმი, გამოჩენილი სწავლული ისტორიკოსების ცხოვრებისა და შემოქმედებისადმი მიძღვნილი ისეთი კაპიტალური ნაშრომებისადმი, როგორცაა, მაგალითად, აკად. მ. ვ. ნეჩკინას „ვასილ ოსტოვის ძე კლიუჩევსკი“ (მოსკოვი, 1974, რუსულ ენაზე), რომელიც მკითხველს ხიბლავს, პირველ რიგში, ვ. კლიუჩევსკის შემოქმედების უზადო ანალიზითა და ზუსტი შეფასებით.

ისტორიოგრაფიული კვლევის მოცემულ სფეროში ბევრი რამაა გასაკეთებელი ქართულ საისტორიო მეცნიერებაში. მით უფრო მისასალმებელია მ. დუმბაძის ნარკვევი — „ნიკო ბერძენიშვილის ცხოვრება და მოღვაწეობა“ (მეორე გამოცემა, თბილისი, 1978), თუმცა, ავტორის აღიარებით, გამოჩენილი მეცნიერის „შემოქმედების ყოველმხრივი და უფრო საფუძვლიანი შესწავლა მომავლის საქმეა“ (გვ. 4). ყველაზე დასანანი კი ისაა, რომ ხსენებული ნარკვევის ბოლო პარაგრაფში — „ნაშრომები ნ. ბერძენიშვილის არქივიდან“ — ცალმხრივადაა შეფასებული მეცნიერის „სვანეთის ისტორიულ-გეოგრაფიული დღიურები“ (სადაც XII—XIII საუკუნეების სვანეთის საზოგადოება შეფასებულია როგორც „სამხედრო დემოკრატიიდან ადრეფეოდალურ ურთიერთობაში გარდამავალი საზოგადოება“). მ. დუმბაძის ნარკვევში სრულებით არაფერია ნათქვამი იმ ფაქტზე, რომ ნ. ბერძენიშვილმა 1964 წელს, „სვანეთის ექსპედიციის დღიურების“ დაწერის შემდეგ, იმავე ექსპედიციის შედეგების შემაჯამებელი ნაშრომი — „სვანეთის ისტორიის ზოგიერთი საკითხი“ — ჯერ კიდევ 1964 წელს გამოაქვეყნა (ხოლო შემდეგ 1971 წელს ეს ნაშრომი განხილული მეცნიერის თხზულებათა მეხუთე ტომში შევიდა)¹.

¹ ნ. ბერძენიშვილის ხსენებული ნაშრომიდან ზემოთ ჩვენ მიერ მოტანილი დებულებები ცხადყოფენ, რომ მისმა ავტორმა შუა საუკუნეების ხანის სვანეთზე არაერთი წინამორბედი მკვლევარაა მიერ შემუშავებულ შეხედულებასთან ერთად, გადასინჯა „სვანეთის ექსპედიციის დღიურებში“ გამოთქმული ზოგიერთი მოსაზრება და სვანთა „ვარაულობისა“ და „კარჩაკეტილობის“ თეორია გააკრიტიკა. საჭირო იყო აკად. ნ. ბერძენიშვილის ტომეულების VIII ტომში (სადაც სვანეთის ექსპედიციის დღიურ-

ასეთი მიდგომით, ერთი შეხედვით, ისეთი შთაბეჭდილება იქმნება, თითქოს ნ. ბერძენიშვილის მიერ ექსპედიციის დღეებში შედგენილ დღიურებში წარმოდგენილი ჩანაწერები შუასაუკუნეების სვანეთის ისტორიის გაშუქების ამოცანა უნდა გახდეს. ხოლო ექსპედიციის დამთავრების შემდეგ მის მიერვე დაწერილი შემაჯამებელი ნაშრომი (მოხსენება) სრულებით არაა ანგარიშგასაწევი. როგორც ჩანს, მ. დუმბაძეს ნ. ბერძენიშვილის „დღიურებში“ შუა საუკუნეების სვანეთზე გამოთქმული აღწერილობითი ან წინასწარული მოსაზრება ზედმიწევნით საგულისხმოდ ეჩვენება, ხოლო იმავე ექსპედიციის შედეგების შემაჯამებელ ნაშრომში ნ. ბერძენიშვილის მიერ ნათლად ჩამოყალიბებული შეხედულებების მოხსენიებაც კი ზედმეტად შიშნია. არანაკლებ დამაფიქრებელია ის ფაქტიც, რომ ნ. ბერძენიშვილის „დღიურებში“ XII—XIII საუკუნეების სვანეთის სოციალურ ურთიერთობაზე გამოთქმული შეხედულება მ. დუმბაძემ ხელოვნურად მიუსადაგა თავის წიგნში — „დასავლეთ საქართველო XIX ს. პირველ ნახევარში“, ამავე ხანის სვანეთზე გამოთქმულ მოსაზრებას, რომელიც სათანადო კვლევების გარეშეა წარმოდგენილი. ასეთი გზით მ. დუმბაძემ ფაქტიურად გააიგივა, ერთი მხრივ, XII—XIII საუკუნეების, ხოლო, მეორე მხრივ, XIX საუკუნის I ნახევრის სვანეთის ვითარება, რასაც ისტორიზმის პრინციპის უგულვებელყოფამდე მივყავართ. ნ. ბერძენიშვილის „დღიურებისადმი“ ასეთი მიდგომით მ. დუმბაძე აცხადებს, რომ „ძველი საქართველოს მთიანეთის სოციალურ-ეკონომიური წყობილების საკითხებზე ჩვენს ისტორიოგრაფიაში სათანადოდ შესწავლილი არაა, ხოლო, კერძოდ, სვანეთის შესახებ ზოგიერთ გამოკვლევაში სერიოზულ შეცდომებს ვხვდებით“ (იხ. დასახ., ნარკვევი, გვ. 116). აქ უთუოდ ის გამოკვლევები ჩანან ნიშანში ამოღებული, სადაც სვანეთზე მ. დუმბაძის ხსენებულ ნაშრომში გამოთქმული მოსაზრებები გაბათილებულია და შესაფერის სანდო წერილობით წყაროებზე დაყრდნობით დასაბუთებულია, რომ სვანეთი ფეოდალური საქართველოს ორგანული ნაწილი და

რები შევიდა) მიუთითებინათ, რომ ამ ექსპედიციის მუშაობის შემაჯამებელი მოხსენება „სვანეთის ისტორიის ზოგიერთი საკითხი“ (რომელიც მეცნიერის სიცოცხლეში დაისტამბა) V ტომშია შეტანილი.

მისი მაღალმთიანი კუთხე, არ იყო კარჩაკეტილი, პირველყოფილური და გვაროვნული, რომ იმ დროის სვანეთისათვისაც (როგორც ეს არაერთ საისტორიო წერილობით წყაროშია აღბეჭდილი) დამახასიათებელი იყო ფეოდალური ურთიერთობის ისეთი (რასაკვირველია, კუთხის მასშტაბის შესაბამისი) ინსტიტუტები, როგორიცაა: მიწის სამამულო-სამემკვიდრეო საკუთრება, საზოგადოების ფეოდალურ-წოდებრივი დაყოფა, ვალდებულებითი დამოკიდებულება და სხვ.

უახლეს გამოკვლევებში დადგენილია, რომ შუა საუკუნეების სვანეთში კერძო საკუთრება ბატონობდა არა მარტო სახნავ-სათეს მიწაზე, არამედ სათიბზე და ტყეზე, რომ მიწა, როგორც სამამულო საკუთრება, ყიდვა-გაყიდვის, გამზითვების, გაჩუქების, წყალობის, შეწირულობის საგანს წარმოადგენდა. ნიშანდობლივია ისიც, რომ შუა საუკუნეების სვანეთის სოფელში გვაროვნული განსახლება გამჭრალი იყო, ის უკვე მრავალგვარობრივი შერევის ნიმუშს წარმოადგენდა (თითოეულ პატარა სოფელშიც კი 2—3 სხვადასხვა გვარ-შვილი ცხოვრობდა, გვარი, როგორც წესი, ინდივიდუალურ-მცირე ოჯახებად იყოფოდა).

შუა საუკუნეების სვანეთის სოციალური განვითარების დონის განსაზღვრისას ანგარიშგასაწვევია ეკლესია-მონასტერთა საოცარი სიმრავლე, მათი მდიდრული გაფორმება, იქ დაცული ჯვარ-ხატებისა და რელიგიური წიგნების სიმრავლე, ადგილზე მოღვაწე სვან მწიგნობართა მრავალრიცხოვნება, საქართველოს სასულიერო ცენტრებში, აგრეთვე უცხოეთში არსებულ ქართულ კოლონიებში სვან მწიგნობართა მოღვაწეობა, სვანური ხელოსნური და მხატვრული სკოლის მნიშვნელოვანი მიღწევები.

ყურადსაღებია სვანეთში ქრისტიანული რწმენის სიმტკიცე და გავრცელებულობა, რაც არა მარტო ეკლესია-მონასტრებისა და მათი სიმდიდრის დაცვაში გამოიხატებოდა, არამედ „წმინდა“ ქრისტიანული რიტუალების შესრულებაშიც გლინდებოდა. ყველაფერი ეს ფეოდალური იდეოლოგიის — ქრისტიანობის ბატონობის მახასიათებელია.

სვანეთის განვითარების დონის განსაზღვრისას უმნიშვნელო როლია ფეოდალურ-წოდებრივი დაყოფისა და დამოკიდე-

ბულებითი ვალდებულების, აგრეთვე საზოგადოებრივი ურთიერთობის რიგი ნორმების წერილობითი (კანონიკური) გაფორმება, სვანეთში საერთო-ქართული ფეოდალური სამართლის ნორმების მოქმედება. ბევრისმეტყველია „დასავლეთ საქართველოს ბარის მოსახლეობის დიდი ნაწილის“ სვანურობა, „ახუნურების და მთავრების (თავადგობს) დიდი რაოდენობით სვანურობა“, აგრეთვე სვანთა ერისთავებისა და მათი წარმომადგენლების დიდი ადგილი და ძალაუფლება საქართველოს ერთიანი სახელმწიფოს სამეფო კარზე.

ასეთია ზოგადად ჩვენი საკვლევი საკითხების ისტორიოგრაფია.

წინამდებარე ნარკვევი მიზნად ისახავს, ჩვენი ისტორიოგრაფიის მიღწევების გათვალისწინებითა და ისტორიული საბუთების, მათ შორის პირველადი საარქივო წყაროების მონაცემების ანალიზის საფუძველზე გააშუქოს სვანეთის რუსეთთან შეერთება, მისი შედეგები, 1875—1876 წლების სვანეთის აჯანყება, კუთხის სოციალური სტრუქტურის განსაზღვრასთან დაკავშირებული სადავო საკითხები.

ნარკვევის „დამატებაში“ განხილულია შუა საუკუნეების (XI—XVIII სს.) სვანეთის საზოგადოების სოციალური სტრუქტურა, წარმოდგენილია „ვარგის“, როგორც აზნაურის სოციალური კატეგორიის, დახასიათება. ნაჩვენებია ე. წ. „გვაროვნული თეორიის“ მიმდევართა მიერ შუა საუკუნეების ისტორიული წყაროების მონაცემების სრული უგულვებლყოფა და სუბიექტივისტური ინტერპრეტაცია (ზოგჯერაც საბუთის მონაცემის აშკარა დამახინჯება), გამოკვლეულია „ვარგის“ სოციალური კატეგორიის რაობა.

ნაშრომში გათვალისწინებულია თანამედროვე საბჭოური ისტორიოგრაფიის მიღწევები. ამასთანავე ის შესრულებულია ადრე ცნობილი და დღემდე უცნობი პირველადი საარქივო წყაროების, ასევე XIX საუკუნის პერიოდული პრესისა და სხვა წყაროების მონაცემების ანალიზის საფუძველზე. საამისო მასალებს მივაკვლიეთ საბჭოთა კავშირის სამხედრო-ისტორიულ არქივში (მოსკოვი), საბჭოთა კავშირის ცენტრალურ ისტორიულ არქივში (ლენინგრადი), საქართველოს ცენტრალურ ისტორიულ არქივში (თბილისი).

ამ წყაროების მონაცემებზე დაყრდნობით შევეცადეთ, რამდენადაც შეიძლებოდა, სრულად აღმოგვეცა სვანეთის რუსეთთან შეერთებისა და სვანეთის გლეხთა აჯანყების მსვლელობა და შედეგები, სწორი მეთოდოლოგიური პოზიციიდან შეგვეფასებინა სვანეთის რუსეთთან შეერთების პროგრესული მნიშვნელობა, გაგვესაზღვრა სვანეთის გლეხთა 1875—1876 წლების აჯანყების ადგილი XIX საუკუნის საქართველოში გაშლილ სოციალურ-ეკონომიკურ და ეროვნულ-განმათავისუფლებელ მოძრაობაში.

თ ა ვ ი პ ი რ ვ ე ლ ი

სვანეთის მოსახლეობა და მეურნეობა XIX საუკუნის 30—70-იან წლებში

გეოგრაფიული მდებარეობა. XIX საუკუნის სვანეთს, აღრინდელთან შედარებით, მცირე ტერიტორია ეკავა. იგი დაახლოებით თანამედროვე სვანეთის ფარგლებში იყო მოქცეული¹.

სვანეთი კავკასიის მთავარი ქედის ცენტრალური ნაწილის სამხრეთ კალთებზე, დასავლეთ საქართველოს ჩრდილოეთში — რაჭიდან აუხზაზეამდეა გადაჭიმული. სვანეთს სამხრეთიდან რაჭა, ლეჩხუმი და სამეგრელო ესაზღვრება.

სვანეთი მდინარე ენგურისა და ცხენისწყლის ზემო წელის ხეობებში მდებარეობს. მას სვანეთის დიდი ქედი ორ ნაწილად, ანუ ე. წ. ზემო და ქვემო სვანეთად ყოფს.

სვანეთის ტერიტორია 4841 კვ კილომეტრს, ანუ საქართველოს ფართობის 6,9%-ს შეადგენს, ცალკე ზემო სვანეთის (ენგურის ხეობა) — 3320-ს, ხოლო ქვემო სვანეთის (ცხენისწყლის ხეობა) 1521 კვ კილომეტრს უდრის².

¹ სვანეთის საზღვრებმა 30-იან წლებშიც ერთგვარი ცვლილება განიცადა. პეტის მთავრობის კომისიამ (შახოვსკის მეთაურობით) სვანეთს ჩრდ. კავკასიაში (ქედს ჩქით) სხვადასხვა ხეობაში მდებარე ტერიტორია ჩამოართვა — მისი საზღვარი კავკასიის მთავარი ქედით შემოიფარგლა. სვანეთს სამეგრელოს მხრიდანაც გარკვეული ფართობის ტყეები და საძოვრები ჩამოაპყრეს (იხ. ე. გაბლიანი, თავისუფალი სვანეთი, თბილისი, 1927, გვ. 49).

სამაგიეროდ, ზემო სვანეთში XIX საუკუნეში აღდგა ოდესღაც განადგურებული დასახლების ნაწილი (ქუბერში, ნაკრაში და სხვაგან). აგრეთვე დაღში (კოდორის ხეობა), რომელსაც სვანეთ-აფხაზეთი ეწოდება.

² „მაღალმთიანი რაიონების ეკონომიურ-გეოგრაფიული ნარკვევი“, კრებული, თბილისი, 1970, გვ. 25.

სვანეთის ტერიტორიის უდიდესი ნაწილი ტყეებს, საძოვრებსა და კლდეებს უკავია, სახნავად კი შედარებით მცირე ადგილი გამოიყენება. ზემო სვანეთის მთელი ფართობის 41% ტყითაა დაფარული.

XIX საუკუნეში ზემო სვანეთის აღმოსავლეთ ნაწილს — ატკვერის ქედიდან ბალის ქედამდე — „ბალსზემო სვანეთი“ (სვანურად „ჟაბე ხევ-ჟიბე ხევარ“), ანუ „თავისუფალი სვანეთი“ ეწოდა¹. ბალის ქედის დასავლეთით კი „სადადიშქელიანო სვანეთი“, ანუ სვანეთის სამთავრო მდებარეობდა.

XVIII საუკუნის მეორე ნახევარში დადიანებმა თავისი ძალაუფლება გაავრცელეს ქვემო სვანეთის დასავლეთ ნაწილში (ლენტეხის თემში), რის შედეგად მას „სადადიანო სვანეთსაც“ უწოდებენ.

სვანეთის უდიდესი ნაწილი ზღვის დონიდან 800 მეტრზე მაღლა მდებარეობს.

მოსახლეობა. XIX საუკუნის პირველი ნახევრის სვანეთის მოსახლეობის ზუსტი მაჩვენებლები არ მოგვეპოვება.

ერთ-ერთი ყველაზე ადრინდელი ცნობით (1830 წ.), სვანეთის მოსახლეობა 23000 სულს შეადგენდა, აქედან 9000 სადადიშქელიანო სამთავროში, 8000 ბალსზემო სვანეთში, ხოლო 6000 ქვემო სვანეთში ცხოვრობდა².

¹ თავისებური ვითარების გამო, რაც საქართველოს სამეფო-სამთავროებად დაყოფისა და სვანეთის ცალკეულ ნაწილებად დაშლის შემდეგ (XVII—XVIII სს.) ზემო სვანეთის აღმოსავლეთ თემებში შეიქმნა, მას „თავისუფალი სვანეთი“ («Вольная Сванетия») ეწოდა (ეს სახელწოდება სვანურად არ არსებობს). ეს სახელწოდება მეფის მოხელეებსა და ოციციალურმა ისტორიკოსებმა XIX საუკუნის პირველ ნახევარში შემოიღეს და დამკვიდრეს. მოცემული რეგიონი „თავისუფალ სვანეთად“ იმიტომ მონათლეს, რომ ის არც რომელიმე სამეფო-სამთავროში შედიოდა და არც რომელიმე თავადის საგამგებლოს შეადგენდა.

ისიც უდავოა, რომ ბალსზემო სვანეთის ზოგიერთი თემის ცხოვრებაში XIX საუკუნისათვის ერთგვარი ცვლილებები მოხდა — აზნაურთა ძალაუფლება შეირყა და დასუსტდა, გლეხობამ კი გარკვეული თავისუფლება მოიპოვა. სწორედ ასეთ ვითარებაში სვანეთი რუსეთის იმპერიის შემადგენლობაში შევიდა (იხ. ჩვენი ნაშრომი — დასავლეთ საქართველოს მთიანეთის ისტორიიდან, თბილისი, 1973, თავი VI).

² ЦГВНАМ, ф. ВУА, ед. хр. 18505. л. 11.

გრაფ პასკევიჩის მიერ 1831 წლის 7 იანვარს გრაფ ჩერნიშოვისადმი გაგზავნილ მიმართვაში (რომელიც იმერეთის მმართველ გენერალ გესეს ცნობებს ემყარებოდა) ნათქვამია, რომ სვანეთის მოსახლეობა 4 ათას კომლს აღემატება და სვანეთს 9 ათასი ჯარისკაცის გამოყვანა შეეძლო¹.

1833 წლის ერთი ცნობით, ე. წ. „თავისუფალ სვანეთში“ სულ 2000 კომლი, ანუ 14000 სული ცხოვრობდა, ციოყის სამფლობელოში (ჩუბეხევში, რომელიც 30 სოფელს მოიცავდა) 500 კომლი, ანუ 4000 სული, ხოლო თათარყანის სამფლობელოში (ეცერ-ცხუმარ-ლეჩყან-ბეჩოში 21 სოფელა) 450 კომლი, ანუ 5200 სული (ამ ცნობარის შემდგენის შენიშვნით, 1834 წელს ზემო სვანეთის მოსახლეობა უკვე ნაკლები იყო)². როგორც ვხედავთ, ამ მონაცემებით მხოლოდ ზემო სვანეთში 23000 სული ცხოვრობდა.

1833 წლის 15 ივნისს როზენი ფინანსთა მინისტრს გრაფ ე. კანკრინს წერდა, რომ დადიშქელიანი ციოყის სამფლობელოში 4 ათასი სული ცხოვრობდა, თათარყანის — 5 ათასი, ხოლო „თავისუფალ სვანეთში“ — 8 ათასი სული³.

სხვა მონაცემებით, იმავე 1833 წელს ბალსზემო სვანეთის მოსახლეობა 1000 კომლს, ხოლო დადიშქელიანთა სამფლობელოსი — 346 კომლს უდრიდა⁴. მოსახლეობის ეს რაოდენობა თემებისდა მიხედვით ასე ნაწილდებოდა: ჩუბეხევში 134 კომლი, ეცერში — 84, ცხუმარში — 62, ბეჩოში — 66, ლატალში — 150, ლენჯერში — 150, მესტიაში — 100, მულახში — 200, მუჟალში — 100, იფარში — 130, კალაში — 60, უშგულში — 90 და ა. შ.

კავკასიის ადმინისტრაციის 1839 წლის დებულების პროექტის მიხედვით, სვანეთში სულ 12 ათასი მამრობითი სული ცხოვრობდა⁵. თუ გავითვალისწინებთ, რომ მამრობითი სქესი მდელრობითს 10—15%⁶-ით სჭარბობდა, გამოვა, რომ მთელი სვანეთის მოსახლეობა 22—23 ათას სულს უდრიდა. ✕

¹ АКАК, т. VII. стр. 404.

² ЦГВИАМ, ф. 482, ед. хр. 193, лл. 5—7.

³ ЦГИАЛ, ф. 561, д. 141, лл. 15—16.

⁴ ЦГВИА, ф. ВУА, ед. хр. 19247, г. 7.

⁵ ЦГИАЛ, ф. 561, д. 141, лл. 15—16.

მცირე გამონაკლისის გარდა, სვანეთის მოსახლეობის რაოდენობის მაჩვენებელი ცნობები გაზვიადებული და მცდარი უნდა იყოს. ასეთი დასკვნის საფუძველს ერთი და იმავე წლის სხვადასხვა წყაროს წინააღმდეგობრივი მონაცემების შეპირისპირება იძლევა.

ამასთანავე აღსანიშნავია, რომ ზემოთ მოტანილი დემოგრაფიული ცნობები მოსახლეობის აღწერის ჩატარების საფუძველზე კი არ იყო შედგენილი, არამედ ზერელე დაკვირვების შედეგს წარმოადგენდა.

თუ ჩვენთვის საინტერესო ყველა მონაცემს შევაჯერებთ და მომდევნო ხანის ცნობებს შევადარებთ, შეიძლება ვივარაუდოთ, რომ XIX საუკუნის 30-იან წლებში სვანეთის მოსახლეობა 16 ათას სულს არ აღემატებოდა. რაც შეეხება XIX საუკუნის დასაწყისს, საგულისხმოა, რომ იმ დროს სვანეთის მოსახლეობა შედარებით მეტი უნდა ყოფილიყო, ვიდრე 30-იან წლებში. ეს შემდეგი გარემოებით აიხსნება. როგორც ცნობილია, 1811—1812 წლებში დასავლეთ საქართველოში ინფექციური დაავადებანი (ქოლერა და სხვ.) მძვინვარებდა. ჩანს, ეს ავადმყოფობა სვანეთსაც მოედო და მრავალი ადამიანი იმსხვერპლა. მაგალითად, ბარტოლომეის გადმოცემით, აღნიშნულ ინფექციურ დაავადებას ელის საზოგადოების სამი სოფლიდან ორი სოფლის მოსახლეობა ამოუწყვეტია (ნასოფლარები დღესაც ჩანს)¹.

მსგავსი ვითარება ყოფილა სვანეთის სხვა საზოგადოებებშიც, სადაც ასევე მრავალი ოჯახი ამოწყვეტილა და რამდენიმე სოფელი განადგურებულა².

სვანეთის მოსახლეობაზე შედარებით სწორ ცნობებს გვაწვდიან ლობანოვ-როსტოვსკი, ბარტოლომეი, ე. ბერჟე და სხვ. ლობანოვ-როსტოვსკის გადმოცემით, XIX საუკუნის 50-იანი წლების დასაწყისში დადიშქელიანთა სამფლობელოში 516, ხოლო „თავისუფალ სვანეთში“ 683 კომლი ცხოვრობდა³. მისივე ცნობით, კომლი საშუალოდ 6 სულისაგან შედგე-

¹ Посадка в Вольную Сванетию полковника Бартоломея в 1853 году, стр. 34.

² Газ. «Кавказ», 1852, № 15—16.

³ იქვე.

ბოდა. თუ ამ მონაცემებს შევჯამებთ, გამოვა, რომ ზემო სვანეთში სულ 7200-მდე ადამიანი ცხოვრობდა. ამ შემთხვევაში კომლთა საერთო რაოდენობა გადაჭარბებული (სულ 1199) ჩანს, სამაგიეროდ კომლის სულადობრივი რაოდენობა შემცირებული (6 სული), ხოლო მოსახლეობის რაოდენობა მიახლოებით სწორად უნდა იყოს ნაჩვენები.

გ. ბერეეს მონაცემებით „თავისუფალ სვანეთში“ 683 კომლი ცხოვრობდა, ბარტოლომეის მონაცემებით — 777.

დ. ბაქრაძის გადმოცემით, სვანეთის საბოქაულოში (ზემო სვანეთში) XIX საუკუნის 60-იანი წლების დასაწყისში სულ 1000-მდე კომლი ითვლებოდა (აქედან 539 კომლი ბალსზემო სვანეთში). ოლონდ, მისი დაკვირვებით, კომლის საშუალო რაოდენობა 7,5 სულს შეადგენდა. ამ მონაცემებით, ზემო სვანეთის მცხოვრებთა რაოდენობა 7500 სული გამოდის.

ზემო სვანეთის მოსახლეობის რაოდენობაზე განსხვავებულ ცნობას გვაწვდის ე. კოვალევსკი, რომლის მიხედვით XIX საუკუნის 60-იან წლებში „სადადიშქელიანო სვანეთში“ 330 კომლი (ჩუბეხევი — 59, ფარში — 94, ეცერში — 83, ცხუმარში — 38 და ბეჩოში — 56) ცხოვრობდა. ბალსზემო სვანეთში — 549 კომლი (ზუსტად იმდენივე, რამდენიც დ. ბაქრაძის მონაცემებით), ხოლო ქვემო სვანეთში 420 კომლი (ლენტეხში — 120, ჩოლურში — 100, ლაშხეთში — 200), რაც დაახლოებით 3 ათას სულს შეადგენდა¹.

ასეთაა რეფორმამდელი სვანეთის მოსახლეობის მიახლოებითი რაოდენობის მაჩვენებლები. შემდგომი ხანის სვანეთის მოსახლეობის რაოდენობის დასადგენად კამერალური აღწერის მონაცემები მოგვეპოვება, რაც მოსახლეობის რიცხვის ზუსტი გაანგარიშების საშუალებას იძლევა.

ე. ტეპკოვის მონაცემებით, რაც XIX საუკუნის 80-იანი წლების აღწერის მასალებს ემყარება, ზემო სვანეთში ცხოვრობდა 732 კომლი, მათ შორის უშგულში — 73, კალაში — 64, იფარში — 128, მულახში — 107, მესტიაში — 70, ლენჯერში — 70, ლატალში — 119, ბეჩოში — 84, ეცერში — 171, ფარ-

¹ Евг. Ковалевский, Сванетия, журн. «Вестник Европы», т. III, СПб., 1867.

ში—79, ჩუბეხევი—115 კომლი (რამდენიმე მცირე თემი სულ გამოტოვებულია)¹. ამ მონაცემებით, ზემო სვანეთში სულ 9 ათასამდე სული ცხოვრობდა.

კამერალური აღწერის მონაცემებით, რეფორმის დროს ქვემო სვანეთში ცხოვრობდა 528 კომლი (აქედან ლენტეხში—164. ჩოლურში—131, ლაშხეთში—233), რაც მთლიანად 4300-მდე სულს შეადგენდა².

ამრიგად, XIX საუკუნის 80-იანი წლების დასაწყისში მთელი სვანეთი 13 ათას მცხოვრებს ითვლიდა, რაც მიახლოებით სწორი უნდა იყოს.

მ ე უ რ ნ ე ო ბ ა. დასავლეთ საქართველოს მთიანეთის³ ცენტრალური რეგიონი — სვანეთი თავისი ეკონომიკური განვითარებით XIX საუკუნეში ბარის რაიონებს საგრძნობლად ჩამორჩებოდა. ამ გარემოებას სახნავ-სათესი მიწის სიმცირე, შედარებით მკაცრი ბუნებრივ-კლიმატური პირობები, მოუწყობელი სამიმოსვლო საშუალებები, მეურნეობისათვის რელიეფის არახელსაყრელი განლაგებაც აპირობებდა.

ბუნებრივი პირობების გარკვეული განსხვავებულობის მიუხედავად, სვანეთის სხვადასხვა კუთხეში ძირითადად მეურნეობის ერთი და იმავე დარგებს მისდევდნენ, სახელდობრ, მიწათმოქმედებას, მესაქონლეობას, საოჯახო მრეწველობას და სხვ., თუმცა ამა თუ იმ დარგის განვითარებას სხვადასხვა ადგილას მეტ-ნაკლები გასაქანი ეძლეოდა.

სოფლის მეურნეობის ერთ-ერთ წამყვან დარგს მიწათმოქმედება წარმოადგენდა. მემინდვრობაში პირველ ადგილზე მარცვლეულის წარმოება იდგა. მებალეობა-მებოსტნეობა შედარებით მეორეხარისხოვან როლს ასრულებდა.

ზემო სვანეთის თემების გლეხურ კომლთა შორის სახნავ-სათიბი მიწის ფართობი XIX ს. 70-იან წლებში დაახლოებით ასე იყო დანაწილებული (ცხრილი 1)³:

¹ В. Я. Тепцов, Сванетия, СМОМПК, вып. X, отд. I, Тифл., 1890, стр. 40.

² Документы по истории Грузии..., т. I, стр. 384—387.

³ В. Я. Тепцов, Сванетия, СМОМПК, вып. X, отд. I, Тифл., 1890, стр. 41.

თემის დასახელება	გლეხური კომლი რაოდენობა	სახნავ-სათიბი მიწა (ქვევებში)		თითოეული კომლი ფლობდა (ქვევებში)			
		მო- სა- ნე	სა- ხნა- ვი	1- და- 5	5- და- 10	20- და- 50	50- და- 100
უშგული	73	562	298	46	24	1	2
კალა	64	391	236	49	11	1	3
იფარი	128	788	506	83	37	4	4
მულახი	107	1661	520	45	48	8	6
მესტია	70	1081	335	37	22	7	4
ლენჯერი	70	936	310	53	11	4	2
ლატალი	119	1667	696	40	56	18	5

როგორც 1-ლი ცხრილიდან ჩანს, თითოეული გლეხური კომლის სახნავი მიწა დაახლოებით 1,6—2 დესეტინას უდრის.

ვარგისი მიწის სიმცირის გამო, სახნავად გამოიყენებოდა არა მარტო ვაკე და შედარებით ფერდობი ადგილები, არამედ ვიწრო ხეობათა დაქანებული მცირე ფართობებიც, რისი დამუშავება ზოგან მხოლოდ თოხითა და ბარით ხდებოდა.

თუ იმასაც გავითვალისწინებთ, რომ საგლეხო რეფორმის შემდეგ სვანეთში ვარგისი მიწის მნიშვნელოვანი ნაწილი თავადაზნაურობას დარჩა, ცხადი გახდება გლეხთა მძიმე მდგომარეობა.

სვანეთში ცოტა იყო ისეთი გლეხური კომლი, რომელიც საკმაო სახნავი მიწით უზრუნველყოფილი იქნებოდა. ხშირ შემთხვევაში 6—8 სულისაგან შემდგარი გლეხური კომლი ერთ დესეტინა სახნავ მიწას ფლობდა, თუმცა, სვანეთში საძოვრები და სათიბად ვარგისი მთები დიდ ტერიტორიას მოიცავდა. გლეხი იძულებული იყო თავისი ოჯახის არსებობის შენარჩუნებისათვის შემოსავლის დამატებითი წყაროები ეძია.

მცირემიწიანობა და მეტადრე სახნავი მიწის სიმცირე გლეხობას აიძულებდა ყველაფერი ეღონა მიწათმოქმედების მაღალი კულტურისათვის. სვანეთში დიდი ხნის ისტორია ჰქონდა არა მარტო მიწის დასაკუთრებას, არამედ ინტენსიურ მი-

წათმოქმედებასაც. ეს კუთხე ცნობილია მრავალმინდვრიანი სისტემის არსებობით. მართალია, მცირემიწიანობის პირობებში მიწის დასვენებას ნაკლებად ეწეოდნენ, მაგრამ სამაგიეროდ თესლბრუნვის სისტემას გლეხები საუკეთესოდ იყენებდნენ დაუფლებულნი.

სხვადასხვა **ჯურის** მოგზაურები, სოფლის მეურნეობის სპეციალისტები და მკვლევარები თითქმის ერთხმად აღნიშნავენ XIX საუკუნის სვანეთში სახნავ-სათიბი მიწების მაღალხარისხოვანი დამუშავების ფაქტს. სვანეთში მიწათმოქმედების შედარებით მაღალგანვითარებულობაზე მიუთითებენ მოგზაურები ან მკვლევარები, რომლებიც თვითმპყრობელობის კოლონიზატორული პოლიტიკით ხელმძღვანელობდნენ და ხშირ შემთხვევაში განგებ ამცირებდნენ არარუს ხალხთა კულტურას, მაგალითად, შახოვსკი, ი. ივანიუკოვი, მ. კოვალევსკი, დ. დობროვოლსკი, ვ. ტეპცოვი, ე. კალვეიტი, ფ. სობოლი და სხვ.

შახოვსკის აზრით, სვანებს მიწათმოქმედების დიდი კულტურა ჰქონდათ და ამ მხრივ ყველა მეზობელ მთიელზე მაღლა იდგნენ. მისივე გადმოცემით, სვანეთში მიწათმოქმედებას მთავარი კულტურა ხორბალი იყო, რომელსაც გაზაფხულზე და შემოდგომაზე თესავდნენ¹.

ი. ივანიუკოვი და მ. კოვალევსკი წერდნენ: „როდესაც ენგურის მკვიდროდ დასახლებული ხეობით მიდიხარ, ხედავ შემოღობილ და საგულდაგულოდ მოვლილ მიწის მცირე ნაკვეთებს, გგონია, რომ მაღალი კულტურის მქონე ქვეყანაში იმყოფები²“.

თესლბრუნვის გონივრულ გამოყენებასთან ერთად, გლეხი საგულდაგულოდ უვლიდა თავის ყანას, წმენდდა ქვებსაგან, ანოყიერებდა სასუქით, აფხვიერებდა მიწას, ასუფთავებდა სარეველა მცენარეებისაგან და სხვა. ამის შედეგად მცირე მიწაზე შედარებით დიდი მოსავალი მოდიოდა.

სვანეთში მიწათმოქმედების კულტურებიდან მოჰყავდათ: ბური, ქერი, ჭვავი, შვრია, ცერცვი, ფეტვი, სიმინდი და სხვა.

1 АКАК, т. VIII, стр. 467; газ. «Кавказ», 1846, № 44.

2 Журн. «Вестник Европы», кн. 8-я, 1886, стр. 591—592.

სიმინდი, ლობიო და კარტოფილი სვანეთში XIX საუკუნის მეორე ნახევარში გავრცელდა. ეს კულტურები შედარებით ბარ ადგილებში ხარობდა, ხოლო კარტოფილი ყველგან. ამ კულტურების მოყვანას მაშინ შედარებით ნაკლები ყურადღება ექცეოდა.

6. კეცხოველის დაკვირვებით, სვანეთში განსაკუთრებული მნიშვნელობა ენიჭებოდა პურეულის კულტურას, აქ 15 სხვადასხვა ჯიშის პური მოჰყავდათ, მათ შორის შავი დიკაც, რომელიც საქართველოს სხვა კუთხეებში იშვიათი იყო, საქართველოს გარეთ თითქმის არსად მოიპოვებოდა¹.

სვანეთის მაღალმთიან სოფლებში ხანგრძლივი ზამთრის გამო ადრე გაზაფხულზე ზოგჯერ საჭირო ხდებოდა თოვლზე მიწის თხელი ფენის მიმობნევა („ლიდსევა“), რათა თოვლის დნობა დაჩქარებულიყო და ხვნა თავის დროზე დაწყებულიყო. ხვნა-თესვა ძირითადად გაზაფხულზე წარმოებდა, მაგრამ პურის ნაწილი („ხულუგ“ და სხვ.) შემოდგომაზეც ითესებოდა.

კოლოსალური შრომისა და მიწათმოქმედების მაღალი კულტურის წყალობით სვანეთში კარგი მოსავალი მიიღებოდა (ნ. ხ. ცხრილი 2)².

აღსანიშნავია, რომ ოფიციალური აღრიცხვის დროს მოსახლეობა ცდილობდა აღმწერთათვის რაც შეიძლება ნაკლები მოსავალი, თუ სხვა ქონება ეჩვენებინა. ამიტომ უნდა ვივარაუდოთ, რომ მოსავლიანობა შედარებით მაღალი იყო, ვიდრე ამას ცხრილ 2-ში მოტანილი მონაცემები გვიჩვენებენ. ცხრილში ნაჩვენებები ექვსჯერადი მოსავალიც სვანეთის პირობებისათვის მაღალი მაჩვენებელია (შესაბამის კულტურათა მოსავლიანობა, როგორც ეს იმდროინდელი აღწერებიდან ჩანს, ბარში ნაკლები იყო, ხოლო აღმოსავლეთ საქართველოს მთიანეთში — მხოლოდ სამჯერადი ან ოთხჯერადი)³.

არსებული მონაცემების მიხედვით, თითოეულ გლეხურ

¹ ნ. კეცხოველი, თოვლიან მთებში, თბილისი, 1943, გვ. 86.

² В. Я. Теплов, Сванетия, СМОМПК, вып. X, отд. I, Тифл., 1830, стр. 22.

³ საქართველოს ისტორიის ნარკვევები, V, თბილისი, 1972, გვ. 173.

თემი	თესლი ფუთობით					მოსავალი ფუთობით						
	ანეული	კვაკი	სავაზაფხუ- ლო პეუი	შერია	ქერი	სიმინდი	ანეული	კვაკი	სავაზაფხუ- ლო პეუი	შერია	ქერი	სიმინდი
უშგული	225	100	5	3	703	—	1500	380	30	20	3650	—
კალა	200	50	12	3	300	—	1320	150	40	10	2900	—
იჯარი	380	40	10	7	700	—	3500	30	70	30	5500	—
მელახი	400	150	10	6	700	—	4600	180	45	25	5800	—
მესტია	300	70	20	10	300	—	2620	210	70	30	3000	—
ლენჯერი	350	40	6	3	600	—	2900	160	25	15	3900	—
ლატალი	300	50	20	9	610	—	3000	200	65	35	6500	—
ბეჩო	400	50	30	23	700	—	3200	250	90	60	5600	—
ვეერი	300	600	10	2	400	—	2900	120	40	30	3500	—
ჟარი	400	120	42	25	600	—	4800	570	190	110	6650	—
ჩუბუხევი	400	80	30	20	503	40	4600	350	90	60	5200	460

კომლზე მიღებული მოსავალი უდრიდა შემდეგს (იხ. ცხრილი 3):

თემი	კომლთა რაოდენობა	სულადობა	მოსავალი ფუთობით		შენიშვნა
			კომლზე	სულზე	
უშგული	75	526	68,2	9,7	მოსავლის მცირე ნაწილს არყის გამოსახდელად და ღორებისთვისაც იყენებდნენ.
კალა	64	425	69,5	10	
მესტია	102	860	56,5	6,7	
ლატალი	122	934	78,3	9,6	
ჩუბუხევი	116	996	89,1	10,6	

როგორც ვხედავთ, თითოეულ სულზე საშუალოდ 10 ფუთი მარცვლეული მოდიოდა, თუ გავითვალისწინებთ იმას, რომ აქედან მცირე ნაწილს თესლისა და სხვა საჭიროებისათვის ხარჯავდნენ, ცხადია, გლეხურ კომლთა ნაწილს საკუთარი

1 В. Я. Тенцов, Сванетия, СМОМПК, вып. X, отд. I, стр. 24.

მოსავალი არ ყოფნიდა, რის გამო ისინი იძულებული ხდებოდნენ დანაკლისი მეზობელ კუთხეებში შექმნილი პურეულით შეეკოსათ.

სვანეთში მებოსტნეობასაც მისდევდნენ; მოჰყავდათ კომბოსტო, ჭარხალი, ნიორი, ხახვი, მკლაკვი, ქინძი, პიტნა. ოსრახუში, ბოლოკი და სხვ. მაგრამ მებოსტნეობას საერთოდ შეზღუდული მასშტაბით მისდევდნენ და ბოსტნეულის ნაცვლად სხვა მცენარეულობასაც (ჭინჭარი, ღვალო, მჟაუნა, დიყა) კრეფდნენ. ფართოდ იყო გავრცელებული აგრეთვე კანაფი, რომლის ბოქკოსაგან უხეშ ტილოს, თოკებს ამზადებდნენ. ხოლო ნაყოფს („გიმბაშს“) საკვებად, ზეთად და სხვა დანიშნულებისათვის იყენებდნენ.

სვანეთში ნაწილობრივ მებაღეობასაც მისდევდნენ. აქ ხარობდა ვაშლი, მსხალი, კაკალი, ქლიავი, წაბლი, ბალი, იშვიათად მალღარი ვენახიც. ზოგ ადგილებში საკმაოდ ბევრი გარეული ხილი მოიპოვებოდა, კერძოდ, მაყალო (წვრილი ვაშლი), პანტა მსხალი, ტყემალი, წაბლი, კაკალი, ბალამწარა, მოცხარი, მოცივი, შალშავი, ყოლო, კოწახური, ხენდრო, ასკილი და სხვ.

სვანეთში მეურნეობის მეორე მნიშვნელოვანი დარგი იყო მეცხოველეობა, რომელსაც დიდი ხნის ისტორია ჰქონდა და მოსახლეობის საქმიანობასთან მტკიცედ იყო შესისხლბორცებული.

მიუხედავად იმისა, რომ ერთი შეხედვით, ალპური საძოვრები მესაქონლეობისათვის კარგ პირობებს ქმნიდა, სინამდვილეში ხანგრძლივი ზამთარი (5—6 თვის ბაგური კვება), მოუხერხებელი გზები და, რაც მთავარია, საზამთრო საძოვრების არარსებობა სვანეთში, მესაქონლეობის ფართო განვითარების შესაძლებლობას არ იძლეოდა.

ცნობილი მონაცემებით, თითოეული კომლის სათიბი მიწა უდრიდა შემდეგს (იხ. ცხრილი 4)¹.

მონაცემებიდან ჩანს, რომ, მაგალითად, უშგულში, სვანეთის ყველაზე უფრო მაღალ ნაწილში, თითოეულ ოჯახზე საშუალოდ მხოლოდ 3,5 ჰექტარი მოდიოდა, საშავიეროდ, ამ

¹ В. Я. Тенцов, Сванегия, СМОМПК, вып. X, отд. I, стр. 41.

თემი	სათიბი ქცევებში	1-დან 5-მდე	5-დან 10-მდე	10-დან ზეით ¹	უმიწა- წყლო
უშგული	264	50	18	—	2
კალა	153	57	—	1	3
იფარი	282	102	10	2	4
მულახი	1132	19	33	48	6
მესტია	746	9	24	23	4
ლენჯერი	626	5	35	28	2
ლატალი	971	64	15	25	5
ბეჩო	194	76	5	1	2

თემის სოფლების მოსახლეობა და ზოგიერთ სხვა სოფლებშიც კერძო სათიბის ნაკლებობას ინაზღაურებდნენ საერთო-სასოფლო საძოვრებით, თუმცა საძოვრების სათიბად გამოყენება დიდ სიძნელეებთან იყო დაკავშირებული იმ მხრივაც, რომ ისინი შორს მდებარეობდნენ და სამარხილე გზა არ უკავშირდებოდა.

სვანეთში მესაქონლეობის განვითარების შემუშლულდელი გარემოებანი თავის დროზე კარგად შეუმჩნევია ზოგაერთ მკვლევარ-დამკვირვებელსაც. ი. ივანიუკოვის, მ. კოვალევსკის, ვ. ტუპცოვის, ე. კალვეიტის და სხვათა ცნობით, სვანეთში მესაქონლეობის განვითარების ერთ-ერთ დამაბრკოლებელ მიზეზად სათიბის სიმცირეა დასახელებული.

მესაქონლეობის, როგორც სვანეთის მეურნეობის უძველესი დარგის, მნიშვნელოვან როლზე და მისი ფართო განვითარების შემათერხებელ ბუნებრივ პირობებზე მიუთითებს მ. გეგეშიძე. მისი დაკვირვებით, სვანეთში მესაქონლეობის ფართო განვითარების შემზღულდველ მიზეზს ხანგრძლივი ზამთარი, მოუხერხებელი გზები და პირუტყვისათვის საზამთრო სადგომი ბინის აუცილებლობა წარმოადგენდა. მისივე აზრით, ყოველივე ეს სვანეთის მოსახლეობას ძველთაგანვე აიძულებ-

¹ როგორც ჩანს, ცხრილში მხოლოდ კერძო სათიბის ფართობია აღნუსხული, მაგრამ სათიბად ზოგჯერ საერთო-სასოფლო საძოვრებთანაც იყენებდნენ, ამიტომ უნდა ვივარაუდოთ, რომ ზოგიერთი შეძლებული ოჯახი გაცილებით მეტი სათიბით სარგებლობდა, ვიდრე ეს ცხრილშია აღნიშნული.

და პირუტყვის საკვებით უზრუნველყოფაზე განსაკუთრებული მზრუნველობა გამოეჩინა¹.

არსებული ბაზა სევანეთში მესაქონლეობის ფართო განვითარების შესაძლებლობას არ იძლეოდა. მართალია, ზოგიერთ სოფელს ფართო ალპური საძოვრები გააჩნდა, მაგრამ მისი გამოყენება მხოლოდ მცირე დროის განმავლობაში შეიძლებოდა, ე. ი. სათიბების ნაკლებობა, ხანგრძლივი ზამთარი, თბილი სადგომის აუცილებლობა და, რაც მთავარია, საზამთრო საძოვრების არარსებობა ხელს უშლიდა სევანეთში მესაქონლეობის ჭეროვნად განვითარებას.

XIX საუკუნის 80-იან წლებში სევანეთის ზოგიერთ თემში პირუტყვის რიცხვი უდრიდა შემდეგს (იხ. ცხრილი 5)²:

ცხრილი 5

თემი	კომლთა რაოდენობა	ცხენი	ჯორი და ვირი	ძროხა	ხარი	ცხვარი	თხა	ღორი
უშგული	73	38	2	123	162	242	44	128
კალა	64	31	—	116	152	121	109	123
აფარი	128	35	—	463	485	613	310	496
მელახი	107	69	6	428	470	849	452	527
მესტია	70	41	1	269	226	405	390	318
ლენჯერი	70	27	—	192	191	384	410	237
ლატალი	119	40	2	594	497	1064	1370	776
ბეზო	84	62	1	282	217	620	648	346
აფარი	79	29	15	314	237	620	648	346
ეცერი	171	78	9	457	420	675	610	639
ჩებხევი	115	28	55	432	412	150	1704	211
ს უ ლ	1160	478	91	3670	3519	5173	6348	4273

სევანეთის მთა-ბარის სოფლებში მესაქონლეობის ხვედრითი წონის თანათარღობის მხრივ მსგავს სურათს იძლევა ი. ივანიშვილისა და კოვალევსკის მონაცემებიც³.

შესაძლებელია, ეს მონაცემები სრულად ვერ ასახავდეს

¹ მ. გეგეშიძე, სარწყავი მიწათმოქმედება საქართველოში, თბილისი, 1961, გვ. 115.

² В. Я. Тенцов, СМОМПК, вып. X, отд. I, стр. 36.

³ И. Иванюков, М. Ковалевский, В Сванетии, журн. «Вестник Европы», кн. XXVI, вып. 9, Тифлис, кн. 8-ая, стр. 59.

მეცხოველეობის მასშტაბს (გადასახადების გაზრდის თავიდან ასაცილებლად მოსახლეობა ხშირად მალავდა პირუტყვის რაოდენობას), მაგრამ იგი, ერთი მხრივ, გლახთა სიღარიბეზე მეტყველებს, ხოლო, მეორე მხრივ, არ ადასტურებს მოსაზრებას, რომ სევანეთში და, კერძოდ, „მთამალალ სოფლებში“ მესაქონლეობა თითქოსდა თავისი მასშტაბით და მნიშვნელობით მეურნეობის დანარჩენ დარგებს სჭარბობდა. პირიქით, XIX საუკუნის სევანეთში ჩატარებული აღწერების მონაცემები ცხადყოფენ, რომ თუ მეცხოველეობის განვითარებაზე საერთოდ შეიძლება მსჯელობა, ეს, უპირველეს ყოვლისა, შეიძლება სევანეთის შედარებით დაბლობ სოფლებზე (მაგალითად, ჩუბეხევი და სხვ.). ყველაზე მაღალმთიან სოფლებში — უშგულში, კალასა და ჰადიშში, სადაც ყველაზე საუკეთესო და მეტი ალპური საძოვრები არსებობდა, მესაქონლეობა ბარის სოფლებთან შედარებით უფრო სუსტად იყო განვითარებული.

ეს გარემოება კარგად შეუნიშნავს ე. კალვეიტს, რომელიც XIX საუკუნის სევანეთის მეურნეობაზე დაკვირვების საფუძველზე წერდა: „მაშინ, როდესაც მეურნეობის ერთ-ერთი მთავარი დარგი -- მიწათმოქმედება — მიუხედავად არაბელსაყრელი კლიმატური პირობებისა, ძალზე ინტენსიურად წარმოებს და მაღალგანვითარებულია, მეურნეობის მნიშვნელოვანი დარგი — მეცხოველეობა — მიუხედავად ზოგიერთ სოფელში (თემში) მისი განვითარებისათვის ხელსაყრელი პირობებისა, მეტად სუსტადაა განვითარებული“¹.

როგორც ვხედავთ, ე. კალვეიტი პირდაპირ წერდა მიწათმოქმედების ინტენსიურ და წამყვან როლზე, მაგრამ მესაქონლეობის ჩამორჩენის მიზეზებში საკმაოდ ვერ გარკვეულა.

სევანეთის მაღალმთიან ზოლში მიწათმოქმედებასთან შედარებით მესაქონლეობის მეორეხარისხოვან მნიშვნელობას ადასტურებდნენ შახოვსკი, ნემიროვიჩი-დანჩენკო და სხვები. რომელთა მტკიცებით, მიუხედავად მკაცრი კლიმატისა და თოვლიანი ქედებით გარემოცულობისა, სევანეთში მიწათმოქმედება გაცილებით უკეთესადაა დაყენებული, ვიდრე მეზობელ მთიელთა რომელიმე მხარეში. ამასთანავე, მათივე აზრით,

¹ Э. М. Кальвейт, Очерки сельского хозяйства Верхней Сванетии, ЗКОИРТО, кн. XXVI, вып. 9, Тифлис, 1911, стр. 26—28.

ხანგრძლივი და ცივი ზამთარი სვანეთში მეცხოველეობის ფართო განვითარების შესაძლებლობას არ იძლეოდა¹.

ზოგიერთ თანამედროვე მკვლევარს სვანეთის „მთამალაღში“ მეურნეობის წამყვან დარგად მესაქონლეობა იმიტომ ესახება, რომ მეზობელ მხარეებში სვანები პირუტყვით ვაჭრობდნენო, ხოლო ხორბლეულს საკუთრივ ყიდულობდნენო. ასეთ ფაქტებს XIX საუკუნეში მართლაც ჰქონდა ადგილი, მაგრამ ეს გარემოება სრულებითაც არ გამოდგება სვანეთში მესაქონლეობისათვის პრიმატის მისაკუთვნებლად, რადგან, ჯერ ერთი, სვანები მსხვილფეხა რქოსან პირუტყვს თვითონაც ყიდულობდნენ ჩრდილო კავკასიაში (ჩვენამდე მოღწეული ცნობებით, სვანეთი მომთაბარე-მეჯოგეობას არ იცნობს). ისინი პირუტყვს ხშირად შრომის ნატურით საზღაურად ლებულობდნენ ხელსაყრელ პირობებში და გაცილებით ძვირად ყიდდნენ, ე. ი. სვანები ამ საქმეში საქართველოს ბარსა და ჩრდ. კავკასიას შორის უშუაველს როლს ასრულებდნენ. პირუტყვით ვაჭრობას ხელს უწყობდა მისი ერთი ადგილიდან მეორეზე გადაყვანის სიადვილეც.

სვანეთში მოსახლეობის არსებობის მთავარი საშუალება ხორბლეული იყო (რძის პროდუქტებით ძირითადად გაზაფხულ-ზაფხულში სარგებლობდნენ, ხორცეულით კი უფრო იშვიათად), ამიტომ, როცა ხორბლეული შემოაკლდებოდათ (უპირატესად სიმინდი), გარედანაც შეჰქონდათ, თუმცა შედარებით უმნიშვნელო რაოდენობით..

ამდენად, მართალია, სვანეთში ბუნებრივ-კლიმატურ-გეოგრაფიული პირობებით მიწათმოქმედებაც და მესაქონლეობაც იზღუდებოდა, მაგრამ მიწათმოქმედება მაინც მეურნეობის წამყვანი დარგი იყო. მიწათმოქმედების აუცილებელი კომპონენტი მესაქონლეობა იყო. მიწათმოქმედების წარმოება შეუძლებელი იყო არა მარტო გამწევი მუშა პირუტყვის გარეშე, არამედ ბუნებრივი სასუქის გარეშეც. სვანეთში მიწის სიმციროს გამო მისი დასვენება ფაქტიურად არ ხდებოდა. მემინდვრეობაში მოსავლიანობის ამაღლება მხოლოდ ბუნებრივი სასუქით და თესლბრუნვით ხერხდებოდა.

სპეციალისტების მტკიცებით, სვანეთში მიწათმოქმედება

¹ Газ. «К а в к а з», 1846, № 44.

ინტენსიურ ხასიათს ატარებდა არა მარტო XIX, არამედ წინა საუკუნეებშიც. მ. გეგეშიძის დაკვირვებით, მიუხედავად შეზღუდული პირობებისა, სვანეთში გემინდვრობა მაღალ დონეზე იდგა: „საუკუნეთა მანძილზე აქ ჩამოყალიბებულა ხალხური აგროტექნიკის ტრადიციები, რაც კონკრეტულ სამეურნეო-გეოგრაფიულ გარემოში ღრმა ცოდნასა და განვითარებას იმყარებოდა“¹.

სვანეთში სოფლის მეურნეობას ინტენსიურ ხასიათს ოდითგანვე ადასტურებს უკანასკნელ დრომდე შემორჩენილი სარწყავი სისტემის ნაშთები, რომლებიც თითქმის ყველა თემში გვხვდება.

გადმოცემით, ~~მეტი~~ ერთ-ერთი უძველესი აზნაურები გომთელიანები ფლობდნენ ცხაკვაზაგარის სათიბებს, რომელსაც სპეციალურად მოწყობილი სარწყავი არხი ჰქონდა. თითქოს სისტემატური რწყვის გამო ცხაკვაზაგარის მთის ნაწილი დაცურდა და მესტიის ერთ-ერთი სოფელი ლანჩვალ (ლანჩვალ — მეწყერი; ლანჩვალ — სამეწყერი) წალეკა და დაშრა.

სხვა გადმოცემებით, სვანეთის მეზატონე ყიფიანმა დადიანის მთიდან თავის სოფელ ჩიხარეშანდე (ლანჩვალის თემი) გაიყვანა სარწყავი არხი, რომელიც დღემდე „ყიფიანის არხის“ სახელს ატარებს. მსგავსი არხების ნაშთები სხვაგანაცაა შემორჩენილი.

სვანეთში საირიგაციო სისტემის განვითარებაზე და რწყვის ძველებურ ტრადიციებზე მეტყველებს ა. ლამბერტის ცნობებიც, რომლის მოწმობით სვანები სათიბებთან ერთად ყანებსაც რწყავდნენ. ლამბერტისავე გადმოცემით, სვანები, როგორც სარწყავი სისტემის სპეციალისტები, ცნობილი იყვნენ საქართველოს ბარშიც².

მიუხედავად მოუხერხებელი ტოპოგრაფიული მდებარეობისა, სვანეთში სათიბების დიდი ნაწილი საირიგაციო სისტემით ყოფილა დაქსელილი. აღსანიშნავია ისიც, რომ ვაკე ადგილებთან შედარებით ფერდობებში სარწყავი სისტემის მოწყობა დიდ ცოდნა-გამოცდილებასა და შრომას მოითხოვდა.

¹ მ. გეგეშიძე, სარწყავი მიწათმოქმედება საქართველოში, გვ. 114.

² არქან ქელო ლამბერტი, სამეგრელოს აღწერა, თბილისი, 1938, გვ. 167.

სვანეთში XIX საუკუნეშიც არსებობდა სარწყავი სისტემა, რომელზეც მიუთითებენ დ. დობროვოლსკი, ე. კალვეიტი და სხვები, რომელთა მსჯელობით, ეს სისტემა მაღალ დონეზე იდგა¹.

სარწყავი არხის სიგრძე ზოგან რამდენიმე კილომეტრს აღწევდა, სიგანე ერთ მეტრს, სიღრმე 50 სანტიმეტრს. რწყვას კარგად იყო დაუფლებული მოსახლეობა. იგი ანგარიშს უწყევდა მდინარის, ღელის თუ წყაროს სამეურნეო-ჰიდროგრაფიულ თვისებებს, რეჟიმს და სარწყავი სისტემის გამართვასაც ამ ცოდნა-გამოცდილებაზე ამყარებდა.

რწყვითა და ბუნებრივი სასუქის შეტანით ვანოყაერების შედეგად შესაძლებელი ხდებოდა მინდვრის ორჯერ მოთიბვა და ერთ დესეტინა მიწაზე საშუალოდ 250-300 ფუთი ძივის მიღება².

მეურნეობის ერთ-ერთი დამხმარე დარგი იყო მეფუტკრეობა, რომელსაც თითქმის მთელ სვანეთში მისდევდნენ. აქაური ფუტკარი მაღალნაყოფიერებით, ხოლო თაფლი საუკეთესო არომატითა და თვისებებით ხასიათდებოდა. თაფლი და ცვილი ყიდვა-გაყიდვის საგანსაც წარმოადგენდა, საკვების გარდა მას წამლების დასამზადებლადაც იყენებდნენ.

სვანეთში ნადირობასა და მეთევზეობასაც მისდევდნენ. ძნელად მისადგომ მთებში და ტყეებში სხვადასხვა ნადირი, განსაკუთრებით ჭიხვი, არჩვი, დათვი ბინადრობდა, მდინარეებსა და ხეობათა ნაკადულებში ბლომად იყო კალმახი.

ნადირობა ვაჟკაცურ და რაინდულ საქმედ ითვლებოდა. ის ფიზიკურ ამტანობასთან ერთად სიმარჯვეს მოითხოვდა. ამიტომ შემთხვევითი არ არის, რომ სვანეთში ნადირობასთან დაკავშირებით მრავალი ლეგენდა-თქმულება და სიმღერა შემონახული. უამრავი გადმოცემა არსებობს ნადირობის ქალღმერთ „დალისთან“ დაკავშირებითაც. თქმულებით, ის მონადირე, რომელიც დალის გულს მოინადირებდა, შინ მუდამ გამარჯვებული და დაჯილდოებული ბრუნდებოდა, ხოლო ვინც

¹ Д. В. Добровольский, Поездка в Сванетию, ЗКОСХ, Тифлис, 1868. стр. 166; Э. М. Кальвейт, Очерк сельского хозяйства Верхней Сванетии, ЗКОИРГО, Тифлис, 1911, стр. 27.

² Э. М. Кальвейт. Очерк сельского хозяйства Верхней Сванетии, ЗКОИРГО, кн. XXVI, вып. 9, Тифлис, 1911, стр. 27.

ნადირობის წმინდა საქმეს შეებღალავდა და ხარბად მოიქცეოდა (ერთდროულად მრავალ ჯიხვს, მით უფრო „თეთრ ჯიხვს“ მოკლავდა), კლდეების მსხვერპლი ხდებოდა.

სვანეთში მეურნეობის ერთ-ერთი დარგი იყო „ოჯახური მრეწველობა“, რომელიც საზოგადოდ კარჩაკეტილ, ვიწრო და თვითკმარ ხასიათს ატარებდა. მისი სახით გლეხი მეტწილად არა საცვლელ, არამედ სახმარ ღირებულებას ქმნიდა. საოჯახო მრეწველობის დარგებიდან მნიშვნელოვანი ადგილი ფეიქრობას ეკავა. სვანეთში ამზადდებდნენ უხეშ შალსა („ხაშკ“, „კული“ და სხვ.) და ტილოს, ქეჩას, ნაბადს, ქუდს; ქსოვდნენ წინდებს; კერავდნენ პაიჭებს, ჩოხა-ახალუხს, ზედა პერანგს, კაბას, საცვლებს და სხვ. ოჯახში მზადდებოდა ტყავ-ბეწვეული, რომლისგანაც ტანისამოსსა და ფეხსაცმელს კერავდნენ.

საოჯახო მრეწველობაში მნიშვნელოვანი ადგილი ხისაგან საოჯახო ავეჯ-ჭურჭლეულის დამზადებას ეკავა. დურგლები თავისთვის ან დამკვეთისთვის სახლის მთელ მოწყობილობას ამზადებდნენ, კერძოდ, სახლის სახურავის, ჭერისა და იატაკის მასალას, კარ-ფანჯრებს, ავეჯს, ხის ჭურჭლეულს და სხვ. დურგალ-ხელოსანთა ნახელავი მდიდრული ორნამენტულ-ჩუქურთმული მორთულობითა და სილამაზით გამოირჩეოდა. აქ საქმე გვაქვს მაღალპროფესიული ხელოსნური წარმოების არსებობასთანაც.

ტრადიციულ ხელოსნობას განეკუთვნებოდა კალატოზობაც. ხელოსნურად ნაშენი სამეურნეო, საფორტიფიკაციო, საეკლესიო და საკულტო ნაგებობანი არქიტექტურული მოკაზმულობით, მოხერხებულობითა და სიმტკიცით გამოირჩეოდა. კალატოზობის მაღალგანვითარებული ტრადიციით სვანეთს საქართველოს სხვა კუთხეებს შორის ერთ-ერთი პირველი ადგილი ეკავა.

სვანეთის მოსახლეობის საქმიანობაში გაცვლა-გამოცვლას და ვაჭრობასაც გარკვეული ადგილი ეჭირა. სპეციალისტთა მტკიცებით, ისტორიულ სვანეთს ფართო ეკონომიკური ურთიერთობა ჰქონდა არა მარტო ქვეყნის სხვადასხვა კუთხეებთან, არამედ ჩრდ. კავკასიისა და ზოგიერთ სხვა მახლობელ ქვეყნებთან, ფეოდალური დაქსაქსულობისა და კარჩაკეტილო-

ბის პირობებში ეს ურთიერთობა მაინც საგრძნობი იყო. მიუხედავად საქართველოს პოლიტიკური დაშლილობისა და მეზობელი კუთხეების განყერძობულობისა, სვანეთის მოსახლეობა დასავლეთ საქართველოს სხვადასხვა კუთხეში გამართული ბაზრობების მუდმივი მონაწილე იყო. სვანეთის მოსახლეობა ხანგრძლივად ჩაკეტილი არ ყოფილა, მას მეტ-ნაკლები ინტენსიური ურთიერთობა ჰქონდა საქართველოს ბართან, ასევე ჩრდ. კავკასიის სხვადასხვა ხალხებთან. ამ ურთიერთობის გაფართოებას სტიმული საქართველოს რუსეთთან შეერთებამ მისცა.

ოფიციალური ლიტერატურისა და დოკუმენტური წყაროების მონაცემებით, XIX საუკუნის მეორე ნახევარში სვანეთის მოსახლეობას ცაგერის, ონის, ლაილაშის, ლიას, სენაკისა და სხვა ბაზრობაზე გაქონდა შალეული და მისი ნაწარმი, ტყავ-ზეწვეული, ტყვია-წამალი, სხვადასხვა იარაღი, ჭურჭლეული, სამკაულები, თაფლი, ცვილი და სხვ. გასაყიდად გაჰყავდათ აგრეთვე მსხვილფეხა რქოსანი პირუტყვი, წვრილფეხა საქონელი, ცხენები, ჯორები და სხვ. სამაგიეროდ ყიდულობდნენ სურსათს (სიმინდს), ღვინოს, ხილეულს, ჭურჭლეულს, შალის, ბამბისა და ტყავის მზა ნაწარმს, რკინის სხვადასხვა სახის სამუშაო იარაღს და ინვენტარს.

ხელსაყრელი პირობების გამო სვანეთის მოსახლეობას მჭიდრო ეკონომიკური ურთიერთობა ჰქონდა მეზობელ ჩრდ. კავკასიის ხალხებთან: ყარაჩაი-ჩერქეზებთან, ყაბარდო-ბალყარელებთან, რომელთაგანაც იაფად იძენდნენ ჯიშიან მსხვილფეხა პირუტყვს. ეს ურთიერთობა ხორციელდებოდა კავკასიის ქედზე გამავალი მრავალი გადასასვლელით, რომელთაგან ყველაზე მოხერხებული იყო ნაკრის, ტეიბერისა და ბეჩოს უღელტეხილები. ვაჭრობა ფულით ან გაცვლა-გამოცვლით წარმოებდა. როგორც ზემოთაც აღვნიშნეთ, სვანეთის მოსახლეობა ჩრდ. კავკასიისა და საქართველოს ხალხთა შორის ეკონომიკურ ურთიერთობაში უშუამავლის როლს ასრულებდა.

მიუხედავად იმისა, რომ რუსეთთან შეერთების შემდეგ საქართველოში შედარებით სტაბილური ვითარება შეიქმნა და ქვეყნის სხვადასხვა კუთხის ეკონომიკური კავშირურთიერთობა გამოცოცხლდა, ცუდი სამიმოსვლო საშუალებების

პირობებში სევანეთის მოსახლეობის ეკონომიკური ურთიერთობა გარე სამყაროსთან დროის დასახულ ახალ მოთხოვნებს ვერ აკმაყოფილებდა.

სევანეთის მოსახლეობის არსებობის ერთ მნიშვნელოვან წყაროს გარე სამუშაოზე გასვლა და იქ ნაშოვნის სახსრები წარმოადგენდა. პირადი მეურნეობის სივიწროვე და უკმარისობა გლეხობას აიძულებდა მასობრივად გასულიყო გარე სამუშაოზე. გარე სამუშაოზე გასვლა განსაკუთრებით ფართო მასშტაბით XIX საუკუნის მეორე ნახევარში საგლეხო რეფორმის შემდეგ ხდება.

საქართველოს ბარის სხვადასხვა კუთხეში თუ ჩრდ. კავკასიაში გარე სამუშაოდ წასული გლეხები სხვადასხვა სამუშაოს ასრულებდნენ. აბრუნებდნენ მიწას, ტეხავდნენ ყამირს, გაპყავდათ თხრილები, სარწყავი არხები, გზები, თიბავდნენ და სხვ. ისინი გამოიყენებოდნენ აგრეთვე ტყის მჭრელებად, დურგლებად, კალატოზებად და სხვა სამუშაოს შესასრულებლად. სევანეთიდან გარე სამუშაოზე ძირითადად სეზონურად გადიოდნენ, უპირატესად ზამთარსა და შემოდგომაზე, დაახლოებით 6—3 თვით, შემდეგ კი თავის კერას უბრუნდებოდნენ.

ქვეყანაში კაპიტალისტური ურთიერთობის ჩასახვა-განვითარების პირობებში გარე სამუშაოზე გასვლის განმსაზღვრელი ფაქტორია ლენინური მითითება: „...გლეხების უმრავლესობას... სრულებით არ შეუძლია მეურნეობის გაფართოებით დაიკმაყოფილოს ფულის საჭიროება, რადგან არაერთი მარაგი არ მოეპოვება და არც წარმოების საშუალებები აქვს საკმაოდ. ასეთი გლეხი ფულის საშოვნელად „საშოვრებზე“ მიდის, ე. ი. ბაზარზე გააქვს უკვე არა თავისი პროდუქტი, არამედ თავისი სამუშაო ძალა. საშოვრებზე წასვლა, ბუნებრივია, იწვევს სამიწათმოქმედო მეურნეობის შემდგომ დაკემას და ეს გლეხი იმით ამთავრებს, რომ თავის მიწის ნაკვეთს იჯარით აძლევს თავისივე თემის მდიდარ წევრს, რომელიც აფართოებს თავის მეურნეობას და, გასაგებია, თვითონ კი არ მოიხმარს იჯარით აღებული მიწის ნაკვეთიდან მიღებულ პროდუქტს, არამედ ბ ა ზ ა რ ზ ე გზავნის მას. ხდება „ხალხის გაღარიბება“...¹.

¹ ვ. ი. ლენინი, თხზ., ტ. I, გვ. 132—133.

სვანეთის რუსეთთან შეერთება და სასოფლო-
სათემო მმართველობის შემოღება

1. რუსეთთან შეერთება

(პოლიტიკურად დაშლილი საქართველოს სხვადასხვა სამეფო-სამთავროები რუსეთს სხვადასხვა დროს შეუერთდა.

დასავლეთ საქართველოს რუსეთთან შეერთებისას სვანეთი დანაწევრებული იყო. ქვემო სვანეთი სამ მცირე ერთეულად იყოფოდა: 1) ლენტეხის თემი — დადიანებს ეკუთვნოდა, 2) ჩოლურის თემი — გარდაფხაძეებს, 3) ლაშხეთისა — გელოვანებს და აზნაურთა რამდენიმე ოჯახს; ზემო სვანეთის დასავლეთ ნაწილში მდებარე „დადიშქელიანთა სამთავრო“ ორ ერთეულად იყოფოდა: ჩუბეხევს დადიშქელიანთა უფროსი შტო განაგებდა, ხოლო ეცერ-ცხუმარ-ბეჩოს თემებს — დადიშქელიანთა უმცროსი შტო; ზემო სვანეთის აღმოსავლეთი ნაწილი ბალსზემო სვანეთად, ანუ ე. წ. „თავისუფალ სვანეთად“ იწოდებოდა და ერთიმეორისაგან დამოუკიდებელი თემებისა და სოფლებისაგან შედგებოდა, ზოგ თემსა თუ სოფელში აზნაურებიც ცხოვრობდნენ.

დასავლეთ საქართველოს სამეფო-სამთავროების რუსეთთან შეერთებისას იმპერიის მთავრობამ სვანეთის საკითხიც დასვა, რადგან მეფის მოხელენი სვანეთს მთელ დასავლეთ კავკასიის სტრატეგიულ პლაცდარმად მიიჩნევდნენ.)

კავკასიის ადგილმდებარეობის და ვითარების გაცნობამ მეფის სამხედრო სარდლობა დაარწმუნა, რომ დასავლეთ კავკასიაში პირველხარისხოვანი მნიშვნელობა ჰქონდა არა სვანეთს, არამედ ადიღეს, ჩერქეზეთს, აფხაზეთს, სამეგრელოსა

და გურია-აჭარას. ამ კუთხეების ხელში ჩაგდებას უნდა გადა-
ეწყვიტა შავ ზღვაზე, აგრეთვე სრუტეებზე გაბატონების
პრობლემა.

აღიღ-ჩერქეზეთის, ყაბარდოს, აფხაზეთ-სამეგრელოსა და
გურია-იმერეთის შეერთებით მეფის მთავრობა სვანეთის სა-
კითხსაც ფაქტიურად ავტომატურად ჰქრიდა, რადგან სამხედ-
რო მნიშვნელობის გზაჯვარედინების მიღმა დარჩენილი სვანე-
თი გარემოცული ეყოლებოდა. თავის დროზე სწორედ ეს გა-
ნაპირობებდა თვითმპყრობელობის ერთგვარ ინდიფერენტუ-
ლობას სვანეთის მიმართ.

(მეფის მთავრობამ სამეგრელოს სამთავროს შეერთებით
მოაგვარა ქვემო სვანეთის შეერთებაც. მართალია, ქვემო სვა-
ნეთის ნაწილი — ჩოლურისა და ლაშხეთის თემები დადიანს
არ ეკუთვნოდა, მაგრამ გარდაფხაძეებმა და გელოვანებმა XIX
საუკუნის დასაწყისში დადიანის უზენაესობა აღიარეს და ამი-
ტომაც თავის სამფლობელოთა რუსეთთან შეერთებას შე-
ეგუენ. თვითმპყრობელობამ დადიშქელიანებთან მოლაპარაკე-
ბით სცადა ზემო სვანეთის მშვიდობიანი გზით შეერთებაც.
მაგრამ ის XIX საუკუნის პირველ მეოთხედში უშედეგოდ
დამთავრდა. †

† თურქეთთან და მის მოკავშირეებთან ურთიერთობის გამ-
წვავებისა და საერთოდ კავკასიაში ვითარების დაძაბვის გამო
ცარიზმი თავს იკავებდა ზემო სვანეთის შესაერთებლად სამ-
ხედრო ძალის გამოყენებაზე. ზემოაღნიშნულის მიუხედავად,
სვანეთის შესაერთებლად მეცადინეობას (მთავარმართებელი
გენერალი (ერმოლოვი ჯერ კიდევ XIX საუკუნის 20-იან
წლებში შეუდგა. სვანეთთან უუამავლობა ერთხანს მან დადი-
ანებს დაავალა. მეფის ერთგულებაზე თავდადებული ლევან
დადიანი 1822 წელს კავკასიის მთავარმართებელს უმტკიცებ-
და, რომ მას შეეძლო დადიშქელიანთა სვანეთის ნაწილის
რუსეთის ქვეშევრდომობაში შეყვანა, მაგრამ მოწინააღმდეგე
დადიშქელიანების დასამორჩილებლად ჯარს თხოულობდა.
დაკისრებული მისიის შესასრულებლად დადიანები არაფერს
იშურებდნენ, მაგრამ მათი მეცადინეობა თავდაპირველად
უწყოფო გამოდგა. †

ირანთან და ოსმალეთთან ომებში გამარჯვებების წყალო-

ბით მეფის მთავრობა კავკასიის მთიანეთში უფრო გააქტიურდა. ჩრდილო-დასავლეთ კავკასიაში რამდენიმე სამხედრო ოპერაციის წარმატებით დაგვირგვინების შემდეგ სვანეთის საკითხმა წინა პლანზე წამოიწია.)

1831 წ. 7 იანვარს კავკასიის სამხედრო კორპუსის სარდალი, გენერალ-ფელდმარშალი პასკევიჩი ჩერნიშოვს აცნობებდა: სამეგრელოს მეზობლის — დღემდე დაუმორჩილებელი სვანეთის მოსახლეობამ რუსეთისადმი მორჩილება მოისურვაო და ამ საქმეში დადიანის დამსახურებას იწონებდა. დადიანმა, — წერდა პასკევიჩი, — ახლად დამორჩილებულ სვანებს რუსეთისადმი ერთგულების ფიცი დაადებინა და ჩემთან გამოგზავნა მათი დეპუტატები — თავადი შმაგი (იშმაგი) და დადარჩი (დადაში) ქურდიანები, ბესი იოსელიანი და სორთმან ჭაფარიძე. პასკევიჩი აღნიშნავდა, რომ სვანთა დეპუტატები გვარიანად დააჯილდოვა და უკან გაისტუმრა.

სვანეთის დაზვერვა და საჭირო ცნობების შეგროვება დაევალა იმერეთის მმართველს — გენერალ-მაიორ გესეს, რომელმაც საქმე გულდაგულ შეისწავლა და სვანეთის შეერთების გეგმაც შეიმუშავა. გესეს აზრით, სვანეთის დამორჩილება უნდა მომხდარიყო არა სამხედრო ძალით, არამედ იქაური მფლობელების მიმხრობით, თუნდაც მოსყიდვით და მომხიბლავი დაპირებებით¹.

ე. გაბლიანის განცხადებით, „საიდუმლო გეგმის“ შედგენის შემდეგ გესეს საქმეში ლევან დადიანი ჩაურევია. ამ უკანასკნელს დავალების შესასრულებლად დიდი მონდომება გამოუჩენია — დადიშქელიანებს დაახლოვებია. ამ მიზნით თავისი ძმა დავითი ჩუბუხევის მფლობელ ციოყის დაზე — დარეჯანზე (მოსოსტრის და დიგოხანის შვილი) დაუნიშნავს. ამასთანავე მღვდელმთავარი გიორგი გაუგზავნია ლატალის თემში. სადაც ასეთი შინაარსის წერილი გაუგზავნია: „ჩემგან პატივცემულნი ერთობით ლატალის მცხოვრებნი აზნაურნი და გლეხნი... მთავარი მინგრელიისა ლევან დადიანი სიყვარულითა და შესაფერისი პატივისცემით მოგიკითხავთ. მერმე ამისა, თქვენც კარგად იცით, რომ თქვენი მამა-პაპა ყოველ-

¹ ე. გაბლიანი, თავისუფალი სვანეთი, გვ. 31.

თვის ჩემი მამა-პაპის ერთგული ყოფილა და თქვენ ჩემი ოჯახის ერთგული ხართ და ამისთვის ჩვენ ვყოფილვართ თქვენი პატივისმცემელი და მწყალობელი და ეხლა უფრო მსურს თქვენი წყალობა და ბედნიერება. დამიჯერეთ, მე თქვენ სამჯობინო საქმეს გირჩევთ, რომლისთვისაც წარმოვგზავნე თქვენთან ჩემი გამზრდელი და მოძღვარი, ჰყონდიდელ-ცაიშელ-ცაგარელი გიორგი, რომელიც ჩემს თქვენთან დაბარებულს ყოველსავე გეტყვით და თუ თქვენი თავის ბედნიერება გინდათ ანუ ჩვენგან პატივისცემა, რაც მან გითხრათ, ყოველივე გაუგონეთ. სარწმუნო იყავით იმაზე, რომ, რაც თქვენთვის არ ივარგებს, ისეთს არას გეტყვით“¹. ჩანს, ამ მისიას დადებითი შედეგი არ მოჰყვა.

(სამეგრელოს, ლეჩხუმისა და რაჭის მფლობელთა რჩევით, მეფის მთავრობამ სცადა დადიშქელიანებთან ერთად კავშირი დაემყარებინა სვანეთის აზნაურებთანაც. ამ მიზნით 1830 წელს ლევან დადიანმა ბერ გელოვანისა და პორუჩიკ წერეთლის მეშვეობით გრაფ პასკევიჩს ერთგულების ფიცის მისაცემად წარუდგინა 49 აზნაური² მათ შორის: თათარყან, ბიტი, ციოყ, კირილე, სუმაი, დავით, გელასხან, ბესი, ოტი, სოზარ, ილყან, დღემბურგ და მახამეთ იოსელიანები; დავით, როსტომ და სვინჩი დევდარიანები; ჯანსულ, ქურდაან, იშმაგ, გელა, სულმან და სოზარ ქურდიანები; თათარყან, ომანაი, ჯანსულ და ჟლენტ ჯაფარიძეები; ახმათ, ყანლუთ, ბესი და რამაზ გომთელიანები; ნოშრევან, რამაზ ყიფიანები; ზესი და ორბინე ჩარკვიანები; ჟორჟოლან, ოთარ, ციოყ, გელა, თათარყან და ელუმთიან ჟორჟოლიანები³. მიუხედავად მოლაპარაკებისა, მეფის მთავრობამ ბალსზემო სვანეთის შეერთება იმთავითვე ვერ მოაგვარა, რადგან გლახობა აზნაურთა სურვილს არ გაჰყოლია.

სამთავროს მესვეური დადიშქელიანები რწმუნდებოდნენ, რომ რუსეთთან შეერთების უამი ახლოვდებოდა, თათარყან დადიშქელიანი, რომელიც აკაკობით განირჩეოდა⁴, იმერე-

¹ AKAK, т. XI, стр. 948.

² ე. გაბლიანი, ძველი და ახალი სვანეთი, თბილისი, 1925, გვ. 73.

³ თათარყანი (ნიკოლოზად წოდებული) და მისი ძმები — თენგიზი, ჯანსული, გელა, ლევანი და ისლამი მამის — ბაბა ციოყის გარდაცვალებული.

თის მმართველ ვაველსკის დაუახლოვდა და განუცხადა: „თუ მე მცნობთ დადიშქელიანთა ერთადერთ მეთაურად, მზად ვარ რუსეთის ქვეშევრდომობა მივიღოვო“¹.)

მეფის მოხელეებს სვანეთის საქმის მოგვარების დიდი სურვილი ჰქონდათ, მაგრამ დარწმუნებული იყვნენ, რომ დადიშქელიანთა შორის პირველობისათვის ბრძოლა ასე მარტივად არ გადაწყდებოდა, ამიტომ თათარყანს უარი ეთქვა დადიშქელიანთა ერთადერთ მეთაურად აღიარებაზე. ამ გარემოებაში, ცხადია, თათარყანი გაანაწყენა და მისი შესვლა რუსეთის ქვეშევრდომობაში დროებით გადადო.

სვანეთის საქმის მოგვარებას ერთხანს ყაბარდოში განლაგებული ჯარის სარდალი — გენერალი გორიხვოსტოვიც შეეცადა. მან 1832 წელს მიიხმო დიგორხან გარდაფხაძე, რომელიც გარდაცვლილი მოსოსტრ დადიშქელიანის ქვრივი იყო და ჩუბუხევის სათავადო სახლს განაგებდა. მიუხედავად იმისა, რომ სახლის მემკვიდრე (თავისი ვაჟიშვილი) ციოცი თან არ ახლდა, დიგორხანმა გენერალს მაინც დაუდო პირობა რუსეთის ქვეშევრდომობაში შესვლაზე.)

დიგორხანის მოქმედებაზე ეცერ-ცხუმარ-ბეჩო-ლეჩყანის (მეორე სათავადო სახლის) მეთაური თათარყან დადიშქელიანი შურისძიებით აღივსო, მაგრამ სხვა რომ ვერაფერი იღონა, კვლავ იმერეთის მმართველ ვაველსკის მიუბრუნდა და წერილობით აცნობა, რომ მზად იყო რუსეთის ქვეშევრდომობის მიღებაზე, ოღონდ განზრახვის აღსრულებას — სამთავროს უფროსობასაც მოითხოვდა.

(როგორც ვხედავთ, დადიშქელიანთა მოქმედება (რუსეთის ქვეშევრდომობის მიღებაზე თანხმობას რომ აცხადებდნენ),

ბის (1812 წ.) შემდეგ ერთხანს შეხმატკბილებულად ცხოვრობდნენ, მაგრამ პირველობისათვის ბრძოლაში ისინი ჯერ თავიანთ მოძმე სხვა დადიშქელიანებს გადაეკიდნენ, ხოლო შემდეგ ერთიმეორესაც. ძმებს შორის ჩამოვარდნილი მტრობის შედეგად საფუძველი ჩაეყარა სამთავროს ორად გაყოფასაც. თათარყანმა, რომელიც ბაბა ციოციის ყველაზე უმცროსი ვაჟიშვილი იყო, ჯერ თავისი ბიძაშვილები დახოცა და შემდეგ ბიძაშვილის — ჯამბულათის ორი მცირეწლოვანი ვაჟიშვილი. მან არც ამის შემდეგ აიღო ხელი თანამოძმეებთან ბრძოლაზე და მრავალი ავი საქმე ჩაიდინა.

¹ საქ. სსრ ცსსა, გმფ. ანაწ. 1, ს. 7, ფურც. 70.

ერთი მხრივ, რეალური ვითარების შეგნებით იყო ნაკარნახევი, ხოლო, მეორე მხრივ, მთელ სამთავროში გაბატონების წადილით.)

(რაკი დადიშქელიანებს უკვე შეგნებული ჰქონდათ რუსეთთან შეერთების გარდუვალობა, მათი მესვეურები ერთიმეორეს ეჭიბრებოდნენ საქმის მოწესრიგებაში. ამ მიზნით დიგორხანი თბილისში ჩამოვიდა და ოფიციალურად შეხვდა როზენს. ამ უკანასკნელმა სპეციალური საბუთი შეადგინა, რომელშიც მეფის სახელით დიგორხანის ვაჟიშვილს ციოყს ჩუბუხევის უფროსობის და უშიშროების გარანტია მისცა.

(სათანადო პირობების მომზადების შემდეგ, 1833 წლის აპრილ-მაისში გაფორმდა სადადიშქელიანო სვანეთის შესვლა რუსეთის ქვეშევრდომობაში. მეფის მთავრობამ არ სცნო თათარყანის პრეტენზიები (თვითონ ყოფილიყო დადიშქელიანთა ერთადერთი მთავარი) და ოფიციალურად გააფორმა დადიშქელიანთა სამთავროს ორ დამოუკიდებელ სახლად აღიარება. ციოყი ცნობილ იქნა ჩუბუხევის, ხოლო თათარყანი — ეცერცხუმარ-ბეჩოს მფლობელად. ამასთანავე, მეფის მოხელეთა მონაწილეობით შედგა და დამტკიცდა ციოყის (მიხეილად იწოდა) და თათარყანის (ნიკოლოზი ეწოდა) „სათხოვარი პუნქტები“¹.

დასახელებულ „სათხოვარ პუნქტებში“ განსაზღვრული იყო თითოეული მფლობელის, აგრეთვე რუსეთის უფლებავალდებულება და სამფლობელოთა საზღვრები.

1833 წლის 9 დეკემბერს „უმალლესად“ დამტკიცებული „სათხოვარი პუნქტების“ შესაბამისად ციოყი და თათარყანი „სვანეთის მფლობელებად“ იწოდებოდნენ (მთავრების უფლებებით). თითოეულ მათგანს მაიორის ჩინი და ხელისუფლების ნიშნები ებოძა.

დადიშქელიანები რუსეთის ქვეშევრდომობის მიღების შემდეგაც ცდილობდნენ თავის შეხედულებებისამებრ განეგოთ საქმეები. ორივე მფლობელი ურთიერთმეტოქეობას განაგრძობდა და მთელი სვანეთის ხელში ჩაგდებას ლამობდა. ამასთანავე ისინი მეფის მოხელეების მითითებებს ყურად არ

¹ ЦГИАЛ, ф. 1286, оп. 9, д. 64, лл. 28—31.

იღებდნენ. სვანეთის საქმეების მოსაგვარებლად 1834 წელს იქ ჩავიდა დელეგაცია, რომელშიც გენერალური შტაბის ოფიცერი შახოვსკი, ვამეყ დადიანი, გიორგი აფაქიძე და მღვდელი დავით ქობულაძე შედიოდნენ. შახოვსკის მისიის მიზანს დადიშქელიანთა შინაური საქმეების მოწესრიგებასთან ერთად, სვანეთის, სამეგრელოს, წებელდის, ყარაჩაის და ბალყარეთის მფლობელების ურთიერთობის მოწესრიგება, აგრეთვე ე. წ. თავისუფალი სვანეთის დაზვერვა შეადგენდა.

დადიშქელიანთა საქმის ერთგვარად მოწესრიგების შემდეგ შახოვსკიმ საიდუმლო მოლაპარაკება გააბა აზნაურებთან და სცადა თავისუფალ სვანეთში წასულიყო, მაგრამ მოსახლეობისაგან სასტიკი უარი მიიღო. ასეთ პირობებში მან სვანეთი დატოვა და უსგვირის ქედით ლეჩხუმში ჩავიდა.

სვანეთის მფლობელები ციოცი და თათარყანი ერთიმეორეს ეჭიბრებოდნენ ბალსზემო სვანეთის რუსეთისადმი დაქვემდებარებაზე. ამ მიზნით ისინი მეზობელ მოსახლეობას ერთიმეორის წინააღმდეგ განაწყობდნენ.

ადგილობრივი აზნაურების თავგამოდებულ მეცადინეობას რუსეთის სასარგებლოდ გლენობა ეჭვის თვალთ უყურებდა: ვაითუ რუსეთთან შეერთებას დადიშქელიანების გაბატონება, ან აზნაურთა დაკარგული უფლებების აღდგენა მოყვესო. ამის გამო 1834 წლის აგვისტოში რუსეთთან შეერთების საქადაგებლად გაგზავნილ კომისიას სვანეთის გლენობამ სროლა აუტეხა, რომლის დროს დიგორხანის და (გარდაფხაძე) მოკვდა. დანარჩენებმა კი თავს გაქცევით უშველეს¹.

გორდში (ლევან დადიანთან ყოფნისას) შახოვსკიმ მოახერხა მიეწვია თავისუფალი სვანეთის ხუთი აზნაური: იშმაგი და მურზა ქურდიანები, სორთმან ჯაფარიძე, ბესი იოსელიანი და მურზა ყორჯოლიანი (მღვდელი)². აღნიშნულმა პირებმა შახოვსკის აღუთქვეს რუსეთის ქვეშევრდომობაში კალის, იფარის, მულახის, მუჟალისა და მესტიის მოსახლეობის შეყვანა.

ლევან დადიანის რჩევით „სვანეთის დელეგაცია“ შახოვს-

¹ ე. გაბლიანი, თავისუფალი სვანეთი, გვ. 32—34.

² იქვე, გვ. 34—36.

კისტან ერთად თბილისში ეწვია ბარონ როზენს, რომელმაც სპეციალური აქტით „დაუპყრობელი სვანეთი“ რუსეთის ქვეშევრდომობაში შესულად გამოაცხადა.

როგორც ე. გაბლიანი წერდა და მოვლენების შემდგომმა განვითარებამაც ცხადყო, მეფის მოხელეებთან გამოცხადებული აზნაურები უფრო საკუთარი ინტერესებითა და სურვილით მოქმედებდნენ, ვიდრე სვანეთის სახელით და სასარგებლოდ. ამიტომ მათ მისიას არავითარი რეალური შედეგი არ მოჰყვა.

სვანეთის ვითარებისა და მდებარეობის შესწავლის შემდეგ შახოვსკიმ როზენის სახელზე შეადგინა ვრცელი პატაკი, რომელშიაც სვანეთის მნიშვნელობა შეაფასა და იქაური ხალხი დაახასიათა, როგორც არაჩვეულებრივად გაბედული, უხეში და ცრუმორწმუნე¹.

(შახოვსკიმ სვანეთის დამორჩილების გეგმა შეიმუშავა. მისი იდეით სადადიშქელიანო სვანეთში წესრიგის დაცვის მიზნით სამხედრო ასეული უნდა დაბანაკებულიყო, თავისუფალი სვანეთის თემები ცალ-ცალკე დაქუცმაცებულიყო, მათ შორის ლატალისა და ლენჯერის თემები კი რუსეთისადმი ერთგულ დადიანებს გადასცემოდა. ამ გეგმაში, მართალია, შახოვსკი სვანებისადმი ფრთხილი მოპყრობის მომხრე იყო, მაგრამ საჭიროების შემთხვევაში იარაღის გამოყენებას და ნოწინააღმდეგის სასტიკ დასჯას მოითხოვდა².)

თავის მოხსენებაში შახოვსკი აზნაურთა მნიშვნელოვან გავლენაზე მიუთითებდა და მიაჩნდა, რომ რუსეთთან შეერთების შემდეგ თავისუფალ სვანეთში მმართველებად დანიშნულიყვნენ ისეთი პირები, რომლებიც დიდი გავლენით სარგებლობდნენ და ბევრი ნათესავი ჰყავდათ.

(თავისუფალი სვანეთის აზნაურები XIX საუკუნის 40-იან წლებშიც აქტივობას იჩენდნენ რუსეთის ქვეშევრდომობაში შესასვლელად. ისინი სათანადო საჩუქრებსაც იღებდნენ, მაგრამ საქმე მაინც მოუგვარებელი რჩებოდა.)

კავკასიის ომის გამწვავებითა და შამილის მეთაურობით მაჰმადიან მთიელთა მიერ მოპოვებული წარმატებებით დამ-

¹ АКАК, т. VIII, стр. 466.

² იქვე, გვ. 467.

ფრთხალი მეფის მოხელეები სვანეთში კვლავ ფრთხილად მოქმედებდნენ. ისინი სვანების მშვიდობიანად გადმობირებას ცდილობდნენ. თავისუფალი სვანეთის რამდენიმე აზნაურმა და გლეხმა 1843 წელს კვლავ გამართა მეფის მთავრობის წარმომადგენლებთან მოლაპარაკება. სვანეთის წარმომადგენლებმა მეფის მოხელეებს რუსეთის ქვეშევრდომობის მიღება აღუთქვეს, სამაგიეროდ კარგი საჩუქრები მიიღეს. მაგრამ როდესაც საკითხი წყდებოდა, მოსახლეობის ნაწილმა ისევ უარი განაცხადა რუსეთის მფარველობაში შესვლაზე. სვანების გადაბირებას მთავრობის მიერ შეჩენილი სამღვდელოებაც ამოდ ცდილობდა.

სვანების ასეთ მოქმედებას მეფის მოხელეები დიდად შეუშფოთებია და ურჩთა დასჯა განუზრახავთ, მაგრამ ჩრდილოეთ კავკასიაში გაჩაღებული ომი ამის საშუალებას არ იძლეოდა. როგორც ჩანს, მთავრობის წარმომადგენელთა აქტიურობას ხალხი უფრო დაუფრთხია და ზემო სვანეთის მისადგომი გზები შეუქრავს. ამის საპასუხოდ კავკასიის ადმინისტრაციამ რაჭა-ლეჩხუმის, იმერეთისა და სამეგრელოს ხელისუფლები და მფლობელები გააფრთხილა, რომ თავიანთ ტერიტორიაზე არ გაეტარებინათ თავისუფალი სვანეთის არც ერთი მცხოვრები, რომელთაც ბარში გარესამუშაოდ წასვლაც აეკრძალათ.

მეფის მოხელეები კარგად იყვნენ ინფორმირებული, რომ სვანეთის მოსახლეობას დამოუკიდებელი ცხოვრება უჭირდა, რომ მათი შემოსავლის მნიშვნელოვან წყაროს გარე სამუშაო შეადგენდა. ბართან ურთიერთობის აკრძალვა კი ურჩად წოდებული სვანების განსაცდელში ჩაგდებას მოასწავებდა. მეფის მოხელეები ვარაუდობდნენ, რომ ასეთ იზოლაციას სვანები ვერ გაუძლებდნენ და დაემორჩილებოდნენ, მაგრამ საქმის საბოლოო მოგვარებას ვერც ამან უშველა.

ამ საქმის გადაჭრას განსაკუთრებული ენერგიით შეუდგა მეფისნაცვალი ვორონცოვი, რამელმაც სვანებთან მოლაპარაკება თავის ადიუტანტს ლობანოვ-როსტოვსკის დაავალა. ამ უკანასკნელმა რამდენიმე პირის თანხლებით შემოიარა სვანეთი და მისიის შესრულებაში გარკვეული წარმატებაც მოიპოვა.

ამის შემდეგ, ვორონცოვის განკარგულებით, (1847 წლის ივნისში სვანეთში იგზავნება ექსპედიცია ქუთაისის ვიცე-გუბერნატორის კოლუბაჟინის მეთაურობით. ვიცე-გუბერნატორმა თავისუფალი სვანეთის მოსახლეობას მთავრობის სახელით აღუთქვა მშვიდობიანი ცხოვრებისა და თავისუფლების უზრუნველყოფა, გადასახადების დაუწესებლობა, ადგილობრივი ადათ-წესების დაცვა, თვითმმართველობის შემოღება, სასწავლებლების დაარსება, გზების გაყვანა, ეკონომიკური დახმარება და სხვ.)

(მეფის მოხელეთა სისტემატურმა ზემოქმედებამ და უხვმა დაპირებებმა თავისი გაიტანა, გარდა მესტიის, ლენჯერისა და ლატალის თემებისა, ყველა თემი რუსეთის ქვეშევრდომობაში შესვლას დაეთანხმა. ამით გახარებული ვიცე-გუბერნატორის ამაღლა უკან დაბრუნდა.)

(მალე რუსეთის ქვეშევრდომობა მესტიის თემმაც მიიღო. თავისუფალი სვანეთის შეერთებას იმპერატორიც დიდი მოწონებით შეხვდა.)

ყოველივე ამის შემდეგ მეფისნაცვლის განკარგულებით გამოქვეყნდა სპეციალური ცნობა, რომელიც ახლად შეერთებული სვანეთისათვის გარკვეულ შეღავათებს აწესებდა და იმ მმართველობის მოსაგვარებლად „მულახ-იფარის“ საბოქაულოს დაარსებას აკანონებდა. სვანეთის ბოქაულად დაინიშნა თავადი (პორუჩიკი) ალექსანდრე მიქელაძე, რომელსაც თანაშემწის, თარჯიმნის, მწერლისა და ორი დამტარებლის წლიურ ხელფასად 1260 მანეთი გამოუყო. სვანეთის ბოქაული უშუალოდ რაჭის მაზრის უფროსს დაექვემდებარა.

(რუსეთთან შეერთების შემდეგ მაზრისა და საბოქაულოს მოხელეებმა ხალხს ვერაფერი სარგებელი ვერ მოუტანეს. ისინი მოსახლეობის ძარცვას შეუდგნენ არაერთარ ანგარიშს არ უწევდნენ ადგილობრივ ადათ-წესებს, ამასთანავე ათასნაირ ჭორებს ავრცელებდნენ სვანთა ურწმუნოებაზე (ქრისტიანული მრწამსის დაკარგვაზე). სინამდვილეში თვითონ მიჰყვეს ხელი საუკუნის მანძილზე სათუთად დაცულ ეკლესია-მონასტრების ქონების დატაცებასაც.

(ყველაფერმა ამან ხალხის აჯანყება და მეფის მოხელეთა

სვანეთიდან გაძევება გამოიწვია. კავკასიის ადმინისტრაცია იძულებული გახდა სვანეთის საბოქაულო გაეუქმებინა!.)

მეფის მთავრობა არც დადიშქელიანებს ეპუებოდა, მით უფრო, რომ დაპირისპირებული დადიანების, აგრეთვე მეზობელი ჩრდილო კავკასიის ზოგიერთი მფლობელის საამებლად მეფის მოხელეები დადიშქელიანებს ხშირად ავიწროებდნენ. ამიტომ ეს უკანასკნელნი მეფის მთავრობის განკარგულებებს ყურად არ იღებდნენ*.

განუწყვეტელი პროტესტისა და შეხლა-შემოხლის მიუხედავად, დადიშქელიანთა სამართლიან მოთხოვნას მთავრობა შხარს არ უქერდა, რადგან საქმე უპირატესად დადიანებს ეხებოდა, რომლებიც მეფის მთავრობის მიმართ ერთგულების გამო განსაკუთრებული პატივისცემით სარგებლობდნენ.

მეფის მოხელეები ამაოდ შიშობდნენ, რომ ჩრდილო კავკასიაში გაჩაღებულ საღვთო ომში სვანებიც ჩაებმებოდნენ. შემდეგში კავკასიის ადმინისტრაციამ ამბოხებულ ჩრდილო-კავკასიელ მთიელებთან ომში დადიშქელიანთა ჩაბმაც განიზრახა.

ჩერნიშოვისადმი მიმართვიდან ჩანს, რომ მთავრობაზე განაწყენებულმა თათარყანმა დავალება არ შეასრულა, ხოლო ჩუბუხევის მფლობელმა ციოყმა თავისი უფროსი ვაჟიშვილი შურზაყანი (კონსტანტინე) და რაზმი წაიყვანა უბიხების წინააღმდეგ საბრძოლველად, სადაც დაიღუპა.

ციოყის გარდაცვალების შემდეგ დადიშქელიანთა ურთიერთობა კიდევ უფრო აირია. თათარყანმა გადაწყვიტა შექმნილი მომენტით ესარგებლა და ჩუბუხევიც ხელში ჩაეგდო. მან ჯერ ციოყის ცოლ-შვილის შეურვეობა მოითხოვა, მაგრამ ეშშაკობით რომ ვერაფერი გააწყო, ჩუბუხევის მფლობელთა

¹ АКАК, т. XI, стр. 941; ე. გაბლიანი, თავისუფალი სვანეთი, გვ. 40.

* სხვათა შორის, შახოვსკის მისიის შემდეგ დადიშქელიანებს ჩამოერთვა კავკასიის ქედს იქით ყარაჩაიში და ბაქსანის ხეობაში კუთვნილი მამულები, აგრეთვე სამეგრელოს მხრიდან მდ. ეცსა და ცხვიშზაგარს შორის მდებარე ტერიტორია და სხვა საბალახო ადგილები. ამის თაობაზე 1835 წელს დიგორჩანმა და სხვა დადიშქელიანებმა ვრცელი საჩივრები შეადგინეს, მაგრამ ვერაფერს გახდნენ (ЦГВИА, ВУА ед. хр. 18505, л. 14; ე. გაბლიანი, დასახელებული შრომა, გვ. 49—53).

სასახლეს თავს დაესხა. ციოყის ცოლ-შვილი ადგილზე არ აღმოჩნდა, სამაგიეროდ, თათარყანის რაზმმა სასახლის ჩვიდ-მეტი მცველი დახოცა, შემდეგ კი იქაურობა ცეცხლს მისცა, რამაც მოხუცებული დიგორხანიც შეიწირა. თათარყანი არც ამით დაკმაყოფილდა და ციოყის ქალიშვილი მძევლად წაიყვანა¹.

კონსტანტინე და მისი ძმები ჯერ სამეგრელოში აფარებდნენ თავს, შემდეგ უკან დაბრუნდნენ და მამული დაიბრუნეს.

ამგვარი შფოთვისა და ორგულობის გამო მეფის მთავრობამ კიდევ უფრო შეკვეცა დადიშქელიანთა სათაეადო სახლების უფლებამოსილება. კავკასიის ჯარების მთავარსარდალმა ნეიდ-გარდტმა დადიშქელიანთა მეთაურების ძველი სატიტულო ნიშნები მოასპობინა, ამის შემდეგ ისინი მხოლოდ „სვან მფლობელებად“, „სიატელნი“-დ იწოდებოდნენ. თანამოძმეებისადმი მიყენებული უდიდესი ბოროტმოქმედებისათვის თათარყანი არავის დაუსჯია. მეფის მოხელეებმა ისღა მოახერხეს, რომ პროტორე ქუთათელაძის მეშვეობით მოსისხლე დადიშქელიანები შეარიგა. მიუხედავად ამისა, აღნიშნულ სათაეადო სახლებს შორის ფარული მტრობა ისევ გრძელდებოდა. ეს მტრობა ვერ აღმოფხვრა ვერც წერილობითმა პირობამ და ვერც ადათ-წესით შერიგებამ².

(ზემო სვანეთის „ურჩი მოსახლეობისადმი“ მთავრობის წაყრუება დროებითი გამოდგა. მეფის მოხელეებმა კვლავ ნაცად ხერხს მიმართეს, ისინი სვანეთს ხან ეკონომიკურ იზოლაციაში აქცევდნენ, ხან სამხედრო ლაშქრობით ემუქრებოდნენ და ხანაც მოთვინიერებას ცდილობდნენ. მეფის მოხელეები განზრახ ირწმუნებოდნენ, რომ თითქოსდა სვანეთში ქრისტიანობა გაქრობის გზაზე იდგა. ასეთი ვერსია ცალკეულ მოხელეთა ცრუ ცნობებზე იყო დაფუძნებული.) სხვა შემთხვევაში, როდესაც ეს ხელს აძლევდათ, მეფის მოხელეები სვანებს ღვთის მორწმუნე ფანატიკოსებად ხატავდნენ და აღნიშნავდნენ, რომ ისი-

¹ ЦГИА.Т, ф. 1268, оп. 9, д. 64, л. 26.

² აწ გარდაცვლილი თათარყანის შვილებმა ჩანსულმა და ოთარმა კონსტანტინესა და მის ძმებს 1851 წელს შერიგებისას 24 ყმა და დიდძალი ქონება გადაუხადეს.

ნი ქრისტიანულ ეკლესიებს და მის ფასეულობას საკუთარ სახლებზე უფრო იცავენო!.

რაკი მულახ-იფარის საბოქაულო რაჭის მაზრაზე იყო მიწერილი, სვანეთის საქმის მოგვარება ახლა წერეთლებმა იკისრეს. მათ მღვდელ ს. გავაშელიშვილის მეშვეობით რაჭაში მიიპატიჟეს მულახისა და იფარის აზნაურები: დადაში და სორთმან ქურდიანები, გელა იოსელიანი, სიმონ დევდარიანი, ნოშრევან ყიფიანი და ყასბულათ შერვაშიძე. გრიგოლ წერეთელმა ეს პირები სვანეთის დელეგაციად მონათლა და 1852 წელს მეფისნაცვალს მიჰგვარა ბორჯომში. ამ უკანასკნელმა სვანეთის წარმომადგენლები დაასაჩუქრა და უკან გაისტუმრა იმ პირობით, რომ მეფის მთავრობის სასარგებლო მუშაობა გაეწიათ ადგილზე.

სვანეთში დაბრუნებულმა პირებმა ხმები გაავრცელეს მეფისნაცვლის ჰუმანურობაზე და სვანეთისადმი კეთილ განწყობაზე (ხელსაყრელი სიტუაციის შექმნისთანავე სვანეთში გაიგზავნა დელეგაცია ცნობილი სამხედრო მოხელისა და არქეოლოგის ბარტოლომეის მეთაურობით, რომელმაც 1853 წლის აგვისტოში იფარ-მულახის ყოფილი საბოქაულო შემოიარა, შემდეგ ლატალის თემსაც ეწვიდა ბარტოლომეის ახლდნენ მეფისნაცვალთან ნამყოფი აზნაურები, რომელთაც ჩარკვიანებისა და რამდენიმე გავლენიანი გლეხის მეშვეობით ლატალის მოსახლეობა რუსეთის ერთგულებასა და ქვეშევრდომობაზე დააფიცეს. მალე რუსეთის ქვეშევრდომობა აღიარა ლენჯერის თემის მოსახლეობამაც. ყოველივე ამის შემდეგ ბარტოლომეი და მისი თანმხლებნი თბილისში დაბრუნდნენ. სვანეთის რუსეთთან შეერთებაში დამსახურებისათვის ბარტოლომეი და მისი დელეგაციის რამდენიმე მონაწილე, მათ შორის სვანებიც, ფულადი საჩუქრებითა და ორდენებით დაჯილდოვდნენ.

სვანეთის ხელახალი და საბოლოო შეერთების შემდეგ მეფის უმაღლესი მოხელეები დიდხანს ყოყმანობდნენ იმაზე, შეიძლებოდა თუ არა სვანეთში მტკიცე მართვა-გამგეობა შე-

¹ Поездка в Вольную Сванетию Полковника Бартоломея в 1853 году, 1853, стр. 15—16, 27, 31, 51, 53.

მოღებულები და ამ მიზანს რამდენი თანხა დასჭირდებოდა. საამისოდ მეფის მოხელეებს საჭიროდ მიაჩნდათ გზების გაყვანა და ხალხში რუსეთისადმი რწმენის განმტკიცება. მაგრამ საამისოდ მნიშვნელოვანი თანხის გაღება მთავრობას ხელს არ აძლევდა. ამიტომ სვანეთის მართვა-გამგეობისათვის საჭირო ფულის გამოყოფა გარკვეული დროით გადაიდო (ასე იყო თუ ისე, 1853 წლიდან სვანეთი ტუსკეთს შეეერთდა)

სვანეთის რუსეთთან საბოლოო შეერთების შემდეგ ბოქულად კვლავ ა. მიქელაძე დაინიშნა) იგი თავდაპირველად ფრთხილად და წინდახედულად მოქმედებდა, საქმეს ზოგჯერ ისე წარმართავდა, თითქოს ხალხის ინტერესებისთვის ზრუნავდა. მაგრამ ასე დიდხანს არ გაგრძელდა. ხალხი მეფის მთავრობისაგან ვერავითარ სარგებელს ვერ იღებდა.

ყირიმის ომით გართული მეფის მთავრობა სვანეთის მართვა-გამგეობისათვის საჭირო სახსრებს ვერ იღებდა. ამასობაში ხმა გავრცელდა, თითქოს სვანები თურქეთის აგენტებმა გადაიბირეს და რუსეთის წინააღმდეგ გამოსვლისთვის ემზადებოდნენ.

(მეფის მთავრობის პოზიცია სადადიშქელიანო სვანეთშიც სუსტი იყო. აქ რუსული მმართველობა არ არსებობდა და მისი გავლენა მხოლოდ დადიშქელიანთა მიერ რუსეთის ქვეშევრდომობის ფორმალურ აღიარებაში გამოიხატებოდა. ასეთი ვითარების გამო მთავრობა მხოლოდ დროდადრო თუ ახერხებდა დადიშქელიანთა საქმეებში ჩარევას.)

(მიუხედავად იმისა, რომ დადიშქელიანთა სათავადო სახლების მესვეურები შერიგებული იყვნენ, კონსტანტინეს და მის ძმებს შურისძიების გრძნობა არ ასვენებდათ. თავის მხრივ, ამას გრძნობდნენ მათი მოწინააღმდეგეებიც, რომელთაც კავშირი შეკრეს დადიანებთან. ეს უკანასკნელნი აგრეთვე ჩუბეხევის მფლობელებთან დაპირისპირებული იყვნენ სასაზღვრო დავისა და მთელი სვანეთის ხელში ჩაგდების წადილის გამო.)

კონსტანტინესა და მის ძმებს დაუპირისპირდა დადიანების წიქე, მეფის სამხედრო მოხელე თავადი მუხრანსკიც. ჭანსულთან და ოთართან (თათარყანის შვილებთან) კავშირით დადიანები ლაშობდნენ ე. წ. თავისუფალი სვანეთის ხელში ჩაგდებას, ხოლო ჭანსული და ოთარი დადიანების მეშვეობით. მე-

ტოქე კონსტანტინესა და მისი ძმების განადგურებას ცდილობდნენ.

(ქვემოთ სიტუაციაში დადიშქელიანთა შორის მტრობა კიდევ უფრო გამწვავდა.) საქმე იქამდე მივიდა, რომ 1855 წელს გურიის სამხედრო რაზმის უფროსის გენერალ-ლეიტენანტი ბაგრატიონ-მუხრანსკის მიერ გამოძახებული ჯანსული, რომელიც თავისი ვაჟიშვილით და 40-კაციანი რაზმით დანიშნული ადგილისკენ მიდიოდა, გზაში მოკლეს კონსტანტინეს ძმებმა თენგიზმა და ისლამმა (ჯანსულის დაქრილმა ვაჟიშვილმა ნიკოლოზმა გაქცევით უშველა თავს). ჩუბენევის მფლობელები არც ამით დაკმაყოფილდნენ და ჯანსულის მამულსაც დაეპატრონენ.

(ჩუბენევის დადიშქელიანთა ამგვარი მოქმედებით გაბორბებულმა ბაგრატიონ-მუხრანსკიმ და ქუთაისის გენერალ-გუბერნატორმა ძმების თენგიზის, ისლამის, აგრეთვე კონსტანტინეს, ბეჭირბის (ალექსანდრეს, რომელიც სამხედრო ოფიცერი იყო და დროებით იმყოფებოდა შვებულეებაში) და ციოყის (ეს სამი უკანასკნელი მკვლელობაში არ მონაწილეობდნენ) წინააღმდეგ მძიმე პოლიტიკური საბრალდებო საქმე შეთხზეს. ამასთანავე დამნაშავე დადიშქელიანების დასასჯელად გენერალ ბებუთოვს (ბებუთაშვილს) სვანეთში სამხედრო ნაწილის გაგზავნა შესთავაზეს.)

დადიშქელიანთა საქმეებმა კავკასიის ადმინისტრაციაც გაანაწყენა, მაგრამ იქამინდელი რთული ვითარება სვანეთში სამხედრო ძალის გაგზავნის შესაძლებლობას არ იძლეოდა, რადგან, ამისათვის მსხვერპლის გასაღებად არავის ეცალა. კავკასიის ადმინისტრაციამ ქუთაისის გუბერნატორი და ბაგრატიონ-მუხრანსკი გააფრთხილა, რომ სვანეთში სამხედრო ძალა არ გამოეყენებინათ რუსეთისადმი კონსტანტინეს დამოკიდებულების საბოლოო გამორკვევამდე.

სანამ ჯანსულის მკვლელობის გარემოება და მიზეზები დადგინდა, ეკატერინე დადიანმა კონსტანტინესა და მისი ძმების წინააღმდეგ რამდენიმე საჩივარი შეადგინა. ჩანს, ეკატერინეს უნდოდა ხელიდან არ გაეშვა ხელსაყრელი მომენტი და საბოლოოდ გაენადგურებინა მოწინააღმდეგე სვანი მფლობელები. ამ მიზნით ეკატერინემ რამდენიმე საბუთიც შექმნა.

ერთ საბუთში ნათქვამი იყო, რომ ჯანსული დადიანებისადმი ერთგულების გამო მოკლეს, მეორე „საბუთში“, რომელიც თითქოს ლატალის თემის მცხოვრებთა მიერ იყო შედგენილი, ნათქვამი იყო, რომ „ლატალი მუდამ დადიანთა მფლობელობაში იყო“ და თითქოს ლატალელებს ახლაც დადიანთა ხელში ყოფნა სურდათ.

ეკატერინე მთავრობის ყველა ინსტანციაში ჩიოდა, რომ კონსტანტინე და მისი ძმები ჯანსულის ცოლ-შვილს ამოწყვეტას უპირებენო და მთელი სვანეთის ხელში ჩაგდებას ცდილობენო. იგი ჩიოდა, რომ ჩუბეხევის მფლობელები რამდენჯერმე დაესხნენ თავს მის მეჭოგეებს და გაძარცვეს.

ეკატერინე კონსტანტინეს ოჯახს არა მარტო ჩვეულებრივ ბოროტმოქმედებაში ადანაშაულებდა, არამედ რუსეთის წინააღმდეგ პოლიტიკურ შეთქმულებასაც აბრალებდა. ცხადია, ეკატერინეს ნაკლებად ადარდებდა მთავრობის თუ სხვებისადმი დადიშქელიანების ორგულობა, მას, პირველ რიგში, საკუთარი ანგარიშები ამოძრავებდა.

როგორც მეფის მოხელე დემიანოვიჩმა სვანეთში ყოფნისას დაადგინა, რუსეთის წინააღმდეგ დადიშქელიანები არავითარ შეთქმულებას არ ამზადებდნენ, მათ არც თურქეთთან ჰქონდათ რაიმე კავშირი. დემიანოვიჩმა კავკასიის ჯარების მთავარსარდალს მიუტანა კონსტანტინეს წერილი, რომელშიც ეს უკანასკნელი დიდ წუხილს გამოთქვამდა ჯანსულის მკვლელობასთან დაკავშირებით და ირწმუნებოდა, რომ ეს მხოლოდ შურისძიების გამო იყო ჩადენილი. ამასთან კონსტანტინე დიდ ბოდიშს უხდოდა სამხედრო ხელმძღვანელობას და გუბერნიის მმართველობას მომხდარი ამბის გამო და არწმუნებდა, რომ მზად იყო მთავრობის ერთგულებისა და გადაწყვეტილების შესრულებისათვის¹.

რაკი სვანეთში არავითარი შეთქმულება არ მზადდებოდა და დადიშქელიანებს თურქეთთან არავითარი კავშირი არ ჰქონდათ, მთავრობამ მკვლელობისა და სხვა დანაშაულებების განხილვა მშვიდობიანი დროისთვის გადადო, ხოლო კონსტანტინეს მომდევნო ძმას — ალექსანდრეს მოქმედ არმიაში დაბრუნება უბრძანა.

¹ АКАК, т. XI, стр. 946—947.

მიუხედავად იმისა, რომ დადიშქელიანთა საქმე ერთგვარად მიწყნარდა, ეკატერინე დადიანი მაინც არ ისვენებდა. იგი ერთი მხრივ, დადიშქელიანებს უკიეინებდა, ხოლო, მეორე მხრივ, ბალსზემო სვანებს ავიწროებდა და ლატალის თემის დაქვემდებარებას ლამობდა¹.

დადიშქელიანთა საქმეების ნაწილობრივი გარკვევის შემდეგ მთავრობამ რაქის მაზრის უფროსს ვასილიევს და ა. მიქელაძეს დაავალა გამოერკვიათ თავისუფალმა სვანებმა მართლა მიიღეს თუ არა თურქეთის აგენტი. საქმის დასადგენად მეფის მოხელეები ჯერ ქვემო სვანეთს ესტუმრნენ, შემდეგ უშგულშიც გადავიდნენ, მაგრამ სვანების გამცემლობაზე და მთავრობის წინააღმდეგ თურქეთთან კავშირზე ვერავითარი სარწმუნო ცნობა ვერ მიიღეს და უკან დაბრუნდნენ.

ყირიმის ომის დამთავრების შემდეგ კავკასიის ადმინისტრაციამ ხელახლა ამოატივტივა სვანეთის ამბები, მათ შორის დადიშქელიანთა საქმეები. მეფისნაცვალმა დამნაშავედ ცნობილი დადიშქელიანები თბილისში გამოიძახა, ხოლო ალექსანდრეს კვლავ სამხედრო სამსახურში დაბრუნება ებრძანა.

(მეფისნაცვალმა ბარიატინსკიმ ბრძანების შეუსრულებლობის გამო ალექსანდრეს სამხედრო სამსახურიდან გარიცხვა. ხოლო მკვლელობის მონაწილე ძმების სისხლის სამართლის პასუხისგებაში მიცემა მოითხოვა.) დამნაშავედ ცნობილი დადიშქელიანების საქმეები ლორის-მელიქოვის მაგიერ პ. უსლარმა გამოიძია*. პ. უსლარი არ დაკმაყოფილდა დადიშქელიანთა სისხლის სამართლის საქმეების დამძიმებით. (მან კონსტანტინეს და მის ძმებს თურქეთთან კავშირი და რუსეთის წინააღმდეგ პოლიტიკური შეთქმულებაც დააბრალა.) ამის დამამტკიცებლად ის ომარ-ფაშას წინააღმდეგ რაზმის გამოუყვანლობას და მთავრობის ერთგულ ჯანსუღის მოკვლას ასახელებდა. ჩუბეხევის მფლობელებს ბრალი ედებოდათ იმაშიც, რომ თითქოს მათ თავისუფალი სვანეთის ძალდატანებითი დაპატრონება უნდოდათ. ყოველივე ეს საკმარისი მიზეზი

¹ АКАК. т. XI, стр. 946—947.

* პ. უსლარი გურიამი დაბანაკებული სამხედრო რაზმის შტაბის უფროსი იყო და ახლო ურთიერთობა ჰქონდა ბაგრატიონ-მუხრანსკისთან, გენერალ გრიგოლ დადიანთან და ეკატერინე დადიანთან.

ყო იმისათვის, რომ დადიშქელიანები მკაცრად დასჯილიყვნენ.

სათანადო მზადების შემდეგ (1857 წლის ივლისში ბარიატინსკისა და სამხედრო მინისტრის ბრძანებით სვანეთში სამაჯრო ექსპედიცია მოეწყო.) ამასთანავე მზადყოფნაში იყო ნალჩიკში, კისლოვოდსკსა და წებელდაში დაბანაკებული სამხედრო ნაწილები, რომლებიც, აგრეთვე, დაუყოვნებლივ უნდა წასულიყვნენ სვანეთში — თუკი დადიშქელიანები შეიარაღებულ წინააღმდეგობას გაწევდნენ.

სვანეთის სამხედრო ექსპედიციის საერთო ხელმძღვანელობა ქუთაისის გენერალ-გუბერნატორს გაგარინს დაევალა, უშუალო ხელმძღვანელობა კი — პ. უსლარს. ზემო სვანეთის მისადგომთან პ. უსლარს პირადად შეხვდა კონსტანტინე და განუცხადა, რომ თვითონ და მისი ძმა ალექსანდრე ნებაყოფლობით გამოცხადდებოდნენ მთავრობასთან და თხოვა ექსპედიცია უკან დაებრუნებინა. მიუხედავად ამისა, ექსპედიცია მაინც წავიდა ჩუბუხევიში, მაგრამ დამნაშავე ძმები თენგიზი და ისლამი მაინც ვერ დაიჭირა და უკან დაბრუნდა.

აფასებდა რა აღნიშნული ექსპედიციის შედეგებს, მეფისნაცვალ ბარიატინსკი 1857 წლის 17 აგვისტოს სამხედრო მინისტრს სწერდა: „რაოდენ მცირეც არ უნდა იყოს თავისთავად სვანეთი, თავისი ცენტრალური მდებარეობით ყაბარდოს, ყარაჩაის, წებელდისა და სამურზაყანოს ტომებს შორის, რომლებიც თუმცა მორჩილნი არიან, მაგრამ ნახევრადველურება, თავისი სიხლოვით ჩვენდამი არაკეთილად განწყობილ მთიულებთან, სვანეთში ყოველგვარი მღელვარება შეიძლებოდა ჩვენთვის საშიში ყოფილიყო, არა მარტო ჩვენდამი პირდაპირ მტრული, არამედ საექვო დამოკიდებულებისასაც. სვანეთი, თავისი ცუდი მისადგომების გამო, ადვილად შეიძლებოდა გამხდარიყო ყველა მეზობელი ყაჩაღის თავშესაყარი, რითაც სავსებით შეიცვლებოდა ჩვენი მდგომარეობა ამიერკავკასიის მთელ დასავლეთ ნახევარში. აუცილებელი იყო სრულად და საბოლოოდ გარკვეულიყო დადიშქელიანების დამოკიდებულება ჩვენდამი და იმ შემთხვევაში, თუკი ისინი არ გაგვიგონებდნენ, დროის დაუკარგავად ძალით მოგვეყვანა

მორჩილებაში“¹. როგორც ვხედავთ, ექსპედიციის მიზანს მარტო დადიშქელიანების შეპყრობა არ წარმოადგენდა, ძალ უფრო შორს გამიზნული მისია ეკისრა.

სანამ სამხედრო ექსპედიცია უკან დაბრუნდა, კონსტანტინე და ალექსანდრე დადიშქელიანები თბილისში მეფისნაცვალთან გამოცხადდნენ. მეფისნაცვალმა კონსტანტინე ქუთაისში გაისტუმრა, ხოლო ალექსანდრე (ბექირბი) მეფისა და სამხედრო მინისტრის განკარგულებით სამხედრო სამსახურში (ჩერნიგოვის დრაგუნთა პოლკში) დაბრუნდა. წინასწარ გადაწყდა, რომ კონსტანტინეს ძმები თენგიზი და ისლამი ვიატკაში გადაესახლებინათ.

მეფის მთავრობამ დაადანაშაულა ბეჩოს მფლობელი ოთარ დადიშქელიანიც, რომელიც ყაბარდოში ცოლეურების მამულზე დასახლდა და თითქოს მაჰმადიანობაც მიიღო. აღნიშნულის გამო ოთარს და მის მემკვიდრეებს აეკრძალათ დადიშქელიანის გვარის ტარება. მათ წინაპართა სახელის მიხედვით ოთაროვები ეწოდათ.

კონსტანტინეს ებრძანა ქუთაისიდან არსად წასულიყო. მას მეთვალყურედ ბარტოლომეი და პოლიციელები მიუჩინეს² გაურკვეველ მდგომარეობაში მყოფი კონსტანტინე 1857 წლის 24 ოქტომბერს გენერალ-გუბერნატორმა გაგარინმა გამოიძახა და განუცხადა, რომ მთავრობის გადაწყვეტილებით მას სვანეთის მფლობელობა ჩამოერთვა და საკითხის საბოლოო გადაჭრამდე ერევანში უნდა გადასახლებულიყო.

ასეთი გადაწყვეტილებით აღელვებულ კონსტანტინესა და გაგარინს შორის ცხარე კამათი გაჩაღდა, რაც შეტაკებაში გადაიზარდა. ამასობაში კონსტანტინემ ხანჯალი იზიშვლა, გაგარინი, მისი ორი მცველი და დანამომარჯვებული მზარეული სიცოცხლეს გამოასალმა. ამის შემდეგ კონსტანტინემ გაქცევა სცადა, მაგრამ ხიდი და გზები შეკრული აღმოჩნდა და ჯარისკაცებთან შეტაკების შემდეგ შეპყრობილ იქნა.

ღიდი დანაშაულის გამო სამხედრო-საველე სასამართლოს გადაწყვეტილებით კონსტანტინე დადიშქელიანს დაახვრეტა მიესაჯა, რაც მალე სისრულეში მოიყვანეს

¹ АКАК, т. XII, стр. 369.

უსლარმა დეტალურად გამოიკვლია დადიშქელიანთა შორის მომხდარი მკვლევლობები და დაასკვნა, რომ მათთვის თითქოს შურისძიებითი მკვლევლობა ჩვეულებრივი სასიცოცხლო მოთხოვნილება და ვალდებულება იყო. მან მეფის მთავრობა დაარწმუნა, რომ კონსტანტინეს დახვრეტის გამო დაწარჩენი დადიშქელიანები მათზეც შურს იძიებდნენ. ყოველივე ამის გამო, უსლარის აზრით, ჩუბეხევის ყველა დადიშქელიანი სვანეთიდან და საერთოდ კავკასიიდან უნდა განდევნილიყო!

თენგიზი, ისლამი და მათი უმცროსი ძმა ციოცი, რომელთაც წინასწარი გადაწყვეტილებით ვიატკაში გადასახლება ჰქონდათ მისჯილი, წელიწადზე მეტხანს იმალებოდნენ, მაგრამ, 1858 წელს შემოდგომაზე სამეგრელოს მხრიდან (ენგურის ხეობით) სვანეთში მიდის სამხედრო რაზმი ქუთაისის გენერალ-გუბერნატორის მოვალეობის შემსრულებლის ^{ერის-} თავის ხელმძღვანელობით. ეს ამბავი ძმებისთვის მოულოდნელი იყო და სახლში იმყოფებოდნენ. რაკი წინააღმდეგობის გაწევას აზრი არ ჰქონდა, ისინი იძულებული გახდნენ სამხედრო ნაწილს ჩაბარებოდნენ.

კავკასიის ადმინისტრაციამ კონსტანტინეს დახვრეტის სისრულეში მოყვანის შემდეგ სამხედრო მინისტრს სთხოვა, რომ ჩერნიგოვის დრაგუნთა პოლკის ოფიცერ ალექსანდრეზე განსაკუთრებული მეთვალყურეობა დაეწესებინა, რათა სამშობლოში გამოქცევის შესაძლებლობა არ მისცემოდა. საშიშროების თავიდან აცილებისა და ჩუბეხევის მფლობელთა საბოლოო ნეიტრალიზაციის მიზნით ალექსანდრე რუსეთის შორეულ აღმოსავლეთში გაგზავნეს, ხოლო კონსტანტინეს უფროსი ვაჟიშვილი, რომელიც თბილისის გიმნაზიის მოსწავლე იყო, ციმბირის კადეტთა კორპუსში ჩარიცხეს.

თენგიზ, ისლამ და ციოცი დადიშქელიანები თბილისში ჩამოიყვანეს, მაგრამ მათი საქმის საბოლოო გადაწყვეტას საკმაოდ დრო დასჭირდა. ამასობაში, ალექსანდრეს ზემოქმედების მეოხებით, ამურის გენერალ-გუბერნატორმა მურავიოვ-ამურსკიმ კავკასიის მეფისნაცვლის წინაშე იშუამდგომლა, რომ

1 ЦГИАЛ, ф. 1268, оп. 9, д. 64, лл. 66---67.

თავის ადიუტანტ ალექსანდრეს ძმებისთვის დადგენილი სას-
ჯელი ეპატიებინათ ან შეემსუბუქებინათ.

რაკი მთავარი მიზანი შესრულებული იყო (კონსტანტინე
დაზვრიტეს, სამთავრო გაუქმეს) და დანარჩენი დადიშქელი-
ანების მკაცრ დასჯას უკვე აზრი არ ჰქონდა, მთავრობამ ანგა-
რიში გაუწია გენერალ-გუბერნატორის შუამდგომლობას, აგ-
რეთვე ალექსანდრე დადიშქელიანის* თხოვნას და თენგიზს.
ასლამს და ციოყს გადასახლება პოლონეთში სამხედრო სამ-
სახურში გაგზავნით შეუცვალა.)

მსგავსი გადაწყვეტილება გამოიტანეს ჩუბეხევის ყველა
დადიშქელიანის მიმართ, რომელთაც სვანეთში და საერთოდ
კავკასიაში ცხოვრება აეკრძალათ. უმაღლეს ინსტანციებში
საკითხის რამდენჯერმე დასმის შედეგად, მეფის 1859 წლის
6 დეკემბრის გადაწყვეტილებით, სვანეთიდან გადასახლებულ
დადიშქელიანებს ჩუბეხევის მამულის საფასურად 150 ათასი
მანეთი გამოეყოთ, ხოლო ჩუბეხევი ხაზინის საკუთრებად გა-
მოცხადდა!

ასე ტრაგიკულად დასრულდა დადიშქელიანთა უფროსი
შტოს ისტორია. რაც შეეხება ეცერ-ცხუმარ-ბეჩოს დადიშქე-
ლიანებს (უმცროს შტოს), მართალია, მათი უფლებებიც შე-
იზღუდა, მაგრამ უმრავლესობა სვანეთში დარჩა და მამულე-
ბ-ც შეუნარჩუნეს (სხვათა შორის, საბოლოოდ არც ყაბარ-
დოში გადასახლებულ ოთარს წაართვეს თავისი წილი ბე-
ჩოში).

XIX საუკუნის შუა ხანებში, როდესაც მთელი კავკასია
რუსეთის ხელში იყო, მეფის მთავრობამ კარგად დაინახა, რომ
ჯეოდალური სამთავრო-ერთეულების დამოუკიდებლობა ხელს
უშლიდა მეფის მთავრობის მმართველობის მტკიცე ცენტრა-
ლიზაციას. ამიტომ სხვა მიზეზიც რომ არ არსებულებოდა, და-
დიშქელიანთა სამთავროს გაუქმება ისედაც ობიექტურად

* მართალია, ალექსანდრე დადიშქელიანი მხოლოდ ამურის გუბერნა-
ტორის ადიუტანტი იყო და ჯერ კიდევ შევიწროებას განიცდიდა, მაგრამ
თავისი ნიჭის, ერუდიციისა და სიმამაცის წყალობით დიდი პერსპექტივის
მქონედ ითვლებოდა. სხვათა შორის, მან გენერალობას მიაღწია და რამ-
დენიმე მეცნიერული გამოკვლევის ავტორიც გახდა.

ყო მომზადებული. ყირიმის ომის შემდეგ, როცა მეფის ხელისუფლებამ მტკიცედ დაისახა კავკასიის ეკონომიკური ათვისება და მისი მმართველობის უნიფიკაცია, ცალკეული პოლიტიკური ერთეულების არსებობა ცარიზმის მიერ დასახული კურსის გატარებას აფერხებდა, მით უმეტეს, რომ ამ მათავროებისათვის რუსეთის ხელისუფლების მიერ დაკისრებული მისია ამოწურული იყო და ქვეყნის გაერთიანებისათვის ეკონომიკური საფუძველიც მომზადებული ჩანდა¹.

დადიშქელიანთა მფლობელობის ლიკვიდაციის ან რეორგანიზაციის განხორციელების შემდეგ კავკასიის ადმინისტრაციამ მიზნად დაისახა ჯერ ზემო სვანეთის გაერთიანება და იქ მტკიცე რუსული მმართველობის დამყარება. ამ მიზნით 1859 წელს მთავრობა დათანხმდა სვანეთში (აგრეთვე წებელდაში) ორი წლის საცდელი ვადით განსაკუთრებული (ე. წ. საპოლიციო) საბოქაულოს ჩამოყალიბებაზე) გარკვეული მზადების შემდეგ ზემო სვანეთში შეიქმნა განსაკუთრებული საბოქაულო, რომლის მმართველობისათვის საკმაო თანხაც გამოიყო. როგორც კავკასიის კომიტეტის თავმჯდომარის (იუსტიციის მინისტრისადმი) მიმართვიდან ჩანს, (1859 წლის ბოლოს მთელი ზემო სვანეთი ერთ საბოქაულოში შევიდა და ცენტრად ბეზო შეარჩიეს) სვანეთის საბოქაულოს შტატი 18 ერთეულით განისაზღვრა, მათ შორის: ბოქაული, მისი თანაშემწე, ორი მწერალი, თარჯიმანი, დამტარებელი, ორი ცხენოსანი და ათი ფეხოსანი ჩაფარი. საბოქაულოს მმართველობის წლიური თანხა 2505 მანეთით განისაზღვრა. სვანეთის ბოქაულად დაინიშნა ს. ამირეჯიბი, რომელსაც ნაწილობრივ მაზრის უფროსის უფლებები მიენიჭა.

(საბოქაულოში შეიქმნა სასამართლო ორგანოც) („სტიკცეაერი სასამართლო“), რომლის შემადგენლობა 12 ერთეულით განისაზღვრა. მათ შორის: ხუთი მდივანბეგი, ოთხი თანაშემწე, ერთი დამტარებელი და ორი ცხენოსანი ჩაფარი. სასამართლო ორგანოს მთელი წლიური თანხა 1665 მანეთს შეადგენდა².

¹ საქართველოს ისტორიის ნარკვევები, ტ. V, 1970, გვ. 217.

² АКАК, т. XII, стр. 249.

სასამართლოს თავმჯდომარე წესისამებრ ბოქაული იყო. საბოქაულოს სასამართლო (რომელიც საქმეებს ზეპირსიტყვიერად არჩევდა) სამოქალაქო საქმეებს განაგებდა, ხოლო სისხლის სამართლის საქმეები, წესისამებრ, გუბერნიის სათანადო უწყებას ექვემდებარებოდა.

1859 წელს შემოღებულმა მმართველობამ, რომელიც ნახევრად რუსული იყო, სვანეთში ნორმალური მართვა-გამგეობა ვერ უზრუნველყო. ბოქაული ძირითადად რუსული კანონებით მოქმედებდა, რაც მოსახლეობისათვის უცხო და გაუგებარი იყო. ბოქაულს და მის აპარატს ძირითადად მხოლოდ სამოქალაქო და ადმინისტრაციული საქმეების გადაწყვეტის უფლება ჰქონდა. ყოველ მნიშვნელოვან საქმეზე ხალხს გუბერნიის მმართველებისათვის უნდა მიემართა, რაც რუსული კანონებისა და რუსული ენის ცოდნას, აგრეთვე ქუთაისში განუწყვეტლივ სიარულს მოითხოვდა. ყოველივე ამის გამო ხალხი გაურბოდა ადგილობრივ თუ ზემდგომ ხელისუფლებას. საქმეს ძველი ადათ-წესის საფუძველზე არჩევდა და წყვეტდა.

ამის მიუხედავად ძველ ვითარებასთან შედარებით ახალ მმართველობას პროგრესული მნიშვნელობა ჰქონდა; ჯერ ერთი, ახალი მმართველობა კრძალავდა ძალადობას, მათ შორის სისხლის აღებასაც; მეორე, ახალი მმართველობა ზღუდავდა თავადაზნაურთა უფლებებს, რომელიც წოდებრივ უპირატესობაზე იყო აგებული; მესამე, ახალი მმართველობა აკავშირებდა ერთიმეორისაგან გათიშულ საქართველოს კუთხეებს. ერთიანი საქართველოს ჩამორჩენილ კუთხეებში ეკონომიკა და კულტურაც სწრაფად ვითარდებოდა.

რაკი სვანეთის ადმინისტრაციას მცირე უფლებამოსილება გააჩნდა და მნიშვნელოვან საკითხებს ვერ ჰქრიდა, მას ხალხი არც მიმართავდა და არც ემორჩილებოდა.

(XIX საუკუნის 60-იან წლებში მეზობელ კუთხეთა ზოგიერთმა მფლობელმა კვლავ დაიწყო თავისი მომიჯნავე სვანეთის მოსახლეობის შევიწროება. სვანეთის საბოქაულოს ხელისუფალთა აშკარა წაყრუებით სამურზაყანოდან და სამეგრელოდან ჩუბხევისა და ლატალის საძოვრებში ჯოგები შერეეს. რაკი სვანთა ყოველგვარი პროტესტი უყურადღებოდ დარჩა, ლატალელებმა და ჩუბხეველებმა თავიანთ ტერიტო-

რიაზე მყოფი ჯოგები ძალით დაიტაცეს¹. სვანეთის მოსახლეობა სხვადასხვა მიზეზით თუ საბაბით პირუტყვის მისატაცებლად თავდასხმებს ზოგჯერ რაჭასა და ჩრდ. კავკასიაშიც აწყობდა.

სამეგრელოს მმართველმა გ. ვლასტოვმა და სოხუმის ოლქის უფროსმა სვანებზე საჩივრები აღძრეს. თუ ადრე დადინები ძალით ან სხვა საშუალებით ლამობდნენ სვანეთის ან მისი ცალკე ნაწილის დამორჩილებას, ახლა, როცა მათ პირიპირ დადიშქელიანთა უფროსი შტოს წარმომადგენლები არ იდგნენ, ისინი სამეგრელოს მმართველის გ. ვლასტოვის მეშვეობით ცდილობდნენ მოსაზღვრე სვანეთის ტერიტორიების მიტაცებას. გარდა იმისა, რომ ამასთან დაკავშირებით დადინებმა გუბერნიის ხელისუფლები მრავალგზის შეაწუხეს. 1866 წ. 18 მაისს გ. ვლასტოვი მეფისნაცვლის მთავარი სამმართველოს უფროსს სწერდა: ეკონომიკური თვალსაზრისით სვანეთს უადრესად დიდი მნიშვნელობა აქვს შავი ზღვისპირეთისათვის, რადგან მთელ სამეგრელოს არ გააჩნია სათიბები და საძოვრები, ამიტომ აქ ძალზე მცირეა რქოსანი პირუტყვი, ცხენები და ცხვარი, რაც სოფლის მეურნეობის საფუძველს შეადგენს. სამეგრელოში ხორცისა და რძის პროდუქტების უკმარობა იქამდე მიდის, რომ ფოთი იძულებულია ხორცისა და რძის პროდუქტები ტრაპიზონიდან იყიდოს, თვით ზუგდიდიც კი კარაქს ტრაპიზონიდან და რუსთა საგუშაგოებიდან იღებს². ყოველივე ამის გამო ვლასტოვი სამეგრელოს მფლობელებისათვის სვანეთის კუთვნილი საძოვრების მიცემას მოითხოვდა.

სვანეთის ბოქაული ამირაჯიბი, ნაცულად იმისა, რომ თავის საგამგებლო მოსახლეობის კანონიერი ინტერესების დაცვაზე ეზრუნა, ძალადობის წინააღმდეგ ამხედრებულ სვანთა დასახასა და გაკიცხვას მოითხოვდა.

მეფის მოხელეთა ამგვარი მოქმედების გამო სვანეთში წესრიგი არც ახალი საბოქაულოს შექმნის შემდეგ დამყარდა, ხალხი ხელისუფლების ყოველგვარ მოქმედებას ეჭვის თვა-

1 საქ. სსრ ცსსა (ქუთაისში), ფ. 16, ს. 365.

2 Сельское хозяйство и аграрные отношения, т. II, составил проф. П. В. Гугушвили, Тбилиси, 1950, стр. 516.

ლით უყურებდა და მზად იყო მისი უკანონო მოქმედებისათვის უმაღლვე წინააღმდეგობით ეპასუხა.

ქართველ და კავკასიის სხვა მთიელებს თვითმპყრობელობა უფრო ენერგიულად უჭერდა მარწუხებს, იგი ყოველ ღონეს ხმარობდა, რათა მალე გაექელა მოწინააღმდეგე და რუსული მმართველობა რაც შეიძლება ჩქარა დაემკვიდრებინა.

1867 წლის 25 მაისს ქუთაისის გენერალ-გუბერნატორმა ავიატოპოლკ-მირსკიმ მეფისნაცვლის წინაშე დასვა საკითხი მთელი სვანეთის ერთიანი საბოქაულოს შექმნაზე. მართალია, ამ საკითხის აღძვრა გუბერნატორმა სამეგრელოს მმართველობის რეორგანიზაციას დაუკავშირა, მაგრამ მისი მთავარი მიზანი სვანეთში მეფის მმართველობის განმტკიცება იყო. სვანეთის ერთ საბოქაულოში გაერთიანებას სვიატოპოლკ-მირსკი იმიტაც ასაბუთებდა, რომ, მისი აზრით, „სვანეთის მოსახლეობა, როგორც პირველ ორ ეოლოსტში (ლაპარაკია ზემო სვანეთზე — ბალსზემო და ბალსქვემო თემებზე — გ. გ.), აგრეთვე მესამეში (ქვემო სვანეთში — გ. გ.) ყოველმხრივ ერთნაირად გავდა, როგორც ცხოვრების წესით, შეხედულებებით, აგრეთვე ადათ-წესებით და დაუდგარი მოქმედებით“¹.

მეფისნაცვლისადმი მოხსენებაში ქუთაისის გუბერნატორი უშუფოთებული წერდა, რომ სვანეთის საბოქაულოში, ე. ი. ზემო სვანეთში (ქვემო სვანეთი ლეჩხუმის მაზრაში შედიოდა) ადგილობრივმა ადმინისტრაციამ წესრიგი და სიწყნარე ვერ უზრუნველყო. გუბერნატორის აზრით, სვანეთში სრული წესრიგის დამყარებისათვის აუცილებელი იყო ერთიანი მმართველობის შემოღება. მაგრამ რადგან, მისი აზრით, ამ მმართველობას დამოუკიდებელი მოქმედების პირობები არ ჰქონდა, საჭიროდ მიიჩნეოდა სვანეთის უფროსის დამორჩილებას ლეჩხუმის მაზრის უფროსისადმი.

სვანეთის მმართველობის რეორგანიზაციაზე გუბერნატორმა წინადადებანი 1868 წ. 10 ივნისს განიხილა მეფისნაცვლის მთავარი სამმართველოს დეპარტამენტმა, რომელმაც მიზანშეწონილად მიიჩნია გუბერნატორის მოსაზრების დაკმაყოფილება — სვანეთის მმართველობის ცენტრალიზაციის განხორ-

¹ ЦГИАЛ, ф. 416, оп. 3, д. 91, л. 1.

ციელების თაობაზე, მით უფრო, რომ კავკასიის ადმინისტრაციული ერთეულების გამსხვილებასა და სათანადო ცვლილებების შეტანაზე უკვე მმართველი სენატის მითითებაც არსებობდა.

ყოველივე ამის გამო დეპარტამენტმა სვანეთის მმართველობის საკითხი საბოლოო გადასაწყვეტად მეფისნაცვლის მთავარი სამმართველოს საბჭოში შეიტანა.

1868 წლის 22 ივლისს დეპარტამენტის წარდგინება — სვანეთის ერთიანი საბოქაულოს ჩამოყალიბებაზე მთავარი სამმართველოს საბჭომაც მოიწონა. მალე მეფისნაცვალმა განკარგულება გასცა სვანეთის ერთიანი მმართველობის შემოღება პრაქტიკულად აღსრულებულიყო¹. დადგინდა, რომ სვანეთის საბოქაულო ლეჩხუმის მაზრაში შესულიყო და ბოქაული მაზრის უფროსს დაქვემდებარებოდა.

სვანეთის ბოქაულს ზოგიერთ საკითხში მაზრის უფროსის უფლებები მიენიჭა, მით უფრო მაშინ, როდესაც ადგილი ჰქონდა მთავრობის საწინააღმდეგო მოქმედებას და საჭირო იყო მისი სასწრაფოდ აღკვეთა.

გადაწყდა, რომ საბოქაულოს შტატი და ფინანსები ადრინდელი დარჩენილიყო, ბოქაულის რეზიდენცია ზაფხულში ბეჩო, ხოლო ზამთარში ქვემო სვანეთი უნდა ყოფილიყო.

2. სასოფლო-სათემო მმართველობის დაარსება

(საქართველოს დანარჩენი კუთხეების მსგავსად, სვანეთში XIX საუკუნის 60-იან წლებამდე სპეციალური სასოფლო მმართველობა არ არსებობდა².)

საადგილმამულო-საგლეხო რეფორმის მომზადების პერიოდში მთავრობის წინაშე ლოგიკური აუცილებლობით დაისვა ახალი პირობების შესაბამისი სასოფლო-სათემო მმართველობის რეორგანიზაციის დებულების შემუშავების საკითხი.

დებულების თანახმად, რუსეთში შემოღებული სასოფლო-

¹ ЦГНАЛ, ф. 416, оп. 3, д. 91, л. 1.

² ა. ლ. ბენდიანიშვილი, სოფლის საზოგადოებრივი მმართველობის შემოღება, საქართველოს ისტორიის ნარკვევები, ტ. V, გვ. 303.

სათემო მმართველობის ანალოგიური მმართველობა მთელ იმპერიაში და, კერძოდ, საქართველოშიც უნდა დამყარებულიყო.)

1864 წ. 13 ოქტომბერს თბილისის გუბერნიის სოფლის საზოგადოებრივი მმართველობის მოწყობის უმაღლესად დამტკიცებული წესების თანახმად მეფისნაცვალს დაევალა, რუსეთის 1861 წლის დებულების საფუძველზე, კავკასიაში სასოფლო-სათემო საზოგადოებათა მოწყობის დაწვრილებითი დებულება შეედგინა. 1865 წ. 11 აპრილს მეფისნაცვალს მიხეილ რომანოვს უკვე ხელთ ჰქონდა სათანადო დებულება, რომლის საფუძველზე საგლეხო რეფორმის კვალდაკვალ მთელ საქართველოშიც ახალი სასოფლო-სათემო მმართველობა უნდა დაარსებულიყო.

დებულების თანახმად, საქართველოში სოფლის საზოგადოებრივ მმართველობას უნდა დაკისრებოდა ყველა ის ფუნქცია, რაც რუსეთში სათემო-სასოფლო მმართველობას ევალებოდა, ე. ი. საჭირო შემთხვევაში სოფლის მმართველობას ადმინისტრაციულთან ერთად, სამეურნეო საქმეების გამგებლობაც ეკისრებოდა. ნავარაუდევია იყო განხორციელებულიყო ისეთი ადმინისტრაციული დაყოფა, რომელიც მმართველობის თვალსაზრისით მოხერხებული იქნებოდა. იმ შემთხვევაში, თუ ცალკეულ სასოფლო-ადმინისტრაციული ერთეულის ჩამოყალიბებისათვის ამა თუ იმ სოფლის მოსახლეობა საკმარისი არ აღმოჩნდებოდა, ტერიტორიული პრინციპით, ერთ მმართველობაში რამდენიმე სოფელი უნდა გაერთიანებულიყო. ამ შემთხვევაში მნიშვნელობა არ ჰქონდა ეს სოფლები უწინ ვის კუთვნილებას შეადგენდნენ. მთავარი ყურადღება ადმინისტრაციული მართვის მოხერხებულობას ექცეოდა. მმართველობის მოხერხებულობისათვის ერთ სასოფლო საზოგადოებაში არამც თუ სხვადასხვა სოფლის გაერთიანება შეიძლებოდა, არამედ ერთი და იმავე მეზობლისადმი ვალდებული გლეხების სხვადასხვა ადმინისტრაციული ერთეულისადმი მიკუთვნებაც. ამასთან, ერთ საზოგადოებაში უნდა გაერთიანებულიყო ყველა კატეგორიის გლეხი.

მაშასადამე, დებულების თანახმად, სასოფლო-სათემო ადმინისტრაციული ერთეულების შექმნის ერთ-ერთი მთავარი

მიზანი ის იყო, რომ ეს ერთეული ადმინისტრაციული და სამეურნეო თვალსაზრისით მოხერხებული ყოფილიყო.

სოფლის საზოგადოების ორგანო — სასოფლო კრებისა და მისი მმართველი პირებისაგან უნდა შემდგარიყო. სოფლის საზოგადოების უმაღლესი ორგანო გლახთა ყრილობა უნდა ყოფილიყო. აღმასრულებელი ხელისუფლება მამასახლისს ენიჭებოდა, ხოლო მართლმსაჯულის — სასამართლოს. სასოფლო-სათემო საზოგადოების შტატი უნდა განსაზღვრულიყო სასოფლო-სათემო საზოგადოების შეხედულებისამებრ. იმ პირობით, რომ ადმინისტრაციული აპარატის ხარჯი მოცემულ ერთეულში გაერთიანებული მოსახლეობისაგან აკრეფილი სახსრებით დაფარულიყო, ე. ი. სოფლის მოსახლეობას თვითონ უნდა უზრუნველყო თავისი მმართველობის დაფინანსება. სასოფლო მმართველობის აპარატის შტატი შედგებოდა მამასახლისისა და მისი ქვემდგომი ერთეულებისაგან. თუ სასოფლო საზოგადოება დიდი იყო და, რაც მთავარია, მას შეეძლო მმართველი აპარატის სათანადო ხარჯებით უზრუნველყოფა, სოფლის მმართველობა შეიძლებოდა შემდგარიყო მამასახლისის, თანაშემწის (ანუ ნაცვალის), გზირის, მეველის, მერუის, მწყემსის, მეწისქვილის, სარწყავი არხებისა და თხრილების ზედამხედველისა და სხვა საშტატო ერთეულებისაგან.

სახელმწიფო-საერობო გადასახადებთან და საზოგადოებრივი მმართველობის დაფინანსებასთან ერთად, გლახობა ვალდებული იყო დამატებითი, ერთდროული ან მუდმივი თანხები გაეღო სოფლის განათლებისა და ჯანმრთელობის დაცვის ღონისძიებებისათვის, აგრეთვე, სარწყავი არხების, გზებისა და ხიდების მოვლისათვის; მალაზიების, საცხობებისა თუ სხვა ამგვარ დაწესებულებათა მოწყობისათვის, აგრეთვე დარაჯის, მწყემსისა თუ სხვა საშტატო ერთეულის შენახვისათვის.

დებულება ითვალისწინებდა სასოფლო-სათემო სასამართლოს ჩამოყალიბებასაც. ამ შემთხვევაში სოფლის ყრილობა სასამართლოს შემადგენლობაში არანაკლებ სამ პირს ირჩევდა. სასოფლო სასამართლოს ფუნქციებში მხოლოდ უმნიშვნელო სამოქალაქო საქმეების განხილვა-გადაჭრა შედიოდა. მაგალითად, მიწაზე გლახთა დავის, ნასყიდობის, ურთიერთზარალის მიყენებისა და სხვა ამგვარი საქმეების მოწეს-

რიგება. ძაგრამ ეს იმ შემთხვევაში, თუ დავის საგანს სათანადო აქტებით გაფორმებული საქმე შეადგენდა და მისი ღირებულება 100 მანეთს არ აღემატებოდა.

დებულების შესაბამისად, სასოფლო საზოგადოების თანამდებობის პირები: მამასახლისი, თანაშემწე, მოსამართლე და სხვა სამი წლის ვადით უნდა არჩეულიყვნენ. შემდეგ კი არჩევნები ხელახლა უნდა ჩატარებულიყო. არჩევნების შედეგები საბოლოოდ გუბერნატორს უნდა დაემტკიცებინა. სასოფლო საზოგადოების თანამდებობის პირები, პირველ რიგში, ბოქაულს ექვემდებარებოდნენ, მაგრამ ყველა მათგანი მაზრის უფროსისა და გუბერნატორის წინაშე იყო პასუხისმგებელი. იმ შემთხვევაში, თუ სასოფლო საზოგადოების თანამდებობის პირები არასასურველი აღმოჩნდებოდნენ, მათი განთავისუფლება, გუბერნატორთან შეთანხმებით, მაზრის უფროსს შეეძლო ყრილობის გარეშე.

(რუსეთთან შეერთების შემდგომ ბატონყმობის გაუქმებამდე სვანეთის მთელ მმართველობას ადგილობრივი მებატონეები ან მთავრობის მოხელეები განაგებდნენ, მაგრამ სისხლისა თუ სამოქალაქო საქმეების უმეტესობა ტრადიციისამებრ — მოდავე პირთა ან მათ მიერ დროებით არჩეულ თავკაცთა (მოციქულ-მედიატორთა) განსჯით და ეკლესიაში დაფიცებით წყდებოდა.) საერთო საკითხების მოგვარება ზოგჯერ სოფლის ან ყველა დაინტერესებული პირის შეკრებით და მოლაპარაკებითაც ხდებოდა. საკითხების განხილვა-გადაწყვეტა მიმდინარეობდა საუკუნეებით დაგროვილ იმ ადათ-წესების საფუძველზე, რომლებიც საერთო ქართული ფეოდალური კანონმდებლობიდან და ტრადიციებიდან გამომდინარეობდა (ზოგჯერ საქმე ვეაქვს ადგილობრივ თავისებურებასთანაც).

(როგორც აღვნიშნეთ, რეფორმამდელ სვანეთში სასოფლო მმართველობის ადგილობრივი ორგანოები არ არსებობდა. საქმეებს მებატონეები (თავადაზნაურები) ან დაინტერესებულ გლეხთა მიერ დროებით არჩეული თავკაცები განაგებდნენ.)

დებულების მიხედვით, სასოფლო მმართველობის ჩამოყალიბება საგლეხო რეფორმის შემდეგ უნდა განხორციელებულ-

ლიყო, მაგრამ ზემო სვანეთში ჯერ სასოფლო მმართველობა დაარსდა, ბატონყმობა კი შემდეგ გაუქმდა*. მეფის მოხელეთა (სამეგრელოს მმართველის, გუბერნატორ ლევაშოვის და სხვ.) ჩვენებით, სვანეთში საგლეხო რეფორმის გვიან გატარების ერთ-ერთი მიზეზი მტკიცე მმართველობის არარსებობაც იყო!

(მეფის მთავრობის გადაწყვეტილებით 1869 წელს მთელი სვანეთი უკვე ერთ საბოქაულოში გაერთიანდა და ახალი ადმინისტრაციული დაყოფა განხორციელდა.)

სვანეთის ადმინისტრაციულ გარდაქმნასთან ერთად**, ქუთაისის გენერალ-გუბერნატორმა ლევაშოვმა 1869 წელს სასოფლო საზოგადოების არჩევნებიც ჩაატარა. არჩევნებში მონაწილეობა მიიღო სათანადო საზოგადოების ყველა ოჯახის უჯროსმა მამაკაცმა („მახვშიმ“) და არჩეულ იქნენ მამასახლისები (ზოგან თანაშემწეები და სხვა პირებიც) და სასოფლო სასამართლოს შემადგენლობა. ამის შესახებ გუბერნატორი ნეფისნაცვლისადმი გაგზავნილ მიმართვაში წერდა: „Сельские управления и суды введены при мне в действие в Сванетиях. Большинство выборов в должностные лица пало на людей сравнительно надежных и влиятельных в обществах и потому должностные все тотчас же были мною утверждены»².

სასოფლო საზოგადოებების ჩამოყალიბებასთან ერთად, ამ საზოგადოების მმართველ ორგანოთა ფუნქციები და უფლება-მოვალეობანი დებულების საფუძველზე განისაზღვრა. რადგან სვანეთში სახნაუ-სათიბ მიწაზე და ტყეზე საერთოსათემო მფლობელობა არ არსებობდა***, სასოფლო ანუ სათე-

* სასოფლო საზოგადოებების ჩამოყალიბებას საგლეხო რეფორმა წინ უსწრებდა მხოლოდ ქვემო სვანეთში.

¹ Сельское хозяйство и аграрные отношения, т. II, Тбилиси, 1959, составил проф. П. В. Гугушвили, стр. 518.

** ეს დაყოფა ტერიტორიული პრინციპით განისაზღვრა და არსებობდა უწინდელი თემების ფარგლებში მოექცა.

² 1868 г. 9 августа. Отношение кутаисского военного губернат-ра гр. Левашова наместнику Кавказскому вел. кн. м. Романову о мерах, предпринятых в Сванетии для разрешения крестьянского вопроса, сельское хозяйство и аграрные отношения, II стр. 521.

*** საერთო მფლობელობაში იყო მხოლოდ საძოვრები და საბალახო ადგილები, რომელიც სოფელს ეკუთვნოდა.

მო მმართველობას ძირითადად ადმინისტრაციული ფუნქციებზე დაეყრდნობა, ეს მაშინ, როდესაც რუსეთისა და კავკასიის მოსახლეობის უდიდესი ნაწილის სასოფლო მმართველობას ადმინისტრაციულთან ერთად სამეურნეო ფუნქციებიც მიენიჭა*.

მამასახლისის მთავარ მოვალეობას შეადგენდა: სახელმწიფო და საერობო გადასახადების აკრეფა, აღწერათა ჩატარება, სვანეთის ფარგლებს გარეთ სამუშაოდ თუ სხვაგან გლეხების გაწვევაზე ნებართვის მიცემა, ზემდგომი ორგანოების თუ ცალკეულ მოხელეთა ბრძანება-განკარგულებების სისრულეში მოყვანა. მამასახლისის ევალეობდა: სამხედრო დეზერტირების, მთავრობის მოწინააღმდეგეების, ქურდ-ყაჩაღებისა და წესრიგის დამრღვევთა დაკავება. იგი ვალდებული იყო აგრეთვე თვალყური ედევნებინა მთელი საზოგადოების მოქმედებისათვის და საექვო შემთხვევაში ყოველივე ბოჭაულის, მაზრის უფროსისა და გუბერნატორისათვის შეეტყობინებინა, აუცილებლობის შემთხვევაში ბოჭაულს შეეძლო პოლიციური რაზმის გამოძახება და დადგენილ ფარგლებში მოქმედება.

როგორც სპეციალური დებულებით იყო ნავარაუდები, რეფორმის გატარების შედეგად სვანეთში სასოფლო-სათემო საზოგადოების უმალესი ორგანო გახდა ყრილობა, რომლის მუშაობაში მონაწილეობდა ყველა ოჯახის უფროსი („მახვში“). ამ ყრილობის უფლებებში შევიდა: თემის თანამდებობის პირთა არჩევა, ოჯახის გაყოფაზე ნებართვის გაცემა, საზოგადოებრივი საქმეებისათვის გარკვეული გადასახადების დაწესება, უპატრონოდ დარჩენილებისადმი მეურვეობა, მავნე პირად მიჩნეულთა სოფლიდან გადასახლებაზე საკითხის დასმა, სახაზინო და საერობო გადასახადებისა თუ თემის საზოგადოებრივი დაწესებულებების შესანახი სახსრების კომლობრივი განაწილება და სხვ.

სოფლის ყრილობის დადგენილება კანონიერად ითვლებო-

* ბალსემო სვანეთში მხოლოდ ზოგიერთ თემს ჰქონდა საერთო საძოვარი. სხვა შემთხვევაში ასეთი საძოვარი თემის ცალკეული სოფლის მფლობელობაში იყო. ასე მაგალითად, კალის თემში არც ერთ დანარჩენ სოფელს არ შეეძლო ხალდეს საძოვრებით ესარგებლა, ასევე, ვიჩნაშის, დაუბერის, იფრალის, ლალხორის სოფლები ცალ-ცალკე ფლობდნენ საძოვრებს. ასეთივე სურათი იყო სვანეთის უდიდეს ნაწილში.

და. თუ მას ოჯახის უფროსთა ნახევარი მაინც ესწრებოდა; საკითხები ხმების უმრავლესობით წყდებოდა. მნიშვნელოვანი დადგენილების გამოსატანად აუცილებელი იყო ხმების ორი შესამედი მაინც.

როგორც აღვნიშნეთ, ლევაშოვმა 1869 წელს სათემო სასამართლოებიც დაარსა. სასოფლო-სათემო საზოგადოების მიერ არჩეულ სასამართლო ორგანოს შემადგენლობაში, მოსამართლესთან ერთად, სოფლის თავკაცებიც შევიდნენ (მათ რაცხვს თითოეული საზოგადოება თავის შეხედულებებისამებრ საზღვრავდა. როგორც წესი, ერთი საზოგადოების სასამართლო ორგანოში დაახლოებით 10—20 ასეთი თავკაცი ირჩეოდა).

სასოფლო-სათემო სასამართლოს უფლებამოსილებას, დებულების შესაბამისად, მხოლოდ უმნიშვნელო სამოქალაქო საქმეების განხილვა-გადაწყვეტა შეადგენდა. სასამართლო ფუნქციას 100 მანეთის ფარგლებში დაჯარიმება ექვემდებარებოდა, აგრეთვე ექვსი დღით საზოგადოებრივი სამუშაოს მისჯა, ურთიერთმიყენებული მატერიალური ზარალის ანაზღაურებინება და სხვა მსგავსი საქმეები. მამასახლისს ფორმალურად არ შეეძლო სასამართლოს მსვლელობაზე გავლენის მოხდენა, მაგრამ იგი სინამდვილეში სასამართლოს მთელ საქმიანობას თავისი შეხედულებისამებრ წარმართავდა. მამასახლისის ხელში იყო აღმასრულებელი უფლებებიც.

ასეთია ის ფუნქციები (უფლება-მოვალეობანი), რაც მთავრობის სპეციალური დებულებით ყრილობას და მამასახლისს მიენიჭათ, აგრეთვე, მათი მოწვევის წესი და მოქმედების სფერო.



ინტერესს არ უნდა იყოს მოკლებული ზოგიერთი საკითხი, რომელიც სვანეთში ე. წ. „გვაროვნულ“ ინსტიტუტებთანაა დაკავშირებული. სვანეთში და, კერძოდ, ბალსზემო სვანეთში „გვაროვნული“ სახალხო მმართველობის არსებობას ერთ-ერთ მაჩვენებლად სწორედ ყრილობა და მახვილია

წარმოდგენილი. რეფორმით შემოღებული სასოფლო-სათემო საზოგადოების უმაღლესი ორგანო — ყრილობა — სვანეთისადმი მიძღვნილ ეთნოგრაფიული და ისტორიული ლიტერატურის უდიდეს ნაწილში უძველესი დროიდან მოქმედ გვაროვნული საზოგადოების ინსტიტუტადაა მონათლული, ხოლო მამასახლისის („სტარშინას“) ფუნქციები და მოვალეობა ოჯახის უფროსის — „მახეშის“ ფუნქცია-მოვალეობადაა გასაღებული. მართალია, ზოგიერთი მოხელე თუ მოგზაურ-მკვლევარი სვანეთში ადრეც მოიხსენიებს მამასახლისს („სტარშინას“ და არა „მახეშის“), მაგრამ ეს მხოლოდ რუსეთის სათემო მმართველობის სათანადო ტერმინების გაელენით აიხსნება. რაც შეეხება რეფორმის შემდეგდროინდელ სვანეთს, როგორც ვნახეთ, აქ ყრილობის ორგანოს არსებობა ფაქტია. სწორედ რეფორმის შედეგად შემოღებულ ყრილობასა და მამასახლისზეა ლაპარაკი ნ. დუბროვინის ნარკვევში¹. შემდგომ სვანეთის მმართველობის საკითხზე სტატიას აქვეყნებს სვანეთის ბოქაული ი. მამაცოვი, რომელიც აღნიშნავს, რომ XIX საუკუნის პირველ ნახევრამდე სვანეთში არსებობდა „ფედერაციული რესპუბლიკები“, რომელთაც თითქოს საბჭოების ტიპის დაწესებულებები ჰქონდათ: «Члены этого федеративного Совета выбирались по большинству голосов. Каждое общество назначало по 24 человека. Цвирми (Симон) было местом заседания, куда собирались все члены два раза в год для разбора горученных им дел. Под ведением этого союзного схода находились дела, касающиеся всей вообще Сванетии, как например, объявление войны соседям, вызов ополчения, назначение главного начальника над ополчением, а равно и сотников и заключение мира. В случае нужды «лузроб» имел право облагать жителей податями для ведения войны и для других финансовых нужд... Решение или постановление этого союзного Совета было безапелляционно для всех сванетов, в знак чего и присягали образу «Шалиани». Эти советы не касались

¹ Н. Дубровин, Сванеты (Шаны) История войны и владычества русских на Кавказе, I, кн. II, Санкт-Петербург, 1871, стр. 94.

მუდრენიგო ურუვრენი სუანეთი, თ. კ. კაჟდოე იბშეთ-
ვო სოოო ჯოვედოოოო სოოიმი დელაში»¹.

როგორც ჩანს, ამ ფანტაზიურ წერილს, რომელიც არა-
ერთარ სარწმუნო საბუთს არ ეყრდნობა (ერთმანეთშია არე-
ული ფედერაციული რესპუბლიკები, საბჭოები და ყრილობა),
საბაბი მიუცია ზოგიერთი სხვა ავტორისათვის არა მარტო ეს
შეთხზული მოსაზრება მიეღო, არამედ თვითონაც ახალი აზ-
რები გამოეგონა.

სუანეთის მმართველობის შესახებ თავის მოსაზრებას
გვაწვდიან ი. ივანიუკოვი და მ. კოვალევსკი, რომლებიც
საერთო ნარკვევში წერენ: «Военный пристав..., его
помощник и выборные обществами старшины суть
единственные представители власти в Сванетии...»²,
აღნიშნული მკვლევარები ქვემოთ ეხებიან მესტიაში აზნაურ
ჯაფარიძეთა ბატონობის დამხობას და „ისტორიულ“ თვით-
მართველობის დახასიათებისას წერენ: «Избавившись от
дворян, жители местийского общества стали управ-
ляться сами собою, собираясь с этою целью на на-
родные сходы (джан-назуран*) и выбирая на них осо-
бого старейшину, занимавшего должность бессрочно, до
тех пор, пока дурное поведение его заставит подумать
народ о новом выборе. Старшина этот носил то же на-
звание, какое принадлежит доселе старейшему во дворе
(«Махвши»); буквально слово это означает: старший.
Кроме старшины, — ганагროძობენ მკვლევარები, — сходы
выбирали еще двенадцать человек так называемых «ми
бари» (выборные) (?), обязанностью которых было
между прочим, следить за тем, чтобы никто не работал
по пятницам, субботам и воскресениям. Виновных в на-
рушении таких запретов подвергали штрафованию. На-
родные сходы созываемы были с помощью особых, поч-

1. И. Мамацов, Заметки о Сванетии, газ. «Кавказ», 1872,
№ 121.

2 Журн. «Вестник Европы», кн. 8-ая, стр. 575.

* ლაპარაკია „ლუზორ“-ზე, რაც რაიმე საქირობოტო საკითხთან და-
კავშირებით ხალხის თავმოყრა-შეკრებას ნიშნავს.

თი საჯენო ტრუბ... უტატიე ვ სოტრანი პრინიპალი ვსე სოვერენოლეთნიე, ნე თოლკო მუჟიყინი, ნო ი ჟეშყინი. დუა პოსტანოვი რეშენიე ტრეოვალოსე ედინოგლასიე: პო პოსლედნეო, ოევიდნო, ნელეგკო ბილო დოსტიგნუტი, ოსობენლო ესლი პრინიე ვო ვნიპაშიე, ჟო ნაიბოლესე ვლიყთელესე გრადიე იულილესე ია დჟან-ნაზურან კაჟდუი ვ სოპროვოჟენიი სოეი პარტიი ი პრითო ნე ბეზორუჟეშენი...»¹. ოგივე შკვლევიარები ჭვემოთ მიუთითებენ, რომ «სობუტია, ოლისანიე ნაიი ვ მესტინ, ს ნეკოტორიი ვარიანტაიი პოვტორიისე ი ვ ლიობო იზ ოსტალესი ობშესტვ ვოლნიოი სვანეთი. ვ კაჟდო ვოზნიკაე სოი ნაროდნიი სოხო (დჟანნაზურან), ნაიყვალუიყსე ტაჟე ვ ნეკოტორი ობშესტვაჟ «ლუხორ» ილი «ლუზორ». მესტო ეო სოტრანიი სლუჟიტ სპეციალნო ოთვედენიე პლოყად, სოეო როდო ფორუმ, პო-სვანეთსკი «ლახორ». ნაროდნო სოტრანიე კაჟდო ობშესტვო ვიბირაე სოეო სტარშინუ, კოტორი, პოდობნო ანგლიისკო მუროვო მუდუე, ოსტაეჟე ვ დოლჟნოჟ «*dignante gesserit*», თო ესე პოკა ეო დურპოე პოვედენიე ნე სდელათ ნუჟნიე ვ გლავაჟ ნაროდა ნაიყვალუი ემუ პრესმიაჟკა»².

როგორც ამ ამონაწერებიდან ჩანს, საკითხი მართლაც 1869 წელს რეფორმის შედეგად დაარსებულ ყრილობას და მამასახლისს ეხება (ამის შესახებ ავტორთა მიერ პირველ ამონაწერში პირდაპირაა ნათქვამი). შემდეგ ი. ივანიუკოვსა და მ. კოვალევსკის (ი. მამაცოვისა და ბ. ნიყარაძის ნაამბობის საფუძველზე) უცდიათ თავიანთი სქემის შევსება და სვანური ტერმინების მოშველიებით ხსენებული ყრილობა და მამასახლისი წარსულში გადააქვთ — ყრილობას გვაროვნული საზოგადოების ინსტიტუტად ნათლავენ, ხოლო მამასახლისს (სტარშინას) — „მახვილ“. როგორც ადრე აღვნიშნეთ, „მახვიში“ არც ერთ ადრინდელ ისტორიულ საბუთში არ გვხვდება³, ხოლო სვანური ტერმინები „ლუზორ“, „ლუხორ“ რაიმე სა-

¹ Журн. «Вестник Европы», XII. 8-я стр. 603.

² იქვე, გვ. 604.

³ იხ. გ. გასვიანი, სვანეთის ისტორიის ზოგიერთი საკითხი, ჟურნ. „მნათობი“, 1968, № 7, გვ. 173

ჭირბოროტო საკითხთან დაკავშირებით ხალხის დროებით შეკრება-თავყრილობას ნიშნავს და არაფერი საერთო არა აქვს მთავრობის მიერ შემოღებულ სასოფლო მმართველობის მულდმივმოქმედ ორგანოსთან — ყრილობასთან და არც იმ გვაროვნულ ინსტიტუტთან, რომელსაც ზოგიერთი მკვლევარი გვთავაზობს.

ი. ივანიუკოვმა და მ. კოვალევსკიმ წინასწარ შედგენილი გვაროვნული საზოგადოების სქემისათვის ხორცის შესწნის მიზნით რეფორმის შედეგად შემოღებული ყრილობის ჩატარებისა და მამასახლისის არჩევის წესი და მათი ფუნქციები სახელდახელოდ გამოგონილ „სვანურ გვაროვნულ ინსტიტუტებს — ყრილობასა და მახვშის“ მიაწერეს. თხრობის დამაჯერებლობისათვის საეკლესიო ნივთი — „სანეყირიც“ (საუვირი) მოიშველიეს. აღნიშნული მკვლევარები ქვემოთ კიდევ უფრო შორს მიდიან და წერენ, რომ სხვადასხვა თემთა ყრილობა თითქოს სულ სამ ადგილზე ტარდებოდა: «В Ушкунле, на площади, называемой Жибнапи, в поселке Цвирипи (სოფ. წვირპი — გ. გ.) местный общества, на площади, называемой Симок, и в Лалверс, селении, расположенном к западу от Эцери и более не существующем»¹.

აქ გარდა იმისა, რომ ერთიმეორეშია არეული ადგილმდებარეობები (წვირპი მესტიისაგან დამოუკიდებელი, სულ სხვაგან მდებარე თემია, ხოლო მესტიაში დასახლებული მოედანი „სიმოკ“, სინამდვილეში „სიმონი“ მდებარეობს იფარის, წვირპისა და მულახის თემებს შორის), ყურადღებას იპყრობს ის, რომ ი. ივანიუკოვის და მ. კოვალევსკის განცხადებით ყრილობა (народный сход) მას შემდეგ გაჩნდა, რაც მესტიაში ჯაფარიძეთა ბატონობა დაამხეს². ამ შემთხვევაში სხვა უხერხულობას (ჯერ ბატონყმობის დამხობა და შემდეგ გვაროვნული ინსტიტუტების წარმოშობა) ემატება ის, თუ როგორ გავიგოთ სადადიშქელიანო სვანეთში გვაროვნული ყრილობის მოწვევა (ყრილობის ჩასატარებელ ერთ-ერთ ად-

¹ Журн. «Вестник Европы», кн. 8-я стр. 604.

² М. М. Ксвалевский, Закон и обычай на Кавказе, т. I и II, М., 1890.

ვილად ლალვერია მითითებულ). თუ დასახელებულ ნაკვეთ-
ვარებს მიაჩნდათ, რომ ყრილობას დადიშქელიანთა ყმები
იწვევდნენ, ნუთუ იმაზე არ დაფიქრდნენ, რომ ამას დადიშ-
ქელიანები არ დაუშვებდნენ? ხოლო „თავისუფალი“ სვანე-
თის წარმომადგენელთა ყრილობის მოწვევა სადადიშქელიანთა
სვანეთში კიდევ უფრო წარმოუდგენელია.

გარკვეული დროის შემდეგ მ. კოვალევსკიმ სვანეთში
აღრე „აღმოჩენილ“ ე. წ. „გვაროვნულ ინსტიტუტებს“ სლავ,
ჩერნიგორიელ, სერბ თუ სხვა ხალხებში შენიშნული გვა-
როვნულ-პატრიარქალური ინსტიტუტებიც მიუმატა და ყოვე-
ლივე ეს სვანეთზე გაავრცელა მექანიკურად. მ. კოვალევსკის
ჯამოკვლევამდე სვანეთის სასოფლო საზოგადოების მმართვე-
ლობის წარმომადგენლებზე 1875 წ. წერილს აქვეყნებს ლაზარე
დაღუანი, რომელიც წერს: „დიდი ხანი არ არის მას შემდეგ,
რაც სვანეთში მამასახლისები და სუდიები დააყენეს... უმე-
ტესად მამასახლისებად და სუდიებად, ვინც ქართული იცოდა
ის ამოირჩიეს. თავად-აზნაურობას სისხლი მოსდიოდათ ყელ-
ში, როდესაც გლეხებს ირჩევდნენ სოფლის მოსამართ-
ლედ... მულახის საზოგადოებაში ერთს გლეხკაცს და აზნაუ-
რიშვილს გვარიანი ჩხუბი შეექმნათ მაზედ, რომ თუ რო-
გორ იქნება თქვენი, გლეხების ჩვენს უმფროსებად დაყენე-
ბაო*. ჩვენ აზნაურნი ვართ და თქვენ ჩვენი მოყმე გლე-
ხები. დღეს აზნაურიშვილებმა უნდა მოვიყაროთ თავი და
ვთხოვოთ ქუთაისის გუბერნატორს უფ. ლევაშოვს, რომ
როგორც იმერეთში და რაჭა-ლეჩხუმში თავად-აზნაურობას
შიეცათ ფული გლეხების განთავისუფლებაზე, აგრეთვე ჩვენც
მოგვცენ“¹. როგორც ვხედავთ, ი. დაღუანმა კარგად იცოდა,
რომ სოფლის მოხელეები (მამასახლისი, მოსამართლე თუ
სხვა) მოსახლეობის მიერ ირჩეოდნენ მთავრობის მითითებით.

ი. დაღუანის შემდეგ მ. კოვალევსკიმდე და მის პარალელუ-

* როგორც ცნობილია, ბატონყმობის გაუქმების შემდეგ თანამდებო-
ბაზე არჩევისას წოდებრიობას გადამწყვეტი მნიშვნელობა უკვე არ ენი-
ჭებოდა, ამიტომ მამასახლისად თუ მომრიგებელ მოსამართლედ გლეხთა
წარიღანაც ირჩევდნენ.

1 ლ. დაღუანი, მამასახლისები და სუდიები სვანეთში, ეთნოგრა-
ფიული წერილები სვანეთზე, თბილისი, 1973, გვ. 26.

რად სვანეთის სასოფლო მმართველობაზე, კერძოდ, ყრილობისა და მახვშის შესახებ 1885 წელს ეთნოგრაფიულ წერილებს აქვეყნებს ბესარიონ ნიჟარაძე, რომელიც წერს: „სასოფლო ყრილობა იყო უზენაესი ინსტანცია სვანეთის იურიდიულს წესთ-წყობილებაში.“

სასოფლო ყრილობა დაბოლოვებით ათავებდა საზოგადო საქმეებს; არავის არ აძლევდა თავის მოქმედების ანგარიშს; არავის წინაშე პასუხისმგებელი არ იყო. ყრილობას დიდი რთული და მრავალგვარი უფლება ჰქონდა; იგი „მახვშის“ (მანასახლისის) თავმჯდომარეობით აყრიდა მოსახლეს, ერთს ან მეტს, გადასწავდა მის სახლ-კარს, განდევნიდა საზოგადოებიდან მავნე პირთ და დასჯიდა სიკვდილით თუ რომ საზოგადოების რომელიმე წევრს აღმოაჩნდებოდა, რომ იგი სცდილობს საზოგადოების რომელიმე თავადიშვილის ხელში ჩაგდებას საყმოდ — კერძო ინტერესებისათვის. ერთის სიტყვით, როგორც ხალხი ამბობს „ვერი მუქდენის“ — ქვეყნის მოღალატეს; სიკვდილით ისჯებოდა ადგილობრივ ეკლესიათა გამყარებაც¹. იქვე ნიჟარაძე სასჯელის საკითხს ეხება და მიუთითებს: „ახლანდელს მოდგმას თავის-თავად არ ახსოვს ვისიმე სიკვდილით დასჯა საზოგადოებისაგან“². მაგრამ ნიჟარაძე იმოწმებს ზეპირ გადმოცემას, რომლის მიხედვით, თითქოს იფარის საზოგადოებაში დაუსჯიათ ვინმე გულბანი, რომელსაც ამ საზოგადოებაზე გაბატონების მოსურნე ვილაც დევდარიანი-სადმი დახმარება დაბრალდება. იქვე ბ. ნიჟარაძე კვლავ ყრილობის ფუნქციებზე მსჯელობს და წერს: „სასოფლო ყრილობის საქმე იყო: ა) გადაწყვეტა სამტროდ წასვლისა (ლამახვალდ ლიზი) გარეშე ქვეყნებში... ბ) მათი დაბეგვრა და შერიგება, გ) კავშირის შეკვრა სხვა საზოგადოებასთან, როდესაც ეს საჭიროდ აღმოჩნდებოდა და დ) განაწილება მეკომურთა შორის გარდასახადისა, თუ ამ უკანასკნელს რაიმე შემთხვევა მოითხოვდა; მაგალითად, თუ

1 ბ. ნიჟარაძე, ისტორიულ-ეთნოგრაფიული წერილები, I. თბილისი, 1962, გვ. 85—86.

2 იქვე.

საზოგადოების რომელიმე წევრი საზოგადო მტერს, გარეშეს მოჰკლავდა, მაშინ საზოგადოება ვალდებული იყო ეზღო მოკლულის ქირისუფლისათვის „სისხლი“ (წორ) საერთოდ და თანასწორად ყოველს მეკომურს...

სასოფლო ყრილობა თავისის უფლებით სჯიდა ადგილობრივ ქურდებს... ქურდების დასჯა მდგომარეობდა ჯარიმის (პიბარ) გადახდევინებაში საზოგადოების და ნაქურდალის პატრონის სასარგებლოდ, რაოდენობა ქურდისაგან ამოსაღებ ჯარიმისა ყრილობის შეხედულებასა და ნებაზე იყო დამოკიდებული, ქურდის ნივთიერის შეძლებისა და მდგომარეობის მიხედვით¹. ქვემოთ ბ. ნიჟარაძე ეხება ყრილობის სხვა ფუნქციებსაც და მიუთითებს ამ ყრილობათა თავშესაყარ ადგილებზე, კერძოდ, ლალვერზე, სვიმონზე და უშგულზე.

თუ ჩავუყვირდებით ბ. ნიჟარაძის აღწერილს, ცხადია, საკითხი 1869 წელს რეფორმით შემოღებულ ყრილობას, მამასახლისს და მათ ფუნქციებს ეხება (ოლონდ გაზვიადებულ ფორმაში — სიკვდილით დასჯა, გადაწვა, საომრად წასვლა და სხვ.), თან ამ დაწესებულებათა მოქმედება წარსულ დროშია გადატანილი. ეს რომ ასეა, ჩანს იქიდანაც, რომ ბ. ნიჟარაძე ერთ შემთხვევაში ყრილობის ერთ-ერთ ფუნქციად გადასახადების მეკომურთა შორის განაწილებაზე მიუთითებს; ცხადია, აქ ლაპარაკია რეფორმის შედეგად შემოღებულ გადასახადებზე, რომელიც სასოფლო საზოგადოების მმართველობას კომლობრივად უნდა დაეყო. სხვა შემთხვევაში ბ. ნიჟარაძე 1875 წელს მოწვეულ სვანეთის ყრილობაზე (აჯანყებისათვის მზადებას რომ მიეძღვნა) მსჯელობს და დასძენს, რომ ფ ე დ ე რ ა ტ ი უ ლ ი რ ე ს პ უ ბ ლ ი კ ი ს მსგავსი ყრილობის ნოწვევის საკითხი სასოფლო ყრილობებმა გადაწყვიტესო; ქვემოთ იგივე ავტორი სოფ. დაუბერში მოწვეულ სასოფლო ყრილობას ეხება და წერს, რომ 1880 წელს კალის საზოგადოებაში ვილაც პირმა მეზობელს ცხვარი მოპარა, ამ დანაშაულმა როგორც კი საზოგადოების ყურამდე მი-აღწია, „მაშინვე სოფლის ყრილობა მოხდა.

¹ ბ. ნიჟარაძე, ისტორიულ-ეთნოგრაფიული წერილები, 1, გვ. 85—96.

მიადგა ქურდს, წაართვა ერთი ხარი და ორი ცხვარი; ორი ცხვარი მოპარული ცხვრის პატრონს მისცა ყრილობამ და ხარი თვით მოიხმარა — დაჰკლა და შეჭამა. როდესაც აღგილობრივ ადმინისტრაციამ თვითმნებლობისათვის უკმაყოფილება გამოუცხადა ყრილობას ამგვარ უკანონო მოქმედებისათვის და დააპირა ხარის გადახდევინება... ამგვარი შემთხვევები, — დაასკვნის ბ. ნიჟარაძე, — სხვა საზოგადოებაშიც ბევრი გვინახავს უკანასკნელ ხანებში“¹.

როგორც ვხედავთ, ეჭვი არ შეიძლება იყოს, რომ საკითხი მთავრობის მიერ შემოღებულ სასოფლო ყრილობას ეხება. ეს კარგად ჩანს იქიდანაც, რომ ყრილობის მიერ ქურდის მეტრისმეტად მკაცრ დასჯას ადმინისტრაციის უკმაყოფილება გამოუწვევია. აღსანიშნავია, რომ მითითებული წერილები² გამოქვეყნებამდე ბ. ნიჟარაძე რამდენიმე წელიწადს (1878—1883 წ.) სვანეთის საბოქაულოს საქმისმწარმოებლად მუშაობდა² და, ცხადია, მან კარგად იცოდა მთავრობის მიერ დაარსებული სასოფლო მმართველობის ორგანოთა ფუნქციები.

ასეთია ჩვენთვის საყოველთაოდ ცნობილი „ყრილობის“ და „მახვშის“ უფლება-მოვალეობანი და მათი ისტორიულ-ქეშმარიტებითი არსი.

ვინც კი სვანეთს შეეხო და იქ გვაროვნული წყობილების ან მისი „მრავალრიცხოვანი“ და „მნივწნელოვანი“ გამომონაშთების აღმოჩენა სცადა (ან მათი არსებობა ირწმუნა), ამოსავალ წყაროდ ი. მამაცაშვილის (მამაცოვი) და ბ. ნიჟარაძის ეთნოგრაფიული წერილები გაიხადა. მათ რიცხვს განეკუთვნებიან მ. კოვალევსკი, ი. ივანიუკოვი (რომლებიც ამა-

¹ ბ. ნიჟარაძე, ისტორიულ-ეთნოგრაფიული წერილები, I, გვ. 87 (ხაზგასმა ჩვენია — გ. გ.).

² ბ. ნიჟარაძის ბიოგრაფია, ისტორიულ-ეთნოგრაფიული წერილები, I, გვ. 11.

ზე პირდაპირაც მიუთითებენ)¹, რ. ერისთავი², ე. გაბლიანი³, ბ. დეგენ-კოვალევსკი⁴, რ. ხარაძე⁵ და სხვები.

ამ მცირე შენიშვნაში შეუძლებელია „ყრილობის“, „მახვ-
შის“ და ამგვარი ე. წ. „გვაროვნულ“ ინსტიტუტებზე დაწე-
რალ ნარკვევთა მთელი შინაარსის გადმოცემა, თუმცა არც
ერთ მათგანში არ არის დამოწმებული რაიმე სარწმუნო წე-
რილობითი წყარო, რომელიც „მახვშის“ და „ყრილობის“
ინდაგვარ გაგებას და მათ ისტორიულობას დაუჭერდა მხარს,
როგორც ზემოაღნიშნულ მკვლევართა მიერაა ისინი წარმოღ-
ვენილი.

თანამედროვე მკვლევართაგან „მახვშის“ ეხება ა. ჩარკ-
ვიანი, რომელიც წერს: „ზღაპრულია გადმოცემა, რომ თით-
ქოს „თემს“ (საგვარეულოს) XIX საუკუნეში ჰყავდა ამორჩე-
ული, ან დანიშნული მახვში. რა თქმა უნდა, გვარში თავისი
ასაკით, გამოცდილებით და გავლენით გამოირჩეოდნენ პი-
რები, რომელთა მოსაზრებას ნათესაობაში განსაკუთრებული
ანგარიში ეწეოდა, თუმცა გვარს თუ საგვარეულოს ოფიცია-
ლური, რეალური ე. წ. საერთო მახვში არ ჰყოლია⁶.
მკვლევარი განმარტავს „მახვშის“ ცნებას, რომ იგი ოჯახის
შეთაურს — უფროსს ეწოდებოდა. რომ იგი იყო ოჯახში
ჟველაზე ხანშიშესული, ცხოვრების გამოცდილების მქონე
გავლენიანი პირი და აქვე დასძენს: „მახვში არ ინიშნებოდა,
არ ირჩეოდა, ის თვითონ ხდებოდა ოჯახის უფროსი“⁷.

გადაჭრით უნდა ითქვას, რომ „მახვში“ (ხოშა-ხნით უფ-
როსი) ოჯახის უფროსია. ქართული ტრადიციით ოჯახის უფ-
როსად ასაკით უფროსი მამაკაცი ითვლებოდა (უმამაკაციოდ

1 Журн. «Вестник Европы», т. IV, кн. 8-я, 1886, стр. 580, 582, М.,
Ковалевский, Закон и обычай на Кавказе, т. I и II, М., 1890.

2 Р. Д. Эрнстов, Заметки о Сванетии, Тифлис, 1898.

3 ევ. გაბლიანი, თავისუფალი სვანეთი.

4 Б. Е. Деген-Ковалевский, Сванетское селение как ис-
торический источник, Советская этнография, № 4—5, М.-Л., 1936.

5 რ. ხარაძე, დიდი ოჯახის გადმონაშთები სვანეთში, თბილისი, 1939;
მისივე. სახალხო მმართველობის სისტემა სვანეთში, მასალები საქარ-
თველოს ეთნოგრაფიისათვის, VI, თბილისი, 1953 და სხვ.,

6 ა. ჩარკვიანი, სვანეთი. თბილისი, 1967, გვ. 67.

7 იქვე.

დარჩენილ ოჯახში ასევე ხნით უფროსი ქალი, თუმცა სვანეთის სინამდვილეში ოჯახის უფროსი ქალის ცნებაც — „ქორა მახვში ზურაალ“ გამოგონილია. როგორც ჩანს, ამ შემთხვევაშიც სვანეთზე მექანიკურადაა გავრცელებული სერბი ხალხის ოჯახის ყოფისათვის ერთ დროს დამახასიათებელი „დომაჩიცას“ ინსტიტუტი).

ცხადია, მრავალრიცხოვან ოჯახში მოხუცს (ასაკით ყველაზე უფროსს), რომელსაც დიდი დამსახურება ჰქონდა, რამდენიმე შვილი, შვილიშვილი და და-ძმები ჰყავდა, უპირატესობა და პატივისცემა ჰქონდა (მოხუცის კულტი მთელ კავკასიაში არსებობდა). შემთხვევითი არ არის ქართული ფეოდალური სამართლისათვის დამახასიათებელი „საუფროსოს“ ინსტიტუტი, როდესაც ოჯახი გაიყრებოდა, უფროსს, რიგით წილთან ერთად, დამატებით საუფროსო წილიც ეძლეოდა.

ფაქტია, უფროსისადმი პატივისცემას სვანეთშიც ჰქონდა ადგილი. მოხუცი, რომელიც დამსახურებით, ჰკუთნებდა, გამოცდილებით და სხვა დადებითი თვისებებით გამოირჩეოდა, სთანადო გავლენით სარგებლობდა არა მარტო საკუთარ ოჯახში, არამედ საძმოში („ლანხუბ“-ში), გვარში, სოფელში და ზოგჯერ მთელ კუთხეშიც. რაც შეეხება ოჯახის უფროსის „მახვშის“ იმდაგვარ ვაგებას, თითქოს იგი საძმოს, გვარისა და თემის უფროსი იყო — სინამდვილეს არ შეეფერება. მართალია, საძმო სისხლით ნათესავ ოჯახებს აერთიანებდა, მაგრამ იგი შედგებოდა ცალკეული დამოუკიდებელი ოჯახებისაგან, რომელთაც თავ-თავისი უფროსი ანუ „მახვში“ ჰყავდათ. გვარს (რომელიც, როგორც სისხლით ნათესაობაზე და სამეურნეო ერთიანობაზე აგებული ერთეული, დაშლილი იყო და არა ნათესავ განშტოებებისაგან შედგებოდა) არც შეიძლება დაჰქვემდებარებდა მთელ გვარს, მით უფრო თემს, რომლის მოსახლეობა არა მარტო სხვადასხვა გვარეულობისაგან შედგებოდა, არამედ სხვადასხვა წოდების გვარებისაგანაც. სხვათა შორის, თვით ტერმინებიც „ლანხუბი მახვში“ (საძმოს უფროსი), „გვარი მახვში“ (გვარის უფროსი) და „თემი მახვში“ (თემის უფროსი) ხელოვნურადაა გამოგონილი, ასეთი ცნებები არ არსებობენ.

სულ სხვა საკითხია ადმინისტრაციული თანამდებობის პირის — „მახვიის“ სახელწოდებით მოხსენიება. როგორც ირკვევა, რუსეთთან შეერთებისა და ადმინისტრაციული მმართველობის შემოღების შემდეგ ტერმინმა „მახვიმ“ (ისევე, როგორც „უფროსმა“) ახალი შინაარსიც შეიძინა და მისი ცნება გაფართოვდა. ამგვარად, „მახვი“, ოჯახის უფროსის გარდა, თანამდებობის პირსაც ეწოდებოდა, მაგალითად, მამისახლისს, ბოქაულს, მოსამართლეს და ა. შ. როგორც ჩანს, მოცემულ პერიოდში ზემოაღნიშნულის გავლენით ეს ტიტული თავადთა წოდების წარმომადგენლის აღმნიშვნელიც გახდა, მაგალითად, „მახვი ფუთა“ და სხვ.



მეფის მთავრობის მიერ განხორციელებული სასოფლო მმართველობის რეფორმა მებატონეთა გამგებლობასთან შედარებით პროგრესული მოვლენა იყო, მაგრამ სასოფლო საზოგადოებათა ახლებურმა მოწყობამ სვანეთის ცხოვრებაში ფაქტიურად დიდი სიახლე ვერ შეიტანა.

მნიშვნელოვანი საქმეები სოფლის მოხელეთა შეხედულებებისამებრ წყდებოდა. ახლად შემოღებული მმართველობის არსებითი ნაკლი ისიც იყო, რომ იგი ძალდატანებით რუსიფიკაციას ემსახურებოდა. საქმის წარმოება ადგილობრივი ხალხისთვის გაუგებარ რუსულ ენაზე წარმოებდა, რის გამო გლეხობა იძულებული იყო ზოგჯერ პროგრესული ღონისძიებებისთვისაც ზურგი შეექცია და მოძველებული ადათ-წესებით ემოქმედნა.

ახლად შემოღებული სასოფლო მმართველობა ანგარიშს არ უწევდა მოსახლეობის ეკონომიკურ შესაძლებლობას, მთავრობა არაავითარ სახსრებს არ ხარჯავდა სოფლის ცხოვრების გარდაქმნისათვის. იგი არ ითვალისწინებდა თავის ხარჯზე სკოლების, საავადმყოფოების, სავაჭრო და კულტურულ-საგანმანათლებლო დაწესებულებების დაარსებას, გზების გაყენას და სხვ. ამასთანავე, ცხოვრების ახლებურ მოწყობას მხოლოდ გლეხობაში აკრეფილი სახსრებით ცდილობდა. ამი-

ტომ, მიუხედავად ახალი მმართველობის შემოღებისა, მეფის მთავრობამ სვანეთის მშრომელი ხალხის ცხოვრების პირობები ვერც რეფორმის შემდგომ გააუმჯობესა, მისი ყოველგვარ ღონისძიებები ფაქტიურად ქალაქებში რჩებოდა.

სასოფლო მმართველობის შემოღების არსებითი ნაკლი ისიც იყო, რომ ეს რეფორმა მხოლოდ მშრომელებს შეეხო და საზოგადოების რომელიმე წევრის დანაშაულზე პასუხს მთელი საზოგადოება აგებდა. ახლად შემოღებული ე. წ. ურთიერთთავდებობის სისტემისას პასუხისმგებლობა მხოლოდ მშრომელებს ეკისრებოდათ. ამ ნაკლოვანებაზე ილია ჭავჭავაძე ჯერ კიდევ ადრე მიუთითებდა: „თუ გლეხკაცმა დააშავა რამე, წაუხდინა რამ ვისმე, ან მღვდელს, დიაკვანს, მღვდელს ნება აქვს იქავ თვალწინ, უხარჯოდ, მოუცდენლად, სოფლის სასამართლოს შემწეობით, გადაახდევინოს გლეხს სასჯელი, თუ საზღაური; და თუ არა — გლეხმა გლეხს დაუშავა რამე, წაუხდინა, პირობა არ აუსრულა, საწყალი გლეხი იძულებულია ათს, ოცს, ოცდაათს ვერსზე გაიქცეს, მომრიგებელ მოსამართლეს მიმართოს, რამდენიმე დღე წასვლა-მოსვლაში დაკარგოს, მერე რამდენიმე თვე საქმის გარჩევას ელოდოს... ყველა ეს იმისთანა მძიმე რამ არის გლეხისათვის, რომ მის გამო გლეხი უფრო ხშირად იძულებულია თავისი დაჩაგვრა არა — გლეხისაგან გულში გაბოროტებით ჩაიმარხოს, ხელი აიღოს საჩივარზედ, გული აიყაროს თავის სამმართველოზედაც, რომელიც უღონოა დიდის წინაშე. რა წარმომადგენელია უფლებისა იგი წყობა, რომელიც დიდის წინ ნაცრად იქცევა ხოლმე და დაბლის წინ — ცეცხლად?! რა პატივით უნდა უყურებდეს გლეხი იმ მმართველობას, რომელიც დიდისაგან გაჭირვებულს არ ესარჩლება, არას შველის, და რომელიც დიდისათვის კი თავს გამოიდებს ხოლმე...

ყოველ ამის გამო, ჩვენის სოფლის სამმართველო და მისნი მოხელენი პოლიციის ბრმა მსახურებს და დარაჯებს უფრო წარმოდგენენ, ვიდრე სოფლის საზოგადოების ინტერესებს“¹.

¹ ი. ჭავჭავაძე, ნაწერების სრული კრებული, VIII, თბილისი, 1928, გვ. 64—70.

ი. ჭავჭავაძის მიერ მოცემული ეს კლასიკური დახასიათება კარგად ასახავს სვანეთის სათემო მმართველობის მთელ დედაარსს და მის ნაკლოვანებებს. საქმე ის არის, რომ სიმართლის ძებნა აქ ცაგერში ან ქუთაისში წასვლასთან იყო დაკავშირებული, სადაც, აგრეთვე, გლახს სიმართლის პოვნის არავითარი გარანტია არ ჰქონდა. სასოფლო-სათემო მმართველობის მანკიერებას ჯერ კიდევ 1875 წელს შეეხო ლაზარე დადუანი. მისი გადმოცემით, მუჟალში ერთმა აზნაურმა გლახის ეზოდან ხარი წაიყვანა. როცა ეს გლახმა შეიტყო, მივიდა აზნაურთან და შეეხვეწა ხარი დაებრუნებინა, მაგრამ აზნაურმა ხარი დაკლა და მთელი კვირა იქეიფა. ამის თაობაზე გლახმა მამასახლისთან და მომრიგებელ მოსამართლესთან იჩილა, მაგრამ მის ჩივილს ყური არავინ დაუგდო, სანამ სახლში არ დაპატიჟა და ცხვარი არ დაუკლა. ქეიფის შემდეგ მამასახლისმა და მომრიგებელმა გლახის საქმე დაივიწყეს. რადგან გლახმა ადგილზე ვერაფერი გააწყო, მაზრის უფროსთან იჩილა, მაგრამ ლეჩხუმში სიარულითაც ვერაფერს გახდა და ბოლოს იძულებული შეიქნა ჩივილი შეეწყვიტა¹. აღმინისტრაციულ მმართველთა უკანონო მოქმედებასთან ერთად ლ. დადუანი აგვიწერს სასოფლო-სათემო სასამართლოში გამეფებულ მექრთამეობასა და განუციტხაობას. სასამართლოში არჩეულმა მომრიგებელმა მოსამართლემ და ხევისთავებმა (ლაპარაკია სოფლის თავკაცებზე — გ. გ.), — წერს ლ. დადუანი, — გარკვეულ სიკეთესთან ერთად ბევრი საქმეც წაახდინეს, როდესაც ისინი საქმის მოსაგვარებლად დამნაშავეის ოჯახში მიდიან, არყით, ხორციით და პურიით ძღვებიან, ხოლო დანაშაულს ხუთმაგად ანაზღაურებინებენ (ორმაგს დაზარალებულს უბრუნებენ და დანარჩენს თვითონ იტოვებენ)². სოფლის სასამართლოს ამგვარ მოქმედებაზე ლ. დადუანი არაერთხელ მიუთითებს.

აღნიშნული სისტემის გამო სვანეთში კანონმდებლობასა და ოფიციალურ მოხელეებს იშვიათად თუ ვინმე მიმართავდა. მთავრობის ღონისძიებებს თუ ცალკეულ მოხელეთა უკანონო

1 ლ. დადუანი, მამასახლისი და სუდიები სვანეთში, გვ. 28—29.

2 იქვე, გვ. 39.

მოქმედებას ხალხი ხშირად პროტესტითა და შეიარაღებული გამოსვლით ხვდებოდა.

არსებული მონაცემებს მიხედვით სვანეთის საბოქაულო-ში, სასამართლო ორგანომ სამოქალაქო საქმეებთან დაკავშირებით განიხილა შემდეგი საკითხები (იხ. ცხრილი 1)¹:

საქმე აღიძრა	ცხრილი	
	საქმეთა რაოდენობა*	
	1886 წ.	1887 წ.
ქონებრივ დავაზე	22	16
სახაზინო საქმეზე	4	—
სხვადასხვა საქმეზე	2	1
ვალის გადაუხდელობის გამო	16	13
პირად ვალდებულებასთან დაკავშირებით	3	4
ზიანთან და ზარალთან დაკავშირებით	9	1
მეურვეობის გამო	6	—

რა თქმა უნდა, ეს მონაცემები სრული არ შეიძლება იყოს, რადგან გლეხს მხოლოდ უკიდურესობა აიძულებდა სასამართლოსათვის მიემართა. ამიტომ დანაშაულთა დიდი ნაწილი შინაურული ადათ-წესით წყდებოდა. მიუხედავად ამისა, ძარცვა, ქურდობა თუ სხვა ამგვარი დანაშაული სვანეთში საერთოდ იშვიათად ხდებოდა. მოგზაურს შეუძლია, — წერს ვ. ტეპცოვი, — დაშვებულნი შემოუაროს მთელ სვანეთს ისე, რომ არ ჰქონდეს გაძარცვის შიში².

წერილობითი მონაცემების მიხედვით 1886 წელს სვანეთში მოხდა სისხლის სამართლის დანაშაულობანი (იხ. ცხრილი 2)³.

ცხრილში მოცემულიდან 1 თავადი და 5 გლეხი მისცეს პასუხისმგებლობაში პოლიციელისა და სასამართლოსადმი შეურაცხყოფის გამო, აქედან ერთ თავადს და ერთ გლეხს ფულადი

1 В. Я. Тепцов, Сванетия, СМОМПК, вып. X, отд. I, стр. 63.

* რადგან ყველა წლის მონაცემი არ მოგვეპოვება, იძულებული ვართ მხოლოდ აღნიშნულით ვისარგებლოთ.

2 В. Я. Тепцов, Сванетия, стр. 63.

3 იქვე.

დანაშაულის სახე	აზნაური		თავადი		გლები	
	მამრ.	მღ.	მამრ.	მღ.	მამრ.	მღ.
მიცემულ იქნა სისხლის სამართლის პასუხისმგებლობაში განთავისუფლებულ იქნა სისხლის სამართლის პასუხისმგებლობისაგან	1	—	17	1	83	4
	—	—	11	1	20	1

ჯარიმა მიუსაჯეს, ხოლო 4 გლებს პატიმრობა. სულ 106 ბრალდებულიდან 33 გამართლდა. თუ ჩავთვლით, რომ ყველა დანარჩენი დამნაშავე იყო, გამოდის, რომ ერთი წლის განმავლობაში მთელ სავანეთში სისხლის სამართლის 73 დანაშაული მოხდა. ამ შემთხვევაში ძნელია თავს ვიღოთ ამ მონაცემების სიზუსტე, მაგრამ ერთი რამ ფაქტია — სისხლის სამართლის დანაშაულის და მათ შორის მკვლელობის საქმეს მეფის მოხელეები აღურიცხავს ნაკლებად ტოვებდნენ. ამდენად, საფუძველსმოკლებული და გაზვიადებულია ზოგიერთი მოხელის, მოგზაურისა თუ მკვლევარის განცხადება — სვანეთი თითქოს სისხლის აღებისა და ხოცვა-ჟლეტის მოედანს წარმოადგენდა*.

* დ. დობროვოლსკის განცხადებით, სვანეთში მამაკაცები თითქოს თავისით იშვიათად კვდებოდნენ, არამედ ერთმანეთს კლავდნენ, რის გამოც მოხუცებულები არ არიანო (იხ. ЗКОСХ, № 6, 1868, გვ. 209). ასეთივე განცხადებას აკეთებს ნ. დუბროვინი, რომლის მიხედვით „სვანეთში ვერ ნახავთ კაცს, რომელსაც სხვა არ ყავდეს მოკლული“ (იხ. Сванети, История войны и владычества русских на Кавказе, I кн. 2-я, III, 1867). მსგავს მოსაზრებას გამოთქვამენ: ევგ. კოვალევსკი (журн. „Вестник Европы“, III, 1867) და ბორის კოვალევსკი (Страна снегов и башен „Придон“. 1913). სამწუხაროა, რომ აღნიშნულ უსაფუძვლო და ტენდენციურ მოსაზრებას ზოგიერთი თანამედროვე მკვლევარიც იმეორებს. მაგალითად, ვ. ჯაოშვილისა და მ. შენგელიას ნარკვევის მიხედვით, სვანეთის მოსახლეობის რიცხოვნობის მიზეზად უკვე ერთ-ერთ დამაბრკოლებელ მიზეზს „სისხლის აღების წესი“ და „მეზობელ თემებს შორის დაუსრულებელი შუღლი“ წარმოადგენდა (იხ. სვანეთის მოსახლეობა, კრებულში: მაღალმთიანი რაიონების ეკონომიურ-გეოგრაფიული ნარკვევი, თბილისი, 1970, გვ. 61).

ახალი მმართველობის შემოღებამ სვანეთში ერთგვარი ბიძგი მისცა განათლებას ~~განვითარებას~~. 70—80-იან წლებში აქ რაქვენიმე დაწყებითი სკოლა გაიხსნა, მაგრამ სათანადო სასწრების უქონლობისა და მასწავლებელთა სიმცირის გამო ზოგიერთი მათგანი კიდევაც დახურულა. სვანეთიდან ზოგიერთი ახალგაზრდა ქუთაისში წასულა სასწავლებლად. მაგრამ სწავლა-განათლებას მაინც ვიწრო მასშტაბი ჰქონდა, მოსახლეობის უდიდესი ნაწილი წერა-კითხვის უცოდინარი იყო. მიუხედავად უკიდურესი პირობებისა, XIX საუკუნის 80-იან წლებში სვანეთში წერა-კითხვის მცოდნეთა რიცხვი საგრძნობლად გაიზარდა. ამასთან დაკავშირებით სვანეთის ერთ-ერთი მკვლევარი ვ. ტუპცოვი ერთგვარ გაკვირვებასაც კი გამოთქვამს. იგი, ერთი მხრივ, ხაზს უსვამს მოსახლეობის განათლების მიღებისათვის მისწრაფებას, მეორე მხრივ, სინანულს გამოთქვამს სასწავლო ქსელის ვიწრო მასშტაბის გამო და ამ მხრივ მეფის მთავრობის უმოქმედობაზე¹.

მიუხედავად ერთგვარი ჩამორჩენისა, XIX ს-ის მიწურულში მარტო ე. წ. ბალსზემო სვანეთში (ბალსქვემომზე მონაცემები არ მოგვეპოვება) სოფლის 13 სკოლა არსებობდა (7 საეკლესიო-სამრევლო და 6 საერო), ხოლო ქვემო სვანეთში 4 სკოლა (2 საეკლესიო და 2 საერო). ბალსზემო სვანეთის სკოლებში სულ 419 მოსწავლე სწავლობდა, ხოლო ქვემო სვანეთში — 82². იმავე პერიოდისათვის სვანეთში (ბალსქვემო სვანეთის გამოკლებით) საშუალო სასწავლებელდამთავრებული 40-ს უდრიდა, ხოლო ქალაქის სხვადასხვა სასწავლებლებში 30-მდე მოსწავლე სწავლობდა³.

(სეთი იყო 1869 წელს სვანეთში მეფის მთავრობის მიერ შემოღებული სასოფლო-სათემო მმართველობა (აგრეთვე ყრილობისა და მამასახლისის — „მახვის“ ფუნქციები და არსი), რომელმაც მშრომელი მოსახლეობის ცხოვრების გაუმჯობესებაში მნიშვნელოვანი ცვლილებები ვერ შეიტანა.)

1 В. Я. Тепцов, Сванетия, стр. 65.

2 ი. მარგიაანი, წერილი სვანეთიდან, ეთნოგრაფიული წერილები სვანეთზე, თბილისი, 1973, გვ. 178—179.

3 იქვე.

გ ლ ე ხ თ ა ა ჯ ა ნ ე ბ ა

1. მ ლ ე ვ ა რ ა ი ს ლ ა ს ა წ უ ნ ი

რუსეთთან შეერთებისა და რუსული მმართველობის შემოღების საწყის ეტაპზე სვანეთის მართვა-გამგეობის ხარჯებს ხაზინა იხდიდა. შემდეგ, მთავრობის გადაწყვეტილებით, ეს ხარჯები მოსახლეობას უნდა გაეღო. მთავრობის ამ განზრახვამ სვანეთის მოსახლეობის უკმაყოფილება გამოიწვია.

ხალხს კარგად ახსოვდა ცარიზმის მოხელეთა უხვი დაპირებები ყოველმხრივი დახმარების აღმოჩენაზე. სინამდვილეში კი პირიქით — მოსახლეობას ბეგარა-გადასახადები უნდა დაეკისრებოდა.

გადასახადების შესაძლო შემოღებით დაშინებული გლეხობა მთავრობის მოხელეებს პროტესტს უცხადებდა, გარანტიას თხოულობდა, რომ არავითარი ბეგარა-გადასახადი არ დაწესებულეყო.

ერუ დაპირებებისა და უკანონო მოქმედების გამო ბოქაულსა და მოხელეებს ხალხი არარად აგდებდა. უკმაყოფილება წინააღმდეგობაში რომ არ გადაზრდილიყო, ბოქაულა ხალხს აშოშმინებდა, ირწმუნებოდა, რომ არ არის განზრახული რაიმე გადასახადის შემოღება, მალულად კი მთავრობის მოწინააღმდეგეებს აღრიცხავდა და დასმენასაც არ ერიდებოდა.

კავკასიის ადმინისტრაციამ გადასახადების შემოღება მთელი სვანეთის ერთიანი გამგებლობის დაწესებასა და საგლეხო რეფორმის გატარებას დაუკავშირა. ამასთან დაკავშირებით 1869 წლის ივლისში ქუთაისიდან სვანეთში მიდის გენე-

რალ-გუბერნატორი ლევაშოვი, რომლის მიზანი, სხვათა შორის, მთავრობის საწინააღმდეგო გამოსვლების ალაგმვა და ჩტკაცე წესრიგის დამყარებაც იყო.

გენერალ-გუბერნატორმა სვანეთში ჩასვლამდეც კარგად იცოდა ხალხის უკმაყოფილების მიზეზები. იქ ჩასვლისთანავე დაძინაშავედ ცნობილი 28 პირი დაიბარა და განმარტებები მოსთხოვა. „დამნაშავეებთან“ საუბრისას გუბერნატორი ერთხელ კიდევ დარწმუნდა, რომ სვანეთში გადასახადების დაწესებას და, მით უფრო, რეპრესიებს შეიძლებოდა მძიმე შედეგები მოჰყოლოდა. ამიტომ საქმის მშვიდობიანი მოწესრიგება არჩია და დამნაშავედ მიჩნეული პირები პასუხისმგებლობისაგან გაათავისუფლა.

სვანეთის ერთ საბოქაულოში გაერთიანების, საერთო მმართველის დანიშვნისა და სასოფლო-სათემო მმართველობის დაარსებასთან ერთად, გუბერნატორმა სვანეთში საკომლო გადასახადები დააწესა, კერძოდ: ჩუბეხევესა და ბეჩოში 5 მანეთი. ხოლო დანარჩენ კუთხეებში — 1 მანეთი და 30 კაპიკი*.

ასეთი „მცირე“ გადასახადების შემოღებას (მაგალითად, მეზობელ სამეგრელოში იგი 2 მანეთსა და 60 კაპიკს უდრიდა) გუბერნატორი მთავრობის წყალობად ასაღებდა და ხალხს არწმუნებდა, რომ ხელისუფლება სვანეთის კეთილდღეობისათვის ზრუნავს და მის სიღარიბეს ანგარიშს უწყევს. ამასთანავე, კავკასიის მმართველობისადმი მიწერილ წერილში გუბერნატორი სვანეთის მოსახლეობას ადანაშაულებდა და წერდა, რომ მოსახლეობას თითქოს გაუნათლებლობის გამო გადასახადების გადახდის აუცილებლობა ჭერ კიდევ არ ჰქონდა შეგნებული.

რაკი გუბერნატორს ეშინოდა, რომ სვანეთის მოსახლეობა გადასახადს არ გადაიხდიდა, ის სვანეთში ყოფნის დროსვე ააქრეფინა¹.

ახალი მმართველობის შემოღება მიზნად ისახავდა მეფის

* გადასახადების სიდიდის სხვადასხვაობა გამოწვეული იყო იმით, რომ ჩუბეხევი და ბეჩო ხაზინის კუთვნილებად იყო გამოცხადებული. მაგრამ დიდი დავის შემდეგ ხაზინას მხოლოდ ჩუბეხევი გადაეცა, ხოლო ბეჩო დაღმქელიანებს დარჩა.

¹ CXAO, т. II, стр. 522.

ალაუფლებიან და კანონმდებლობის საბოლოო განმტკიცებას, სვანეთის მოსახლეობის ძალდატანებითი ასიმილაციის დაჩქარებას. სვანეთში შეიზღუდა ან აიკრძალა ქართულ ენაზე საქმის წარმოება და სწავლება.

ე. XIX საუკუნის 50-იან წლებში სამხედრო მოხელე ბარტოლომეის (არქეოლოგი და ნუმისმატიკოსი) სვანებისათვის რუსული ანბანისა და რუსულ-სვანური ლექსიკონის შედგენა დაევალა. გადაწყდა, რომ ღვთისმსახურებაც რუსულ ენაზე წარმოებულყო. ყოველივე ამის საფუძველზე სვანეთის მოსახლეობა რუსულ ენაზე უნდა გადასულიყო, რუსულ ყაიდაზე გარდაქმნილიყო. რადგან ბარტოლომეიმ ვერაფერი გააწყო, საქმის მოგვარება მეორე სამხედრო მოხელეს — უსლარს დაეკისრა. მან, როგორც ფილოლოგმა, სვანებისათვის რუსული ანბანი და რუსულ-სვანური ლექსიკონიც შეადგინა.

მეფის მთავრობისა და მის მოხელეთა მტკიცებით, „სვანეთში საჭირო არ იყო ქართულ ენაზე საქმის წარმოება და ქართული ენის განვითარება, რადგან მეფის მოხელეთა განსაჯით, საბოლოოდ მთელ საქართველოში რუსული ენა უნდა დამკვიდრებულიყო“. რუსული ენის დანერგვისა და გავრცელების, სააგიტაციოდ სვანეთში გაიგზავნა ქუთაისის გიმნაზიის მასწავლებელი და დირექტორი სტოიანოვი, რომლის აზრითაც, სვანეთში მხოლოდ ერთადერთი სახელმწიფო ენა — რუსული ენა — უნდა გავრცელებულიყო.

მიუხედავად მრავალი დაპირებისა, თვითმმართველობამ სვანეთის კეთილდღეობისათვის არავითარი სახსრები არ გაიღო; კიდევ მეტი, გუბერნიის მმართველობა დღენიადაგ იმას ჩიოდა, რომ იქ დაწესებული გადასახადები თვით ადგილობრივ მართვა-გამგეობის ხარჯებს ვერ ფარავდა.

(ეკონომიკური სიდუხჭირე, უგზობა და უსწავლელობა სვანეთის მოსახლეობას კვლავინდებურად ტანჯავდა. მართალია, რუსეთთან შეერთებას მნიშვნელოვანი პროგრესი მოჰყვა, მაგრამ, მეორე მხრივ, საკომლო გადასახადების შემოღებამ, მჩაგვრელმა რეჟიმმა და ასიმილატორულმა პოლიტიკამ ხალხი სასოწარკვეთილებამდე მიიყვანა.)

გლებობა ახალი მჩაგვრელის თავიდან მოშორებაზე ოცნე-

ბობდა. ამას კარგად გრძნობდა გუბერნიის მმართველობაც, 1871 წლიდან სვანეთში (ბეჩოში) სამხედრო ასეული შეიყვანა.

მართალია, სვანეთში დაბანაკებული სამხედრო ნაწილის მთავარი მისია მთავრობის საწინააღმდეგო მოქმედებისა და არეულობის აღკვეთა იყო, მაგრამ სინამდვილეში მისი უფროსი ყველა საქმეში ერეოდა, ანგარიშს არ უწევდა საუკუნეების მანძილზე შემუშავებულ ადგილობრივ ადამ-წესებს. საქმეებს სამხედრო დროის კანონებით „აწარმოებდა“ და სამხედრო რეჟიმის დამკვიდრებას ცდილობდა.

მიუხედავად მოსახლეობის სისტემატური წინააღმდეგობისა, მთავრობა არ აპირებდა ასიმილაციურ პოლიტიკას და ხალხის ჩაგვრაზე ხელის აღებას. მის მიზანს მარტო სვანეთის მმართველობისათვის გაღებული ხარჯების ამოქაჩვა როდი შეადგენდა, იგი კუთხის ეკონომიკურ ათვისებასაც ესწრაფვოდა.

1873 წელს სვანეთში თუთუნსა და არაყზე სააქციზო გადასახადი დაწესდა, მაგრამ ეს მთავრობას დიდ შემოსავალს ვერ აძლევდა, ამიტომ კავკასიის ადმინისტრაცია სვანეთის მოსახლეობის მეტი დაკაბალებისათვის ახალ საშუალებას ეძებდა.

უდავოა, რომ მთავრობის განკარგულება მიწების გაზომვაზე ამ მიზანს ემსახურებოდა. გადაწყვეტილება მიწის გაზომვაზე გუბერნიის ადმინისტრაციამ ბოქაულს აცნობა, ამ უკანასკნელმა 1875 წლის ივნისში მოსახლეობა გააფრთხილა, რომ მათი მიწის ფართობის გასაზომად კომისია მოდიოდა და ამისათვის მზად ყოფილიყვნენ. ამან ხალხს ეჭვი აღუძრა — იქნებ მთავრობას მიწაზე გადასახადების შემოღება აქვს განზრახულიო.

მთავრობის ახალი განკარგულება სვანეთში ელვის სისწრაფით გავრცელდა. გლეხობა სხვადასხვა მოსაზრებას გამოთქვამდა. გამოცდილ გლეხებს ეჭვი არ ეპარებოდათ, რომ ახალი ღონისძიება მიწაზე გადასახადის შემოღებას მოასწავებდა, მაგრამ ეს ზოგიერთს არ სჯეროდა, რადგან არც თუ ისე დიდი დრო იყო გასული მას შემდეგ, რაც საკომლო გადასახადი დაწესდა და მეფის მოხელეები ირწმუნებოდნენ, რომ სვანე-

თის მოსახლეობის ყოველგვარი ვალდებულება ამით ამოიწურებოდა.

სინამდვილის დასადგენად სხვადასხვა თემის გლეხთა წარმომადგენლები ბეჩოში ეწვივნენ ბოქაულ ჭორჯაძეს, რომელმაც გლეხთა წარმომადგენლების შეკითხვებზე განმარტების მიცემა არ ინება და მოკლედ განუცხადა — „მთავრობამ ბრძანა თქვენი მიწების გაზომვა, ალბათ საჭიროა, მე კი სათანადო ცნობების წარდგენა მევალება“.

ძნელია იმის ზუსტად დადგენა, თუ გლეხობამ მიწაზე გადასახადის დაწესება პირველად ვისგან გაიგო — მთავრობის ოფიციალური წარმომადგენლებისაგან თუ შემთხვევითი პირებისაგან, მაგრამ ის კი ფაქტია, რომ ასეთი გადაწყვეტილება მართლაც არსებობდა და გლეხობამ ეს ოფიციალურად თუ არაოფიციალურად შეიტყო. ყოველ შემთხვევაში, რაკი ბოქაულმა თავი აარიდა მასთან მისულ გლეხთა დარწმუნებას, რომ არავითარი გადასახადების შემოღება არ იყო განზრახული, ამან ექვეები უფრო გააძლიერა და ბევრი ააფორიაქა. მაგრამ რაკი სათანადო ოფიციალური განკარგულება ჯერ არ იყო გაცემული, ხალხი მთავრობის წინააღმდეგ მოქმედების დაწყებაზე თავს იკავებდა.

(მართლაც, დაიწყო ლატალის თემის მიწების გაზომვა. მიუხედავად მითქმა-მოთქმისა, აშკარა წინააღმდეგობა არავის უცდია. იმავდროულად მიწების გაზომვა უნდა დაწყებულიყო მულახისა და მესტიის თემებშიც, სადაც მოსახლეობამ თავი ველარ შეიკავა და კომისიას დავალებული საქმის დაწყება აუკრძალა.)

საისტორიო წყაროების მოწმობითაც და ე. გაბლიანის სიტყვებით რომ ვთქვათ, მღელვარების პირველი ნაპერწკალი ლატალში გაჩნდა, ხოლო მულახში აინთო ცეცხლი, რომელიც მთელ ბალსზემო სვანეთს მოედო.

სხვათა შორის, გლეხთა წაქეზებასა და მღელვარების გაჩაღებაში აქტიური როლი ითამაშეს მესტიისა და მულახის აზნაურებმა, რაზეც ა. ჩარკვიანი სამართლიანად მიუთითებს.

საქმე ისაა, რომ სვანეთის აზნაურები დიდად განაწყენებული იყვნენ მეფის მთავრობაზე, რომელმაც საგლეხო რეფორმის გატარების დროს (1869—1871 წწ.) მხოლოდ ზოგა-

დად ცნო ე. წ. „თავისუფალი სვანეთის“ აზნაურების ზოგიერთი უფლება და შინაყმათა თუ გლეხთა საბოლოო განთავისუფლებაზე მათ არავითარი გასამრჯელო არ მისცა¹. რადგან აზნაურთა მრავალგზის თხოვნამ თავის დროზე უშედეგოდ ჩაარა, ისინი განაწყენებული იყვნენ და ახლა მთავრობის ღონისძიებას გადასახადების შემოღებაზე ყოველნაირად წინ აღუდგნენ.

მღელვარების მონაწილე გლეხთა დაკითხვის ოქმიდან, ასევე ქუთაისის გუბერნიის მმართველის მალაფეევის მეფისნაცვლისადმი მოხსენებიდანაც ჩანს, რომ მესტიისა და მულახის აზნაურები პირველნი გადაეღობნენ მთავრობის ღონისძიებებს. ამასთან დაკავშირებით ვიცე-გუბერნატორი მალაფეევი მეფისნაცვალს მოახსენებდა: მართალია, ლატალის საზოგადოება (სადაც პირველად დაიწყო მიწების აღწერა) უნდობლად მოეკიდა ჩვენს ღონისძიებას, მაგრამ მას აშკარა წინააღმდეგობა არ გაუწევია. ხოლო, როდესაც ბოქაულმა და მისმა თანამემწემ მესტიასა და მულახში აღწერის უწყისების გაცემა მოიწადინეს, აზნაურებმა მათ მიღებაზე კატეგორიული უარი განაცხადეს².

როგორც აღვნიშნეთ, აზნაურების ეს წინააღმდეგობა შემთხვევითი არ იყო, ისინი მეფის ხელისუფლების მიმართ შეგნებულად იყვნენ მტრულად განწყობილი.

მიუხედავად იმისა, რომ ლატალში მიწის მზომელები აშკარა წინააღმდეგობას არ წააწყდნენ. აქაურმა გლეხობამ თავისი წარმომადგენლები დააგზავნა დანარჩენ საზოგადოებებში, შეატყობინა ყოველივე და თხოვა ერთად გამოსულიყვნენ მთავრობის განზრახვის აღსრულების წინააღმდეგ. მართალია, მიწის გაზომვის წინააღმდეგ მესტიის მოსახლეობამაც პროტესტი გამოთქვა, მაგრამ აშკარა და შედარებით ორგანიზებუ-

¹ იხ. გ. გასვიანი, დასავლეთ საქართველოს მთიანეთის ისტორიიდან, თბილისი, 1973, გვ. 344—348.

² ა. კოკლავაშვილი. გლეხთა შეიარაღებული აჯანყება სვანეთში 1875—1876 წწ. (დოკუმენტების პუბლიკაცია და შესავალი წერილი), საქ. სსრ შსს საარქივო სამმართველოს ჟურნალი „საისტორიო მოამბე“, I, 1945, გვ. 145.

ლი წინააღმდეგობა პირველად მაინც მულახის საზოგადოებაში დაიწყო.

(ბ. ნიჟარაძე და ე. გაბლიანი გადმოგვცემენ, რომ მთავრობის გადაწყვეტილებით აღელვებული მულახის მოსახლეობა შეიკრიბა სოფ. კოლაშში) სადაც ერთიმეორეს ეკითხებოდნენ: რატომ გვიზომავენ მიწებს, რა უნდათ ჩვენგან? მიწას თუ გადასახადი დაედო — ჩვენი ცხოვრება შეუძლებელია და სხვ. როცა ხალხმა ყიყინითა და ჩოჩქოლით გული იჭერა, სიტყვაში გამოვიდა მულახის თემის მამასახლისი ყასბულათ შერვაშიძე: „ყველამ ვიცით, რაც ბოქაულმა გამოგვიცხადა, დანამდვილებით არ ვიცი რისთვის გვიზომავენ მიწებს! სხვა რა მიზეზი უნდა იყოს მიწების აღწერა, თუ არა მათი დაბეგვრა?“¹ ყრილობის* მონაწილეები კვლავ ახმაურდნენ და გაიძახოდნენ — ეს არ მოხდება, მიწაზე გადასახადს არ გადაეხდით! გარკვეული სჯაბაასის შემდეგ ყრილობის მონაწილეებმა დაადგინეს: „შევატყობინოთ ჩვენი აზრი თავისუფალი სვანეთის ყველა სოფელს — თუ მთავრობას მართლაც აქვს განზრახული მიწების დაბეგვრა, არზა მივცეთ, რომ ეს არ ინებოს, თუ თხოვნით არაფერი გაგვივიდეს, მაშინ ყველამ იარაღს მოვკიდოთ ხელი და ჩვენი უფლებები ისე დავიცვათ, როგორც ჩვენი სახელოვანი წინაპრები იცავდნენ თავს ყოველგვარი ძალადობისაგან“. აქვე დაადგინეს, რომ ეს გადაწყვეტილება ეცნობებინათ დანარჩენი თემებისთვისაც 50 წარმომადგენლის მეშვეობით.

როგორც ბ. ნიჟარაძე და ე. გაბლიანი გადმოგვცემენ, მეორე დღეს მულახის ორმოცდაათი წარმომადგენელი მესტიაში ჩავიდა და თავისი თემის გადაწყვეტილება აცნობა. მესტიაშიც, როგორც მულახში, მთელი საზოგადოება შეიკრიბა და მულახის მაგალითს მიბაძა. მათ თავიანთი გადაწყვეტილება ლენჯერის მოსახლეობას აცნობეს, ხოლო სამივემ ერთად

¹ ბ. ნიჟარაძე, ისტორიულ-ეთნოგრაფიული წერილები, II, გვ. 174.

* მთავრობის მიერ 1869 წ. განხორციელებული რეფორმით ყრილობა იყო სასოფლო-სათემო მმართველობის უმაღლესი ორგანო, ზოგიერთი მკვლევარი კი ამ ყრილობას სვანეთში გვაროვნული წყობილების გადმონაშთად ნათლავს.

ლატალისა, სადაც ეკლესიის ეზოში თავმოყრილმა ხალხმა სრული თანაგრძნობა და მხარდაჭერა გამოუცხადა მულახის, მესტიისა და ლენჯერის საზოგადოებების გადაწყვეტილებებს და ბოლოს ოთხივე საზოგადოების 200-მდე წარმომადგენელმა ერთიმეორეს შეფუცეს, რომ ერთგულნი და ერთიანი ყოფილიყვნენ. აქვე დააწყდა, ოთხი საზოგადოების წარმომადგენლებს თავისი გადაწყვეტილება იფარის, კალის, უშგულისა და სხვა საზოგადოებებისათვის შეეტყობინებინათ და თუ ეს უკანასკნელნიც მხარს დაუჭერდნენ, ყველანი ერთად შეკრებილიყვნენ კალის საზოგადოებაში, სადაც სვანეთის მთავარ სალოცავში — კვირიკესა და ივლიტას ეკლესიაში საბოლოო გადაწყვეტილება მიეღოთ, რასაც ფიცითაც დაადასტურებდნენ.

იფარის, კალისა და უშგულის მოსახლეობამ შეიტყო მულახის, მესტიის, ლენჯერისა და ლატალის გლეხობის გადაწყვეტილება და ის ერთხმად შიშნა.

ბენისის დასაწყისში, დანიშნულ დროს, მთელი ბალსხემო სვანეთის წარმომადგენლები — ბრძოლისუნარიანი 2 ათასამდე მამაკაცი კალის თემის სოფელ ლალხორში შეიყარა*) შეიარაღებული ხალხი დილაადრიანად შეიკრიბა პატარა მინდორში. ყველა ერთნაირად ღელავდა, განსაკუთრებით კი ახალგაზრდობა აქტიურობდა. ცოტა ხანიც და კრება თადარიგს შეუდგა. ხალხს გამოეყო ერთი მოხუცებული თავკაცი გინადრუყვ გირგვლიანი, რომელმაც აღნიშნა: „ხათრი დასდევით ჩემს მოხუცებულობას, ჩემს ქალარას და გამიგონეთ, დაწყნარდით, დამშვიდდით, ასე აღელვებით საქმე არ გაკეთდება. მოლაპარაკე ავირჩიოთ. კარგად გავიგოთ ყოველივე. მოვისაზროთ რა გზას უნდა დავადგეთ. ჯერ ისეთი გაჭირვება

* ლალხორ სვანურად თავშესაყარ, შესაკრებ ადგილს ნიშნავს. „ლალხორ“ წარმოდგება ლუხო-ლუზორიდან, რაც შეკრება-თავმოყრას ნიშნავს. სხვათა შორის, სვანეთის ერისთავ გელოვანთა რეზიდენციაც ამ სოფელში იყო. აქ მდებარეობდა სვანეთის ერთ-ერთი მთავარი, უძლიერესი და უმდიდრესი კვირიკესა და ივლიტას სახელობის მონასტერი. ამასთანავე ლალხორი კეტავდა ზემო სვანეთიდან ქვემო სვანეთისაკენ და აქედან ლეჩხუმ-ქუთაისისკენ მიმავალ მთავარ გზას. ყველაფერი ეს იმაზეც მეტყველებს, რომ სოფ. ლალხორი თავის დროზე მთელი სვანეთის ერთ-ერთ ისტორიულ ცენტრს და თავშესაყარს წარმოადგენდა.

არა დაგვდგომია რა, რომ მაინცდამაინც თავი გავიმეტოთ, და თუ შემდეგში რაიმე განსაცდელი მოგველის, მაშინ თავს ზურავინ დაზოგავთ, პირველი მე გაგიძღვებით, სადაც საჭირო იქნება. დაე დიაცის ლეჩაქი დაეხუროს მას, ვინც გაგაჭირვების დროს თავი დაზოგოს...“¹.

გ. გირგვლიანის მოწოდებაზე ყველანი დამშვიდდნენ და სმენად იქცნენ (ყრილობამ ხელმძღვანელად ერთხმად აირჩია მულახის მკვიდრი ყასბულათ შერვაშიძე, რომელსაც კარგად იცნობდა გუბერნიის ხელმძღვანელობა. იგი თავდაპირველად ბოქაულის მდივანბეგად მუშაობდა, ხოლო შემდეგ — 1869 წლიდან — მულახის მამასახლისად.)

ყრილობის მონაწილეთა თხოვნით ყასბულათ შერვაშიძემ ყრილობის მონაწილე სხვადასხვა თემთა წარმომადგენლებს (ჩენილებს) მიმართა: „ამგვარი ყრილობა ~~მთელს~~ ხევისა, როგორსაც დღეს ვხედავ, აქ ძველად ხშირად ყოფილა თურმე. აქისთანა ყრილობას გამოიწვევდა ხოლმე საზოგადო გაჭირვება. ვთქვათ, რომელიმე თავადიშვილის გვარეულობა მოინდო-მებდა სვანების ხელში ჩაგდებას, ჩვენზე ბატონობას, ჩვენი შაბა-პაპანი ხევობას („ხევობ“*) მოიწვევდნენ და საზოგადო მტერს საკადრის პასუხს გასცემდნენ. ძველებისაგან ნაამბობ-ნაარაკევი მრავალი შემთხვევა ვიცი, როდესაც ჩვენზე ბატონობის მოსურნე შერცხვენილი დაგვიტოვებია. ჩემზე უფრო მოხუცი ურევია ამ ყრილობას და ისინი ჩემზე უკეთ გეტყვიან, რომ ვისაც ჩვენი დამონება, ხელში ჩაგდება მოუხდომებია, ყველანი ჩვენი მსხვერპლი გამხდარან: თოფი და ხანჯალი ყოფილა ჩვენი დამცველი! სვანეთის სალოცავმა გვაშოროს, რომ თოფი და ხანჯალი დაგვეჭირდეს ეხლაც. ამგვარი საქმის მოსურნე არავინ ვართ, რადგან სიცოცხლე გვინდა და არა სიკვდილი. ჩხუბში რუსებს ვერ გაუმაგრდებით, რადგან ისინი ბევრნი არიან — გამოუღვევლნი და ჩვენ ცოტანი ვართ. მართალია, თავს ვისისხლებთ, მაგრამ რუსები მაინც მრავალნი დარჩებიან და ჩვენ ისეთი საქმე მოგვივა, როგორც აფხაზებს**;

¹ ბ. ნიქარაძე, ისტორიულ-ეთნოგრაფიული წერილები, II, გვ. 175.

* „ხევობ“ — სხვადასხვა ხევის (ძველ სვანეთში ხევი ეწოდებოდა თემს, ზოგჯერ ცალკეულ სოფელსაც) წარმომადგენელთა კრება ანუ ყრილობა.

** იგულისხმება აფხაზეთის 1866 წლის აჯანყება.

მაგრამ აქამდე რატომ უნდა მივიღეს ჩვენი საქმე? ჩვენ ხომ არ ვეუბნებით მთავრობას, რომ თქვენ ხელში ყოფნა არ გუნდაო. ამის თქმა შეგვეძლო პირველად, როდესაც მტერი და მოყვარე ყველა რუსების ხელში გადასვლას გვირჩევდა, მაგრამ უარი არ გვითქვამს იმიტომ, რომ გვარწმუნებდნენ: რუსების ხელში უფრო ბედნიერი იქნებით, ვიდრე თავისთავად ხართ. მთავრობას ბევრ რამეს ჩამორჩებითო და თქვენ კი არაფერს მოგთხოვენო.

მე თვითონ, — განაგრძობს შერვაშიძე, — მთავარმართებლის (ე. ი. მეფისნაცვლის) ვორონცოვის მონათლული ვარაუდი და იმისგან მოკიდებული პატარა მოხელემდე ყველანი იქნას გვიმტკიცებენ, რომ რუსის მთავრობა აგაშენებთო. ჩვენ ეს დავიჭერეთ. რასაც გვეუბნებოდნენ მართალი გვეგონა. ამიტომაც ძალდაუტანებლად — ჩვენი ნებით დაუკარილთ თავი რუსებს. არავის წინააღმდეგობა არ გაგვიწევია, თუმცა ეს შეგვეძლო: თუ ჩვენმა მეზობლებმა რუსებს თოფ-იარაღით გაუწიეს წინააღმდეგობა**, ჩვენ რა ღმერთი გაგვიწყრებოდა, რომ ერთ თოფს ვერ გავისვრიდით. მაგრამ არა! იმ იმედით, რომ მთავრობა ბევრ რამეს შეგვძენდა, მისი ყოველი მოთხოვნილება ავასრულეთ: გამოგზავნა მღვდლები — დავიყენეთ, დანიშნა ბოქაულები — მივიღეთ, სოფლის მოხელეები აირჩიეთო — დავუჭერეთ, ბოლოს ექვსი აბაზი — უზალთუნიც ბევრად დავიღვეით***.

იმ ბევრ შემწეობის დაპირების შემდეგ, — განაგრძო ყასბულათმა, — რაც მე ჩემი ყურით გამიგონია მთავრობის წარმომადგენელთაგან, ეს ბეგარა კი ძლიერ გამიკვირდა. გვეუბნებოდნენ აგაშენებთო — პირიქით ბეგარა ჩვენგან წაიღეს. ჯერ ჩვენთვის უნდა შეეძინათ რამე და მერე მოეთხოვათ, თორემ ისე გამოდის, რომ „ცხვარი თხას მიადგა მატყლის სათხოვნელადო“.

ეს ასეა, მაგრამ ახლა კიდევ გვეუბნებიან: მიწები უნდა გა-

* ლაპარაკია მეფისნაცვალ ვორონცოვზე, რომელსაც 1852 წელს სხვებთან ერთად ბორჯომში ეწვია თვით ყ. შერვაშიძე.

** იგულისხმებიან ჩრდილო კავკასიის მთიელები, ე. ი. კავკასიის ომი.

*** ლაპარაკია საკომლო გადასახადზე (1 მან. 30 კაპ.), რომელიც 1869 წელს იქნა შემოღებული.

გიზომოთო. რისთვის? რად უნდათ ჩვენი მიწების გაზომვა? ამაზე ბოქაული გვეუბნება: ასეა მთავრობის განკარგულებათ. ჩვენში კი ხმა დადის, მათი დაბეგვრა უნდათო. თუ ეს ხმა მართალი გამოდგა, მაშინ კი, სწორედ სიცოცხლის პირი არ გვაქვს და, მუდამ წვალებას, ის გვირჩევენია, ერთ დღეს გავთავდეთ. ახლა, რადგან ეს ზუსტად არ ვიცით, ჯერ უნდა შევიტყოთ — რაშია საქმე. მოვახსენოთ მთავრობას ისე, როგორც ამას დღეს ვაპბობ და მის პასუხს მოუცადოთ, მერე კი ჩვენი ვილონოთ“¹. ყრილობის მონაწილეებიც ერთხმად დაეთანხმნენ მის მიერ წარმოთქმულ მოსაზრებებს.

შერვაშიძის გამოსვლის შემდეგ ყრილობის მონაწილეებს კვლავ გინადრუყვ ფარჯიანმა მიმართა: ყასბულათის სიტყვებს მე მხოლოდ იმას დავუმატებ, რომ სვანეთში ყოველთვის, როცა ასეთი დიდმნიშვნელოვანი საკითხები წყდებოდა, გადაწყვეტილების მიღების დასტურად და სიმტკიცისათვის წმ. კვირიკეზე იფიცებოდნენ. ამიტომ ჩვენც ასე უნდა მოვიქცეთ. წავიდეთ და ეკლესიაში შევფიცოთ ერთმანეთს, რომ ერთიმეორეს არ უღალატებთ. ჰირსა და ლხინში განუყრელი ვიქნებით, ვიბრძოლებთ ბოლომდე და თუკი აუცილებლობა მოითხოვს, ოაჲს შევწირავთ საერთო საქმეს. ხოლო ის, ვინც ფიცს გატეხავს და გვიღალატებს — სასტიკად იქნას დასჯილი².

რაკი საწინააღმდეგო არავის ჰქონდა და არც სხვა რამე დამატებითი მოსაზრება არ წამოუყენებიათ, ყრილობის მონაწილეები გაემართნენ კვირიკესა და ივლიტას ეკლესიისაკენ, რომელიც ლალხორიდან თითქმის ორ კილომეტრზე მდებარეობდა.

როდესაც ყრილობის მონაწილეებმა ეკლესიის გალაენის შიგნით მოიყარეს თავი, გიორგი ფანგანმა ეკლესიის კარები გააღო და შალიანის* ხატი გამოასვენა. დაიწყო ფიცის ცერემონიალი, ხალხმა ქუდები მოიხადა, სმენად გადაიქცა და

¹ ყასბულათ შერვაშიძის სიტყვის შინაარსი 1892 წელს პირველად გამოაქვეყნა ბესარიონ ნიჟარაძემ გაზეთ „ივერიაში“, № 129—141, რითაც ჩვენ ვსარგებლობთ. იგივე სიტყვა მცირედი განსხვავებით 1925 წ. გამოაქვეყნა აგრეთვე ე. გაბლიანმა (იხ., ძველი და ახალი სვანეთი, გვ. 95—96).

² ბ. ნიჟარაძე, ისტორიულ-ეთნოგრაფიული წერილები, II, გვ. 177.

* შალიანი კვირიკეს ეკლესიას ეწოდებოდა.

მუხლმოდრეკილი ხატს მისჩერებოდა. გ. ფანგანმა ხატი მალა-
ასწია და დაიწყო ფიცის ტექსტის გადმოცემა: „დაე, ვინც სა-
ერთო გადაწყვეტილების ერთგული არ დარჩეს ბოლომდე,
ერთიმეორეს უღალატოს და საერთო საქმისათვის არ
იბრძოლოს სისხლის უკანასკნელ წვეთამდე — მისი ტანი,
ოჯახი და ჯილაგი შერისხოს და ამოწყვიტოს მამა ზეციერმა!“
ხალხი მუხლმოდრეკილი და მალა ხელებაპყრობილი დას-
ტურის ნიშნად ამინ-ამინს იძახოდა. საჯარო ფიცისა და წყევ-
ლა-კრულვის დამთავრებისთანავე ცერემონიალის მონაწილე-
თაგან ორმა კაცმა ჯოხის ბოლოებს მოჰკიდეს ხელი, მის თავ-
ზე ხატი ამართეს და გადაწყვეტილებსადმი საბოლოო ერთ-
გულების დასადასტურებლად ყველა მონაწილემ ჯოხის ქვეშ
გააარა (რაკი ფიცი საჯარო ხასიათს ატარებდა და შესაძლებე-
ლი იყო მისი მონაწილე გულში გადაწყვეტილების მომხრე არ
ყოფილიყო, ამიტომ საჭიროდ მიიჩნიეს ხატის ქვეშ გადებუ-
ლი ჯოხის ქვეშ ყველას გავლა, რაც ფაქტიურად ინდივიდუა-
ლურ დაფიცებას ნიშნავდა).

შემდეგ ყრილობის მონაწილეებმა მოიფიქრეს, თუ როგორ
ემოქმედათ საგანგაშო ვითარებისას, როგორი სიგნალით ემ-
ცნოდ ერთიმეორისათვის თავშეყრისა თუ სხვა საჭიროება.

შექმნილი ვითარება არ გამოპარვია სვანეთის ადმინისტრა-
ციას. ბეჩოში მყოფმა ბოქაულმა და სამხედრო რაზმის ხელ-
მძღვანელობამ ყოველივე გაიგო, ამათან, მათ დასმენა მიი-
ღეს — თითქოს სვანეთის მოსახლეობამ ფიცი დადო მათ გა-
ნადგურებაზე და, საერთოდ, მეფის მთავრობის ძალაუფლების
დამხობაზე.)

(ბოქაულმა ჯორჯაძემ და რაზმის უფროსმა სვანეთში შექმ-
ნილი ვითარება მაზრის უფროსსა და გუბერნიის მმართველო-
ბას გაზვიადებული სახით აცნობეს. ამავე დროს მოსალოდ-
ნელი თავდასხმის მოსაგერიებლად თადარიგს შეუდგინენ.)

ლეჩხუმის მაზრის უფროსის ნიერ 1875 წ. 4 ივნისს ქუ-
თაისის მმართველ მალაფევეისადმი მიცემულ პატაკში აღნიშ-
ნული იყო, რომ სვანეთში 700-მდე გლეხმა დაიფიცა ეკლესი-
აში, რათა მთავრობისათვის მიწების გაზომვა არ დაენებებინა.
მაზრის უფროსი გრინევსკი იტყობინებოდა, რომ სვანეთის
გლეხთა მღელვარების მიზეზი თითქოს ცრუ ხმები იყო, რომ-

ლის თანახმად თითქოს მთავრობა არა მარტო მიწაზე, არამედ პირუტყვზეც გადასახადის შემოღებას, და აგრეთვე, ყველა ოჯახიდან თითო მამაკაცის ჯარში გაწვევას აპირებდა.

მაზრის უფროსი იტყობინებოდა, რომ მიუხედავად გაწეული ღონისძიებისა, ადგილობრივმა ადმინისტრაციამ ვერ შეძლო ამბოხებული ხალხის დაშლა. ამიტომ იგი ვიცე-გუბერნატორ მალაფეევს თხოვდა მიეცა 20-კაზაკიანი რაზმი, რათა სვანეთში დაბანაკებულ ასეულთან ერთად უწესრიგობისათვის ბოლო მოეღო.)

ქუთაისის ვიცე-გუბერნატორმა სვანეთის ადმინისტრაცია გააფრთხილა, რათა მიწების გაზომვა დაუყოვნებლივ შეეწყვიტა, ხოლო 20-კაციანი კაზაკთა რაზმის მიცემაზე უარი განუცხადა, რადგან ასეთი მცირე ძალებით მას სვანეთის გლეხთა ამბოხების ჩაქრობა შეუძლებლად მიაჩნდა.

რაკი გუბერნიის ხელმძღვანელობის ოფიციალური დახმარება გვიანდებოდა, ბოქაულის მოადგილემ თენგიზ დადიშქელიანმა ბეჩოში, ცხუმარში და ეცერში თავისი ერთგული პირები გააფრთხილა, რათა დაძახებისთანავე ბეჩოში გამოცხადებულ იყვნენ ადმინისტრაციისა და სამხედრო ასეულის დასაცავად.

დადიშქელიანმა ბეჩოში თავი მოუყარა შეიარაღებულ გლეხთა რაზმს, რომელსაც უბრძანა ფხიზლად ყოფილიყო, რათა ადმინისტრაციულ ცენტრსა და სამხედრო რაზმს ლატალის მხრიდან თავს არავინ დასხმოდა.)

სამხედრო ასეულის საომარ მდგომარეობაში მოყვანამ და თ. დადიშქელიანის მიერ ქვემო თემებში გლეხთა შეიარაღებული რაზმის შექმნამ მთავრობის მოწინააღმდეგე გლეხობაში თავისთავად ეჭვი და შიში დაბადა. ასეთ ვითარებაში ლატალის გლეხობამ თავისი წარმომადგენლები დაგზავნა ყველა თემში და შეატყობინა, რომ სათანადო ზომების მიღება იყო საჭირო. მოლაპარაკებისამებრ მღელვარე გლეხობამ ახლა ლატალში მოიყარა თავი. აჯანყებულებმა აქ საკმაოდ ხანგრძლივი თათბირი გამართეს. ზოგიერთს მიაჩნდა, რომ სამხედრო რაზმისათვის დაესწროთ და მანამ ამოეხოცათ ისინი, სანამ მთავრობა გონს მოვიდოდა და სვანეთში დამატებით ძალებს გაგზავნიდა. ამაზე ზოგიერთი თავს იკავებდა და მოითხოვ-

და, რომ შეიარაღებული დაცვა დაეყენებინათ, როგორც ლატალის მისადგომებზე (ბალის ქედზე გამავალ გზაზე), აგრეთვე ლატფარის ქედზე. თუკი საქმე მაინც შეჭახებამდე მივიდოდა, მაშინ თავი დაეცვათ მეფის ზთავარობის მიერ გამოგზავნილი ჯარის შემოტევისაგან. ამგვარი სჯა-ბაასის შემდეგ ლატალში თავმოყრილმა გლეხობამ თავისი შეიარაღებული რაზმი გაგზავნა ბალის გადასასვლელზე, რათა ამის მეოხებით საბოლოოდ დაედგინათ ბეჩოში დაბანაკებული რაზმი და ქვედა თემების გლეხები მართლა აპირებდნენ თუ არა აჯანყებული გლეხების წინააღმდეგ გალაშქრებას? თუკი ეს დადასტურდებოდა, მაშინ აჯანყებულები აპირებდნენ თვითონ დაესწროთ, ჯარის ნაწილი დაეხოცათ და მისი იარაღი და ტყვიანაწილი ხელთ ეგდოთ, ხოლო შემდეგ ყველაფერი ელონათ, რათა მეფის რუსეთის ჯარი სვანეთში არ შეეშვათ.

საქმის საბოლოო დასაზუსტებლად აჯანყებულთა ნაწილი ბალის ქედისაკენ გაემართა. იქ შენიშნეს ქვემო თემების შეიარაღებული გლეხობა, რომელთაც თ. დადიშქელიანმა სამხედრო რაზმისა და საბოქაულოს ადმინისტრაციის დაცვა დაავალა.

რაკი დამხდურთა შორის სამხედროები არ იყვნენ, აჯანყებულები მოერიდნენ მათთან პირდაპირ შეჭახებას და თავის თვისტომებს აღელვებულებმა მიმართეს, თუ რატომ ადგნენ გზაზე და რა განზრახვა ჰქონდათ? დამხვდურებს მეთაურობდა ორი დადიშქელიანი. მათ აჯანყებულებს განუმარტეს: „თქვენ თვითონ ხედავთ, რომ კამანდა ამჟამად ჩვენი ხიზანია, ჩვენ მიწა-წყალზეა დაბანაკებული და სტუმარია. ნუ შეგვარცხვენთ! როგორ უნდა გამოვჩნდეთ სადმე, თუ ჩვენი სტუმარი ამოსაწყვეტად დაგანებთ. გვირჩევნია უწინ ჩვენ დაგვხოცოთ, ჩვენს მკვდარ სხეულზე გაიაროთ და ისე მიხვდეთ კამანდის ამოსაწყვეტად, ვიდრე ცოცხალი დავრჩეთ და ასე გიყუროთ“¹. აჯანყებულები კიდევ უფრო გაღიზიანდნენ და აღელდნენ, მაგრამ დადიშქელიანებმა და სხვა დამხვდურებმა განუმარტეს, რომ მათ აჯანყებულების წინააღმდეგ არავითარი მტრული განზრახვა არ ჰქონდათ და დამშვიდება დაუ-

1 ა. ჩარკვიანი, სვანეთი, გვ. 184.

წყეს. როდესაც აჯანყებულები დარწმუნდნენ, რომ თავიანთი თვისტომების მიზანი მხოლოდ სვანეთის ადმინისტრაციისა და სამხედრო რაზმის ხელმძღვანელობის დაცვა იყო, მათთან შეტაკებას მოერიდნენ და ბეჩოში განიზრახეს წასვლა. როგორც ბ. ნიჟარაძე აგვიწერს, ამ შემთხვევაშიც დამხედურებმა იმარჯუეს და აჯანყებულებს მიმართეს: „ხომ ხედავთ — თუ კამანდისკენ წასვლას არ მოიშლით, თავი უნდა შეგაკლათ, რად იქცევით ასე, რა გამოვა ჩვენ რომ ერთმანეთს თავი შეგაკლათ? კამანდა დარჩება და ჩვენ ერთმანეთის ძმები — ერთიმეორეს დაეხოცავთ!“¹ ამ სიტყვებმა ბევრი ჩააფიქრა, თანაც ერთიმეორის ნათესავეებიც გამოჩნდნენ. ყოველივე ამის გამო აჯანყებულებმა ხელი აიღეს განზრახვის აღსრულებაზე.

ბალის გადასასვლელთან აჯანყებულებმა თათბირი მოაწყვეს და გადაწყვიტეს, რომ გადასასვლელზე და ლატფარის ქედზე შეიარაღებული დაცვა დაეყენებინათ, რათა ბალსზემო სვანეთში არც ბეჩოში დაბანაკებული რაზმი, არც სხვა რომელიმე სამხედრო ნაწილი და, აგრეთვე, არც მეფის მოხელეები შეეშვათ. აქვე დადგინდა, რომ მეფის ჯარის შესაძლო შემოსევისაგან დასავლეთი მხარე ლატალსა და ლენჯერის საზოგადოებას დაეცვა, ხოლო აღმოსავლეთისა — დანარჩენ საზოგადოებებს.

(გადაწყვეტილების თანახმად, აჯანყებულებმა რამდენიმე დღის შემდეგ ბალსზემო სვანეთისკენ მიმავალი გზები ჩაკეტეს.)

1875 წლის 22 ივნისს გუბერნატორმა მალაფეევმა მაზრის უფროსის გრინეცკისაგან მიიღო ახალი პატაკი, რომელშიც იტყობინებოდა, რომ სვანები არ ემორჩილებიან მთავრობის არავითარ განკარგულებას და თავისუფალი თვითმმართველობის აღდგენას ლაშობენ: „სალაჟა ცნობამ ვაცე-გუბერნატორი კიდევ უფრო შეაშფოთა და, საქმის მეტისმეტი სერიოზულობის გამო, გადაწყვიტა 2 ივლისს მეფისნაცვალთან გამოცხადებულიყო ბორჯომში. მალაფეევი მეფისნაცვალს ეახლა, დეტალურად გააცნო სვანეთის ვითარება და მოახსენა, რომ

¹ ბ. ნიჟარაძე, ისტორიულ-ეთნოგრაფიული წერილები, II. გვ. 172.

სვანები მემბოხე ხასიათის გამო მთავრობის არავითარ განკარგულებას არ ემორჩილებიან. ამასთანავე მოახსენა, რომ ისინი თავის ტერიტორიაზე არავის ატარებდნენ, ხიდეები და გზები გააფუჭეს და თითქოს ბეჩოს სამხედრო ასეულს თავდასხმით ემუქრებიან¹.

საქმის საგანგაშო მდგომარეობის გამო მეფისნაცვალმა პირადად მალაფეევს უბრძანა თვითონ წასულიყო სვანეთში და გენერალ-მაიორ ციტოვიჩის სარდლობით ჯარის ნაწილი წაეყვანა. მალაფეევს დაევალა, რომ გაერკვია მღელვარების მიზეზები, დაესაჯა ამბოხების მოთავეები და სრული წესრიგი დაემყარებინა².

(მეფისნაცვლის ბრძანების თანახმად სასწრაფო წესით შედგა სამხედრო ექსპედიცია, რომლის შემადგენლობაში შევიდა: 1. ალექსანდრეპოლის 161-ე პოლკის ორი ასეული (6 ობერ-ოფიცრის, 20 უნტერ-ოფიცრის, 200 ფეხოსანი ჯარისკაცისა და 8 მუსიკოსის შემადგენლობით); 2. ქუთაისის ირეგულარული პოლკის ერთი ცხენოსანი ასეული (1 შტაბოფიცრის, 4 ობერ-ოფიცრის, 2 იუნკერის, 4 ურიადნიკისა და 120 ცხენოსნის შემადგენლობით); 3. იმავე პოლკის ერთი ფეხოსანი ასეული (1 შტაბოფიცრის, 4 ობერ-ოფიცრის, 2 იუნკერის, 4 ურიადნიკის, 120 ფეხოსანი ჯარისკაცის შემადგენლობით); 4. სამთო საარტილერიო ბატარეისა და მესანგრეთა რაზმი (20-კაციანი). ამასთან ერთად სამხედრო ექსპედიციაში შედიოდა გურულთა მილიციის ასეული და სხვ.³.

აღნიშნულ სამხედრო ექსპედიციას ემსახურებოდა 2 ტოპოგრაფი, 7 ფერშალი, 7 სანიტარი, 60 სატვირთო ცხენი და სხვ.

ექსპედიციის სამხედრო მეთაურთა შემადგენლობაში გენერალ-მაიორ ციტოვიჩთან ერთად შედიოდნენ: შტაბსკაპიტანი სენიუკოვი (ექსპედიციის ადიუტანტი), როტმისტრი თავადი ბარიატინსკი, მაიორი თავადი წულუქიძე (ორივე ფეხოსანი ასეულის მეთაური), კაპიტანი (თავადი) ილია კერაძე (პირველი ფეხოსანი ასეულის უფროსი), კაპიტანი მურაზოვი (მეორე

¹ საქ. სსრ ცსსა, ფ. 416, ან. 3, ს. 174, ფურც. 1.

² იქვე, ფურც. 2.

³ იქვე, ფ. 521, ან. 16, ს. 43, ფურც. 7—8.

ფეხოსანი ასეულის უფროსი), პოდპოლკოვნიკი პრინცი (ცხენოსანი ასეულის უფროსი), მაიორი თავადი წერეთელი (ქუთაისის ირეგულარული პოლკის ფეხოსანი ასეულის მეთაური), პოდპოლკოვნიკი მაკაროვი, შტაბსროტმისტრი კოლიაკო, პორუჩიკები: თავადები წულუკიძე, ჯავახიშვილი, მაჭავარიანი, პოდპორუჩიკი გიორგობიანი, პრაპორშჩიკი გიგობერაძე და სხვ.¹

მეფისნაცვლის (კავკასიის არმიის მთავარსარდლის) ბრძანების შესაბამისად, თუ დადგინდებოდა, რომ სვანეთის ამბოხებულები მართლაც აპირებდნენ ბეჩოს სამხედრო ასეულზე თავდასხმას, მაშინ ამ ასეულის მხარდასაჭერად კავკასიის ქედის გადასასვლელით ყაბარდოდან სვანეთში უნდა გადასულიყო სამთო მილიცია — სამი ასეულის შემადგენლობით².

სვანეთში სამხედრო ექსპედიციის წასვლის მზადების შესახებ გენერალ-მაიორი ციტოვიჩი კავკასიის არმიის მთავარსარდალს მოახსენებდა, რომ განკარგულების თანახმად ექვს ივლისს ექსპედიცია მზადაა სვანეთში ლაშქრობისათვის. ამასთანავე აცნობებდა, რომ ექსპედიციის საყრდენი პუნქტი იქნებოდა მურში, სადაც ერთი თვის სურსათს მიზიდავდა და საქიროების შემთხვევაში ლაზარეთს გამართავდა³.

სასწრაფო მზადების შემდეგ თბილისსა და ქუთაისში შექმნილი რაზმები 8 ივლისს სვანეთისკენ დაიძრნენ. მალაფეევსა და ციტოვიჩს ეუბნოდათ, რომ ამბოხებაში მთელი სვანეთი არ ყოფილიყო ჩაბმული, ამიტომ საქმის ვითარების გარკვევამდე 10 ივლისს ცაგერში დაბანაკდნენ.

ცაგერში, მურის ხილთან მაალაფეევის თანმხლებმა პარებმა შენიშნეს სვანეთში მიმავალი შვიდი მგზავრი, რომლებიც იმერეთიდან შინ მიდიოდნენ. ისინი ვიცე-გუბერნატორს მიჰგვარეს. ამ უკანასკნელმა გლეხები პატივით მიიღო და დაარწმუნა, რომ მთავრობას არავითარი ახალი გადასახადების შემოღება არ განუზრახავს. რაც შეეხებოდა მიწების გაზომვას, განუმარტა, რომ თითქოს ხელმწიფე-იმპერატორს თავისი ქვეშევრდომების მიწების რაოდენობა აინტერესებდა.

¹ საქ. სსრ ცსსა, ფ. 521, ან 16, ს. 43, ფურც. 9.

² იქვე, ფ. 416, ან. 3, ს. 174, ფურც. 2.

³ იქვე, ფ. 521, ან 16, ს. 43, ფურც. 7.

მაღაფევემა გლეხებს დაავალა გადაეცათ ამბოხებულები-სთვის, რომ პირადად მასთან გამოცხადებულეყვნენ, როგორც არეულობის თავკაცები, აგრეთვე რვა-რვა კაცი თითოეული საზოგადოებიდან; თუ აჯანყებულები ამ მოთხოვნას შეასრულებდნენ და შეთანხმდებოდნენ, ჯარს უკან გააბრუნებდა, წინააღმდეგ შემთხვევაში კი სევანეთში შექრითა და სასტიკი სასჯელით იმუქრებოდა.

ვიცე-გუბერნატორი ამით არ დაკმაყოფილდა და სცადა საქმეში სწავლული სევანები და, აგრეთვე, მეზობელ მხარეთა გავლენიანი მოხელეებიც ჩაება.

ამის თაობაზე ბესარიონ ნიჟარაძე წერდა: ლეჩხუმის მაზრის უფროსისაგან მივიღე ბარათი, რომელშიც მწერდა — „სხელ უთუოდ ჩემთან გამოცხადდი, გუბერნატორი გიბარებს, თარჯიმნად უნდისხარ სევანეთში ყოფნის დროსო“¹.

დიდად არ მეამა ამგვარი მოწვევა, — წერდა ბ. ნიჟარაძე, — რომელიც თბილისის სასულიერო სემინარიის მოსწავლე იყო და არდადეგებზე შინ იმყოფებოდა. ამგვარ საქმეში ჩაბმას მას დასვენება ერჩია, მაგრამ სხვა გზა არ ჰქონდა და ლეჩხუმისაკენ გაუდგა გზას:

სამხედრო ექსპედიციის მოახლოებამ აჯანყებულები როდი დააფრთხო, მათ თავის საზღვრების დაცვა კიდევ უფრო გააძლიერეს. „მთის მწვერვალს (ლაპარაკია ლატფარის უღელტეხილზე — გ. გ.) რომ უახლოვდებოდი, — გადმოგვეცემს ბ. ნიჟარაძე, — დამინახეს დარაჯებმა, რომელთა ყურადღება მიიპყრო ჩემმა რუსულმა ჩაცმულობამ. ჟერ კიდევ მოშორებით ვიყავი, როდესაც დაგვიძახეს: ვინ ხართო? ჩემმა ამხანაგმა ჩვენი ვინაობა ძახილითვე შეატყობინა. დარაჯებს გუბერნატორთან გაგზავნილი ბოქაულის მოხელეთაგან ვინმე ვეგონე. მივალწიეთ ლატფარის მწვერვალს, სადაც შემოგვეხვია 200-მდე დარაჯი, რომლებშიც ჩემი ნათესავები და ნაცნობებიც ერიენ. ჩემი წასვლის გამო ახლო ნათესავები ძლიერ შეწუხდნენ, არა გზით არ მიშვებდნენ. ზოგიერთმა მითხრა — ჩხუბი რომ მოხდეს, შენ ვინ გაგარჩევსო? შენც ისე მოგკლავენ, როგორც სხვასო. ვინც ჩემი ნათესავი და ნაცნობი არ იყო, იმათ

¹ ბ. ნიჟარაძე, ისტორიულ-ეთნოგრაფიული წერილები, II, გვ. 179.

სხვა თვალთ შებედეს გუბერნატორთან ჩემს წასვლას. მაჟი აზრით, მე გუბერნატორი იმისთვის მიბარებდა, რომ მის მხარეზე ვიყავი და სვანების მტერი. ერთმა უცნობმა მომამახა, რომ თავისი მიწა-წყლის მოლაღატეს დაე სვანეთის სალოცავი გაუწყრესო. ეს ჩემს ნათესავებს ეწყინათ, როგორ თუ შენ მოლაღატედ მიაჩნიხარო და მათ შორის კინალამ უსიამოვნება მოხდა. დარაჯებმა თითქმის ერთ საათს გამაჩერეს და ამ ხნის განმავლობაში სულ გულსაკლავი სიტყვები მესმოდა: ახლობელიც და გარეშეც ჩემი წასვლის წინააღმდეგი იყო. მაგრამ მე ჩემი მიანიც არ დავიშალე და როგორც იქნა მათ ხელიდან გავუსხლტი“¹.

სალამოს ბ. ნიჟარაძემ სოფელ ლუჯიში (ჩოლურისა და ლაშხეთის საზოგადოებების საზღვარზე) მიაღწია, სადაც ლეჩხუმის მაზრის უფროსი გრინევსკი და თავისი თანამემამულე ექვსი გლეხი დახვდა.

ჩოლურში მყოფი მაზრის უფროსი ერთხელ კიდევ მოელაპარაკა ზემო სვანეთში მიმავალ გლეხებს და უთხრა: წადით და ჩემს მაგიერ ხალხს გადაეცით, რომ თქვენი მიწების დაბეგვრა მთავრობას აზრადაც არ მოსვლია. მათ იმიტომ ზომავენ, რომ ხელმწიფემ უნდა იცოდეს თავისი ქვეშევრდომთა ადგილ-მამულის ოდენობა. მიწაზე და პირუტყვზე გადასახადის დაწესება, აგრეთვე სამხედრო ბეგარის შემოღება მოგონილია ბოროტი პირების მიერ, რომელთაც სურთ სვანეთს ზიანი მოუტანონ. ნუ დაუჯერებთ იმათ, ვინც ამას გეუბნებათ, ისინი თქვენი მტრები არიან და შეცდომაში შეჰყავხართ.

ამგვარი აგიტაციის შემდეგ გრინევსკიმ ნიჟარაძეს კიდევ გაუმეორა. თუ სვანებს სურთ ყველაფერი კეთილად დამთავრდეს და მთავრობამაც არავინ დასაჯოს, ჩემთან ჩამოვიდნენ თქვენი მეთაურები, აგრეთვე რვა-რვა კაცი თითოეული საზოგადოებიდან და ყველა მათგანს მე ცაგერში გუბერნატორთან მივიყვან. თუ ამ მოთხოვნას შეასრულებთ, ჩვენ არავინ დავსჯით და ქუთაისში დავბრუნდებით, თუ არადა სვანეთში ჯარით შევიჭრებით და მაშინ საქმე სხვაგვარად წარიმართებაო.

¹ ბ. ნიჟარაძე, ისტორიულ-ეთნოგრაფიული წერილები, II, გვ. 179.

მეფის მოხელეებმა კარგად იცოდნენ, რომ სვანეთში დღეს თუ ხვალ ახალი გადასახადები უნდა შემოღებულიყო, მაგრამ ახლა მათი უპირველესი ამოცანა არეულობის აღკვეთა და მტკიცე წესრიგის დამყარება იყო.

ბ. ნიჟარაძე და შვიდი გლეხი კალის თემში გამოცხადდნენ და აჯანყებულებს გადასცეს გუბერნატორისა და მაზრის უფროსის დანაბარები. ყოველივე ამან, ბუნებრივია, მათ ეჭვი აღუძრა — ვაი თუ მთავრობას უბრალოდ აინტერესებს ჩვენი მიწების ოდენობა და გადასახადების შემოღებას არ აპირებს, ამ შემთხვევაში აჯანყება და სისხლისღვრა ხომ უმიზნო იქნებაო. ამასთან, მათ ეშინოდათ არ მოტყუებულიყვნენ, რადგან მეფის მოხელეები ხშირად ერთს ამბობდნენ და მეორეს აკეთებდნენ. ასეთ ორჭოფულ ვითარებაში აჯანყებულებმა ირჩიეს სპეციალური წარმომადგენლები გამოეყოთ ათი კაცის შემადგენლობით და გუბერნატორთან გაეგზავნათ.

13 ივლისს აჯანყებულთა დელეგაცია ყაბულათ შერვაშიძის ხელმძღვანელობით ჩოლურში გამოცხადდა გრინევსკისთან, რომელმაც ეს დელეგაცია 14 ივლისს ცაგერში, ვიცე-გუბერნატორ მალაფეევთან წაიყვანა.

მულახის მამასახლისს ყ. შერვაშიძეს მეფის მოხელეები კარგად იცნობდნენ. ბ. ნიჟარაძის გადმოცემით, მაზრის უფროსმა გრინევსკიმ ყ. შერვაშიძეს საყვედურით მიმართა: აგერ 15 წელიწადია, რაც შენ მთავრობის სამსახურში ხარ. მთავრობამ ორი მედლით დაგაჯილდოვა და დღეს შენ მის წინააღმდეგ სვანეთს ამხედრებ. იცოდე, თუ შენს მიერ აჯანყებული ხალხი შენვე არ დაგიწყნარებია, სასტიკად დაისჯები!..!

ყაბულათმა მიუგო: ტყუილად გგონიათ, რომ მე სვანეთის თავი ვიყო, მე კი არა და როგორც ხედავთ — მეოაურად რუსეთის დიდ ხელმწიფესაც უარყოფენ. ჩემი მოთავეობა არაფერ შუაშია, სვანეთში ისეთი არავინ მეგულება, არც ჩემი თავი და არც სხვა, რომ თავის ნებაზე ააჯანყოს ხალხი და კიდევაც დაამშვიდოს. ყველაფერი ყრილობის საქმეა, რაც მას სურს, ის უნდა აასრულოს ყოველმა სვანმა. ყრილობის

1 ბ. ნიჟარაძე, ისტორიულ-ეთნოგრაფიული წერილები, II, გვ. 181.

უნებურად ერთი ფარას ოდენა არც რა გაკეთდება და არც რა წახდება. რაში უნდა ვიყო მე აჯანყებულთა მოთავე? მთელმა ხეობამ ყრილობა მოიწვია კალაში. რასაკვირველია, მეც იქ ვიყავი. ყრილობამ მთხოვა ჩემი აზრი მეთქვა, მეც ვთქვი რასაც ვფიქრობდი. რატომ არ უნდა მეთქვა! მე კიდევ მთავრობის სასარგებლოდ ვილაპარაკე, სხვა კი უარესს იტყოდა. მე თქვენგან მადლობას ველოდი, თქვენ კი მიწყობით! თქვენ რომ ხალხის ლაპარაკი გაგეგონათ, მაშინ სულ სხვას იტყოდით, ხალხი არავის უგონებს..¹.

გრინეესკიმ სვანეთის წარმომადგენლებს უბრძანა ცაგერში გუბერნატორთან წასულიყვნენ.

გრინეესკის ქადილმა ყასბულათი ჩააფიქრა და თავისი ამხანაგები ცალკე გაიხმო მოსალაპარაკებლად. ცოტა ხნის შემდეგ ყასბულათმა გრინეესკის მოახსენა: „მე და ჩემი რვა ამხანაგი წამოვალთ. ჩვენ თვითონ გვსურს გუბერნატორის ნახვა და ყველაფერზე დაწერილებით მოლაპარაკება. რაც შეეხება, ერთ-ერთი ჩვენი ამხანაგი უკან უნდა დაბრუნდეს და ხალხს შეატყობინოს, რომ ჩვენ გუბერნატორთან წავედით“. ყასბულათს ეშინოდა, რომ ზემო სვანეთში კაცის გაშვებაზე უარს მიიღებდა, ამიტომ გრინეესკის უთხრა — ყრილობამ ასე დამავალა და თუ ასე არ მოიქცევით, მაშინ ხალხი იფიქრებს, რომ დაჭერილები ვართ, რაც არ ივარგებს.

მართლაც, ერთი კაცი უკან გაუდგა გზას, ხოლო 8 კაცი გრინეესკისთან და ბ. ნიჟარაძესთან ერთად წავიდა ვიცე-გუბერნატორთან მოსალაპარაკებლად.

ბ. ნიჟარაძის გადმოცემით აჯანყებულთა დელეგაცია გრინეესკისთან ერთად 14 ივლისს 12 საათზე ცაგერში წარსდგა ვიცე-გუბერნატორ მალაფეევთან, რომელიც თავის მხლებელ სამხედრო ოფიცრებთან და ადგილობრივ მემამულეებთან ერთად უზარმაზარი იფნის ხის ქვეშ ისვენებდა. დელეგაციის მისვლისთანავე მალაფეევმა სვანებს ჰკითხა, თუ რატომ და რა მიზეზით აჯანყდნენ?

თავი და თავი აჯანყების მიზეზი, — დაიწყო ყასბულათმა, — არის მიწების აღწერა — გაზომვა, მაგრამ არც სხვა მხრივ ვემადლიერებით მთავრობას.

¹ ბ. ნიჟარაძე, ისტორიულ-ეთნოგრაფიული წერილები, II, გვ. 181.

— რატომ არ ემადლიერებით? — სიტყვა გააწყვეტინა გუბერნატორმა.

— იმიტომ, — მიუგო ყასბულათმა, — რომ თავის დღეში გადასახადები არ გვდებია, დღეს კი გადასახადები შეგვაწერათ. გადასახადების გაღება არ შეგვიძლია, ჩვენ ლარიზნი ვართ, შემწეობას თქვენგან ველით, თქვენ კი ჩვენგან თხოვლობით გადასახადს! მდიდარნიც რომ ვიყოთ, გადასახადები მაინც გვძულს.

გუბერნატორი არწმუნებდა, რომ ეს ჰორი იყო და არ უნდა დაეჯერებინათ. დავიჯერეთ, — განაგრძო ყასბულათმა, — იმიტომ, რომ პირველად არც სხვა გვჯეროდა, მაგრამ მერე ნამდვილი აღმოჩნდა — ბეგარა დაგვადევს (იგულისხმება 1869 წელს შემოღებული საკომლო გადასახადი — გ. გ.). რაკი სხვა ხმები დადასტურდა, ვფიქრობთ მიწაზე გადასახადის შემოღებაც მართალი იქნება. სანამ თქვენთან მოვიდოდით, ზოგიერთმა ლეჩხუმელმა სიკვდილის გუნებაზე დაგვაყენა. ნიშნისმოგებით გვითხრეს, რომ მთავრობა არა მარტო მიწას დაადებს გადასახადს ქცევაზე ხუთ შაურს, არამედ იარაღს აგყრიან და კოშკებსაც დაგინგრევენო. ეს კი დაუჯერებელია, მაგრამ გულს მაინც წყენს. თუ მმართველობა (ე. ი. მთავრობა — გ. გ.) მართლაც ამას გვიპირებს, ბარემ ერთ დღეს ამოგვწყვიტოს, მაშინ იარაღიც ოხრად დაგვრჩება, კოშკებიც და ყველაფერი.

— მე თქვენ ჰკვიანი მგონიხართ და რატომ ერწმუნებით მაგისთანა ჰორებს? — ისევ ჩაერია მალაფევი.

— არ ვერწმუნებით, მაგრამ გადასახადების შემოღება... —

რა გადასახადები? — კვლავ შეაწყვეტინა გუბერნატორმა, იცით ხაზინა რამდენ ფულს ხარჯავს თქვენზე? ბოქაული, მისი თანაშემწე, კანცელარია, სამღვდლოება... ყველა სახელმწიფოს ხარჯზეა. თქვენი გადასახადი მეასედიც კი არაა იმის, რასაც ხაზინა თქვენზე ხარჯავს.

— ალბათ მთავრობისათვის არის საჭირო თქვენ მიერ დასახელებული მოხელენი, — მიუგო ყასბულათმა, — თორემ ჩვენ იმათგან არაფერი სარგებლობა და სიკეთე არ გვინახავს. მე, მართალი უნდა მოგახსენოთ, ყრილობამაც ასე დამაბარა.

რომ გადასახადი გვიმძიმს, ის ჩვენთვის თამარ მეფესაც არ დაუღვია...

— თამარ მეფე გადასახადს არ გახდევინებდათ, — შენიშნა მალაფეევმა, — მაგრამ გიწვევდათ ჯარში, როცა საჭიროება მოითხოვდა, თქვენში ჯარს აყენებდა სარჩენად*. — არა ბატონო გუბერნატორო, — განაგრძო ყასბულათმა, — ეს ასე არ ყოფილა. თამარ მეფესთან ყოველწლიურად რამდენიმე სვანი მიდიოდა თურმე, თითოეულ მოსახლისაგან თითო სასროლი თოფის წამალი მიჰქონდა და მეტი არაფერი. თამარი კი ძღვენის მიმტან სვანებს მეფურად ასაჩუქრებდა ძვირფასეულობით. ეხლა კი მამასახლისის თანაშემწეებს ქუთაისის ხაზინაში მიაქვთ გადასახადები და ხაზინა გზის ფულსაც არ იძლევა. თამარ მეფეს კიდეცაც ვეცოდებოდით თურმე და ბევრჯერ გვწყალობდა... ყასბულათს სურდა კვლავ განეგრძო, მაგრამ გუბერნატორმა მოუჭრა: — ეხლა ამ ლაპარაკს თავი დაუვანებოთ, შენ და შენი ამხანაგები ჩვენთან უნდა წამოხვიდეთ სვანეთში, იქ მე თვითონ გავიგებ ყოველივეს.

ასეთი წინადადება ყასბულათს არ ეამა და ვიცე-გუბერნატორს ჰკითხა — ჯარიც ხომ არ მიჰყავდა სვანეთში? მალაფეევმა მიუგო, რომ — დიახ, ჯარიც მიჰყავდა. ყასბულათმა შეამჩნია ვიცე-გუბერნატორის ულოგიკობა და უთხრა — რა საჭიროა ჯარის წაყვანა — თუკი გადასახადების შემოღება არ გაქვთ განზრახული. გუბერნატორმა მყისვე მიუგო, რომ ჯარი თითქოს იმიტომ მიჰყავდა, რომ ბეჩოს რაზმისათვის სურსათსანოვადე უნდა წაეღო. თან დააყოლა, რომ ჯარის წაყვანა თითქოს სვანებისათვის სასარგებლო საქმე იყო, რადგან ის სვანეთში სასმელ-საკმელს იყიდის, სამაგიეროდ გლეხობა ფულს შეიძენსო.

რაკი ყასბულათი დარწმუნდა, რომ ვიცე-გუბერნატორი სვანეთში წასვლას არ დაიშლიდა, თხოვა თავის დელეგაციიდან ერთ-ერთი რომელიმე წინდაწინვე გაეშეა, რათა ხალხისათვის ყოველივე გაეგებინებინა. მაგრამ მალაფეევი ამაზე არ დათანხმდა და უთხრა, რომ ამ საკითხს გზაში გადაწყვეტდნენ.

* როგორც ჩანს, ვიცე-გუბერნატორი მალაფეევი სვანეთზე და მის წარსულზე წინასწარ იყო ინფორმირებული.

საკმაო შესვენების შემდეგ, 15 ივლისს, მალაფეევი და სამხედრო ექსპედიცია, გენერალ ციტოვიჩის მეთაურობით, ცაგერიდან დაიძრა, ხოლო 16 ივლისს ჩოლურის თემში -- ლატფარის უღელტეხილის მისადგომთან დაბანაკდა. აქ მალაფეევმა კვლავ მოსინჯა სვანეთის საქმე და სცადა მისი დიპლომატიური მოგვარება. მან ჩოლურის თემში შეიტყო, რომ ჯარის მოახლოების გამო აჯანყებულებს ლატფარის გადასასვლელის დაცვა გაუძლიერებიათ. ვიცე-გუბერნატორმა ისიც კარგად იცოდა, რომ მთაგორიან-კლდიან პირობებში ჯარის ნაწილებს და მილიციას გაუჭირდებოდა სვანებთან ბრძოლა ან მათთან იარაღით შეებმა დიდ მსხვერპლს გამოიწვევდა. ამიტომ იგი თავდაჭერილად და ლოიალურად იქცეოდა.

ჩოლურის თემის სოფელ ჭველფში მალაფეევი ერთხელ კიდევ ესაუბრა მასთან მისულ დელეგაციას და ნება დართო ყასბულათის გარდა ერთ-ერთი ვინმე წინდაწინ გადასულიყო უღელტეხილზე (ზემო სვანეთში), რათა იქ ხალხისათვის შეეტყობინებინა ვიცე-გუბერნატორის მისიის მშვიდობიანი ხასიათი.

ვიცე-გუბერნატორი ვარაუდობდა, რომ აჯანყებულებს ლატფარის ქედზე დაცვას მოხსნიდნენ და ზემო სვანეთში იგი უბრძოლველად შევიდოდა.

როგორც აღვნიშნეთ, სვანეთში გაშვების საკითხი ყასბულათმა ჯერ კიდევ ცაგერში წაუყენა მალაფეევს, მაგრამ ამაზე იმიტომ უთხრა უარი, რომ ექსპედიცია ზემო სვანეთამდე მიღწევას რამდენიმე დღეს მოანდომებდა და მალაფეევს ეშინოდა ეს დრო აჯანყებულებს საწინააღმდეგო მზადებისათვის გამოეყენებინათ. ამასთან მშვიდი და ლოიალური მოპყრობით ვიცე-გუბერნატორმა სვანთა დელეგაცია თანდათან დაიახლოვა და, ჩანს, დაარწმუნა, რომ მთავრობა არავითარი ახალი გადასახადების შემოღებას არ აპირებდა.

გუბერნატორი იმასაც პირიდებოდა, რომ თუ აჯანყებულები გზების დაცვას მოხსნიდნენ და მშვიდობიანად დაიშლებოდნენ, არავის დასჯიდა.

თუკი მოვლენები ისე განვითარდებოდა, როგორც ამას გუბერნატორი ირწმუნებოდა, მაშინ ყასბულათი აჯანყებულთა მიზანს და თავის მისიასაც მიღწეულად ჩათვლიდა. ამიტომ

დელეგაციის ერთ-ერთ წევრს დაავალა სასწრაფოდ წასულიყო და აჯანყებულებისათვის გუბერნატორის პირობა გადაეცა. მართალია, ყასბულათს ექვი ეპარებოდა გუბერნატორის გულწრფელობაში, მაგრამ საქმის საბოლოო გარკვევამდე მეფის ჯართან შებმას მიზანშეწონილად არ მიიჩნევდა, ამიტომ აჯანყებულებთან დააბარა, რომ ლატფარის ქედზე დაცვა მოეხსნათ.

იმის გასაგებად აჯანყებულებმა შეასრულეს თუ არა მოთხოვნა, მალაფეევმა ლატფარის დასაზვერად ჯარისკაცები გაგზავნა და სიფრთხილის მიზნით გრინევსკის დაავალა, რომ მათ მხლებელ ლეჩხუმელ თავად-აზნაურებს წინ გაძლოლოდა და, თუკი გზაზე არავითარ ხიფათს არ შეეცრებოდა, მისთვის შეეტყობინებინა, რომ გზა გახსნილი იყო.

ლეჩხუმის მაზრის უფროსს თან ახლდა ბ. ნიჟარაძეც. როდესაც გრინევსკი და მისი მხლებლები კალის თემის სოფ: ლალხორს მიუახლოვდნენ, პატარა მინდორში შენიშნეს უამრავი ხალხი, რომელთაგან ათიოდე შეიარაღებული პირი მათკენ იმავალ გრინევსკისა და მის მხლებლებს შეეგება.

ბ. ნიჟარაძე გადმოგვცემს, რომ შეიარაღებულმა ადამიანებმა მათ უბრძანეს გაჩერებულიყვნენ, მაგრამ გრინევსკი შეეპასუხა, და სთხოვა სოფელში შეეშვათ. მაგრამ მის წინ აღმართულმა თოფმოღერებულმა კაცმა შესძახა: თუ ფეხი გადმოგიდგია წინ, ამწამსვე გაგათავებო. ბესარიონი გრინევსკის მივარდა, მისი ცხენის აღვირს ჩაავლო ხელი და სვანის მუქარა გადაუთარგმნა. „გრინევსკი, — წერს ბ. ნიჟარაძე, — სულ გაფითრდა, ისეთი გულმოსული იყო, რომ შესაძლებლობა რომ ჰქონოდა, მთელ სვანეთს ნაცარტუტად აქცევდა“¹.

შიშმორეულ-დაბნეული გრინევსკი და მისი მხლებლები ცხენებზე შემჯდარი თავარა მზეში იდგნენ, ვერც წინ მიდიოდნენ და ვერც უკან დაბრუნებას ახერხებდნენ. როდესაც გონს მოვიდნენ, შეიარაღებულებს მუდარის კილოთი მიმართეს, რომელიმე პირი მინდორში თავმოყრილ ხალხთან დაბრუნებულიყო და სოფელში შესვლის ნება ეთხოვა.

როგორც იქნა, გრინევსკიმ და მისმა მხლებლებმა სოფელ-

¹ ბ. ნიჟარაძე, ისტორიულ-ეთნოგრაფიული წერილები, II, გვ. 186.

ში შესვლის უფლება მიიღეს. ბ. ნიჟარაძემ ყველა თავის ნათესავთან მიიყვანა, ხოლო თვითონ მინდორში შეკრებილ ამბოხებულებთან მივიდა.

„ჩემს დღეში არ დამავიწყდება ის სურათი, — წერდა ბ. ნიჟარაძე, — რასაც მაშინ ყრილობა წარმოადგენდა. 2000-მდე შეთოფიარალებული სვანი ერთი გრძნობით იყო გამსჭვალული. მათი სურვილი იყო უმაღლეს ბრძოლის დაწყება გრინევსკის და მისი მხლებლების ამოსაწყვეტად. ყველანი იძახოდნენ: ხომ არ აგვცილდება ბრძოლა, ბარემ რას ველოდებით, ახლა დავიწყოთ? ნურაფერს დაუჭერებთ გრინევსკის, ყასბულათი მოციქულად გავაგზავნეთ და ჯერაც არ გამოუშვია, შეიძლება კიდევაც დაიჭირეს“¹. ამბოხებულთა ჩოჩოლში მალე ბ. ნიჟარაძეც ჩაერია. მან განუმარტა, რომ ყასბულათი დაჭერილი არ იყო და ხვალ ან ზეგ დაბრუნდებოდა. მაგრამ ზოგიერთმა ეს არ დაიჯერეს და ვიღაცამ ხმამაღლა დაიყვირა: რაკი ბრძოლა გარდაუვალია, კვირიკეს მადლი გაუწყრეს იმას, ვინც გრინევსკის და მისი მხლებლების დასახოცად არ წამყვეს. როდესაც ამ მოწოდებას ბევრი მიემხრო და სოფლისაკენ გასწიეს, ერთ-ერთი მესტიელი ამბოხებულებს გადაუდგა და უთხრა: ყველანი ხომ არ წავალთ 20 კაცის წინააღმდეგ?! რამდენიმე კაცი გავაგზავნოთ გრინევსკისთან, მოეთხოვოთ უკან დაბრუნება და ჩვენი დელეგატების გამოშვება. თუ ამ მოთხოვნას არ შეგვისრულებს და ჯარი ისე გამოჩნდება, ეს ომს ნიშნავს და მაშინ გრინევსკი და მისი ყველა მხლებელი დავხოცოთ. ეს აზრი ყველამ მოიწონა. მალე გრინევსკისთან მივიდა თითოეული თემის ორ-ორი წარმომადგენელი. ამ ჯგუფს გაყვა ბ. ნიჟარაძეც, რომელმაც გრინევსკის საქმის ვითარება აუხსნა. მაგრამ ამ უკანასკნელს უკან დაბრუნება არ უნდოდა.

გრინევსკის თავის მხლებლებმაც სთხოვეს უკან დაბრუნება, რადგან აღელვებულ ხალხთან შერკინება შეიძლებოდა სიცოცხლის ფასად დასჯდომოდათ. ლეჩხუმის თავად-აზნაურთა ერთი წარმომადგენელი ამბობდა: უგნურობად ჩამოგვართმევენ, რომ აღელვებულ ხალხს ასე ახირებულად თავი დავახოცინოთ. ნუ იღუპავთ თავს და ნურც თქვენი ცოლ-შვილის

¹ ბ. ნიჟარაძე, ისტორიულ-ეთნოგრაფიული წერილები, II, გვ. 186.

ცოდვაში ჩადგებით. ამბოხებულთა აშკარა მუქარამ გრინეესკი აიძულა თავის ჯგუფითურთ 18 ივლისს უკან გაბრუნებულიყო და ღამე ლატვიარის ქედზე უკუნეთ სიბნელეში გაეტარებინა.

სამხედრო ექსპედიცია ვიცე-გუბერნატორ მალაფეევისა და გენერალ ციტოვიჩის მეთაურობით 19 ივლისს, დილაადრიანად ჩოლურიდან გაუდგა გზას, რამდენიმე საათის შემდეგ გრინეესკის ჯგუფი და მალაფეევის ამაღა ერთმანეთს შეხვდნენ ქედზე. გრინეესკიმ დეტალურად მოახსენა ყველაფერი, რაც გადახდა.

მალაფეევი საბოლოოდ დარწმუნდა მათდამი სვანების მტრულ განწყობილებაში და ბრძანა მცირე შესვენების შემდეგ სასწრაფოდ დაშვებულიყვნენ სოფლისაკენ. ამასთანავე გუბერნატორმა არაფერი შეიმჩნია და თავისთან მიიხმო სვანთა დელეგაცია. მალაფეევა ერთხელ კიდევ დაამშვიდა ისინი, რომ ზემო სვანეთში არავითარი გადასახადების შემოღება არ იყო ნაპრაუდები და თან ყასბულათს სთხოვა, წინ წაძლოდა და აჯანყებულები დაერწმუნებინათ, რომ ყველაფერი, რაც მათ გაიგეს და რისთვისაც აჯანყდნენ, ბოროტი და ცრუ ხმების შედეგია, რომ ჯარი ბეჩოს სამხედრო რაზმის მოსამარაგებლად მიდიოდა. ყასბულათი და მისი ამხანაგები დარწმუნებულები იყვნენ, რომ ჯარის უეცარი გამოჩენა კალაში ამბოხებულთა შეშფოთებასა და ჯართან შეჯახებას გამოიწვევდა, სიხარულით დაეთანხმნენ გუბერნატორის წინადადებას და სწრაფად დაეშვნენ კალაში.

19 ივლისს საღამოს სამხედრო ექსპედიციამაც მიაღწია კალის თემის სოფელ დაუბერამდე, სადაც სოფლის მოპირდაპირე მხარეზე მინდორში დაბანაკდა.

როგორც კი ექსპედიციამ კალის თემამდე მიაღწია, აჯანყებულებმა სცადეს მტრის შეიარაღებული ძალების დაზვერვა, მაგრამ აჯანყებულთა მოქმედება არც მოწინააღმდეგეს გამოპარვია.

„19 ივლისს საღამოს, როდესაც კალის საზოგადოების სოფელ დაუბერამდე მივალწიეთ, — წერდა მალაფეევი მეფისნაცვლისადმი მოხსენებაში, — იქ ჩვენი განლაგების პირდაპირ — მდინარე ენგურის მეორე მხარეზე შევნიშნეთ აჯანყ-

ბულთა 200-მდეკაციანი შეიარაღებული ბრბო. მე მაშინათვე გავაგზავნე მათთან ჩემი მხლებელი ნდობით აღჭურვილი პირები — ლეჩხუმის თავადთაგან იმ მოთხოვნით, რომ იქ მყოფთაგან — კალისა და მის მეზობელ უშგულის საზოგადოებათა წარმომადგენლები ჩემთან გამოცხადებულიყვნენ, ხოლო დანარჩენები დაშლილიყვნენ და თავიანთ სახლებში წასულიყვნენ. მაგრამ მათ მიპასუხეს, რომ თითქოს ჩემი რაზმის და აგრეთვე ყაბარდოს მილიციის მისვლა მათ მიწა-წყალს და ოჯახებს აოხრებით ემუქრებოდა, გადაწყვიტეს ბრძოლაში დაღუპულიყვნენ, ვინემ ყოველი ამის გულგრილი მყოფრებელი ყოფილიყვნენ. ამასთანავე, აჯანყებულები ირწმუნებოდნენ, რომ მათ არავითარი მტრული განზრახვა არ ჰქონიათ არც მთავრობისადმი საზოგადოდ და არც სვანეთში მყოფი ჭარისადმი და მთხოვდნენ შეწყალებას¹.

ვიცე-გუბერნატორსა და აჯანყებულებს შორის მოლაპარაკებამ ორ დღეს გასტანა. ამ დროს ერთ-ერთი მთავარი შუამავალი იყო ჰქვიან და გავლენიან კაცად ცნობილი ფარნაოზ გელოვანი, რომელსაც მრავალი აჯანყებული იცნობდა და ენდობოდა.

აჯანყებულებს გუბერნატორმა შეუთვალა, რომ სვანეთში რაზმი მოვიდა არა სვანეთის ასაოხრებლად, არამედ წესრიგის აღსადგენად, რომ ხმები — მიწასა და პირუტყვზე გადასანადის დაწესებაზე, აგრეთვე სამხედრო ვალდებულების დაწესებაზე — ყოველგვარ საფუძველს მოკლებულია².

მოლაპარაკების ერთ-ერთი მონაწილის ბ. ნიჟარაძის გამოცემით, გუბერნატორის განცხადებაზე, რომ მთავრობას სვანებისათვის სიკეთის მეტი არაფერი მოუტანია და ამისი მადლობელი უნდა იყვნენ, თავის მხრივ, სვანები უთვლიდნენ, რომ მათ არავისი შეწუხება არ სურთ, რომ სვანები, როგორც აქამდე ცხოვრობდნენ, სხვისი შემწეობის გარეშე, ახლაც ისე იცხოვრებენო და სხვ.³

ამგვარი მოლაპარაკების შედეგად ამბოხებულთა უმრავლესობა დარწმუნდა, რომ მთავრობა ველარ გაბედავდა გადა-

¹ საისტორიო მოამბე, I, თბილისი, 1945, გვ. 143.

² იქვე.

³ ბ. ნიჟარაძე, ისტორიულ-ეთნოგრაფიული წერილები. II, გვ. 188.

სახადების შემოღებას და, რომ ჯარის მოყვანის მიზანიც მხოლოდ წესრიგის აღდგენა იყო და სხვა არაფერი.

ორი დღის მოლაპარაკების შემდეგ მალაფეევმა შეძლო აჯანყებულთა უნდობლობა გაეტეხა და პირადად ესაუბრა კალაში თავმოყრილ გლეხთა წარმომადგენლებს, მაგრამ, რადგან ისინი ბეჩოსა და ლატალის საზღვარზე მდგომი თანამოძმეების აზრის მოლოდინში იყვნენ, ვიცე-გუბერნატორს საბოლოო პასუხი მაინც ვერ გასცეს. 22 ივლისს — დილას კალაში თავმოყრილმა აჯანყებულებმა ლატალიდან მიიღეს ცნობა, რომ თუკი გუბერნატორის სიტყვა სარწმუნო იყო, თვითონაც თანახმა იყვნენ წინააღმდეგობის გაუწევლად დაშლილიყვნენ.

ყოველივე ამის შემდეგ, აჯანყებულებმა მალაფეევისა და ციტოვიჩის სამხედრო ექსპედიციას უფლება მისცეს ბეჩოში წასულიყო, ხოლო თვითონ თავიანთ სახლებში დაბრუნდნენ.

რაკი მალაფეევმა კალის თემში თავის მიზანს მიაღწია და აჯანყებულები დაშალა, 23 ივლისს ბეჩოსკენ გასწია. იგი გზადაგზა აზუსტებდა მთავრობის მოწინააღმდეგე სვანთა ვინაობას. სამხედრო ექსპედიციისათვის გზაში წინააღმდეგობა არავის გაუწევია. ოღონდ, როდესაც მან ბეჩოსა და ლატალის საზღვარს — ბალის ქედს მიაღწია, აქ ექსპედიციის მხვერავებმა შენიშნეს აჯანყებულთა 150-მდეკაციანი შეიარაღებული რაზმი, რომელსაც დასავლეთიდან მოსული მტრის მოგერიება ევალებოდა, თუმცა ამჟამად იგი, ბეჩოს მხრიდან მოსალოდნელი საფრთხის გამო, ჩახერგილ და წალეკილ გზას აკეთებდა. მიუხედავად იმისა, რომ აჯანყებულები უკვე შეთანხმებულნი იყვნენ წინააღმდეგობის გარეშე დაშლილიყვნენ, ბალის ქედზე მდგომმა რაზმმა თავისი წარმომადგენლები აახლა მალაფეევს და, რადგან ყაბარდოს მილიცია კვლავ ბეჩოში იმყოფებოდა, გარანტია მოითხოვა, რომ არავის არაფერს დაუშავებდა.

„ამბობებულთა ამ უკანასკნელი ჯგუფის მიმართაც ისეთივე პოზიცია დავიკავე: — წერდა მალაფეევი, — როგორიც დავბერში და იგივე შედეგს მივალწიე. ადამიანს, რომელსაც არავითარი საქმე არ ჰქონია სვანებთან, ჩემი შემწყნარებლური მოქმედება შეიძლება სისუსტედ მოეჩვენოს, მაგრამ ვინც

იცის სვანების ხასიათის სიმკაცრე, შრომის მძიმე პირობებ-
და საკუთარი სურვილის წინააღმდეგ წაყენის სიძნელე....
უსამართლოდ და უმიზნოდ მიიჩნევს მათ მიმართ ძალადობის
გამოყენებას ისე, თუ წინასწარ არ ამოწურე მათი დამშვიდე-
ბის და შთაგონების ყოველგვარი შესაძლებლობა“¹.

შემრიგებლური და მოხერხებული ტაქტის წყალობით ნა-
ლაფეევმა შეძლო ლატალშიც დაემშვიდებინა და დაეშალა აჯან-
ყებულები, თვითონ კი ბეჩოში მშვიდობიანად შესულიყო.

ბეჩოში დაბინავებული მალაფეევი გამოძიებას შეუდგა
მან ადგილობრივ ადმინისტრაციას მოსთხოვა დამნაშავეთა
სია და დაწვრილებითი მონაცემები. ბოქაულმა და მისმა თა-
ნაშიემწემ ვიცე-გუბერნატორს წარუდგინეს სია, რომელშიც
აჯანყების დამწყებად და ხელმძღვანელად 36 კაცს მიიჩ-
ნევდნენ.

მალაფეევი შეეცადა ყველა აქტიური აჯანყებულის გამო-
აშკარავებას. რამდენიმე დღეში მან გრინევსკის, მეფის ნაცვ-
ლის ადიუტანტისა და გრაფ ტიზენგაუზენის სპეციალური მო-
ხელის თანდასწრებით 36 ბრალდებული და 80-მდე სხვა პი-
რი გამოიძახა.

დაკითხულთა აბსოლუტურმა უმრავლესობამ ვიცე-გუბერ-
ნატორს ერთნაირი ჩვენება მისცა.

გამოძიებისა და სვანეთის ადმინისტრაციის მონაცემების
საფუძველზე ვიცე-გუბერნატორმა საბოლოოდ დაადგინა,
რომ ლატალის საზოგადოება, სადაც პირველად დაიწყო პი-
წების გაზომვა, უნდობლად მოეკიდა მთავრობის ღონისძიებას.
მაგრამ მას აშკარა წინააღმდეგობა არ გაუწევია. მალაფეევის
დასკვნით, როდესაც ბოქაულსა და მის თანაშემწეს შესტრისა
და მულახის მემამულეებისათვის* მიწის გაზომვის ბლანკების
გადაცემა უნდოდათ, მათ ამაზე სასტიკი უარი მიიღეს. „მარ-
თალია, — წერდა მალაფეევი, — აზნაურების მხრივ გლეხების
წამქეზებლობაზე პირდაპირი მონაცემები არ მოიპოვება, მაგ-
რამ; რადგან მიწაზე გადასახადი სრულიად უცხო და ახალი

¹ საისტორიო მოამბე, I, გვ. 144.

* აქ მალაფეევი შენიშნავს, რომ ეს მემამულეები აზნაურებად იწოდებოდნენ. მალაფეევის შენიშვნით, გლეხები ასეთ გადასახადს (ფეოდალურ ვალდებულებებზეა ლაპარაკი — გ. გ.) აღრეც იხდიდნენ.

მხოლოდ მემამულეებისათვის იყო, არ შეიძლება არ დარწმუნდეს იმაში, რომ წინააღმდეგობას გაწევაში სწორედ მესტიისა და მულახის აზნაურები იყვნენ პირველი დამნაშავენი“¹.

გამოძიებამ მალაფეევი იმაშიც დაარწმუნა, რომ ხალხის ამბოხების მიზეზი იყო ხმები მიწასა და პირუტყვზე დიდი გადასახადის დაწესების, ასევე სამხედრო ვალდებულების შემოღების თაობაზე.

ცხადია, გუბერნატორმა ყველაზე უკეთესად იცოდა, რომ სვანეთში ახალი გადასახადები და სხვა ვალდებულება უნდა შემოღებულიყო და ეს ადგილობრივმა ადმინისტრაციამ გაავრცელა, მაგრამ ეს რომ ოფიციალურად გამოაშკარავებულიყო, ნათელი გახდებოდა ისიც, თუ განკარგულება ვინ გასცა. ასეთ შემთხვევაში კავკასიის ადმინისტრაცია იძულებული გახდებოდა ოფიციალურად გამოეცხადებინა თავისი გადაწყვეტილების გაუქმება. ცხადია, ეს თავისი პოლიტიკის აშკარა მარცხი იქნებოდა და რაკი ეს არ აწყობდა, გუბერნატორმა მრავალნაირი ვერსია გამოიგონა — ყოველივე ცრუ ხმებს, გულუბრყვილობას და სვანების ამბოხებისადმი მიდრეკილებას დააბრალა.

მიუხედავად იმისა, რომ აჯანყებისადმი ხელმძღვანელობა ოფიციალურად არავის დაუმტკიცდა, ადგილობრივი ადმინისტრაციის დასმენით და ტენდენციურ გამოძიებაზე დაყრდნობით ვიცე-გუბერნატორმა სამართალში გადასცა 16 კაცი, მათ შორის ყველაზე მძიმე ბრალდება ყასბულათ შერვაშიძეს წარედგინა.

ბეჩოში გამოძიებისას მალაფეევთან პირველი ყ. შერვაშიძე გამოცხადდა. უალრესად ჭკვიანი, გამჭრიახი და მამაცი ყასბულათი თავს იმართლებდა და ყველაფერში მთავრობას და მის მოხელეებს ადანაშაულებდა. იგი მზად იყო თავის მოქმედებაზე პასუხი ეგო.

მძიმე ბრალდება წარედგინათ აგრეთვე გინადრუყვ ფარჯიანს, ყანსავ შერვაშიძეს (ყასბულათის შვილი), სვინჩი ჯაფარიძეს, შახუბათ ქურდიანს, ბითე იოსელიანს, მაბილა ფილფანს, ბექმურზა ცვირიბიანს, თაისავ კვანჭიანს, გურმაჩ გასვიანს,

¹ საისტორიო მოამბე, გვ. 145; საქ. ცსსა, ფ. 416, ან 3, ს. 174, ფურც. 4.

ჩარგაზ ჯოხაძეს, ბაჯუ გირგვლიანს, მურაბი ჩართოლანს, ბექა ფილფანს და ბაბი ნავერიანს.

დამნაშავედ ცნობილმა პირებმა, აგრეთვე ყველა დაკითხულმა განაცხადა, რომ მათ ხელმძღვანელები არ ჰყოლიათ, ყველა იმას აკეთებდა, რაც სურდა, რომ ხელისუფლების მიერ ექვემდებარებული პირები ხელმძღვანელები კი არა, არამედ ხალხის თხოვნით მოლაპარაკედ იყვნენ არჩეულები.

მიუხედავად ასეთი ჩვენებებისა, მალაფეევმა ბოქაულის მიერ წარდგენილ სიაში შეტანილ პირთა ნაწილი მაინც დამნაშავედ ჩათვალა, რადგან მისი განსჯით, სურვილის შემთხვევაში აღნიშნულ პირებს შეეძლოთ გავლენა მოეხდინათ ამბოხებულებზე და ხალხი იმთავითვე დაემშვიდებინათ. რაკი ეს პირები ასე არ მოიქცნენ, მალაფეევმა ისინი დაადანაშაულა — მათ შორის 16 პირი ამბოხების მთავარ გამძალებლად სცნო. მით უფრო, რომ პოლიციის და ადგილობრივი ადმინისტრაციის დახასიათებით, ეს პირები ადრეც გამოირჩეოდნენ როგორც სვანების ყოველგვარი ურჩობის მუდმივი ინიციატორები.

ყოველივე ამის გამო, გამოძიებამ მიზანშეწონილად სცნო 16 პირის სვანეთიდან სხვადასხვა ვადით გადასახლება. სასჯელის ასეთი ზომა მალაფეევმა, ერთი მხრივ ლმობიერად მიიჩნია, მეორე მხრივ, სასარგებლო ღონისძიებად ჩათვალა, რადგან თითქოს ამით სვანეთი არაკეთილსაიმედო პირთა გავლენისაგან გათავისუფლებოდა.

ბეჩოში გამოცხადებული 13 ბრალდებული გუბერნატორმა დააკავა. მათ განუცხადა, რომ ქუთაისში უნდა წაყოლოდნენ და იქ მეფისნაცვალთან უშუამდგომლებდა, რათა ისე მძიმედ არ დასჯილიყვნენ, როგორი დანაშაულიც ჩაიდინეს. ყასბულათი იხტიბარს არ იტეხდა და გუბერნატორს არწმუნებდა, რომ თანახმა იყვნენ ქუთაისში გაყოლოდნენ, რადგან არავითარი დანაშაული არ მიუძღვით. „მე იმედი მაქვს, — განაცხადა ყასბულათმა, — რომ რუსეთის კანონი სამართლიანია და მეფისნაცვალი მართალ ადამიანებს არ დაგვსჯის“.

მიუხედავად მკაცრი ბრძანებისა, დამნაშავედ ცნობილ პირთაგან ოთხი: ედავ გირგვლიანი, შახუბათ ქურდიანი, გურამაჩ გასვიანი და ჩარგაზ ჯოხაძე ბეჩოში არ გამოცხადდნენ.

ბოჭაული და მაზრის უფროსი დაუინებით მოითხოვდნენ, რომ ეს ოთხი ბრალდებული ვიცე-გუბერნატორის ბეჩოდან წასვლამდე შეეპყროთ, მაგრამ რაკი უკან დაბრუნებისას ჯარს იმ თემებში უნდა გაეცლო, სადაც აღნიშნული პირება ცხოვრობდნენ, გუბერნატორმა გაქცეულთა შესაპყრობად სამხედრო ნაწილის წინდაწინ გაგზავნაზე თავი შეიკავა.

ერთი კვირის შემდეგ სამხედრო ექსპედიცია და ყაბარდოს მილიცია ბეჩოდან დაბრუნდნენ. ლატალში გავლისას მალაფე-ევმა მოითხოვა ედავ გირგვლიანის გამოცხადება, მაგრამ რაკი ამას ვერ მიაღწია, ბრძანა გირგვლიანების სახლკარისათვის ჯარს ალყა შემოერტყა და ედავი ძალით დაეპატიმრებინა. სამხედრო ნაწილის გამოჩენისთანავე ე. გირგვლიანი და მისი მოძმეები ქაეზა და ბაჯუ შეიარაღდნენ და კოშკში შევიდნენ. რადგან გლეხები ნებაყოფლობით არ ჩაბარდნენ, გუბერნატორმა ძალას მიმართა და ციტოვიჩს უბრძანა გირგვლიანებისათვის ცეცხლი დაეშინა. კოშკში ჩაკეტილებმა ცეცხლს ცეცხლითვე უპასუხეს. გირგვლიანებმა ექვსი ჯარისკაცი დას-ქრეს და მთელი დღე წინააღმდეგობას განაგრძობდნენ. რაკი ჩვეულებრივ იარაღიდან სროლამ შედეგი არ გამოიღო, გენერალმა ციტოვიჩმა ბრძანა გირგვლიანების კოშკისა და სახლებისათვის ქვემეხების ჯგუფური ცეცხლი დაეშინათ. ქვემეხების ჭურვებმა დაღამებისას კოშკის ირგვლივ მდებარე ნაგებობებს ცეცხლი გაუჩინა, მალე ეს ალი კოშკსაც მის-წვდა. კრილობისაგან შეწუხებული ედავი და საფრთხეში ჩა-ვარდნილი მისი თანამებრძოლები იძულებული შეიქნენ კოშ-კიდან გამოსულიყვნენ და მტერს ჩაბარებოდნენ.

ვიცე-გუბერნატორი არ ელოდა, რომ ასე გაუჭირდებოდა ერთი დამნაშავეის შეპყრობა. რაკი სამი დანარჩენი ბრალდებული არ გამოცხადდა და მათდამი დევნა საშიშროებასთან იყო დაკავშირებული, მალაფეევმა დამნაშავეთა შეპყრობა ად-გილობრივ ადმინისტრაციას დაავალა, ხოლო თვითონ სვანე-თი დატოვა.

ქუთაისში დაბრუნებულმა მალაფეევმა სვანეთის საქმეზე მეფისნაცვლის მიხეილ ნიკოლოზის ძის სახელზე მოხსენები-თი ბარათი შეადგინა.

ვიცე გუბერნატორის მოხსენებაში, პირველ რიგში, სვა-

ნეთის აჯანყების მიზეზები და მსვლელობა იყო დახასიათებული, შემდეგ კი სამხედრო ექსპედიციის შედეგები და აჯანყების („არეულობის“) მოთავე 16 კაცის ვინაობა იყო გადმოცემული.

მოხსენებაში მალაფეევი ფარისევლურად თხოულობდა, რომ იმ ბრალდებულებისადმი, რომლებიც მასთან ნებაყოფლობით გამოცხადდნენ, მეფისნაცვალს მეტისმეტი სიმკაცრე არ გამოეჩინა — მათთვის სვანეთიდან რამდენიმე წლით გადასახლება ეკმარა, ხოლო ისინი, ვინც გაიქცნენ და იმალებოდნენ, უმკაცრესად დასჯილიყვნენ.

მეფისნაცვალმა 1875 წ. 22 აგვისტოს ქუთაისის ვიცე-გუბერნატორის მოხსენებას — „სვანეთის არეულობაში მონაწილე დაპატიმრებულ სვანთა შესახებ“ — წააწერა: ქუთაისის გუბერნატორის მოვალეობის შემსრულებლის „სტატსოვეტნიკ“ მალაფეევის წარდგინება მოხსენებისადმი დართულ სიაში ჩამოთვლილ პირთა სვანეთიდან ადმინისტრაციული წესით გადასახლების შესახებ — დამტკიცდეს. თუკი აღნიშნულთაგანს არეულობაში მონაწილეობის გარდა, დამატებითი ცნობებით, სხვა რამ დანაშაულიც დაუდასტურდა, მაშინ გადასახლება უფრო მძიმე სასჯელით — პატიმრობით შეეცვალოს¹.

ხოლო გირგვლიანების (რომელთაც შეიარაღებული წინააღმდეგობა გასწიეს) საქმე სამხედრო სასამართლოს უნდა გაერჩია. ამის თაობაზე კავკასიის სამხედრო ოლქის შტაბი 1875 წ. 2 სექტემბერს მეფისნაცვლის მთავარმმართველობას ატყობინებდა: 26 აგვისტოს სამხედრო მინისტრმა ტელეგრამით გვაცნობა, რომ ხელმწიფე იმპერატორმა ინება სვანეთის მღვლვარების მთავარი დამნაშავეები სამხედრო სასამართლომ ომისდროინდელი კანონით გაასამართლოს. ამასთანავე სამხედრო შტაბის უფროსი მთავარმმართველობას თხოვდა, რომ ქუთაისის გუბერნატორს სპეციალური სია და დახასიათება წარედგინა იმ პირებისა, რომელთა საქმე სამხედრო სასამართლოს უნდა გაერჩია².

სვანეთის აჯანყების მონაწილეთა საქმის წინასწარ გარჩევაში ვიცე-გუბერნატორთან ერთად მონაწილეობდნენ გუბერ-

¹ საქ. ცსსა, ფ. 20, ს. 2468, ფურც. 20

² იქვე, ფურც. 23.

ნიის პროკურორი, პოლიციისა და მაზრის უფროსები, ბოქაული და სხვ.

გუბერნატორისა და პროკურორის მიერ წინასწარ მიღებული დამატებითი მონაცემების საფუძველზე აჯანყების მეთაურებად მიჩნეულ ზოგიერთ პირს თითქოს სხვა დანაშაულიც ჰქონდა ჩადენილი. ამიტომ გადაწყდა, რომ საქმის საბოლოო გამორკვევამდე, ყასბულათ და ყანსავ შერვაშიძეები, გურმაჩ გასვიანი, ჩარგაზ ჯოხაძე, შახუბათ ქურდიანი და თაისავ კვანჭიანი ამოღებული ყოფილიყვნენ ადმინისტრაციული წესით გადასასახლებელთა სიიდან, რაც მალე შინაგან საქმეთა და სამხედრო მინისტრებსაც ეცნობათ.

იმ შემთხვევაში, თუ სვანეთიდან ადმინისტრაციული წესით გადასასახლებელთა სიიდან ამოღებულთაგან რომელიმეს სისხლის სამართლის დანაშაული არ დაუდასტურდებოდა ან ეს დანაშაული მსუბუქი აღმოჩნდებოდა, ვიცე-გუბერნატორის განცხადებით, ეს პირნიც იმავე წესით დაისჯებოდნენ, როგორც ეს თავიდან იყო გათვალისწინებული, ე. ი. ადმინისტრაციული წესით იქნებოდნენ სვანეთიდან რამდენიმე წლით გადასახლებული.

როგორც ჩანს, ბეჩოს გამოძიების შემდეგ ლატალის შეიარაღებულმა შეტაკებამ, აგრეთვე რამდენიმე ადამიანის დამალვამ, აჯანყების მონაწილე პატიმართა საქმეც საგრძნობლად გაართულა. მეფის მოხელეები ცდილობდნენ მათთან ანგარიშის გასასწორებლად უფრო მძიმე ბრალდება გამოენახათ.

ეტყობა, სვანეთის აჯანყების მონაწილე დაპატიმრებულ პირთა საქმეების დამამძიმებელი სხვა საბუთების გამოძებნა გაჭირდა, მიუხედავად დეტალური ძებნისა, საოლქო სასამართლო ორგანოების ხელში არავითარი მასალა არ აღმოჩნდა აჯანყების მოთავედ მიჩნეული რომელიმე პირის სისხლის ან სამოქალაქო სამართალში მისაცემად. ამიტომ გუბერნიის პროკურორი იძულებული გახდა 5 სექტემბერს ვიცე-გუბერნატორისათვის ეცნობებინა, რომ სვანეთიდან ადმინისტრაციული წესით გადასასახლებელ პირთაგან არც ერთი არ იყო პასუხისგებაში მიცემული და დევნილი. აღნიშნულის გამო, პროკურორმა სანქცია გასცა აჯანყების მონაწილე სვანთა გადასახლების სისრულეში მოყვანაზე, ოღონდ საქმის საბოლო-

ოდ გადასაწყვეტად მეფისნაცვლის თანხმობა უნდა ყოფილიყო. ამასთან, შინაგან საქმეთა მინისტრის სახელმძღვანელო განკარგულების თანახმად, გუბერნიის ხელმძღვანელობა ვალდებული იყო ადმინისტრაციული წესით გადასასახლებელ პირთა დანაშაულებრივი საქმეების ძებნა განაჩენის სისრულეში მოყვანის შემდეგაც განეგრძო.

მართალია, მეფის მოხელეები ამაოდ დაშვრნენ აჯანყების მონაწილეებზე დამატებითი ბრალდების დამტკიცებაზე, სამაგიეროდ, ქუთაისის ციხეში პოლიციამ პატიმრებს ისეთი მძიმე პირობები შეუქმნა, რომ ორი თვის შემდეგ ისინი სიკვდილის კარამდე მივიდნენ. უმძიმესი რეჟიმისა და არაადამიანური დამოკიდებულების შემდეგ სექტემბრის შუა რიცხვებამდე აჯანყების მონაწილეთაგან ოთხი უკვე გარდაიცვალა, ხოლო დანარჩენებიც უკიდურესად დაძაბუნდნენ.

იმის რიღით, რომ განაჩენის სისრულეში მოყვანამდე აჯანყების ყველა მონაწილე არ დახოცილიყო, ქუთაისის გუბერნიის მმართველი მალაფეევი იძულებული გახდა 1875 წლის 24 სექტემბერს მეფისნაცვლის მთავარმმართველობის უფროსისადმი სპეციალური წერილით მიემართა, რათა აჯანყების მონაწილე სვანები სასწრაფოდ გადაესახლებინათ ან იმთავითვე თბილისის ციხეში გადაეყვანათ, რადგან თითქოს ქუთაისის ციხე პატიმართა ჯანმრთელობაზე მომაკვდინებლად მოქმედებდა. ვიცე-გუბერნატორი აცნობებდა, რომ პატიმართაგან ოთხი უკვე გარდაცვლილი იყო, ხოლო თითქოს სამხედრო სასამართლოს სისასტიკის მოლოდინით შეშინებულმა ერთ-ერთმა ბრალდებულმა თავის მოკვლაც კი სცადა. ყოველივე ამის გამო, მალაფეევი აჯანყების მონაწილეთა ნაწილის გადასახლებას, ხოლო მთავარი დამნაშავეების დაუყოვნებლივ გასამართლებას თხოულობდა სამხედრო სასამართლოს შესვეობით¹.

საქირო მასალების თავმოყრის შემდეგ, გუბერნიის პოლიციამ, პროკურატურამ და მმართველობამ სვანეთის აჯანყების მოთავეებად მიჩნეულ 16 კაცს ასეთი საბრალდებო საქმე შეუდგინეს²:

¹ საისტორიო მოამბე, I, გვ. 154.

² იქვე. გვ 151—152.

კვარი და სახელი	დანაშაულის ხასიათი და ბრალდება	განზრახული სასჯელი	შენიშვნა
1	2	3	4
<p>უკანაბლათ შე- რვაშიძე (მულა- ნის საზოგა- დობა).</p> <p>ვანადრუყვ ფარჯიანი (ლა- ტლის საზოგა- დობა).</p>	<p>თავიანთი აღიარების და ყველა დაკითხული პირის ერთხმად დამოწმებით, მხილებული არიან მღელვარე ბრბოს ფიცის მიღების მოთავეობაში. ადგილობრივი პოლიციის მიერ დიდი ხანია ორივე ცნობილია, როგორც თავიანთ საზოგადობაში დიდი გავლენის მქონე, რასაც უკუღმართად იყენებენ მთავრობის განქარგულება-თა წინააღმდეგ.</p>	<p>სევანეთიდან 5 წლით გადასახლება.</p> <p>სევანეთიდან 3 წლით გადასახლება.</p>	<p>აღნიშნულის გარდა, უკანაბლათ შე- რვაშიძეს ბრალი ედება სისხლის სამართლის დანაშაულში, რაც გამოძიების საქმის წარმოებაშია.</p>
<p>უკანავე (უკანაბ- ლათის ძე) შე- რვაშიძე (მულა- ნის საზოგა- დობა).</p>	<p>ადგილობრივი უფროსების და ჩემი პირადი დაკვირვებით, მშფოთვარე ხასიათისაა, არეულობის დროს განუშორებლად იმყოფებოდა მამამისთან.</p>	<p>სევანეთიდან 5 წლით გადასახლება.</p>	<p>ბრალი ედება სისხლის სამართლის რამდენიმე დანაშაულში, რაც გამოძიების საქმის წარმოებაშია გამოსარკვევად.</p>
<p>მესტიის საზოგა- დობის აზნაური სეინი ჯაფარიძე.</p>	<p>მრავალი მოწმის ჩვენებით ბრალი ედება იმაში, რომ მიწის აღწერის დროს მულახის საზოგადობას მთავრობის წინააღმდეგ ამხედრებდა. მონაწილეობდა ყველა ყრილობასა და ფიცის მიღებაში.</p>	<p>პატიმრობა 1 წლით.</p>	<p>გამოცხადდა ჩემთან, გულწრფელ სინანულს გამოთქვა მდა.</p>
<p>მულახელი აზნაური შახუ- ბათ ქურდიანი.</p> <p>მესტიელი აზნა- ურ ბესო გომთე- ლიანი.</p>	<p>ბოქაულის და სხვა თანამდებობის პირთა ჩვენებით, მხილებულები არიან იმაში, რომ პირველებმა განაცხადეს უარი ბლანკების მიღებაზე და აღრიდან არიან ცნობილი, როგორც დაუდგარი, დაუმორჩილებელი და თვითნება ადამიანები.</p>	<p>სევანეთიდან 3 წლით გადასახლება</p>	<p>სხვების და პატიმრების დროს დაიმა- ლა, დაპატი- მრებისათვის ზომები მიღებული.</p>

1	2	3	4
მულახელი აზნაური ბითე ოხსელიანი.	წინა ორი დამნაშაის მსგავსად ბრალი ედება მუ- ლახის მოსახლეობის წა- ქეზებაში.	სევანეთიდან 2 წლით გა- დასახლება.	
მესტკელი გლეხი მაბაღა ფილფანი ლატალელი გლე- ხი ბექმურზა წვარიბიანი. ლატალელი გლე- ხი თაისაკ ეკანკიანი.	მრავალი მოწმის ჩვენე- ბით მხილებული არიან, რო- გორც ყველა ყრილობის და დაფიცების მონაწილენი, აგრეთვე სხვების წამქე- ზებლები.	სევანეთიდან 3 წლით გა- დასახლება. " "	ქურდობის გამო სასა- მართლოშია გადაცემული.
კალის თემის სოფ. ხალდეს გლეხი გურმაჩ კასვიანი. იმავე საზოგა- დობისა და სო- ფლის გლეხი ჩარვაზ ჯონხაძე.	მრავალი პირის ჩვენებით მხილებული არიან, როგორც ყველა მღელვარების და და- ფიცების აქტიური მონაწი- ლები. ჩემს მიერ (იგული- სხმება ვიცე-გუბერნატორი გ. გ.) აჯანყებულ ბრბოსთან მოსალაპარაკებლად მიგზა- ვისას ყველაზე მეტს ყვი- როდნენ და ხალხს აფრთხი- ლებდნენ არ დაშლილიყვენ. ადგილობრივი პოლიციის მიერ დიდი ხანია ორივე ცნობილი არიან, როგორც მთავრობის ყველა განკარ- გულების უტიფარი მოწი- ნალმდევენი.	სევანეთიდან 5 წლით გა- დასახლება. სევანეთიდან 5 წლით გა- დასახლება.	სხვების და- პატიმრების- თანავე მიი- მალა. დასა- ქერად ზომე- ბია მიღებუ- ლი. იგივე მიიშალა, ბრა- ლი ედება სხუდასხვა დანაშაულში. ძიებისას და- კავებული იყო, მაგრამ ორჯერ გაი- ქცა. საქმე ძიებაშია.
ლატალელი გლე- ხი ბაჯუ გირ- გელიანი. მესტიელი გლე- ხი მურათბი ჩართოლანი.	მრავალი ჩვენებით მსი- ლებული არიან როგორც ყველა თავყრილობის და დაფიცების აქტიური მო- წილენი.	პატიმრობა 1 წლით.	
ლენჯერელი გლეხები ბექა ფილფანი და ბაბა ნავერიანი.		პატიმრობა 1 წლით.	

ამ საბრალდებო დასკვნას, რომელიც მეფისნაცვალ მიხეილს გაეგზავნა, ხელს აწერდა ვიცე-გუბერნატორი მალაფევი.

რამდენჯერმე შეხსენების შემდეგ 1875 წლის 21 ოქტომბერს, როდესაც აჯანყების ოთხი მონაწილე (ელავ გირგვლიანი, ბითე იოსელიანი, თაისავ კვანჭიანი და ბაბი ნავერიანი) უკვე გარდაცვლილები იყვნენ ქუთაისის ციხეში, ხოლო სამი ბრალდებული (გურმაჩ გასვიანი, ჩარგაზ ჯოხაძე და შახუბათ ქურდიანი) იმალებოდა, მეფისნაცვალმა ვიცე-გუბერნატორისადმი განკარგულება გასცა: „თქვენი წარდგინების თანახმად ნებას ვიძლევი სვანეთის არეულობის მონაწილე პირები მხარიდან (ე. ი. სვანეთიდან — გ. გ.) იმპერიის ერთ-ერთ შიდა გუბერნიაში გაასახლოთ, მათ შორის გლეხები: ყასბულათ შერვაშიძე, ყანსავ შერვაშიძე, გურმაჩ გასვიანი, ჩარგაზ ჯოხაძე, გინდარუყვ ფარჯიანი, აზნაურები: შახუბათ ქურდიანი და ბესი გოშთელიანი, გლეხები: მაბილა ფილფანი და ბექმურზა წვირიბიანი, — პირველი ოთხი-ხუთი წლის ვადით, უკანასკნელი ხუთი კი — სამი წლით, ხოლო: აზნაური სვინჩი ჯაფარიძე, გლეხი ბაჯუ გირგვლიანი, მურათბი ჩართოლანი და ბექა ფილფანი დაისაჯონ თითო წლის პატიმრობით. გატყობინებთ რა ამას, გთხოვთ გასცეთ განკარგულება გადასახლებულ პირთა წესისამებრ გაგზავნაზე ქ. ხარკოვში (გუბერნატორის განკარგულებაში), ვიდრე მათ დანიშნულებისამებრ საბოლოოდ არ განაწესებს შინაგან საქმეთა მინისტრი, რომელსაც აგრეთვე საქმის ვითარება ეცნობა“¹.

როგორც ვხედავთ, სვანეთის აჯანყების მონაწილეებს მთავრობის საწინააღმდეგო მოქმედების გარდა, სხვა უფრო მძიმე ბრალდება ვერ დაუმტკიცდათ. ამიტომ გუბერნიის ხელმძღვანელობის მიერ გამოტანილ განაჩენში მეფისნაცვალმა მხოლოდ ოდნავი ცვლილებები შეიტანა. ამასთან, სვანეთის საქმეები კვლავ მოუგვარებელი რჩებოდა, ამიტომ მეფისნაცვალმა სვანეთის აჯანყების მონაწილეთა საქართველოს ფარგლებში გაჩერება მიზანშეუწონლად მიიჩნია.

ასე დამთავრდა გლეხთა აჯანყების პირველი ეტაპი.

¹ საისტორიო მოამბე, I, გვ. 155.

უდავოა, რომ სვანეთის მღელვარებას ღრმა ეკონომიკური და პოლიტიკური მიზეზები განაპირობებდა, ამიტომ ხალხის უკმაყოფილებისა და მთავრობის საწინააღმდეგო გამოსვლების ლიკვიდაცია მხოლოდ ზედპირული ღონისძიებებით და ადმინისტრირების გზით ვერ მოხერხდა. ეს გარემოება არ შეიძლება ნაწილობრივ მაინც არ გაეთვალისწინებინა გუბერნიის ხელმძღვანელობას.

სხვათა შორის, ვიცე-გუბერნატორმა მალაფეევმა სცადა სვანეთის არეულობის მიზეზების დადგენა და მისი აღმოფხვრისათვის გარკვეული ღონისძიებებიც დასახა.

1875 წლის აგვისტოში მიხეილ ნიკოლოზის ძისადმი სვანეთის არეულობის თაობაზე მიწერილ მოხსენებაში ქუთაისის ვიცე-გუბერნატორი მალაფეევი იძულებული იყო ელიარებინა, რომ 1869 წელს შემოღებულმა მმართველობამ სვანეთში უნაყოფოდ ჩაიარა. იგი წერდა: 1) ადგილობრივი სასოფლო თვითმმართველობა გამოიხატება მხოლოდ თანამდებობის პირთა არჩევნებით, მაგრამ ამ უკანასკნელთა განცხადებით და ჩემი დაკვირვებით, სვანები მმართველობას არ ემორჩილებიან; 2) სასოფლო სასამართლოს იშვიათად თუ ვინმე მიმართავს, ასეთ შემთხვევაშიც ორივე მხარე გადაწყვეტილების უკმაყოფილოა და მას არ ემორჩილება; 3) 1869 წლიდან აღძრული სისხლის სამართლის არც ერთი საქმე სასამართლოს მიერ არ არის გადაწყვეტილი. ყველა ბრალდებული თავისუფლად გრძნობს თავს და ზოგიერთმა მათგანმა კიდევაც მოასწრო ახალი დანაშაულის ჩადენა. აღნიშნულის გამო, დაზარალებულებმა დაკარგეს კანონიერი დაცვის იმედი, ხოლო დამნაშავეები დაიმედებული არიან დაუსჯელობით 4) ერთადერთი სკოლა, რომელიც მართლმადიდებელმა საზოგადოებამ დააარსა, მასწავლებლის უყოლობის გამო დაიკეტა¹.

ვიცე-გუბერნატორი ეხებოდა სვანეთში გადასახადების აკრეფის სიძნელეს და მათ პეტისმეტ სიმცირეზე მიუთითებდა იგი წერდა: „მიუხედავად იმისა, რომ თავდაპირველად უმნიშვნელო რაოდენობის გადასახადები დაწესდა იმ ანგარიშით,

¹ საისტორიო მოამბე, I, გვ. 148—149; საქ. ცსსა, ან. 3. ს. 174. ფურც. 5.

რომ ის თანდათანობით გაიზრდებოდა, გადასახადების აკრეფა დიდ სიძნელეს შეადგენს. უკანასკნელმა მღელვარებამ გვიჩვენა, თუ რა ხარჯებთან და რა სიძნელეებთანაა დაკავშირებული გადასახადების გადიდება. ამიტომ მე ვეჭვობ — თუნდაც შორეულ მომავალში სვანეთში გადასახადის გადამხდელებმა როდისმე აუნაზღაურონ მთავრობას თუნდაც იმ ხარჯების ნახევარი, რაც ამ მხარის მმართველობისთვის სჭირდება. ერთადერთი სარწმუნო საბუთი, რითაც შევძლებდით სვანებისათვის ნებაყოფლობით გადაგვეხდევინებინა გადასახადები, იქნება იმ დაპირების შესრულება, რომ მათ თვითმმართველობას მივანიჭებდით, თავდაცვის აუცილებლობისა და სისხლის ალბისაგან ვიხსნიდით, სახელმწიფო სასამართლოს დავუკავშირებდით და სკოლებს მოუწყობდით. რადგან არც ერთი ამ სიკეთით სვანები ჯერ კიდევ ვერ სარგებლობენ, ამიტომ, ბუნებრივია, გადასახადების გადახდის საჭიროება და, მით უფრო მათი გადიდება, სვანების ცნობიერებაში ყოველგვარი კანონიერების საფუძველს კარგავს“¹.

ამასთანავე ვიცე-გუბერნატორი თავის მოხსენებაში აღნიშნავდა: სამხედრო რაზმი, რომელიც ბეჩოშია დაბანაკებული და რომელსაც წესრიგის დაცვაში პოლიციისადმი დახმარება ევალება, უძლური აღმოჩნდა. მაგალითად, მიუხედავად სამხედრო რაზმის თანდასწრებისა 1872 წელს რამდენიმე დამნაშავეის დასაქერად მახრის უფროსს 400 მილიციელის შეგროვება დასჭირდა. უკანასკნელ ამბებში იძულებული გავხდით საფრთხეში მყოფი სამხედრო რაზმის უშიშროების უზრუნველსაყოფად სვანეთში სამხედრო ნაწილი წაგვეყვანა. სამხედრო რაზმის ადგილსამყოფელიც უხეიროდ შერჩეული აღმოჩნდა, რადგან ის მეტისმეტად დაშორებულია სვანეთის იმ ნაწილისგან, რომელიც პოლიციის მუდმივ ზედამხედველობას და სამხედრო ძალის ჩარევას საჭიროებს.

დაბოლოს, ვიცე-გუბერნატორი იძულებული იყო შეენიშნა: „სვანეთში მთავრობის გავლენის გავრცელებისა და ავტორიტეტის დამკვიდრების მთავარ დაბრკოლებას მუდმივი მოხერხებული გზის არარსებობა წარმოადგენს. 1873 წელს სა-

¹ საისტორიო მოამბე, გვ. 148—149; საქ. ცსსა, ან. 3. ს. 174, ფურც. 5.

ბოლოოდ დადგინდა, რომ ასეთი გზა უნდა გაყვანილიყო ენგურის ხეობით, რომლის ტრასირება სამხედრო უწყების ხარჯზე 1874 წელს გაკეთდა, ხოლო გეგმისა და ხარჯთაღრიცხვის შედგენას ინჟინერი ზუბოვი ამთავრებს, გზის სამუშაოს დასაწყებად კი ფული არ გაგვაჩნია“¹. როგორც ვხედავთ, სვანეთის მიმართ ცარიზმის პოლიტიკის უსამართლობას თვით მისი მაღალი რანგის მოხელეც აღიარებდა.

აღსანიშნავია აგრეთვე, რომ მეფის მოხელეები სვანებს სიტყვიერად ყველაფერს ჰპირდებოდნენ, სინამდვილეში იქაურ მოსახლეობას უმოწყალოდ ავიწროებდნენ.

მიუხედავად იმისა, რომ გუბერნიის მმართველობამ სვანეთში ახალი გადასახადების შემოღების მცდელობა დამალა და ყველაფერი ცრუ ხმებს გადააბრალა, სინამდვილეში, როგორც ეს ვიცე-გუბერნატორ მალაფეევის მიერ მეფისნაცვლის მისამართით გაგზავნილ მოხსენებაშიც კარგად ჩანს, სვანეთში თავდაპირველად (ე. ი. 1869 წელს) შედარებით მცირე გადასახადი იმ ვარაუდით დაწესდა, რომ იგი თანდათანობით გაიზრდებოდა და საბოლოო ჯამში სვანეთის მმართველობისათვის ხაზინის მიერ გაღებულ თანხას გადააჭარბებდა, მაგრამ, როგორც ამას გუბერნატორი თავის მოხსენებაშიც შენიშნავდა — გადასახადების გაზრდა სვანეთში დიდ სიძნელეებთან არის დაკავშირებული, რაც უკანასკნელი ამბებიდანაც კარგად გამოჩნდაო. ყოველივე ეს იმისი პირდაპირი აღიარება იყო, რომ გლეხთა მღელვარება და აჯანყება სვანეთში ახალი გადასახადების შემოღების ცდამ გამოიწვია.

სვანეთში იყო თუ არა განზრახული ახალი გადასახადების შემოღება? ამ თვალსაზრისით საინტერესოა გუბერნატორის 1875 და 1876 წლების ანგარიშები. ვიცე-გუბერნატორი თავის 1875 წლის ანგარიშში მეფისნაცვალს მოახსენებდა, რომ „1875 წ. ივნისში სვანეთის ზოგიერთ საზოგადოებაში შეიარაღებული აჯანყება გამოიწვია ხმებმა — გადასახადების უზომო გაზრდის შესახებო“². ვიცე-გუბერნატორი აქ მხოლოდ გა-

¹ საისტორიო მოამბე, I, გვ. 148-149; საქ. ცსსა, ფ. 416, ს. 174, ფურც. 6.

² ЦГИАЛ, ф. 1268, оп. 21, д. 174, л. 74—75.

დასახადების უზომო გაზრდას უარყოფს და არა საერთოდ გადასახადების გადიდების ცდას. გუბერნატორი არც შემდგომი წლის ანგარიშში უარყოფს გადაჭრით სვანეთში საადგილმამულო გადასახადის შემოღების სურვილს¹.

ცხოვრების მძიმე პირობები, მეფის მოხელეთა თავაშეებული მოქმედება და გადასახადების დაწესება, ბუნებრივია, სვანეთის მოსახლეობის უკმაყოფილებას იწვევდა. ადმინისტრაციამაც კარგად იცოდა, რომ გლეხთა გამოსვლების საბოლოო აღმოფხვრა მარტო რეპრესიებით არ შეიძლებოდა, რომ ხალხის დაშოშმინებისათვის აუცილებელი იყო ეკონომიკური პირობების გაუმჯობესება და, აგრეთვე მმართველობის გარდაქმნა.

მალაფეევის მოსახრებით სვანეთში წესრიგისა და მტკიცე მმართველობის უზრუნველყოფისათვის საჭირო იყო: 1) ენგურის ხეობით გზის მშენებლობის დაუყოვნებლივ დაწყება ხაზინის ხარჯზე; 2) ბეჩოს სამხედრო ასეულის შეცვლა მოხალისე სვანთა მილიციის რაზმით, რომელიც უშუალოდ ბოქაულს დაემორჩილებოდა (მოხელის მტკიცებით, ასეთი მილიციის შენახვაც იაფი დაჯდებოდა და მისი მოსახლეობაზე მოქმედებაც ბევრად ეფექტური იქნებოდა, ამასთანავე, ადგილობრივი მილიცია სამხედრო ასეულივით არ იქნებოდა სხვადასხვა გარემოებაზე დამოკიდებული); 3) ბოქაულისა და პოლიციის უფლებამოსილებისა და ხელფასის გაზრდა; 4) ცენტრიდან დაშორებული თემებისადმი მეთვალყურეობის გაზრდა, ამ მიზნით ბოქაულის მეორე თანაშემწის თანამდებობის დაწესება; 5) სახსრების გამონახვა იმისათვის, რომ თბილისის სასამართლოს პალატის თავმჯდომარეს სვანეთში მუდმივი მართლმსაჯულება დაეწესებინა; 6) მართლმადიდებლური რწმენის გაძლიერება.

ვიცე-გუბერნატორის მიერ წამოწყებული გეგმა გაეგზავნა მეფისნაცვალს, რომელმაც თანხმობის ნიშნად წააწერა, რომ საქმეს მსვლელობა მისცემოდა. მაგრამ ეს მოსახრებებიც ისევე, როგორც უწინ წამოწყებული ყველა სხვა ღონისძიება, მხოლოდ სურვილად დარჩა, რადგან, სვანეთის ცხოვრების პირობების გაუმჯობესებისათვის საჭირო იყო დასახული ღო-

¹ ЦГИАЛ, ф. 1268, оп. 21, д. 174, л. 63.

ნისძიებების რეალიზაცია, ე. ი. სახსრები, რის გაღებასაც ხაზინა გაუბრუნდა.

2. შინაარსიანი აჯანყება და ხალხის ტრაგედია

(სამხედრო ექსპედიციისა და კავკასიის ადმინისტრაციის მიერ განხორციელებულმა რეპრესიებმა და ღონისძიებებმა ვერ ჩაკლა სვანეთის გლეხთა წინააღმდეგობა. ცხადია, მთავრობის მიერ ახალი გადასახადების დაწესებაზე ხელისაღებამ გლეხობის საბრძოლო სულისკვეთება შეანელა, მაგრამ, სამაგიეროდ, გლეხთა ნაწილის დაპატიმრებამ და, მით უფრო, ზოგიერთი მათგანის ციხეში გარდაცვალებამ არა მარტო მათი ოჯახები და ნათესაობა, არამედ მთელი სვანეთის გლეხობა ააფორიაქა.)

უდანაშაულო ადამიანთა ფიზიკურმა მოსპობამ და სხვა რეპრესიებმა მთავრობისადმი მოსახლეობის ნდობა საბოლოოდ გააქარწყლა. ხალხში კვლავ გაისმოდა პოლიციური რეჟიმის წინააღმდეგ პროტესტის ხმა, მაგრამ მეფის მოხელეები ახლა უფრო ფიზიკობდნენ და სამხედრო რაზმის დახმარებით სვანეთში სიმშვიდის დამკვიდრებას ლაშობდნენ.

მაზრისა და საბოქაულოს ადმინისტრაცია 1875 წლის შემოდგომაზეც განაგრძობდა მღელვარების მოთავე, დაუპატიმრებელ პირთა: შახუბათ ქურდიანის, გურმაჩ გასვიანისა და ჩარგაზ ჯოხაძის დევნას. მაგრამ მთელი სვანეთის მოსახლეობის სიმპათიებისა და განსაკუთრებით სოფ. ხალდეს მცხოვრებთა ერთსულოვანი მხარდაჭერის წყალობით ბოქაულმა და მისმა თანაშემწემ, რომელთა განკარგულებაში სამხედრო რაზმი და პოლიცია იყო. „დამნაშავეთა“ დაპატიმრება ვერ მოახერხეს. ამასობაში ზამთარი დადგა და გაქცეულთა დევნა უგზობის გამო დროებით შეწყდა.

1876 წლის გაზაფხულზე ადგილობრივი ადმინისტრაცია გაქცეულთა დევნას ახალი ენერგიით შეუდგა. ყველაზე მეტად ბოქაულის თანაშემწე თენგიზ დადიშქელიანი აქტიურობდა. მას მიაჩნდა, რომ მისი მომავალი კარიერა ამ საქმეში წარმატებაზე იყო დამოკიდებული, ამიტომ არაფერს ზოგავდა, თუმცა მის ენერგიულ მოქმედებას შედეგი არ მოჰყოლია.

ვიცე-გუბერნატორი მალაფეევი განკარგულებას განკარგულებათზე იძლეოდა, მაგრამ თანამოძმეების ბედის ტრაგიკული დასასრულით შემფოთებული შახუბათ ქურდიანი, გურმან გასვიანი და ჩარგაზ ჯოხაძე დამორჩილებას არ აპირებდნენ.

ციხეში დაღუპულთა და დანარჩენ პატიმართა ბედით აღმფოთებული სვანეთის მოსახლეობა ღელავდა. მაზრის უფროსი გრინევსკი მოთმინებას კარგავდა და გაქცეულ პირთა ხელშემწყობთ განადგურებით ემუქრებოდა.

თავის მხრივ ღელავდა თ. დადიშქელიანიც. მაზრის უფროსი, ბოქაული და მისი თანაშემწე რამდენჯერმე ეწვივნენ მულახის და კალის თემებს, რათა ბრალდებულთა დაპატიმრებაში დახმარებოდნენ, მაგრამ უშედეგოდ.

ახლად დანიშნულმა ბოქაულმა პოლპოლკოვნიკმა თავადმა მიქელაძემ და თ. დადიშქელიანმა. სამხედრო ნაწილის მეშვეობით ორჯერ სცადეს შ. ქურდიანის, გ. გასვიანისა და ჩ. ჯოხაძის დასაპატიმრებლად ხალდეში შესვლა, მაგრამ ხალხის პროტესტის გამო მათი ცდა ორივეჯერ ამაო გამოდგა.

რაკი სხვაგვარად არაფერი გამოვიდა, ხოლო ვიცე-გუბერნატორმა დაეინებით მოითხოვა დამნაშავეთა დაპატიმრება, გრინევსკიმ ლეჩხუმში მილიცია შეკრიბა და 1876 წ. ივლისში ლასილის გადასასვლელით (სვანეთის ქედზე) შევიდა ბეჩოში, საიდანაც ბოქაულ მიქელაძესთან, თ. დადიშქელიანთან, სასამართლოს ბოქაულ ასათიანთან ერთად სამხედრო ასეულიც წაიყვანა. ეს ექსპედიცია მოულოდნელად მიადგა მულახის თემის სოფელ მურშკელს. რაკი აქ შ. ქურდიანი ვერ შეიპყრეს, მისი უდანაშაულო ორი შვილი დააპატიმრეს და ხელბორკილი დაადეს. დამსჯელები მულახიდან კალაში წავიდნენ.

ლეჩხუმის მაზრის უფროსმა გრინევსკიმ სოფელ ხალდეში შესვლა ვერ გაბედა და მის მცხოვრებლებს ბეჭირბი და ლევან დადიშქელიანების, აგრეთვე კალის მღვდლის ალექსი ბაქრაძისა და კალის საზოგადოების მამასახლისის მარგველანის მეშვეობით 1876 წ. 31 ივლისს მოლაპარაკება გაუმართა. მაზრის უფროსმა, ასეულის მეთაურმა და ბოქაულმა ხალდელებს ულტიმატუმი წაუყენეს — ან ორი გაქცეული ბრალდებული ჩაებარებინათ, ან სოფელს დაარბევდნენ. ხალდე-

ლებს პირი ჰქონდათ შეკრული თანასოფლელები არ გაეცათ და მოციქულების მეშვეობით ადმინისტრაციას შეუთვალეს, რომ ბრალდებულთაგან არც ერთი სოფელში არ იმყოფებოდა და მათზე არც არაფერი იციან.

კალის მამასახლისისა და ბოქაულის ცნობით აღნიშნულ დროს ხალდეში ცხოვრობდა შრომისა და ბრძოლისუნარიანი 40-მდე მამაკაცი, რომლებიც მთავრობას არ ემორჩილებოდნენ.

მოციქულობამ და მუქარამ რომ ვერ გაქრა, მაზრის უფროსმა გრინევსკიმ მოითხოვა ხალდელები მასთან გამოცხადებულიყვნენ სოფელ ლალხორში, მაგრამ 19-კომლიანი ხალდე ერთ პირობაზე იდგა — არ გაეცათ ორი თანამძმე და ერთადებრძოლათ თანასოფლელების დასაცავად.

როგორც აღენიშნეთ, გადასახადების შემოღების წინააღმდეგ ბალსზემო სვანეთის მოსახლეობამ, ჭერ კიდევ, 1875 წლის ივნისში დადო ფიცი ერთად ემოქმედათ, მაგრამ ეს ფიცი მთავრობამ ჭარის მეშვეობით გატეხა და რამდენიმე კაცს დააპატიმრა. ხალდელები კი ფიცის გატეხას არ აპირებდნენ.

რაკი გრინევსკიმ მოლაპარაკებით ვერაფერი გააწყობა, განრისხდა და მთელ სოფელს აწიოკებით ემუქრებოდა.

მთელი სოფლის დასჯის მუქარამ ძლიერ შეაწუხა ექსპედიციის ზოგიერთი მხლებელი, მათ შორის იყო გიმნაზიის სტუდენტი, უშგულის მკვიდრი ბესარიონ ნიჟარაძე. სხვებთან ერთად ხალდეში წასვლა მან ითავა. ბ. ნიჟარაძე წერდა: „მე მკვიდრი ნათესავები მყავდა ხალდეში და ესეც რომ არ ყოფილიყო, რაკი ვხედავდი, საქმე ცუდად მიდიოდა, უარი არ მითქვამს. სოფელს ან ორი დამნაშავე უნდა მიეყვანა გრინევსკისთან, ან თვითონ გამოცხადებულიყო“¹.

31 ივლისს, სანამ ბ. ნიჟარაძე და მისი მხლებლები სოფელ ხალდემდე შეაღწევდნენ, ზოგიერთს თავისი ცოლ-შვილი უკვე მთაში გაეხიზნა, ხოლო თუ გრინევსკი სოფელს სამხედრო რაზმით შეუტევდა, ყველა ბრძოლისუნარიანი მამაკაცი მზადყოფნაში იყო.

ბ. ნიჟარაძემ სოფლის შუაგულში თავმოყრილ ხალხს

1. ბ. ნიჟარაძე, ისტორიულ-ეთნოგრაფიული წერილები, II გვ. 194.

გრიწვესკის დანაბარები გადასცა, თან ურჩია, რომ მთავრობისადმი ურჩობა არ ივარგებდა.

მიუხედავად მოციქულების რჩევისა და ადმინისტრაციის კატეგორიული ულტიმატუმისა, სოფელმა ორი მკვიდრის ჩაბარება არ ინება. ამასთანავე, კალაში წასვლის მოთხოვნაზე უპასუხეს: „შახუბათ ქურდიანის მაგიერ გრიწვესკიმ მისი ორი შვილი დააპატიმრა და ბორკილგაყრილი წაიყვანა, ჩვენ რა იმედი გვაქვს, რომ არ დაგვიჭერს და ქუთაისის ციხეში არ გამოგვამწყვდევს, იქ არ დაგვხოცავს. ამიტომ ჩვენ ცოცხალი თავით არავის ჩავბარდებით, იქ ციხეში დახოცვას, აქ სახელწოდებად სიკვდილი გვირჩევენიაო — ასეთი იყო ხალდელების პასუხი.

ხალდეს მცხოვრებთათვის ცხადი იყო, რომ ამგვარი ურჩობა არ ივარგებდა, მაგრამ მათი გადაწყვეტილება — არ დაეშვათ თავისი ღვიძლი ორი კაცის მთავრობისადმი გადაცემა — საბოლოო და შეუწყვეელი იყო.

ბ. ნიჟარაძეს სწამდა, რომ სოფელ ხალდეს მოსახლეობას უბედურება დასტრიალებდა, ამიტომ თხოვდა გრიწვესკისათვის ორი კაცი გადაეცათ.

ბოლოს ბ. ნიჟარაძემ თავისი ნათესაეები და რამდენიმე კაცი დაიყოლია გრიწვესკისთან წაყოლაზე, ოღონდ იმ პირობით, რომ სამხედრო ნაწილი მოშორებით ყოფილიყო და მათთან მხოლოდ გრიწვესკი მისულიყო. ამგვარ პირობაზე შეთანხმებულნი კალისკენ გაუდგნენ გზას.

„მიხაროდა, — იგონებდა ბ. ნიჟარაძე, — რომ საქმე ამნაირად მოვახერხე, გაუძეხი წინ სოფელს და დანიშნულ ალაგას დავტოვე, მე — კი საჩქაროდ გავეწიე გრიწვესკისთან. გრიწვესკი აღელვებული დამხდვა, ჩემს ლაპარაკს ნახევრადლა უგდებდა ყურს. ხალდეს ისე მოუვიდა, როგორც კოზაკს აქლემების წაკიდებით — ჩემი ხალდეში ყოფნისას გრიწვესკის და კომანდირ ლეუსს სადილობისას უსიამოვნება მოსვლიათ. როგორც ექიმმა ბელსკიმ მიაგებო, ლეუსი თურმე უკადრისობდა, რომ იგი რაზმით მაზრის უფროსის განკარგულებაში იყო. თუ საქმისათვის მოვსულვართ, ბარემ ხალდეში წავიდეთო, თორემ რას მიქვია ამდენხანს კალაში ყურყუტო. ავდგები და რაზმს ბეჩოში წავიყვანო — უთხრა თურმე ლეუსმა გრი-

ნევსკის. ამაზე გრინევსკის მიუგია, რომ ნება მაქვს რაზმიცა და მისი უფროსიც ნებისამებრ გამოვიყენოვო. აი ეს გამხდარა. ?იზუზი გრინევსკის და მაიორ ლეუსს შორის უსიამოვნების. ნასადილევს გრინევსკი და მაიორი ლეუსი ერთიმეორეს ეჭიბრებოდნენ ცხენების შეკაზმვას, თუ რომელი მოასწრებდა. გრინევსკი რომ ასეთ ფაცა-ფუცში იყო, მე ისევ ჩემსას განვაგრძობდი — სოფლელების ნახვა გინდოდათ, მოვიყვანე, ასე ?უქართ კამანდის (იგულისხმება სამხედრო რაზმი — გ. გ.) წაყვანა არ ივარგებს მეთქი. დამნაშავეები არ მომიყვანა სოფელმა?! — დაიძახა გრინევსკიმ. მე თვითონ მივალ და სოფელს მტერად ვაქცევ. ამას მპასუხობს და თვალები ლეუსისკენ აქვს.

— თუ რაზმით წასვლას არ იშლით. მე უნდა გამოგიტყდეთ, რომ ხალდეში სისხლისღვრა მოხდება, — ეუთხარი გრინევსკის¹.

გრინევსკი ცოფმორეულივით ილანძღებოდა და სოფელს სამაგალითო დასჯით ემუქრებოდა, რომ ამით მთელი სვანეთისათვის ჭკუა ესწავლებინა. როცა ბ. ნიჟარაძე დარწმუნდა, რომ ვერაფერს გახდებოდა, მიქელაძეს შეეხვეწა საქმეში ჩარეულიყო და გრინევსკი ხალდეში არ გაეშვა.

როგორც ჩანს, გრინევსკის შეჩერება ბოქაულმაც სცადა, მე ვკისრულობ ხალდელების დაჭერას ერთი კვირის განმავლობაში — აღუთქვა მან, მაგრამ გრინევსკის მისთვის მიუგია — თქვენ რომ მხდალი ხართ, ყველანი ხომ ასეთი არ ვიქნებით! შეგიძლიათ თქვენ დარჩეთ. ამ ლანძღვაზე მიქელაძეც გაცხარებულა და ესაულისათვის უბრძანებია ცხენი მიეგვარა. ამასობაში მაიორი ლეუსი ცხენზე შეჯდა და სამხედრო რაზმს უბრძანა ხალდეს გზას გასდგომოდა. მას გაჰყვნენ მაზრის უფროსი გრინევსკი, ბოქაული მიქელაძე, ექიმი ბელსკი, მანასახლისი მარგველანი, სასამართლო ბოქაული ასათიანი და სხვ.

კალაში გრინევსკისთან მისულმა ხალდელებმა მათი სოფლისკენ მიმავალი სამხედროები რომ შენიშნეს, სასწრაფოდ შინ დაბრუნდნენ.

სოფელში განგაში გამოცხადდა. ვისაც კი შეეძლო იარაღისათვის ხელი მოეკიდა, თადარიგში ჩადგა, მოხუცები, ქალები

1 ბ. ნიჟარაძე. ისტორიულ-ეთნოგრაფიული წერილები, II, გვ. 195.

და ბავშვები კოშკებში შეხიზნეს. სანამ სამხედრო რაზმი სოფლამდე მიაღწევდა, ხალდელებმა საბოლოოდ მოითათბირეს, რომ საქმის მშვიდობიანი მოგვარება ეცადათ, მაგრამ თუ არაფერი გამოვიდოდა,, დასაპატიმრებლად არავინ დაენებებინათ. თუ მომხდური ძალადობას მიმართავდა, თვითონაც ძალადობით ეპასუხნათ, თუკი საქმე მაინც შეტაკებამდე მივიდოდა, თავი არავის დაეზოგა და სისხლის უკანასკნელ წვეთამდე ებრძოლა.

ხანმოკლე ბაასის შემდეგ გადაწყდა, რომ მოძალადეთა შესვეურებს (იგულისხმება გრინევსკი, მიქელაძე, ლეუსი და სწვ.) და მათ ამაღას სოფლის შესასვლელთან მოსალაპარაკებლად დახვედროდნენ მოხუცი ძმები: გეგი და გიორგი გასვიანები, რომლებიც სოფელში ცნობილი იყვნენ თავიანთი გამჭირახობით.

როგორც კი ასეული 1 აგვისტოს სოფელს მიაღგა, მაიორმა ლეუსმა ბრძანება გასცა სოფლისათვის ალყა შემოერთყათ, იქიდან არავინ გაეშვათ და საჭიროების შემთხვევაში იარაღით ემოქმედათ. ამ ბრძანებაზე ასეული მარჯვნივ და მარცხნივ გაიფანტა და სოფელს ალყა შემოარტყა. მოძალადეთა ხელმძღვანელები; გრინევსკი, ლეუსი, მიქელაძე, აგრეთვე ბელსკი, ასათიანი, თარჯიმანი ბაქრაძე და კალის მამასახლისი მარგველანი სოფლის შუაგულისაკენ გაემართნენ. სოფელში შესვლისთანავე მათ მიეგებენ ძმები გეგი და გიორგი გასვიანები. ლეუსის ბრძანებით მათ თოფმოღერებული რამდენიმე ჯარისკაცი შეეგება. შეშფოთებულმა ძმებმა უკან დაიხიეს და ჯარისკაცების ბრძანებაზე „ხელები აღემართათ და ნაბიჯი არ მოეცვალოთ!“— მოწინააღმდეგისგან გაცლა და სახლში შესწრება მოიწადინეს. მაგრამ, როდესაც კარს მიაღგნენ და ურდულის გახსნას შეუდგნენ, ჯარისკაცებმა ზურგიდან ხიშტები გაუყარეს. შედარებით მსუბუქად დაჭრილმა გეგიმ მყისვე ხანჯალი იშიშვლა, ერთი ჯარისკაცი იქვე მოკლა და მეორე დაჭრა. ერთი წამიც და კოშკებიდან თოფებმა იქუხა. ბადრი, შახან და ბულა გასვიანებმა მაიორი ლეუსი მოკლეს, რამდენიმე ჯარისკაცი და ბოქაული მიქელაძე დაჭრეს.

გრინევსკისა და მის ჯგუფს სროლა აუტეხეს ჩევიანების კოშკიდან. კალის მამასახლისი მარგველანი, იმ იმედით, რომ მას მეზობელი ხალდელები არ გაიმეტებდნენ, გრინევსკის ჩა-

მოეფარა, მაგრამ არც ის დაინდეს — მომი და გუა ჩეგვიანებმა მამასახლისი მარგველანი და რამდენიმე ჯარისკაცი მოკლეს¹. სამხედრო ასეულსა და ხალდელებს შორის სროლა მთელ დღეს და გვიან ღამემდე გრძელდებოდა.

უმეტაუროდ დარჩენილი ჯარისკაცები დაბნეულად მოქმედებდნენ, თითოეული მათგანი ცდილობდა თავისთვის ეშველა. იყო შემთხვევები, როცა გაქცეული ჯარისკაცები უკუნეთ სიბნელეში უფსკრულში ჩეხებოდნენ და იღუპებოდნენ.

სამხედრო ასეულის ნაშთებმა (მათ შორის დაჭრილებმა, რომელთაც სიარული შეეძლოთ) გვიან ღამე სოფლის ახლოს მოიყარეს თავი და გათენებამდე სოფელ ლალხორში დაბრუნდნენ.

პირველ შეტაკებაში გადარჩენილმა გრინევსკიმ, მძიმედ დაჭრილმა მიქელაძემ, ექიმმა ბელსკიმ, სასამართლოს ბოქაულმა ასათიანმა, დამტარებელმა დევლეთ პირველმა თავი სოფლის აღმოსავლეთ ნაპირას მცხოვრებ ესპანდ ჯონაძის ქოხს შეაფარეს

ბრძოლის შეწყვეტის შემდეგ დაღლილ-დაქანცული ხალდელები სახლებს ჩხრეკდნენ. ესპანდ და ლემინ ჯონაძეებმა შენაშნეს, რომ თავიანთ ბოსელს ვილაც უცხო პირები აფარებდნენ თავს, მათ შორის გრინევსკი, მიქელაძე, ბელსკი, ასათიანი, აჩახმათ და ათმურზა გუჯეჯიანები. ჯონაძეებმა თავიანთ ქოხში შეხიზნულებს ხელშეუხებლობა და სამშვიდობო გზით სოფლიდან გაყვანა აღუთქვეს, მაგრამ ამ დაპირების შესრულებამდე ეს ამბავი შეიტყვეს დანარჩენმა ხალდელებმაც, რომლებიც თავს დაესხნენ და ყველანი დახოცეს.

მეორე დღეს ხალდელები გათენებისას შეიკრიბნენ. ისინი დარწმუნებული იყვნენ, რომ ჩადენილ დანაშაულს არავინ აპატიებდა, გადაწყვიტეს სანამ ძალა და ღონე ექნებოდათ, სოფელში გამაგრებულიყვნენ და იქ ესისხლათ თავისი თავი და ცოლშვილი. ახალი თავდასხმის მოლოდინში ხალდელთა ნაწილი სოფლის მისადგომებთან ჩასაფრდა, ნაწილმა დახოცილები მოაგროვა, მათ შორის: გრინევსკი, მაიორი ლეუსი, პოდპოლ-

¹ საისტორიო მოამბე, I, გვ. 157; ა. ჩაკვიანი, სვანეთი, გვ. 208.

კოვნიკი თავადი მიქელაძე, სასამართლოს ბოქაული ასათიანი, ექიმი ბელსკი, უნტერ-ოფიცერი ტიშენკო და 17 ჯარისკაცი, ისინი ერთად დაასაფლავეს, ხოლო მამასახლისი მარგველანის, ასევე აჩახმათ გუჯეჯიანის ცხედარი ჭირისუფლებს გაატანეს. როგორც შემდეგ გამოირკვა, რამდენიმე ჯარისკაცი სოფლის ქვემოთ უფსკრულში გადაჩეხილა.

აჯანყებულთა ნაწილმა სოფელში დარჩენილი ცოლ-შვილი და მოხუცები 2 აგვისტოს ღამით სხვადასხვა სოფელში ნათესაებთან გახიზნა. სხვები ტყვიაწამლის მომარაგებას, გზების ჩახერგვასა და ხიდის ჩაგდებას შეუდგნენ. ამასთანავე, აჯანყებულებმა 3 აგვისტოს დილაადრიანად 6 კაცს — ბულა გასვიანს, ლემინ, ზურაბ, გიორგი ჭოხაძეებს, გიორგი და ერმინე ჩოფლიანებს — დაავალეს, რომ ჩუმათ შემოევლოთ ბალსზე-მო სვანეთის თემები და ხალხისათვის დახმარება ეთხოვათ.

4 აგვისტოს სოფ. ხალდე მიუვალ ციხესიმაგრედ გადაიქცა, დასავლეთიდან კლდოვან ფერდობზე გადაჭიმული ვიწრო გზა ორ ადგილას ჩახერგეს და დარაჯები დააყენეს, სამხრეთ-აღმოსავლეთიდან მისადგომ გზაზე ერთადერთი ხიდი, რომლის სიმაღლე ორასამდე მეტრს უდრიდა, ჩააგდეს, აღმოსავლეთიდან მისადგომი გზაც წაახდინეს, ჩრდილოეთის მხრიდან კი სოფელი ძნელად გასავლელი უგზო კლდეებით იყო დატული.

7 აგვისტოს სხვა სოფლებში გაგზავნილი წარმომადგენლები უშედეგოდ დაბრუნდნენ (მხოლოდ ტყვია-წამალი მოიტანეს).

ასეულის ჯარისკაცებმა, რომლებიც აჯანყებულებს გადაურჩნენ, თავი მოიყარეს სოფელ ლალხორში, მათი მეთაურობა დროებით პორუჩიკმა კვინიხიძემ იკისრა, მაგრამ გადარჩენილი ჯარისკაცები უკვე იმდენად იყვნენ დემორალიზებული, რომ აჯანყებულთა წინააღმდეგ არავითარი ნაბიჯის გადადგმა არ შეეძლოთ.

სვანეთში მომხდარი სისხლისღვრის ამბავი სასწრაფოდ ეცნობა გუბერნიის და კავკასიის ადმინისტრაციას. მეფისნაცვალს ეგონა, რომ აჯანყებაში მთელი სვანეთი იყო ჩაბმული, ამიტომ ბრძანება გასცა აჯანყებული სვანების სამაგალითო დასასჯელად დიდი სამხედრო ექსპედიცია ჩამოყალიბებულიყო.

სანამ შერეული სამხედრო ექსპედიცია მომზადდებოდა, ვიცე-გუბერნატორის მალაფეევისა და ექსპედიციის სარდლის გენერალ-მაიორ ციტოვიჩის ბრძანებით, ბეჩოს სამხედრო ასეულის ნაშთების დასახმარებლად 4 აგვისტოს ქუთაისიდან სასწრაფოდ გაიგზავნა ალექსანდროპოლის 161-ე რეგულარული ლეგიონის ორი ფეხოსანი ასეული და მილიციის ასკაციანი რაზმი, რომელთა საერთო მეთაურობა პოლკოვნიკ თავად წულუკიძეს დაევალა¹.

დროის მოგების მიზნით ციტოვიჩმა თავისი ექსპედიცია ორ ეშელონად დაყო: 9 აგვისტოს, პირველ რიგში, ქართული მილიციის ორი ასეული გაგზავნა, ხოლო თავის უშუალო სარდლობით 12 აგვისტოს ქუთაისიდან მთავარი ძალებიც დაძრა. კერძოდ, ალექსანდროპოლის 161-ე პოლკის ოთხი ფეხოსანი ასეული, 39-ე საარტილერიო ბრიგადის სამთო ბატარეის ოცეული (სარაკეტო და მესანგრეთა რაზმებით), ექსპედიცია უზრუნველყოფილი იყო ერთი თვით სურსათ-სანოვავის და საომარი მასალის მარაგით, აგრეთვე მოძრავი საექიმო დახმარებით და წამლებით.

ქუთაისიდან ექსპედიციის სწრაფი და ზუსტი საინფორმაციო კავშირურობის უზრუნველსაყოფად გზაზე მოწყობილ იქნა ხუთი საფოსტო საგუშაგო, რომელთაც ემსახურებოდა ეისკის ცხენოსანი პოლკის 35 კაცი — ერთი ოფიცერისა და ორი ურიადნიკის მეთაურობით².

აღნიშნულის გარდა, ყაბარდოსა და აფხაზეთის სახაზო სამხედრო მეთაურებს ებრძანათ საჭიროების შემთხვევაში სვანეთში შესაჭრელად ჩრდილოეთიის (კავკასიის ქედით) და სამხრეთის (ზუგდიდ-ჯვარი-ხაიშის) მხრიდან მზადყოფნაში ჰყოლოდათ სპეციალური სამხედრო, ასევე მილიციის ნაწილები. ციტოვიჩმა მალე მიიღო მეფის განკარგულება: მოესპო აჯანყებულთა ბუდე და მისი მონაწილეები დაესაჯა იმდაგვარად, რომ ეს ყველასათვის ჭკუის სასწავლებელი და მაგალითი ყოფილიყო.

წულუკიძის მეთაურობით ქუთაისიდან 4 აგვისტოს გაგზავ-

1 საისტორიო მოამბე, I, გვ. 207.

2 იქვე.

ვნილმა სამხედრო მილიციის ნაწილებმა 10 აგვისტოს სოფელ ლალხორამდე მიაღწიეს. მეწინავე ნაწილებს ნაბრძანები ჰქონდათ ალყა შემოერთყათ სოფელ ხალდესათვის, იზოლაციაში მოექციათ მისი მცხოვრებლები. წულუკიძის მეწინავე ნაწილებს 17 აგვისტოს ქუთაისიდან გაგზავნილი ქართული მილიციის ორი ასეულიც შეუერთდა.

სანამ სვანეთში მთავარი ძალები მიაღწევდნენ, 16 აგვისტოს წულუკიძემ ხალდელებს წინადადება მისცა დანებებულიყვნენ, მაგრამ უარი მიიღო. იმავე დღეს, საღამოს სცადა სოფელში შესვლა, მაგრამ აჯანყებულთა გააფთრებული წინააღმდეგობის გამო, მან მხოლოდ სოფლის მისადგომებამდე მიაღწია.

15 აგვისტოს ციტოვიჩის ძალებმა ცაგერს მიაღწიეს და მურთან დაბანაკდნენ. 17 აგვისტოს ციტოვიჩმა შეიტყო, რომ აჯანყებულები შეუპოვარ წინააღმდეგობას განაგრძობდნენ. 18 აგვისტოს ციტოვიჩის კოლონა ჩოლურში შევიდა, ხოლო, 19-ში ლატფარის ქედი გადალახა და ლალხორის ბანაკამდე მიაღწია.

აჯანყებულებს არ გამოპარვიათ, რომ მათ წინააღმდეგ კალაში თავი მოიყარა რეგულარული არმიისა და საქართველოს მილიციის დიდმა ნაწილებმა. სხვათა შორის, 16 აგვისტოს სოფელ ლალხორში გამოცხადდა ბოქაულის თანაშემწე თენგიზ დადიშქელიანიც, რომელსაც ბალსქვემო სვანეთში შეგროვილი 50-მდე გლეხისგან შემდგარი რაზმიც ახლდა.

ხალდეს წინააღმდეგ იერიშის წარმატებით მისატანად ციტოვიჩმა თავისი ძალები სამ ნაწილად დაყო: 1) საარტილერიო ოცეული (6 ქვემეხით), ერთი სამხედრო ასეული და ერთიცი მილიციის ასეული სამხრეთის მხრიდან წაიყვანა მიჯვარისა და ლამარიას მიმართულებით; 2) ერთი სამხედრო შენაერთი და მილიციის ორი ასეული დასავლეთის მხრიდან გაუშვა იფრალის, კრახაგარისა და ვანიაშის გზით; 3) ერთი სამხედრო ასეული და მილიციის 150-კაციანი რაზმი აღმოსავლეთიდან შესატევად გაგზავნა.

სოფლის სამხრეთით, ხეობის მეორე მხარეზე ლამარიას პატარა მინდორში (სოფლიდან 600—800 მეტრზე) ჯერ კიდევ 18 და 19 აგვისტოს მომზადდა ქვემეხების დასადგმელი მოედ-

ნები, 20 აგვისტოს საღამოს მიჯვარიშის მხრიდან 5 სამთო ქვე-
მეხი მიზიდეს.

სამხედრო ნაწილებს სარდალი ციტოვიჩი და მთავარი
შტაბი დაბანაკდა მიჯვარიშის მინდორში, საიდანაც კარგად მო-
ჩანდა ხალდე (ეს მინდორი მდებარეობდა ხეობის მეორე მხა-
რეზე ხალდეს პირდაპირ სამხრეთ-დასავლეთით, სოფლიდან
დაახლოებით ორი კილომეტრის მანძილზე).

ციტოვიჩის ბრძანებით, საერთო იერიშის დაწყებამდე, 21
აგვისტოს დილით ადრე სოფელს ცეცხლი დაუშინეს, მაგრამ
აჯანყებულებმა ხანძარი სასწრაფოდ ჩააქრეს.

22 აგვისტოს ციტოვიჩმა ხალდელებს წინადადება მისცა
წინააღმდეგობა შეეწყვიტათ და იარაღი დაეყარათ, მაგრამ
ისინი განაგრძობდნენ ბრძოლას და სამთო ბატარეისადმი
სროლას. რადგან ქვემეხები შორიდან უშენდნენ და აჯანყე-
ბულები მათ შაშხანებით და კაჟიანი თოფებით ვერავითარ ზი-
ანს ვერ აყენებდნენ, ხალდელებმა დაბნელებისთანავე გამოყვეს
ექვსკაციანი ჯგუფი, რომელსაც ქვემეხების მწყობრიდან გამო-
ყვანა დაევალა, გვიან საღამოს გურმაჩი, კაციანე და ბადრი
გასვიანები, ჩარგაზ და ჯოხან ჯოხაძეები და გიორგი ჩოფლი-
ანი სოფლის პირდაპირ გადავიდნენ უგზოუკვლო ხეობაზე და
მოულოდნელად თავს დაესხნენ მოწინააღმდეგეებს, რომელ-
თაგან სამი მოკლეს, ხოლო ოთხი მძიმედ დაჭრეს.

23 აგვისტოს დილით არტილერიამ სოფელს კვლავ ცეცხ-
ლი გაუხსნა. იმავე დღეს საღამოს სოფელი მიატოვა რამდენი-
მე მოხუცმა და ქალმა, რომლებიც მილიციას დანებდნენ და
სამხედრო ბანაკში მიიყვანეს.

აჯანყების მსვლელობის დროს, აჯანყებულ ხალდელთა თაო-
ბაზე ერთ-ერთი სამხედრო კორესპონდენტი გაზეთ „დროება-
ში“ წერდა: ხალდეს კოშკებში 70-მდე კაცი აფარებს თავს.
ჩვენს მოთხოვნაზე იარაღი დაყარონ, უარით გვიპასუხეს,
დამორჩილებას არ აპირებენ. ლამდამობით სოფელში მოძრაო-
ბაა, ისმის განუწყვეტელი ხმაური. აჯანყებულებმა მოკლული
ჯარისკაცები სოფლის ნაპირას დამარხეს, მკვდრების მუნდი-
რები თვითონ ჩაიცივეს.... დღეს (25 აგვისტოს) ველოდებით
დამორჩილებას, თუ არა ხვალ შეტევა უნდა განვაახლოთ!.

1 გაზ. „დროება“, № 93, 1876 წ.

მსგავსი კორესპონდენცია დაიბეჭდა გაზ. „კავკაზშიც“, რომელშიც აღნიშნული იყო, რომ აჯანყებულები ზუსტად ისროდნენ და კოშკიდან-კოშკში ერთიმეორეს რაღაც სიგნალებს გადასცემდნენ.

ციტოვიჩის მთავარმა ძალებმა 25 აგვისტოს შეძლეს მიახლოებოდნენ სოფელს და სამმხრივ ალყაში მოექციათ. 26 აგვისტოს დილიდან სოფელი ხალდე კვლავ ფეხოსანი ჯარისა და მილიციის ცეცხლში მოექცა. იმავე საღამოს, დათქმულ სიგნალზე წულუკიძის სამხედრო კოლონამ ძლიერი ცეცხლით, „ურას“ დახილითა და დაფდაფის ცემით სწრაფად წაიწია წინ და სოფლის დასავლეთ მისადგომთან ბორცვს დაეუფლა. ხალდელებმა მთავარი ყურადღება წულუკიძის კოლონასა და მის მოგერიებას მიაპყრეს, ამან მილიციის რაზმებს და მესანგრეებს შესაძლებლობა მისცა მოპირდაპირე აღმოსავლეთის მხრიდან სოფლის განაპირა ქოხები ჩაეგდოთ ხელში.

ამ დღეს აჯანყებულთაგან არავინ დაშავებულა. მოწინააღმდეგეთა რამდენიმე ჯარისკაცი და მილიციელი დაიჭრა. 26 აგვისტოს დღის მეორე ნახევარსა და საღამოს სამხედრო ხელმძღვანელობის ბრძანებით მთავარი ყურადღება მიაქციეს დასავლეთის მხრიდან სოფლის წყაროს მარჯვენა მხარეზე მდებარე ყველაზე დიდ კოშკს, რომელშიც თითქოს მთავარი დამნაშავეები აფარებდნენ თავს. მაგრამ როგორც კავკასიის სამხედრო შტაბის პატაკშიცაა აღნიშნული, დიდი სიმტკიცის გამო, კოშკის აფეთქების ყოველგვარმა ცდამ ამაოდ ჩაიარა¹.

ტყვია-წამლის ნაკლებობის მიუხედავად, აჯანყებულებმა მესანგრეებს საშუალება არ მისცეს კოშკების ასაფეთქებელ სამუშაოს დღისით შესდგომოდნენ, სიბნელეში კი კოშკის ძირის გამოთხრა ვერ მოახერხეს.

27 აგვისტოს დღისით ციტოვიჩმა, წულუკიძემ და სხვა სამხედრო ხელმძღვანელებმა მოითათბირეს, რომ თანდათან შეევიწროებინათ სოფლის ალყა და კოშკების ასაფეთქებელი სამუშაოები გაეძლიერებინათ. აჯანყებულებმა დაკრილებისათვის სახელდახელო საკაცეები გააკეთეს და გასაქცევად მოემზადნენ, საშინელ ამინდსა და უკუხეთ სიბნელეში 10-კაციანი

¹ საისტორიო მოამბე, I, გვ. 208.

ჯგუფის წინამძღოლობით სცადეს აღმოსავლეთის გზით მთის-
კენ წასულიყვნენ. მართალია, მეწინავე რაზმი ყარაულებს
გაუსხლტა, მაგრამ ჯარის ნაწილს შეეფეთა. მოალყე ჯარის
განგაშმა აჯანყებულები იძულებული გახადა უკან დაეხიათ დ-
აღმოსავლეთის გზით წასვლაზე ხელი აეღოთ.

ხალდელებს ტყვია-წამალი შემოეღიათ. მათ დატყვევება
ან გარდუვალი დაღუპვა ემუქრებოდა. ამიტომ იძულებული
გახდნენ დაქრილებისა და მოხუცების წაყვანაზე ხელი აეღოთ
და ჩრდილოეთის მხრიდან უგზოუკვლო კლდეებით გაპარვა
ეცადათ. ისინი რამდენიმე ნაწილად დაიყვნენ, როდესაც პირ-
ველი ჯგუფი სოფლის თავთან მდებარე მაცხოვრის ეკლესიასა
და სასაფლაოს გასცდა, მათ კლდის ძირში ადამიანთა ლანდე-
ბი შენიშნეს. ჩასაფრებულ დარაჯებს ხალდელებმა სთხოვეს
მშვიდობიანად გაეშვათ. გამოირკვა, რომ ყარაულები იყვნენ
თენგიზ დადიშქელიანის მიერ მობილიზებული ბალსქვემოხე-
ველი გლეხები. მათ ხალდელებს გზა მშვიდობისა უსურვეს
და გაატარეს. პირველ ჯგუფს მალე დანარჩენებიც მიჰყვნენ
და ყველამ მშვიდობიანად გადალახა კილომეტრზე მეტი სი-
მაღლის ციცაბო კლდეები.

ხალდელების მცდელობა — ლამით კოკისპირული წვიმის
დროს გაერღვიათ ჯარის ალყა გათენებამდე — ციტოვიჩმა და
მისმა შტაბმაც შეიტყო. ისინი მიხვდნენ, რომ აჯანყებულებს
საომარი საჭურველი არ ჰქონდათ და გაქცევას ლაშობდნენ.
ამიტომ ციტოვიჩი არ დაელოდა ცალკეული კოშკების აფეთ-
ქებას და ქართული მილიციის ასეულებს უბრძანა — რაღაც
არ უნდა დაჯდომოდათ, დილას მთელი სოფელი დაეკავები-
ნათ.

საერთო „ურას“ ძახილზე დილაადრიანად მილიციის რაზ-
მები სოფელში შეეკვივნენ, მალე მათ ჯარის ნაწილებიც მიჰ-
ყვნენ. მათ არავითარი წინააღმდეგობა არ შეხვდათ.

როცა მესანგრეები ცენტრალური კოშკების აფეთქებას
შეუდგნენ, გასვიანების ერთ-ერთი კოშკიდან თოფებმა იქუსა.
ერთი რაზმელი სასიკვდილოდ, სამი კი მსუბუქად დაიჭრა. მა-
ლე რამდენიმე კოშკის აფეთქების ხმა გაისმა. პირველი კოშ-
კის ნანგრევებში დაქრილი გეგი და გიორგი გასვიანები მოჰ-
ყვნენ, დანარჩენ ორში კი არავინ იმყოფებოდა. მესანგრეე-

ბი და ჯარი შემდეგ სხვა კოშკების დანგრევასაც შეუდგნენ, ამ დროს ერთ-ერთ კოშკში შეხიზნულმა დაჭრილებმა და მოხუცებულებმა, რომელთაც ცოცხლად დამარხვას დანებება არჩიეს, კოშკის კარები გახსნეს, ხის კიბე გადმოუშვეს და ჯარს დანებდნენ, მათ შორის იყვნენ: ჩაპი, გიორგი, ბექა, ბიტა, კაციანე, გუა გასვიანები, გეგი და ბექი ჩოფლიანები და ბადი ჯოხაძე (სულ ცხრა კაცი).

ჯარმა და მისმა ხელმძღვანელობამ აჯანყებულთა ნაწილის სოფლიდან გაქცევა მხოლოდ მას შემდეგ შეიტყვეს, როდესაც შეპყრობილები დაკითხეს და ყველა კოშკი და სახლი გაჩხრიკეს.

გაირკვა, რომ ხალდელები ჩრდილოეთის მხრიდან კლდეებით გაპარულან. მართალია, ვერ დადგინდა, თუ როგორ და ჩისი მეშვეობით შეძლეს მათ შეუმჩნეველად გაპარვა, მაგრამ ჯარის ხელმძღვანელობამ ეჭვი მაინც ამ მხრიდან გუშაგად დაყენებულ ჩუბეხეველ სვან გლეხებზე აიღო. ისინი უღმერთოდ გაროზგეს.

მესანგრეთა ნაწილი და ჯარისკაცები მთელი სოფლის აოხრებას შეუდგნენ. იმპერატორის ბრძანების თანახმად ხალდელების დასჯა მაგალითი უნდა ყოფილიყო მთელი სვანეთისათვის.

დავალების შესრულების შედეგზე გენერალმა ციტოვიჩმა ქუთაისის მმართველობას და კავკასიის არმიის სარდლობას ასე უპატაკა: „სოფელი ხალდე აღებულია და მიწასთანაა გასწორებული, აჯანყებულთა ნაწილი დაპატიმრებულია, ნაწილი მთებში გაიქცა. აჯანყების ბუდე ლიკვიდირებულია“¹.

ხალდეს აღებასთან დაკავშირებით კავკასიის სამხედრო ოკრუგის პატაკში ვკითხულობთ: „აღებისთანავე დაუყოვნებლივ დაიწყო სოფელ ხალდეს სისტემატური მოსპობა ისე, რომ 1 სექტემბრისათვის ყველა 11 კოშკი და სხვა ნაგებობა გარდა სოფლის თავში მდებარე პატარა ეკლესიისა, საფუძვლიანად იქნა დანგრეული...“².

მეფის სამხედრო მოხელეები სოფლის ძირფესვიან დანგრევას როდი დასჯერდნენ, მათ ცეცხლს მისცეს არა მარტო

¹ ЦГИАЛ, ф. 1, д. 648, л. 5.

² საისტორიო მოამბე, I, გვ. 208.

აფეთქებული შენობების ხის მასალა, არამედ ყანებიც, რომელთა მკა ის-ის იყო უნდა დაწყებულიყო. დაანგრის სოფლიდან კილომეტრნახევარზე მდებარე წისქვილებიც. დაიტაცეს და დახოცეს სოფლის შინაური პირუტყვი და სხვ.

დამსჯელი სამხედრო ექსპედიციის მეთაურები გაქცეულ აჯანყებულთა დევნას შეუდგნენ. მთებში გახიზნული ხალდელების დევნა თენგიზ დადიშქელიანისა და გარდაფხაძის მიერ სვანეთში შედგენილ გლეხთა რაზმს და გურულთაგან შემდგარ მილიციის ასეულს დაევალა. მთებში ორდღიანმა დევნამ მთავრობისათვის სასურველი შედეგი ვერ გამოიღო, სამაგიეროდ მიაკვლიეს აჯანყებულთა ადგილსამყოფელს.

მართალია, აჯანყებულთა ძირითადი ბირთვის დაპატიმრება მალე ვერ მოხერხდა, მაგრამ როგორც აღვნიშნეთ აჯანყებულთა მთავარი ბუდე ლიკვიდირებულ იქნა, მისი ნაწილი — დაპატიმრებული.

ძირითადი მიზნის მიღწევის შემდეგ გენერალ-მაიორი ციტოვიჩი რეგულარული ჯარის ნაწილებით, არტილერიითა და ქართული მილიციის ძირითადი რაზმებით 2 სექტემბერს ზემო სვანეთიდან უკან დაბრუნდა. ქვემო სვანეთში გადასვლისთანავე ექსპედიცია ორ ეშელონად გაიყო. 3 სექტემბერს ჩოლურიდან გავიდა პირველი ეშელონი, რომელშიც შედიოდა: ალექსანდრეპოლის 161-ე ფეხოსანი პოლკის ორი ასეული. საარტილერიო ნაწილი და ქართული მილიციის ასეული, რომელთაც თან წაიყვანეს დაქრილი ჯარისკაცები და მილიციელები. აგრეთვე დაპატიმრებული 9 აჯანყებული. სხვები გზას 4 სექტემბერს გაუდგნენ. ქუთაისში ჩასვლის მეორე დღეს — 10 სექტემბერს — ექსპედიცია დაიშალა.

როგორც ცნობილია, XIX საუკუნის 70-იან წლებში ბატონყმური წყბილების გადმონაშთების და ცარიზმის კოლონიზატორული პოლიტიკის წინააღმდეგ ბრძოლაში გლეხობა მარტო არ იყო. რევოლუციონერი ხალხოსნები ცდილობდნენ საქართველოს გლეხთა ბრძოლისათვის ორგანიზებული და ერთდროულად ხასიათი მიეცათ.

XIX საუკუნის 70-იან წლებში ხალხოსნური მოძრაობა საქართველოშიც გაიშალა. ამაზე, სხვათა შორის, მეტყველებს ქუთაისის ვიცე-გუბერნატორ მალაფეევის 1876 წლის პოლიტიკური ანგარიში მეფისნაცვლისადმი. თავის მოხსენებაში მალაფეევი გუბერნიაში შექმნილი პოლიტიკური ვითარების დახასიათებისას წერდა, რომ 1876 წელს ზუგდიდის მაზრაში და სვანეთში ადგილი ჰქონდა გლეხთა ორ შეიარაღებულ აჯანყებას, რაც მხოლოდ სამხედრო ძალის ჩარევით იქნა ლიკვიდირებული. ამასთანავე, იგი ხაზს უსვამდა, რომ სვანეთის გლეხთა აჯანყება მხოლოდ სოფლის განადგურების შედეგად იქნა შესაძლებელი და მძიმე შედეგებით დამთავრდა.

ვიცე-გუბერნატორი, განაზოგადებდა რა აჯანყების გამომწვევ მიზეზებს, მეფისნაცვალს სწერდა: საქმის გაცნობამ მთლიანად დამარწმუნა, რომ გლეხობა მოქმედებს მიწის კერძო საკუთრების უფლების თეორიით, რომელიც მათთან უცხო მხრიდან ვრცელდება. ამ საკითხზე ბევრი გლეხი არა მარტო ერთნაირად მსჯელობს, არამედ გასულ წელს (ე. ი. 1875 წ.) აპრილსა და მაისში ქუთაისისა და თბილისის გუბერნიებში აღმოჩენილ სოციალისტ-რევოლუციონერთა მიერ გლეხობაში გავრცელებული იდეები ერთნაირი ფრაზებითაა ჩამოყალიბებული. ამ საქმის ძიებამ დაგვანახა, — დაასკენიდა მალაფეევი, — რომ პროპაგანდისტები ცდილობენ დასავლეთ-ევროპული და რუსული სოციალისტურ-რევოლუციური პერიოდიკა თარგმნონ ქართულად¹.

ამასთანავე, ვიცე-გუბერნატორი აღნიშნავდა, რომ მთავრობის დროული ღონისძიებებით გლეხთა დანაშაულებრივი განზრახვა ჩაიფუშა, მაგრამ მათში ზოგიერთი სოციალისტური შეხედულება მაინც ვრცელდებაო. მოხელის აზრით, ასეთი იდეების მქადაგებელი და ლიტერატურის მთარგმნელები უთუოდ იყვნენ სოფლის მასწავლებლები, რომლებიც სოციალისტ-რევოლუციონერთა ფენას ეკუთვნიან და რომელთაც მკიდრო ურთიერთობა აქვთ გლეხობასთან, ისინი გლეხობაში აკრძალულ ლიტერატურასაც ავრცელებენო.

მალაფეევი მეფისნაცვლისადმი მოხსენებაში შემოფოთებას

¹ ЦГИА.Г, ф. 1268, оп. 23, л. 53, л. 63.

გამოთქვამდა სოციალისტური თეორიის გავრცელებაზე გლახობაში და მის წინააღმდეგ ენერგიული ზომების მიღებას, აგრეთვე საეკლესიო სწავლების გაძლიერებას მოითხოვდა¹.

როგორც ირკვევა, შემთხვევითი არ იყო სვანეთის გლეხთა აჯანყების დაკავშირება ზუგდიდის მაზრის გლეხთა აჯანყებასთან და, რაც მთავარია, ე. წ. სოციალისტ-რევოლუციონერთა საქმიანობასთან. ჩანს, სვანეთის გლეხთა მღელვარებას და აჯანყებას საერთო ჰქონდა საქართველოს სხვა კუთხეების საქმიანობასთან. ამასთანავე, სვანეთის გლეხთა გამოსვლებს ყურადღება მიაპყრეს ჩრდილო კავკასიის ხალხოსნებმა, მათ შორის ოსმა რევოლუციონერებმაც. ასეთი დასკვნის შესაძლებლობას იძლევა ნ. არდასენოვის გამოკვლევა², რომელშიც ავტორი აშუქებს ხალხოსან ა. არდასენოვის მოღვაწეობას და აღნიშნავს, რომ იგი დიდ მუშაობას ეწეოდა რევოლუციურ-არალეგალური ლიტერატურის გასავრცელებლად და ქვეყნის სხვადასხვა ნაწილის რევოლუციონერებისა და გლეხობის დასაკავშირებლად³. ამისი ერთი უტყუარი საბუთია ა. არდასენოვის მკდელობა სვანეთის აჯანყებულებისადმი მატერიალური და ფიზიკური დახმარების აღმოსაჩენად.

სვანეთის აჯანყების კავშირზე საქართველოს სხვა კუთხეების გლეხთა მოძრაობასთან თავის დროზე მიუთითა სამხედრო-საველე სასამართლომაც, მაგრამ იმხანად ამის დადგენა, აჯანყებულთა მტკიცე ნებისყოფის გამო, მთავრობის საგამომძიებლო ორგანომ ვერ მოახერხა. საქართველოს პროგრესულ მოღვაწეთა წარმომადგენლების (ა. წერეთელი, ნ. ნიკოლაძე და სხვ.) ცხოველი გამომხაურება და მზრუნველობა პატიმარ-აჯანყებულების ბედზე — იმის პირდაპირი მანიშნებელი შეიძლება იყოს, რომ სვანეთის გლეხთა მოძრაობას კავშირი ჰქონდა საქართველოს ცენტრებში და საერთოდ მთელ იმპერიაში გაშლილ განმათავისუფლებელ მოძრაობასთან.

ამის მანიშნებელია ისიც, რომ, როდესაც სვანეთში მღელვარება დაიწყო, ეს უმაღლესი თერგის ოლქის ხალხოსნებმა,

1 ЦГИАЛ, ф. 1268, оп. 23, д. 53, л. 64—65, 646—647.

2 Н. М. Ардашенов. Аликхан Ардашенов (документальный очерк), Орджоникидзе, 1970.

3 Н. М. Ардашенов. Аликхан Ардашенов, стр. 39—40.

რომელთა წარმობადგენელი ა. არდასენოვი ვლადიკავკავიდან გამოეშურა თბილისში, სადაც ქართველ ხალხოსნებს შეხვდა და სვანეთის აჯანყებულთა დასახმარებლად 399 მანეთი ფულა შეაგროვა. თბილისიდან ა. არდასენოვი ვლადიკავკავში დაბრუნდა. იქ თავისი თანამებრძოლები შეკრიბა და სვანეთის გლეხთა აჯანყებისადმი მხარდაჭერის საკითხი განიხილა. ვლადიკავკავის ხალხოსნური წრის წევრებმა თავდაპირველად გადაწყვიტეს, რომ სვანეთში დ. სოხიევი გაეგზავნათ, მაგრამ ამ უკანასკნელის ავადმყოფობის გამო სვანეთში წასვლა ა. არდასენოვმა იკისრა¹.

ჩანს, ა. არდასენოვთან ერთად სვანეთში ხალხოსანთა მთელი ჯგუფი წავიდა, რაც დასტურდება სრულიად რუსეთის სოციალისტ-რევოლუციონერთა ორგანიზაციის წევრის, ქართველი პუბლიცისტის გ. მაყაშვილის (ზდანოვიჩის) წერილითაც. ამ წერილში მაყაშვილი ხალხოსანთა ივანოვო-ვოზნესენსკის არალეგალურ ჯგუფს ატყობინებდა, რომ „სვანეთში აჯანყებულებმა ამოქლიტეს ჯარისკაცთა გარნიზონი, დახოცეს მეთაურები, გააფუქეს გზები... დაწვრილებითი ცნობები ჯერ არაა ცნობილი — წერდა იგი, — მაგრამ მეტად ცხელი დღეებია მოსალოდნელი. ქუთაისში დაიპირეს ოსები, რომლებიც ცხენების ჯოგს მიერეკებოდნენ. დაპატიმრება იმითაა მოტივირებული, თითქოს ეს ჯგუფი ოსებმა ქართველებთან „მოსალაპარაკებლად“ გაგზავნეს. ღმერთმა ქნას ასე იყოს!“².

ჩანს, ა. არდასენოვი სვანეთში საქმის ვითარების დასადგენად და შესაძლო მხარდაჭერის აღმოსაჩენად მიდიოდა, მაგრამ რაკი სვანეთის შეიარაღებული აჯანყება უკვე ლიკვიდირებული იყო, ხოლო ხალდე განადგურებული, ა. არდასენოვის ჯგუფმა სვანეთისაკენ გზა არ გააგრძელა და ქუთაისში შეჩერდა, სადაც დაპატიმრეს. თუმცა ოსებმა თავი იმით იმართლეს, რომ თითქოს მათი მიზანი ქუთაისში ცხენების გაყიდვა იყო და სხვა არაფერი.

ყოველივე აღნიშნული იმაზე მეტყველებს, რომ სვანეთის გლეხთა აჯანყება ცარიზმის წინააღმდეგ კავკასიის გლეხთა მოძრაობის შემადგენელი და განუყოფელი ნაწილი იყო და, ისევე, როგორც რუსი, კავკასიელი ხალხოსნებიც ცდილობდნენ

¹ Н. М. Ардасенов, Алыхан Ардасенов, стр. 40.

² იქვე.

გლენობა თვითმპყრობელობის წინააღმდეგ საყოველთაო-სახალხო აჯანყებაში ჩაებათ.



ხალდეს აოხრებისა და აჯანყებულთა ერთი ნაწილის დაპატიმრების შემდეგ მეფის ჯალათებმა მთებში გაქცეულთა დევნა განაგრძეს. ჯერ კიდევ 31 აგვისტოს კავკასიის ქედის ძირას დიდ მყინვართან აჯანყებულთა ბანაკს ალყა შემოარტყა ორასამდე კაცისაგან შემდგარმა მილიციის რაზმმა, რომელსაც რეგულარული არმიის ნაწილიც მიეშველა, მაგრამ მილიციის რაზმსა და სამხედრო ნაწილს მოუხერხებელი ადგილმდებარეობის გამო გაშლისა და იერიშის მიტანის საშუალება არ ჰქონდათ. სამდღიანი ალყის შემდეგ აჯანყებულები იძულებული გახდნენ კავკასიის ქედის მუდმივყინულიანი შვეული კლდეებით ჩრდილო-დასავლეთის მიმართულებით გაქცეულიყვნენ. ამ ალყის დროს აჯანყებულთაგან მხოლოდ ერთი კაცი დაიჭრა, ხოლო ორი მილიციელი მოკლულ იქნა და შვიდი — დაჭრილი.

როგორც ხალდეში, აგრეთვე მთის მყინვართან აჯანყებულთა მიერ მეფის შეიარაღებული ნაწილების ალყისაგან თავის დაღწევა ურთულეს პირობებში და აჯანყებულთა უდიდესი სიმამაცის წყალობით გახდა შესაძლებელი. ამ შერკინების ეპიზოდები თავისუფლებისა და სიმართლისათვის მებრძოლ ქართველ გლენთა გმირობისა და თავდადების ბრწყინვალე ფურცელს შეადგენს.

აჯანყებულების დევნაში განსაკუთრებით აქტიურობდნენ თ. დადიშქელიანი და ო. გარდაფხაძე, რომელთაც სექტემბრის შუა რიცხვებში თავისი რაზმების რიცხვი უფრო გაზარდეს და ყველგან, სადაც აჯანყებულთა გამოჩენა იყო მოსალოდნელი, დარაჯები დააყენეს. ამასთანავე მათ დააზუსტეს, თუ აჯანყებულთა ცოლ-შვილი და ღრმად მოხუცებული მშობლები რომელ სოფლებში და ნათესავებთან იმალებოდნენ.

გაქცეული აჯანყებულები მეტწილად ჰადიშის, ხალდესა და უშგულის მთებში იყვნენ გახიზნული და თავს ძირითადად ნანადირევით ირჩენდნენ.

რადგან აჯანყებულთა დაპატიმრება ვერ ხერხდებოდა, თ. დადიშქელიანმა და ო. გარდაფხაძემ ახალ ხერხს მიმართეს. ისინი ნათესავეებში დამალულ ხალხელი ქალების, ბავშვებისა და მოხუცებულების დაპატიმრებას შეუდგნენ. ის ოჯახები, რომლებიც მათთან შეხიზნულ ხალხელებს არ გასცემდნენ ან მათ დაპატიმრებას წინ აღუდგებოდნენ, სასტიკ რეპრესიებს განიცდიდნენ. მიუხედავად ამისა, თენგიზმა და ოთარმა ხალხელთა ცოლ-შვილის მხოლოდ ნაწილის დაპატიმრება შეძლეს, რადგან მათ არა მარტო ნათესავეები მალავდნენ, არამედ დანარჩენი მოსახლეობაც დიდი თანაგრძნობით ეკიდებოდა.

ოცი დღის უშედეგო დევნის შემდეგ, გურიის მილიციის ასეული სვანეთიდან დაბრუნდა, ხოლო თ. დადიშქელიანს და ო. გარდაფხაძეს ებრძანათ ყველაფერი ელონათ იმისათვის, რომ გაქცეულები შეეპყროთ.

ქუთაისში დაბრუნებისთანავე გენერალ-მაიორმა ციტოვიჩმა დამსჯელი ექსპედიციის მიერ განხორციელებული ოპერაციის შესახებ ვიცე-გუბერნატორ მალაფეევისა და კავკასიის სამხედრო ხელმძღვანელობის სახელზე შედგენილ მოხსენებით ბარათში გვერდი აუარა სამხედრო ექსპედიციის მძიმე მარცხს, იმის აღიარებას, რომ ექსპედიციამ საგრძნობი მსხვერპლი გაიღო და ხოტბა-დიდებას ასხამდა თავის მისიას, რომელიც ხალხს საბოლოო განადგურებით დამთავრდა.

როგორც მოსალოდნელი იყო, მეფის მთავრობა არ დაელოდა ყველა აჯანყებულის დაპატიმრებას და უკვე შეპყრობილი ცხრა კაცის გასამართლებას შეუდგა. სასწრაფო და ზერელე გამოძიების შემდეგ საქმე სამხედრო-საველე სასამართლოს გადაეცა. ამ უკანასკნელმა საიდუმლო ვითარებაში (დახურულ პროცესზე) სახელმწიფოებრივი დანაშაულის ბრალდებით (რაც მაზრის უფროსის, ბოქაულის, სამხედრო ოფიცრის, ზემდეგების, აგრეთვე, რიგით სამხედრო და სამოქალაქო პირთა დახოცვაში გამოიხატა) აჯანყების ცხრა მონაწილეს უმძიმესი განაჩენი გამოუტანა, კერძოდ: 42 წლის ჩაპი ბექას ძე გასვიანს და 40 წლის გრიგოლ ბიტოს ძე ჩოფლიანს — ჩამოხრჩობა (რაც მაღაროებში სამუდამო საკატორლო მუშაობით შეეცვალათ); 40 წლის ბექა ბესოს ძე ჩოფლიანს და 50 წლის გიორგი გუვას ძე გასვიანს — მუდმივი საკატორლო მუ-

შაობა ციმბირის მხარეში. 20 წლის ბიტა ჩაპის ძეს და 65 წლის კაციანე ბადრის ძე გასვიანებს — ათ-ათი წლის საკატორლო მუშაობა; 70 წლის ბადი აბრამის ძე ჯოხაძეს და 32 წლის გუვა გეგის ძე გასვიანს — ციმბირში სამუდამოდ გადასახლება, ხოლო ბეჭა ბიტას ძე გასვიანს (რომელიც ღრმად მოხუცებული და მომაკვდავი ავადმყოფი იყო) სასჯელი არ მისცეს¹.

სამხედრო-საველე სასამართლო პროცესი ისე მალულად და სწრაფად ჩატარდა, რომ საქართველოს საზოგადოებრიობამ განსასჯელებს ვერავითარი მხარდაჭერა და დახმარება ვერ აღმოუჩინა.

მთავრობა კვლავ ენერგიულად განაგრძობდა დაუპატიმრებელ ხალდელთა დევნას. მეფის მოხელეებმა, რომ ძალით ვერაფერი გააწყვეს, მათ ყალბი ხმები გაავრცელეს — თითქოს მოწყალე ხელმწიფემ აჯანყებულებს რვა კაცის დასჯა და სოფლის აოხრება აკმარა, ხოლო ყველა დანარჩენს დანაშაული აპატიო. ცხადია, ამ ხმებმა მთებში დამალულ ხალდელებამდეც მიაღწია და მათ ერთგვარი იმედიც შთაუწერა, მაგრამ, ჩანს, მთავრობის მოხელეებს ხალდელები ასე იოლად არ ენდვნენ და არ სურდათ ნებაყოფლობით ჩაბარებოდნენ.

ამასობაში ზამთარი ახლოვდებოდა, მთებში ნადირობით თავის გამოკვებაც შეუძლებელი ხდებოდა, განუწყვეტელი ეგზეკუციების გამო მოსახლეობასთან დაკავშირებაც თანდათან ძნელდებოდა, ამასთან, ნათესავებში შეხიზნულ ქალთა, ბავშვთა და მოხუცთა ძებნა და რეპრესიები გრძელდებოდა. ყოველივე ამან ხალდელთა ნებისყოფა საბოლოოდ გატეხა და მათ ხელისუფლების წარმომადგენლებთან მოლაპარაკება გადაწყვიტეს.

რაკი დადიშქელიანს აჯანყების გაჩაღებასა და აჯანყებულთა წინაშე დიდი ბრალი მიუძღოდა, ხალდელებმა ირჩიეს მოლაპარაკება ო. გარდაფხაძესთან ეწარმოებინათ. სვანეთის მშობელთა ეს დაუძინებელი მტრები და მეფის დაქირავებული ლაქიები ერთიმეორეს ეჯიბრებოდნენ რომელი მეტ წარმატებას მიაღწევდა.

¹ საქ. ცსს, ფ. 114, ს. 1, ფურც. 30—32.

ნათესაების მეშვეობით ოთარ გარდაფხაძემ შეძლო უშუალოდ ენახა ზოგიერთი გაქცეული და მასთან ესაუბრა. იგი აჯანყებულებს არწმუნებდა, რომ თუკი ნებაყოფლობით ჩაბარდებოდნენ, მეფე მათ დანაშაულს შეუშლბუქებდა ან აპატიებდა. გარდაფხაძე ნათქვამის დასადასტურებლად ხალდელებს უჩვენებდა რალაც ქალაღდებს, რომლებშიც თითქოს მათდამი მეფისნაცვლის შემწყწნარებლობაზე იყო ლაპარაკი. ო. გარდაფხაძე ირწმუნებოდა, რომ, თუ ხალდელები ნებაყოფლობით ჩაბარდებოდნენ, მაშინ იგი მეფისნაცვალთან წაყვებოდა და მათ გასათავისუფლებლად ყველაფერს იღონებდა.

როგორც ჩანს, ო. გარდაფხაძის შთაგონებამ ხალდელებზე გარკვეული ზემოქმედება მოახდინა, მაგრამ, რაკი მისი გულწრფელობა ნაკლებად სწამდათ, ამიტომ ო. გარდაფხაძეს თხოვეს — ყველაფერი, რასაც ჰპირდებოდა, კვირიკეს ეკლესიაში ფიცის მიღებით დაედასტურებინა.

დათქმულ დროს — 30 სექტემბერს, საღამოს 22 ხალდელი, ო. გარდაფხაძე, მღვდელი და რამდენიმე კალელი ერთიმეორეს შეხვდნენ კვირიკეს ეკლესიის ეზოში, სადაც ო. გარდაფხაძემ ხატქვეშ დაიფიცა, რომ ბრალდებულთა საქმის ერთგული იქნებოდა და მათი ხსნისათვის ყველაფერს იღონებდა.

გულუბრყვილობა იქნებოდა იმისი ვარაუდი, რომ აჯანყებულებმა ო. გარდაფხაძის დაპირება ირწმუნეს და განთავისუფლების იმედი ჰქონდათ. ცხადია, მათ ჩადენილი დანაშაულის სიმძიმე კარგად ესმოდათ (მით უფრო, რომ თავის თანამოძმეთა ნაწილი უკვე გასამართლებული და სასტიკად დასჯილი იყო), მაგრამ მათ იცოდნენ, რომ ზამთრის დადგომის, სურსათ-სანოვაგისა და თავშესაფრის უქონლობის გამო უეჭველი სიკვდილი ან შეპყრობა ელოდებოდათ, ამასთანავე, ცოლ-შვილისა და მოხუცი მშობლებისადმი გამუდმებულმა დევნამ და რეპრესიებმა აიძულა ისინი იარალი დაეყარათ და ხელისუფლებს ჩაბარებოდნენ. თუმცა ო. გარდაფხაძის დაპირებამ და მეტადრე ფიცმა მათ უმძიმესი სასჯელისაგან ხსნის ერთგვარი იმედიც შთაუწერგა.

ო. გარდაფხაძემ სვანეთის ბოქაულის თანაშემწე თ. დადი-შქელიანს იმთავითვე შეატყობინა, რომ ბრალდებულები მან უკვე შეირიგა და თბილისისაკენ მიჰყავდა. ამასთანავე ო. გარ-

დაფხაძემ და თ. დადიშქელიანმა საქმის ვითარება შეატყობინეს ქუთაისის ადმინისტრაციას, რომელმაც პოლიციელების მეშვეობით ბრალდებულები გზაშივე დააპატიმრეს და ციხეში შეჰყარეს.

ახლა, როდესაც აჯანყებულები ციხეში იყვნენ გამომწყვდეული, თ. გარდაფხაძემ და თ. დადიშქელიანმა ჩინ-მედლებისა და ფულის მიღების წადილით მთავრობას ყველაფერი, რაც მოხდა, შებრუნებულად მოახსენეს — თითქოს აჯანყებულები მათ ძალით შეიპყრეს. რა თქმა უნდა, თ. გარდაფხაძემ არამც თუ დაპატიმრებულებზე არ იზრუნა, არამედ კრინტიც კი არ დაიწრა იმაზე, რასაც ხალდელებს ადრე ესოდენ დაბეჭითებით ეფიცებოდა.

მთავრობამ განიზრახა ამ აჯანყებულთა ბედიც ისე სწრაფად და საიდუმლოდ გადაეჭრა, როგორც თავდაპირველად დაპატიმრებული 9 პირის საქმე, მაგრამ, მოწინავე ქართველი საზოგადოებრიობის აქტიური ჩარევით, ხელისუფლებამ ეს ვერ მოახერხა.

სვანეთის აჯანყებულმა გლეხობამ, რომელიც ცარიზმის ანტიხალხური პოლიტიკის წინააღმდეგ იარაღით ხელში იბრძოდა, საქართველოს მშრომელი გლეხობისა და პროგრესული ინტელიგენციის დიდი სიმპათია და მხარდაჭერა დაიმსახურა. სვანეთის აჯანყების მონაწილეების დასაცავად აღსდგნენ საზოგადოების სხვადასხვა წარმომადგენლები: ხალხოსნები, გამოჩენილი ქართველი მწერლები და მოღვაწეები, ადვოკატები, პედაგოგები და სხვ.

სვანეთის აჯანყებას ქართველ მოღვაწეთაგან ერთ-ერთი პირველთაგანი გამოეხმაურა ნიკო ნიკოლაძე. გამოჩენილი სამოციანელი აჯანყების დღეებშივე გამოექმთაგა სვანეთის ამბოხებულ მოსახლეობას¹. საამისოდ მან, დემოკრატიული ქართული პრესის თვალსაჩინო წარმომადგენლებთან ერთად, დაიმოწმა ოფიციალურ „კავკაზში“ გამოქვეყნებული კორესპონდენცია, რომელიც სვანეთის აჯანყების გამომწვევე მიზეზად ლეჩხუმის მაზრის ხელისუფალთა უგუნურ ბოროტმოქმედებას

¹ Н. Николадзе, По поводу сванетской «вспышки», газ. «Тифлисский Вестник», 14 августа 1876.

ასახელებდა, უკანასკნელთ ადანაშაულებდა „ადგილობრივი მოსახლეობის გრძნობებისა და ტრადიციული ადათ-წესებისადმი“ უპატივცემულო და არაფრთხილ დამოკიდებულებაში. ჩვენ, — განაგრძობდა ნ. ნიკოლაძე, — სავსებით ვიზიარებთ იმ ხალხთა თვალსაზრისს, რომელიც ამიერკავკასიის ხალხთა სულს-კვეთებისა და თავისებურებების ცოდნას ემყარება. „როცა ხალხისადმი, რომელიც მრავალი საუკუნის მანძილზე თავისებურ პირობებში, თავისებური ისტორიული ცხოვრებით სულდგმულობდა, ცდილობენ გამოიყენონ პოლიტიკური მოწყობის ახალი პირობები, ამგვარი გამოყენებისას შუამავლებლად უნდა შერჩეულ იქნენ განვითარებული, გამოცდილი, „ტაქტიკის“ მქონე და ფრთხილი ადამიანები“.

სვანეთის აჯანყების გასამართლებლად ნ. ნიკოლაძემ დაპირისპირებით დაახასიათა, ერთი მხრივ, სვანეთი, ხოლო, მეორე მხრივ, იქ დაწესებული ახალი ადმინისტრაცია. „სვანეთი, — წერს იგი, — საუკუნეთა მანძილზე ცხოვრობდა თავისებურად“, „იქ ხალხი საუკუნეებში გამოირჩევა ზნეობის რაინდული სიწმინდით“, „იქ ღირსება და უანგარობა ხალხის სანუკვარ კუთვნილებას შეადგენენ“, ასეთი ხალხი ბავშვს ემსგავსება, რომლის შთაბეჭდილებაზე ყველაზე ძლიერ ორი ფაქტორი ზემოქმედებს: „დამოკიდებულების დელიკატურობა და უანგარობა, ზნეობისა და ქმედობის იდეალური სიწმინდე: ვიდრე ასეთი ხალხი „პატივისცემით განიმსჭვალება თქვენი აზრისა და თქვენი მიზნისადმი“, მას „უყალიბდება სიმპატია ან ანტიპატია თქვენი პიროვნებისადმი, და სიმპატიები და ანტიპატიების ამ პრიზმაში უყურებს ყველა თქვენს სიტყვას, აზრს, განზრახვასა და მიზნებს“. „ამასთანავე, — განაგრძობს ნ. ნიკოლაძე, — არაჩვეულებრივი მნიშვნელობა აქვს არა მარტო დიდ ქმედობებს, არამედ იმ პიროვნებათა ყველაზე უწვრილმანეს თავისებურებებს, რომლებიც ახალი, „მაცივილიზირებელი“ ცხოვრების წარმომადგენლებია“.

სვანეთის ასეთი დახასიათების კვალდაკვალ ნ. ნიკოლაძემ ცენტურაგავლილ წერილშიც შეძლო გამოეაშკარაებინა ახალი ადმინისტრაციის სრული უვარგისობა და ბოროტმოქმედება სვანეთში.

მან აღნიშნა, რომ როცა საუკუნეების მანძილზე თავისებურ ისტორიულ ცხოვრებას შეჩვეული ხალხი. პოლიტიკური ცხოვრების ახალ პირობებში უნდა მოაქციონ, როცა სურთ, რომ ამ ახალმა რეჟიმმა ხალხის თანაგრძნობა და მხარდაჭერა მოიპოვოს, ხალხს ახალი ვითარების საუკეთესო მხარეები და თვისებები უნდა უჩვენონ; ახალი ადმინისტრაციის წარმომადგენლები განათლებული, გამოცდილი, ტაქტიანი და უანგარონი უნდა იყვნენ. „თუკი ცივილიზირებული და განვითარებული ქვეყნის სახით ხალხი ხედავს, რომ ადმინისტრაციული და სასამართლო ხელისუფლების წარმომადგენლები ბოროტებას მფარველობენ, — ეს იქ არავის მიერ არ მიიღება როგორც ცივილიზაციის კუთვნილება...“ „აქ ყველასათვის გასაგებია, რომ ეს მხოლოდ ადმინისტრაციისა და სასამართლოს უღირსი წარმომადგენლების კერძო ბოროტმოქმედებაა.

ყოველგვარი ცუდი რამაა მოსალოდნელი ქვეყანაში, — განაგრძობს ნ. ნიკოლაძე, — სადაც ადმინისტრაციის წარმომადგენელია რომელიღაც სრული უმეცარი, რომელიც მხოლოდ იმაზე ზრუნავს, რომ ვინმე გაქვლიტოს და თავისი ძალაუფლება აჩვენოს. „აქ, ხალხის თვალში, ცივილიზაცია საერო ცხოვრების უმაღლესი ფორმა კი არაა, არამედ ძალადობა და სიცრუე“¹.

დაბოლოს, ნ. ნიკოლაძე გარკვევით მიუთითებს, რომ სენატის აჯანყება ახალი ადმინისტრაციის ბოროტმოქმედებამ გამოიწვია.

რაკი შეიარაღებული აჯანყების ცხრა მონაწილე უკვე გასამართლებული იყო და მეფის მოხელეებს საქმე წინასწარ ჰქონდათ გამოძიებულ-გაფორმებული, სწრაფად შედგა ანლადდაპატიმრებულთა საბრალდებულო დასკვნებიც. ცხალა, როგორც გასამართლებულებს, აღნიშნულ 22 კაცსაც სახელმწიფო დანაშაულის ბრალდება წაუყენეს. ამიტომ მათი ომიანობისდროინდელი კანონების შესაბამისად გასამართლებაც სამხედრო-საველე სასამართლოს დაევალა.

¹ Н. Никол а д з е, «Тифлисский Вестник», 14 августа 1876 г.

1876 წ. 27 ნოემბერს ქალაქ ქუთაისში დაიწყო შეიარაღებული აჯანყების მონაწილე 22 ბრალდებულის გასამართლება, მაგრამ საქართველოს ფართო საზოგადოებრიობის მოთხოვნით მთავრობა იძულებული გახდა სამხედრო-საველე სასამართლოს საქმე ახლა საჯარო სხდომაზე გაერჩია.

სამხედრო-საველე სასამართლოს თავმჯდომარეობდა კაკა-სიის სამხედრო-საოლქო სასამართლოს თავმჯდომარე გენერალ მაიორი ლეიხტი, სასამართლოს წევრები იყვნენ ალექსანდროპოლის 161-ე ლეგიონის ოფიცრები: თავადი წულუკიძე და ბიკოვი, შტაბსკაპიტნები: ლუპულოვი, პავლიცკი, გენვიჩი და არტილერიის კაპიტანი გაიკაზოვი. ბრალმდებელი იყო სამხედრო პროკურორის თანაშემწე კაპიტანი შლეტინსკი, მდივანი—ფილჩაკოვი.

ბრალდებულებს იცავდნენ იურისტები: დავით ლორთქიფანიძე, ლუარსაბ ლოლუა და დრობიშვილი. საქართველოს საზოგადოებრიობის სახელით დაცვაში გამოვიდა სახელმოხვეპილი მწერალი და საზოგადო მოღვაწე აკაკი წერეთელი, თარჯიმანი იყო ყარაიმან გარდაფხაძე.

პროცესის დასაწყისში სამხედრო პროკურორმა შლეტინსკიმ საბრალდებო აქტი წაიკითხა, რომელშიც მომხდარი სისხლისღვრისათვის მთელი პასუხისმგებლობა ხალდეს მცხოვრებლებს დაეკისრათ.

აქტის დასაწყისში ჩამოთვლილია ხალდეს მცხოვრები 22 კაცის ანკეტური მონაცემები, მოცემულია 1875 წ. სვანეთის აჯანყების („უწესრიგობის“) მონაწილე ორი დამნაშავეს გურამაჩ გასვიანისა და ჩარგაზ ჯოხაძის დევნასთან დაკავშირებით ადმინისტრაციის მიერ გატარებული ღონისძიებება.

აქტში საქმე ისეა წარმოდგენილი, თითქოს ადმინისტრაციამ ყველა ზომა იხმარა დამნაშავედ ცნობილ პირობა მშვიდობიანი დაპატიმრებისათვის, მაგრამ ამას მთელმა სოფელმა შეუშალა ხელი და შეიარაღებული წინააღმდეგობა გაუწია.

მიუხედავად იმისა, რომ აქტი მეფის მოხელეების მიერაა შედგენილი, მასში მაინც შეინიშნება, რომ სვანეთის ადმინისტრაცია ყოველ წუთს მზად იყო ძალადობისათვის მიემართა

და უდანაშაულო მოსახლეობას დარეოდა. ამის მაგალითია, თუნდაც ის, რომ ადმინისტრაციამ ხალდეს მცხოვრებლები დაავალდებულა ორი უდანაშაულო სოფელი დაექირა და პოლიციისათვის ჩაებარებანა. რადგან სოფელმა ბრალდებულთა ჩაბარება არ იკისრა, ეს საკმარისი გახდა იმისათვის, რომ ხალდეს მთელი მცხოვრებლები მთავრობის მოწინააღმდეგედ მონათლა და მის წინააღმდეგ სამხედრო ძალა გამოყენებინა.

საბრალდებო აქტში ხალდეს მოსახლეობა დახასიათებულია, როგორც მშფოთვარე და ურჩი ხალხი, რომელიც თითქოს მთავრობის არც ერთ განკარგულებას არ ასრულებდა. აქტში ნათქვამია ისიც, რომ სენები მაგარ კოშკებსა და სახლებში ცხოვრობენ და მემკვიდრეობით ფლოპს როგორც იარაღს, აგრეთვე ტყვია-წამლის დამზადებას.

აქტში კარგად ჩანს, რომ, რადგან ხალდელებმა დამნაშავედ ცნობილი ორი კაცი არ ჩააბარეს, ადმინისტრაციას და სამხედრო ასეულის ხელმძღვანელობას განზრახული ჰქონდა მათი დასჯა (ამისი მაჩვენებელია ისიც, რომ ბოქაულ მიქელაძეს არ უნდოდა ხალდეში სამხედრო ასეულის შეყვანა და პირობას იძლეოდა თვითონ დაექირა დამნაშავეები), მაგრამ ამის მიუხედავად, შეიარაღებული შეტაკების მიზეზად მხოლოდ ხალდელებია დასახელებული.

აქტში არაფერია ნათქვამი იმაზე, რომ ხალდელებმა ადმინისტრაციასა და სამხედრო ასეულს ხანშესული წარმოადგენლები შეაგებეს და საქმის მშვიდობიანი მოგვარება სცადეს. ამასთანავე, საქმე ისეა დახატული, თითქოს გვიგო და გიორგი გასვიანებმა პირველებმა გამოიყენეს იარაღი და უმიზეზოდ დაჭრეს ჯარისკაცები, თითქოს ჯარისკაცებმა ისინი ამის სპასუხოდ დაჭრეს.

აქტში აღწერილია ხალდეს სისხლიანი შეტაკება — ხალდელთა მიერ ადმინისტრაციის წარმომადგენელთა და სამხედრო პირთა დახოცვა (ამასთან დაკავშირებით, აქტში არასრული ცნობებია მოცემული, ჩანს, მძიმე სამხედრო მარცხის ჩვენება კავკასიის ადმინისტრაციამ მიზანშეუწონლად მიიჩნია), ხალდეს მებრძოლთა დაპატიმრება, მათი ნაწილის ბრძოლაში დაღუპვა, ნაწილის მთებში გაქცევა და სხვ.

აქტში მოცემულია მთებში ხალდელების დევნა და იქ მომხდარი შეტაკება. საქმე ისეა წარმოდგენილი, თითქოს მთებში გაქცეული ხალდელები თენგიზ დადიშქელიანმა ძალით შეიპყრო. აქვე აღწერილია აფეთქებულ ხალდედან სოფელ მუჯალის მკვიდრთა მიერ წისქვილის ქვების წაღებისას მურზა ჭეხანის მკვლელობა* და სხვ. აქტით ხალდეს მცხოვრებ 22 პირს (ამას გარდა 9 კაცი უკვე გასამართლებული იყო, ხუთი ბრძოლაში დაიღუპა) საბოლოოდ რამდენიმე ბრალდება წაუყენეს, მათ შორის: მთავრობის განკარგულებისადმი შეიარაღებული წინააღმდეგობის გაწევა, ხელისუფლების წარმომადგენლების, აგრეთვე სამხედრო და სამოქალაქო პირების სიცოცხლის უმიზეზო ხელყოფა და სხვ. ყოველივე ეს ომიანობის კანონების საფუძველზე სასჯელის უმაღლეს ზომას — ჩამოხრჩობას ითვალისწინებდა.

სასამართლო პროცესის დაწყებამდე დადგინდა, რომ არც ერთ ბრალდებულს წლოვანების დამადასტურებელი საბუთი არ გააჩნდა. სამედიცინო ექსპერტიზის დასკვნით ბრალდებულთაგან: შახან, გიორგი და ბესი გასვიანები, აგრეთვე გიორგი ჭოხაძე, თავდაპირველად არასრულწლოვანებად იქნენ ცნობილი, ხოლო გიორგი ჩოფლიანი 70 წელს გადაცილებულად.

22 ბრალდებულიდან ავადმყოფობის გამო სასამართლო პროცესს არ ესწრებოდნენ გიორგი ჩოფლიანი და ზურაბ გასვიანი (65 წლის). 23 მოწმიდან სასამართლოზე მხოლოდ 12 გამოცხადდა.

სამხედრო-საველე სასამართლოზე საბრალდებო სიტყვით გამოვიდა კაპიტანი შლეთინსკი, რომელმაც აღნიშნა, რომ მათ წინაშე იყვნენ ის პირები, რომელთაც რამდენიმე თვის წინ სახელმწიფო დანაშაული ჩაიდინეს თავისუფალ სვანეთში და რომლის თანამონაწილე ცხრა კაცი უკვე გასამართლებული იყო. შლეთინსკიმ სასამართლოს წევრებს შეახსენა ის საბრალ-

* აფეთქებულ ხალდედან მუჯალელ გლეხებს ხარებით მიჰქონდათ წისქვილის ქვები, როდესაც ეს მთაში გახიზნულმა ხალდელებმა შენიშნეს, ჩხუტნიერის ქედზე მიმავალ მუჯალელებს მოსთხოვეს ქვები თავას ადგილზე დაებრუნებინათ, რაზეც უარი მიიღეს. ამაზე მომხდარ შეტაკებაში ერთი მუჯალელი დაიღუპა.

დებო დასკვნა, რომელიც სასამართლოს ამავე შემადგენლობას, ჯერ კიდევ, წინა პროცესზე (ოქტომბერში) მოახსენა იმავე აჯანყების 9 მონაწილის გასამართლების დროს. ამის შემდეგ პროკურორი შეუდგა საქმის ფაქტიური მხარის გარჩევას.

პროკურორმა გვერდი აუარა სამხედრო ასეულსა და ხალდეს მოსახლეობას შორის შეტაკების გამომწვევი მიზეზისა და გარემოების რეალური სურათის წარმოდგენას, რაც მეფის მოხელეთა კოლონიზატორულ რეჟიმში, და აგრეთვე ხალდეს მშვიდობიანი მოსახლეობის წინააღმდეგ ძალადობრივ მოქმედებაში მდგომარეობდა და აღნიშნა, რომ, თითქოს ორი დამნაშავეის დაპატიმრების ცდის დროს ხალდეს მოსახლეობამ ხელისუფლების წარმომადგენლებს და სამხედრო ასეულს უმიზეზოდ აუტეხა კოშკებიდან სროლა, რის შედეგად ადმინისტრაციის ხელმძღვანელები და, აგრეთვე სამხედრო პირები დახოცა. ბრალმდებელმა ყურადღება გაამახვილა აგრეთვე ჯოხაძეების სახლში თავშეფარებულ სახელმწიფო მოხელეების დახოცვაზე, აგრეთვე ხალდეს მოსახლეობის მიერ სამხედრო ნაწილებისადმი თავდაცვისას გაწეულ შეიარაღებულ წინააღმდეგობაზე და ყველაფერი ეს, მხოლოდ ხალდელებს დააბრალა და მათი ბოროტმოქმედებით ახსნა. ამასთანავე, პროკურორმა არა მარტო სოფლის ბარბაროსულ აოხრებასა და მიწასთან გასწორებაზე არაფერი თქვა, არამედ უმწეო მოხუცების, ბავშვებისა და ქალების შემდგომ ზედზეც არ დაძრა კრინტი.

საქმის ცალმხრივი განსჯით სახელმწიფო ბრალმდებელმა აჯანყებულების მოქმედებას შეუფარდა 1875 წელს დამტკიცებული სამხედრო წესდების 75-ე, მეორე ნაწილის 110-ე, აგრეთვე დებულების მე-12, 279-ე მუხლები, რომლებიც ჩანოხრობას, მუდმივ კატორღას, სამუდამოდ გადასახლებასა და სხვა სასტიკ სასჯელს ითვალისწინებდნენ.

შლეთინსკიმ დასძინა: ხუთდღიანი სხდომის დროს სასამართლო საქმისადმი დაძაბულ ყურადღებას იჩენდა, რაც თითქოს იმის გარანტიას იძლეოდა, რომ სასამართლო ყველა მსჯავრდებულს სამართლიან განაჩენს გამოუტანდა. ამასთანავე, პროკურორმა თქვა: თავს ნებას ვაძლევ მოვითხოვო, რომ ყველა იმ პირს, რომელმაც ადგილობრივი ადმინისტრაციის

წარმომადგენლები მოღალატური გზით დახოცა — ჩადენილი დანაშაულის შესაბამისი — მკაცრი განაჩენი გამოეტანოს¹.

ცალკეულ ბრალდებულთა დანაშაულის განსაზღვრისა და მათი მოქმედების აჯანყების კატეგორიისადმი მიკუთვნებასთან ერთად, მოსამართლეს და სასამართლოს წევრებს დაევალათ, რომ აჯანყების მთავარი მონაწილეების დანაშაულებრივი საქმე მთელი სიმკაცრითა და სერიოზულობით განეხილათ.

ბოლოს პროკურორი შეეხო თ. დადიშქელიანის მოქმედებასა და როლს სვანეთის აჯანყების საქმეში: მე, არ შემიძლია დუმილით ავუარო გვერდი იმას, რასაც საქმისათვის საგანგებო მნიშვნელობა აქვს. საქმე ისაა, რომ არც თუ დიდი ხანია, რაც სვანეთში გავრცელდა ხმები, რომ ადგილობრივი ბოქაულის თანამემწე თავადი თენგიზ დადიშქელიანი ყველა ხელსაყრელ მომენტში მთავრობის საზიანოდ მოქმედებდა — სვანეთის მოსახლეობის ნაწილს ადმინისტრაციის წინააღმდეგ აქეზებდა. ექვს გარეშეა ბატონო მოსამართლენო, რომ ამ ხმებმა თქვენამდეც მოაღწია. მე, განაგრძო სახელმწიფო ბრალმდებელმა, როგორც თავისუფალ სვანეთში მომხდარი ამბების წინასწარი გამოძიების მუდმივ მეთვალყურეს, მიმაჩნია, რომ თუ ამ ხმების სინამდვილე დადასტურდებოდა, მაშინ თავადი თენგიზი, როგორც მოცემული საქმის ინტელექტუალური დამნაშავე, თავის საქმიანობისთვის წახალისებას კი არ დაიმსახურებდა, როგორც ეს დღემდე იყო, არამედ მას გურჩიანის გასვიანის გვერდით დამნაშავეს სკამზე ჯდომა განეკუთვნებოდა, ხოლო დანარჩენი განსასჯელები, როგორც დამნაშავეის (ე. ი. თ. დადიშქელიანის — გ. გ.) ბრმა იარაღი, სრულ შემწყენარებლობას დაიმსახურებდნენ².

მიუხედავად იმისა, რომ თ. დადიშქელიანის დანაშაული აშკარა იყო, პროკურორმა მთავრობის მოხელის ინტერესები დაიცვა და დასძინა: თქვენ რომ შესაძლებლობა გქონოდათ ამ ხმების სიმართლის განსჯის, მე ვცდილობდი გამერკვია თავად თენგიზის როლი. როგორც გასამართლებული სვანების (რომლებსთვისაც ის უკვე საშიში არ არის), აგრეთვე მოწმეთა ჩვე-

1 საისტორიო მოამბე, I, გვ. 171.

2 იქვე.

ნებებით — საბედნიეროდ, სრულიად უსაფუძვლო აღმოჩნდა. ბატონო მოსამართლენო! თქვენ აქ მოისმინეთ მოწმე ა. ბაქრაძის (კალის მღვდელზეა ლაპარაკი — გ. გ.), ჩვენება — თავის და აწ განსვენებული მაზრის უფროსის გრინეცკის მოსაზრებაზე, რომ თავადი თენგიზი კარგი შემსრულებელი პოლიციელი და მოხელეა¹.

აქვე პროკურორმა აღნიშნა, რომ ამ საქმეში მეტად ძვირფასია უკვე გასამართლებულ სევანთა განმარტებები. ყველა მათგანმა ერთხმად განაცხადა, რომ თავადი თენგიზი სევანთში არსად და არასდროს მოსახლეობას უფროსების წინააღმდეგ არ ექეზებდა. პირიქით, იგი სევანებისაგან ხელმძღვანელობისადმი უსიტყვო მორჩილებას მოითხოვდა. ამასთანავე, სევანები თენგიზს სინდისიერ და მთავრობისადმი ერთგულ პირად მიიჩნევენ*. ბატონო მოსამართლენო! გასამართლებულ პირთა ეს ნიუკერძობეული და კეთილსინდისიერი დახასიათება, ჩემი აზრით, თქვა შლეტინსკიმ, ექვმიუტანლად მეტყველებს თავად თენგიზ დადიშქელიანის მიერ სამსახურებრივი მოვალეობის პატიოსან შესრულებაზე².

პროკურორმა შლეტინსკიმ სცადა გაექარწყლებინა აგრეთვე ზოგიერთი ბრალდებულისა და დამცველის გამოსვლა თენგიზ დადიშქელიანის წინააღმდეგ. მისი აზრით, ადმინისტრაციის წარმომადგენლების, მათ შორის, თენგიზის პატივსაცემად ხალდელების მიერ გაწეული წვეულება თითქოს ჩვეულებით იყო ნაკარნახევი და არა მოხელეთა მოთხოვნით და სურვილით. თითქოს თენგიზის ამგვარ მოქმედებაში — თანამდებობის ბოროტად გამოყენების — მსგავსი არაფერი იყო. ამ საქმეში თენგიზის გასამართლებლად შლეტინსკიმ დაიმოწმა მთავრობას ერთგული მსახურის ო. გარდაფხაძის განცხადებაც, რომ სევანთში საერთოდ არსებობდა თავადებისადმი უფასო გამასპინძლების ჩვეულება და თენგიზისადმი სამსახურ-

¹ საისტორიო მოამბე, I, გვ. 171.

* როგორც ქვემოთაც ვნახავთ, პროკურორმა თავის დროზე აჩანყებულთა ჩვენებებს არავითარი ანგარიში არ გაუწია, ეხლა როდესაც საქმე თ. დადიშქელიანს შეეხო, მათი ნათქვამი მიუუკერძოებელ, ძვირფას და პირველხარისხოვან წყაროდ ჩათვალა.

² საისტორიო მოამბე, I, გვ. 171-172.

რიც ამით აიხსნებოდა. პროკურორმა თენგიზ დადიშკელიანი არამც თუ რაიმეში დაადანაშაულა, არამედ იგი სვანეთის ღარიბი მოსახლეობის ქომაგად და შემწედ დახატა, რასაც პროკურორი იმითაც ასაბუთებდა, რომ თითქოს „თენგიზმა გასამართლებულ ხალდელთა მრავალ ოჯახს სარჩო და თავშესაფარიც სრულიად უანგაროდ მისცა“¹.

საბრალდებო სიტყვის დასასრულს პროკურორმა ყურადღება გაამახვილა ეკლესიის მუშაობაზე და სოფელ ხალდეს მოსახლეობის რელიგიურ მრწამსზე. პროკურორის აზრით, ეკლესიას მეტი უნდა ემოქმედა მთავრობისადმი ხალხის მორჩილების ჩასანერგად, მან ისიც თქვა, რომ ხალდეს ზოგიერთ მცხოვრებს, რომელიც ესოდენ საჭიროებს სახარების ქეშმარიტებას, მიუხედავად ასაკობრივი მომწიფებისა, არც ერთხელ არ მიუმართავს თავისი სულიერი მამისთვის, არ ულოცია და აღსარება არ ჩაუბარებია, რაც პროკურორმა, ერთი მხრივ, აღმაშფოთებელ და მოუთმენელ ფაქტად მიიჩნია (თუმცა ხალდეს ეკლესიის აფეთქებისა და გაძარცვის დროს მეფის მოხელეებს ამაზე არ უფიქრიათ — გ. გ.), ხოლო, მეორე მხრივ, მღვდელ ა. ბაქრაძის დაუდევრობად და საქმისადმი ბოროტმიდგომად ჩათვალა. ამასთანავე, პროკურორმა მითითება გასცა ამ საქმეზე სასამართლოს ცალკე განჩინება გამოეტანა და შედეგი საქართველოს ეკლესიის მღვდელმთავრისათვის ეცნობებინა.

როგორც ვხედავთ, მეფის მთავრობის მითითებით კავკასიის ადმინისტრაციასა და სამხედრო სარდლობას გადაწყვეტილი ჰქონდათ საბოლოოდ გასწორებოდნენ აჯანყებულებს და ფიზიკურად მოესპოთ ისინი.

სვანეთის ერთ-ერთი სოფლის მოსპობას და მისი მოსახლეობის ხელყოფას დიდი პროტესტით შეხვდა საქართველოს პროგრესული საზოგადოებრიობა, მისმა მოწინავე წარმომადგენლებმა გადაწყვეტეს რაღაც არ უნდა დაჯდომოდათ, აჯანყებულები ეხსნათ ფიზიკური განადგურებისაგან. ამ საქმეში გარკვეული წარმატების საწინდარი იყო ის, რომ სამხედროსაველე სასამართლო იძულებული შეიქნა ღია სასამართლო

¹ საისტორიო მოამბე, I, გვ. 171-172,

პროცესი ეწარმოებინა, სადაც მონაწილეობის მისაღებად უნდა დაეშვა სამოქალაქო საზოგადოების წარმომადგენლები. ასე მოხერხდა ქართველი ხალხის სასიკადაულო შვილის, მწერლისა და საზოგადო მოღვაწის აკაკი წერეთლის საჯარო გამოსვლა. აგრეთვე რამდენიმე ცნობილი ადვოკატის აყვანა და სასამართლო პროცესზე მონაწილეობა.

სამხედრო-საველე სასამართლოზე საქართველოს საზოგადოებრიობის სახელით პირველი გამოვიდა ცნობილი იურისტი და საზოგადო მოღვაწე ლუარსაბ ლოლუა. მან აღნიშნა, რომ განსახილველი საქმე ეხებოდა არა მარტო ბრალდებულთა ვიწრო წრეს, არამედ მთელ ქვეყანას, სახელმწიფოსა და მთელი ხალხის ინტერესებს. დამცველი შეეცადა დაესაბუთებინა, რომ მეფის მოხელეთა ნიერ გარედან ძალდატანებით ჩარევის გამო სვანებს უჭირდათ ახალი წესებისადმი შეგუება: „...ხალხთა განვითარების ისტორიამ გამოიმუშავა ურღვევი წესი, რომლის მიხედვით მხოლოდ და მხოლოდ ხალხთა მიერ ახალი იდეების და წესებას შეგნებულად შეთვისება უზრუნველყოფს ცხოვრებაში მათ წარმატებით გატარებას“¹. დამცველის აზრით, მოცემულ უბედურებათა მიზეზია სვანებისადმი ახალი და უცხო კანონების ძალით თავსმოხვევა: „თუ ნამდვილად გამოვლინდება, რომ ასეთი წესების გატარებისას დაიშვა შეცდომები, ეს გაკვეთილი იქნება იმისათვის, რომ შემდგომში მსგავსი უბედურებანი აღკვეთილ იქნეს, ეს აგრეთვე ჰკუთის სასწავლი მაგალითი გახდება ჩვენი ქვეყნისა და მთელი სახელმწიფოსათვის“². დამცველის აზრით, ამის გარკვევას უდიდესი მნიშვნელობა უნდა ჰქონოდა არა მარტო ბრალდებულთა ბედ-იბლების გადასაწყვეტად, არამედ თვით სასამართლო პრაქტიკისათვისაც.

მართალია, — აღნიშნა, ლ. ლოლუამ, — ბრალდებულები არ უარყოფენ იმას, რომ ისინი ნამდვილად ისროდნენ და ხელისუფლების წარმომადგენლებს წინააღმდეგობას უწევდნენ,

1 საისტორიო მოამბე, I, გვ. 173, აგრეთვე კრებული — ქართული სასამართლო მკვერმეტყველება, თბილისი, 1974 (ვ. სიღამონიძის შედგენილი), გვ. 32.

2 საისტორიო მოამბე, I, გვ. 173-174; ქართული სასამართლო მკვერმეტყველება, გვ. 33-34.

მათ კარგად იციან, რომ მკვლელობა ბოროტებაა და მისი ჩამდენი ისჯება, მაგრამ ამასთანავე ამტკიცებენ, რომ ისინი ამ მოქმედებაში დამნაშავენი არ არიან — ერთი სიტყვით თავს დამნაშავედ არ ცნობენ, ამიტომ გადაწყვიტეს თავი შესწირონ ქონებით, თავისუფლებით და სიცოცხლით, რაც ასე ძვირფასია ადამიანისათვის. გადაწყვიტეს დაღუპულიყვნენ და ცოცხლად დამარხულიყვნენ თავისივე სახლ-კარის ნანგრევებში. მათ წინააღმდეგობა გაუწიეს მთელ რაზმს და მხოლოდ მათ შინ დანებდნენ, როცა ყველა შესაძლებლობა ამოწურეს.

ლ. ლოლუამ სცადა მეფის სამხედრო სასამართლოსათვის დაემტკიცებინა, რომ ყველაფერი სვანეთისათვის უცხო კანონებისა და წეს-ჩვეულებების თავსმოხვევის, ადგილობრივი ადმინისტრაციის უკანონო მოქმედების და სამხედრო ასეულის ახირება-ძალადობის შედეგი იყო.

იმის გამო, რომ ბრალდებულები ეხსნა ფიზიკური მოსპობისაგან, დამცველი ლ. ლოლუა ცდილობდა ხალდეს გლებთა შეიარაღებული აჯანყებისათვის პოლიტიკური საფუძველი ვამოეცალა და სულ სხვა სარჩული დაედო. იგი სასამართლოს წევრებს არწმუნებდა, რომ „ავგისტოს ამბებს პოლიტიკურ მიზეზებთან, აგრეთვე წინაზრახულ შურისძიებასთან და სისხლის აღებასთან არავითარი კავშირი არ ჰქონდა. მისი მტკიცებით, ხალდეს სისხლიანი შეტაკების მთავარი მიზეზი იყო სვანეთის მოუშნადებლობა რუსული მართვა-გამგეობის მიღებისათვის. სვანები ცხოვრობენ მიუვალ მთებში, მათ უჭირავთ მალალი, ქედებით გარშემორტყმული დაბლობები.... თუ რამდენად იყვნენ იზოლირებული სვანები გარეშე ქვეყნებიდან, ეს სჩანს იქიდანაც, რომ ოდესღაც ეს ხალხი ქართულ ენაზე ლაპარაკობდა, ახლა კი მათ თავისი საკუთარი ენა შექმნეს“¹.

შემდეგ ლ. ლოლუა შეეხო სვანეთში რუსული მართვა-გამგეობის შემოღებას და რუსეთის ხელისუფალთა ძალაუფლებას. მან აღნიშნა, რომ რუსეთის შემადგენლობაში შესვლის მიუხედავად, სვანეთში ძველებური წესები და კანონები მოქმედებდნენ: „სასამართლო მართლმსაჯულების ნაწილი ვახტანგ

¹ საისტორიო მოამბე, I, გვ. 176, 177; ქართული სასამართლო მწვერ-ბეტყველება, გვ. 38—39.

მეფის კანონების მიხედვით წარმოებდა, ე. ი. დაღვრილი სი-
სხლის ფულადი საზღაურის გადახდევინებით, ნაწილი კი სი-
სხლისაღებათ — სისხლი სისხლისთვის — წესით¹. ასეთ ვი-
თარებაში, განაგრძო დამცველმა, ადმინისტრაციამ განიზრახა
ერთბაშად გარდაექმნა ყველაფერი. „...ადგილობრივმა ხელი-
სუფლებამ მოინდომა ერთბაშად მოესპო ძველი და დაემყარე-
ბინა ახალი წესი... სამწუხაროდ, ჩვენმა ადგილობრივმა ხელი-
სუფლებამ სვანეთში, როგორც ეს სამსჯავრო გამოძიებიდან
ჩანს... მთავრობის ნდობა ვერ გაამართლა“².

ლ. ლოლუა ეხება ეკლესიის მღვდელმსახურთა საქმიანობა-
საც და დასძენს: „რელიგიის წარმომადგენელნი ხალხში სასა-
რების მოძღვრების გავრცელების ნაცვლად მხოლოდ თავის
პირად გამდიდრებაზე ზრუნავდნენ. ძნელია იმისი წარმოდგე-
ნაც კი, რომ შესაძლებელი იქნებოდა ამ ღარიბი ხალხისაგან
რაიმეს მიღება, მაგრამ მაინც გამოჩნდნენ ადამიანები, რომ-
ლებიც ამათგანაც კი იღებდნენ საეკლესიო გადასახადს და ეს
ადამიანები ქრისტიანული სარწმუნოების წარმომადგენლები
იყვნენ. ყველა ამის შემდეგ რა უნდა მოვთხოვოთ სვანებს?“³.

ლოლუამ აღნიშნა, რომ სვანეთში თვითნებურად ინერგე-
ბოდა შეუსაბამო კანონები, მან სასამართლოს მოახსენა სვა-
ნეთში კანონების იურიდიული ნორმების უხეში დარღვევის
მრავალი მაგალითი, მათ შორის შეეხო 1875 წლის მღვლეა-
რების მონაწილე გ. გასვიანისა და ჩ. ჯოხაძის დასაპატიმრებ-
ლად მაზრის უფროსის გრინევსკის მიერ გაწეული ღონისძიე-
ბების უკანონობას, რამაც მთელი სოფელი საბრალდებო სკამ-
ზე დასვა.

„ჩვენ უნდა ჩაეწვდეთ ამ საქმეს,—აღნიშნა ლ. ლოლუამ,—
ადგილობრივ ხელისუფლებას ნამდვილად გურამჩისა და ჩარ-
გაზის დაპატიმრება ჰქონდა მხედველობაში, თუ ეს მხოლოდ
საბაბი გახდა ენერგიული ზომების მიღებისათვის, სხვა მიზნე-
ბის მისაღწევად“⁴.

დამცველმა სცადა სასამართლოსთვის დაემტკიცებინა, რომ

¹ საისტორიო მოამბე, I, გვ. 177.

² იქვე, გვ. 177—178.

³ ქართული სასამართლო მკვებრმეტყველება, გვ. 40—41.

⁴ საისტორიო მოამბე, I, გვ. 180.

ჰველაფერი ადგილობრივ ხელისუფალთა ძალადობის შედეგი იყო, რომ გრინევსკიმ ასეულის უფროსა შეგნებულად წააქეზა ხალდეს წინააღმდეგ.

ამასთანავე, ლ. ლოლუა დასძენდა: „სასამართლო უწყების მიერ არც ერთი აქტი არ არის შედგენილი სასამართლოს დადგენილების სისრულეში მოსაყვანად ხალდელების დაუმორჩილებლობისა და მათი წინააღმდეგობის გაწევის გამო. სხვაგან საკმარისია სულ ცოტა ურჩობის გაწევა, რომ მათ პასუხისგებაში მისაცემად დაუყოვნებლივ იქნას აღძრული საქმე. ასევე უნდა მომხდარიყო სვანეთშიც. სწორი არ იქნებოდა გვეფიქრა, რომ ვითომც ადგილობრივი ხელისუფლება სვანეთში ბოროტმოქმედ პირებს თავზე ხელს უსვამდა. მან ხომ თავი დადვა მათ წინააღმდეგ ბრძოლაში. ამიტომ, სწორი რომ ვთქვათ, საქმე ხალდელების დანაშაულში როდი იყო. მათთვის ეს ბრალდება არავის წაუყენებია, სამაგიეროდ, იგრძნობოდა საერთო კანონების არადაამკმაყოფილებელი მოქმედება, ან უკეთ რომ ვთქვათ, ამ კანონების უმოქმედობა სვანეთში. აქ ხელისუფლება ვერ ხედავდა კანონების შესრულებას ისე, როგორც სხვა ადგილებში იყო, და ისე როგორც ამას კანონი მოითხოვდა... მან მიზნად დაისახა ამ საერთო უბედურების აღკვეთის ამოცანა და თუმცა განზრახვა კეთილი იყო, მაგრამ მისმა შესრულების მცდარმა მეთოდმა დიდი უბედურება გამოიწვია“¹.

დამცველმა სცადა სასამართლოსათვის დაესაბუთებინა, რომ აგვისტოს სისხლიანი ტრაგედია გამოიწვია არა ხალდეს მოსახლეობამ, არამედ ადგილობრივ ხელისუფალთა წინდაუხედავმა აქციებმა. იგი შეეცადა გამოეაშკარავებინა ამ საქმეზე შექმნილი ყალბი „დოკუმენტები“, რომლებიც მაზრის ხელმძღვანელობის მოქმედებას ამართლებდნენ. ლ. ლოლუამ სასამართლოს ყურადღების ცენტრში მოაქცია ის ფაქტი, რომ გრინევსკიმ ხალდედან პასუხის მიღებამდე ლეუსს უბრძანა სალაშქროდ მომზადებულიყო. ამასთანავე, დამცველი შეეხო გრინევსკის მიერ 1876 წ. ივლისში ბეჩოდან კალაში მიქედისა და ასათიანის გაგზავნას და აღნიშნა, რომ გრინევსკი მათი

¹ საისტორიო მოამბე, I, გვ. 180; ქართული სასამართლო მკვლევარ-ტყველება, გვ. 44.

პასუხის მიღებამდე ბეჩოდან სამხედრო რაზმით დაიძრა. „იბადება ეჭვი, ხელისუფალი ხომ არ ეძებდა რაიმე საბაბს იმისათვის, რომ ენერგიული ზომების მიღება გაემართლებინა? ბეჩოდან ხალდემდე, სულ მცირე 40 ვერსია, თავად მიქელაძეს 28 რიცხვში მიეცა მიწერილობა ბეჩოში, ხოლო იმის თაობაზე, რომ ხალდელები ჯიუტობენ ბოროტმოქმედთა ჩაბარებაზე უკვე 29 რიცხვში მაზრის უფროსის სახელზე მოხსენებაა შედგენილი. თუ მხედველობაში მივიღებთ დროის სიმციროს, რაც საჭირო იყო მიქელაძისათვის მიღებული დავალების შესასრულებლად, ამ შემთხვევაში მე არ შემიძლია ვიფიქრო, რომ ხელისუფლის მიერ მართლაც იყო მიღებული ზომები საქმის მშვიდობიანი გზით მოწესრიგებისათვის. მიქელაძის 29 ივლისის მოხსენება ბეჩოდან დაძრული რაზმის მოქმედების გამამართლებელ საქმეში გამოსაყენებელ საბუთს ხომ არ წარმოადგენს?“¹.

აქვე ლ. ლოლუა შეეხო მიქელაძის მისიას და დასძინა, რომ არც მან მოიმოქმედა რაიმე საქმის ნორმალური მოგვარებისათვის, ნაცვლად იმისა, რომ ხალდელებს თვითონ მოლაპარაკებოდა, მათთან მღვდელი ალექსი ბაქრაძე გაგზავნა: „აღამიანს ოდნავი წარმოდგენაც არ უნდა ჰქონდეს სვანეთზე, რომ ამ მიზნით ასეთი პირი აირჩიოს“. ამასთან დაკავშირებით დამცველმა სასამართლოს მოახსენა: „ბატონო მოსამართლენო, თქვენ თვითონ დაინახეთ, თუ როგორ დამოკიდებულებაში იყო ეს მღვდელი ხალდელებთან და აქედან შეგიძლიათ განსაჯოთ, თუ რა შედეგი მოყვებოდა მის-შუამავლობას: მისი არჩევა და გაგზავნა არ მარწმუნებს იმაში, რომ უფროსებს საქმის მშვიდობიანი მოგვარება სურდათ. ა. ბაქრაძის უხეირო ჩარევამ უფროსებს ბიძგი მისცა ძალადობისათვის მიემართათ². დამცველი ლ. ლოლუა შეეხო მაზრის ადმინისტრაციის მიერ, ჯერ კიდევ, წინა წელს ჩადენილ ძალადობას და აღნიშნა: „როგორც აქ თარჯიმანმა ი. ბაქრაძემ აგვიხსნა, ზოგიერთ სოფელში ხელისუფლებამ ხალდეში მისვლამდე დააპატიმრა რამდენიმე კაცი, მაგრამ მათ შორის არ იყო არც ერთი,

¹ ქართული სასამართლო მკვერპეტყველება, გვ. 46.

² იქვე, გვ. 47.

რომლის დაპატიმრებას სასამართლო ხელისუფლება მოითხოვდა. ჩვენ აქ ყურადღება უნდა მივაქციოთ თვით დაპატიმრების წესს და ამასთან ადვინისტრაციის მიერ მიღებულ ზომებსაც, რომლებიც მკვეთრად ეწინააღმდეგებიან კანონის მოთხოვნას. რაზმი გარს ერტყმის სოფელს, ან ცალკეულ სახლს, ჯარისკაცები შედიან შიგ, ჩხრეკენ და აწარმოებენ ჩამორთმევას, ერთ სოფელში მამის მაგიერ აპატიმრებენ ორ შვილს (საქმე ეხება 1875 წლის მღელვარების მონაწილე შახუბათ ქურდიანის შვილებს — გ. გ.), რომლებსაც არავითარი დანაშაული არ მიუძღოდათ, და შებოჭილი მიჰყავთ ლეჩხუმში. შეიძლებოდა თუ არა ყველა ამის გაკეთება კანონის საფუძველზე? შეიძლებოდა თუ არა ასეთი ღონისძიების წამოწყება სასამართლოს დებულების ფარგლებში? ადმინისტრაციის და სამხედრო რაზმის ასეთი მოქმედება ეწინააღმდეგება ყველა კანონმდებლობას, რომლის ძალა სევანეთზედაც უნდა გავრცელდეს“...¹.

ი. ბაქრაძის ჩვენებაზე დაყრდნობით, ლ. ლოლუამ სცადა დაესაბუთებინა, რომ გრინევსკი და ლეუსი წინასწარ შეთანხმდნენ ხალდეს ალყაში მოქცევაზე, ყველა ოჯახის გაჩხრეკაზე, აგრეთვე იმაზე, რომ თუკი გურმაჩი და ჩარგაზი შინ არ აღმოჩნდებოდნენ, სოფელი იძულებული გაეხადათ მოეძებნა ისინი. ხელისუფალთა ამგვარი ძალმომრეობის წინააღმდეგ სოფელი იძულებული გახდა დარაზმულიყო, „ხალდელებმა იგრძნეს, რომ დიდი საფრთხე მოელოდათ. მათთვის უკვე ცნობილი იყო, რომ სხვაგან სოფლები და სახლები გარშემორტყმულია, რომ ყოვლად უდანაშაულო პირებს აპატიმრებდნენ და რაზმს თან მიჰყავდა. ჯარს თან ჰქონდა წერაქვები, ძალაყინები და თოფისწამალი სახლებისა და კოშკების ასაფეთქებლად. ისინი ჩაფიქრდნენ, უხუცეს პირებს აგზავნიან უფროსებთან, თხოვენ ჯარის გაყვანას და ახალი მძევლების მიცემას პირდებიან, მაგრამ უფროსები ახლოს არ იკარებენ. ხალდელები თხოულობენ, რომ რაზმის გარეშე მისულიყვნენ უფროსები მათთან. უფროსები კი ხალდეში მარტო არ მივიდნენ. ამდა-

¹ საისტორიო მოამბე, I, გვ. 183; ქართული სასამართლო მკვერამეტყველება, გვ. 47.

გვარად ორივე მხრივ უნდობლობა შეიქმნა, ადმინისტრაციამ უკან არ დაიხია და, თხოვნის მიუხედავად, იგი პირველ აგვისტოს ჯარის თანხლებით ხალდეში შევიდა¹.

სასამართლო გამოძიებაზე და პროცესზე დიდი დრო დაეთმო იმის დადგენას, თუ ვინ დაიწყო პირველად შეიარაღებული შეტაკება: ხალდელებმა თუ ჯარისკაცებმა. სამხედრო-საველე სასამართლოზე ისე, როგორც წინასწარი ძიების დროს, მეფის მოხელეები ცდილობდნენ შეიარაღებული კონფლიქტის დაწყება ხალდეს მოსახლეობისათვის გადაებრალებინათ. სამხედრო პროკურორის განცხადებით და, საერთოდ საბრალდებო დასკვნის მიხედვით, სისხლიანი შეტაკების წამომწყები თითქოს გეგი და გიორგი გასვიანები იყვნენ, ვითომდა მათ პირველებმა მიმართეს იარაღს ჯარისკაცების წინააღმდეგ. გამოძიება და პროკურორი დაეყრდნენ სამხედრო ასეულის ჯარისკაცთა ჩვენებებს, რომლის მიხედვით იარაღი თითქოს პირველად ხალდელებმა იშიშვლეს და თითქოს ჯარისკაცებმა მხოლოდ ამის შემდეგ მიმართეს ძალას. ძიებამ მხედველობაში არ მიიღო არა მარტო ხალდელების ჩვენებები, რომ ჯარისკაცებმა პირველებმა გაუყარეს ხიშტები მათ შესახვედრად მისულ ორ უდანაშაულო ადამიანს, არამედ პირველი ბრძოლის მონაწილე ზემდეგის ჩვენებაც, რომ მან თვითონ უბრძანა პვენეს განეგმირა სვანი და მხოლოდ შემდეგ დაინახა დახოცილი ჯარისკაცები.

აღნიშნულ ფაქტებთან დაკავშირებით ლ. ლოლუა შენიშნავდა: „ბრალდებულთა და მოწმეების ჩვენებები იმაზე, თუ პირველად რომელმა მათგანმა მიაყენა კრილობა — ჯარისკაცებმა სვანებს, თუ პირიქით სვანებმა ჯარისკაცებს — ერთმანეთის საწინააღმდეგოა... არსებობს საფუძველი დაუუშვათ, რომ ორი სვანი ვერ გაბედავდა იარაღი აეღოთ საუკეთესოდ შეიარაღებული რაზმის წინააღმდეგ, უკეთუ ისინი არ იფიქრებდნენ, რომ მათ სიცოცხლეს საშიშროება მოელოდა, მხოლოდ ამის შემდეგ შეეძლოთ ხელი მოეკიდათ ისეთი უბადრუკი ხანჯლებისათვის, რომელსაც თქვენ აქ მაგიდაზე ხედავთ, როგორც ნივთიერ დამამტკიცებელ საბუთს. თუ ჯარისკაცებმა

¹ საისტორიო მოამბე, I, გვ. 184-185; ქართული სასამართლო მკვებრეტყველება, გვ. 50.

პირველებმა ააგეს სვანები ხიშტებზე, ცხადია, ხალდელები ნაკლები დამნაშავენი არიან, ვინემ ჭარისკაცები“¹.

რაკი დამცველი ღრმად იყო დარწმუნებული, რომ სასამართლო თავის მხარის ყალბ ჩვენებებს დაეყრდნობოდა, მან სასამართლოზე საკითხის მეორე მხარეზეც გაამახვილა ყურადღება: „...საკითხი იმაზე, თუ რომელმა მათგანმა მიაყენა პირველად ჭრილობა, ჩემთვის სულ ერთია... ასე საკითხის დასმა საჭირო არ არის; აქ საქმის დედაარსი მდგომარეობს მაიორ ლეუსის არასწორ განკარგულებაში — დაეპატიმრებინათ ორი სვანი, რომლებმაც ვერ შოასწრეს კოშკში დამალვა ისე. როგორც სხვებმა. ეს უდანაშაულო ორი სვანი იყო გიერგი და გეგი გასვიანები*, რომელთაც არავითარი ბრალი არ ედებოდათ. ისმის კითხვა: რა საფუძველზე გასცა მაიორმა ლეუსმა განკარგულება, ჭარისკაცებს დაეპატიმრებინათ ისინი. ასეთ დაპატიმრებას არამც თუ არ ითვალისწინებს კანონი. არამედ ფორმალურადაც კრძალავს და თავისუფლების კანონსაწინააღმდეგო ხელყოფაა. პიროვნებას სვანეთში უფრო მეტად სცემენ პატივს, ვიდრე ჩვენს სხვა რომელიმე მხარეში. ამ ქვეყანაში პიროვნება უზრუნველყოფილია სისხლის სამართლის დებულებით...“

რა აძლევდა მაიორ ლეუსს უფლებას, რომ განკარგულება გაეცა გიერგი და გეგი გასვიანების დაპატიმრებაზე? ამ პირებს ბრალედებოდათ თუ არა რაიმე ბოროტმოქმედება? მოითხოვდა თუ არა ვინმე მათ დაპატიმრებას? არა, მსგავსი, რამ არ ყოფილა. ხელისუფლების ეს მოქმედება, რაც ხალდეში მოხდა, არ ექვემდებარებოდა კანონის მოთხოვნას და ეს დაპატიმრება ბოროტმოქმედებას წარმოადგენდა. უდანაშაულო ადამიანების პირადი თავისუფლების ასეთმა უკანონო ხელყოფამ ყველაფერი გამოიწვია“².

მაიორ ლეუსის უკანონო საქციელის დაგმობის შემდეგ

1 საისტორიო მოამბე, I, გვ. 185; ქართული სასამართლო მკვერმეტყველება, გვ. 51.

* სასამართლოს მასალებში გასვიანის ნაცვლად ხშირად კასტლიანია შეცდომით ფიქსირებული.

2 საისტორიო მოამბე, I, გვ. 186; ქართული სასამართლო მკვერმეტყველება, გვ. 52.

დამცველმა ლ. ლოლუამ დასძინა: „რა უნდა ეფიქრათ ხალ-
დელებს მათ სოფელში სამხედრო რაზმის პირველივე გამო-
ჩენისთანავე? მათ წარმოდგენაც კი არ ჰქონდათ ჩვენს ახალ
წესებზე. მათთან აღწევდა ცნობები დამნაშავეთა მაგიერ უდა-
ნაშაულო ადამიანების დაპატიმრებისა და ჯარისკაცების მიერ
ჩხრეკის წარმოების შესახებ. ისინი ხედავდნენ ალყაშემორ-
ტყმულ სოფლებს, ხედავდნენ — წერაქვებსა და ძალაყინებს
და გაიგეს ლეუსის პირველი განკარგულება... რაზმის პირვე-
ლი ძალმომრეობით მოქმედება მიმართულ იქნა გიერგი და
გეგი გასვიანებისადმი... არ შეიძლება არ ვალიაოთ, რომ
ხალდელებს არ შეეძლოთ არ ეგრძნოთ, რომ მათ სიცოცხლეს.
თავისუფლებას და ქონებას გარდაუვალი საფრთხე ემუქრე-
ბოდა. აი, ჩემი აზრით, ესაა მთავარი მიზეზი, რითაც უნდა
აიხსნას პირველი აგვისტოს ამბები და მასთან ერთად შემდეგი
ამბებიც... აი ბატონო მოსამართლენო! ეს არის ამ საქმის
ერთადერთი სწორი ახსნა“¹.

შეიარაღებული შეტაკების ნამდვილი მიზეზების გამოაშკა-
რავეების გამო ხელისუფლების მეტისმეტი გულისწყრომა რომ
არ გამოეწვია, დამცველმა ლ. ლოლუამ ნაწილობრივ დაადა-
ნაშაულა ხალდელებიც. ამასთანავე ლ. ლოლუა შეეხო ხალდეს
აჯანყების შემდგომ მსვლელობას და განაცხადა:—„ყველა შემ-
დგომი ამბები მხოლოდ ამ პირველი მიზეზების ბუნებრივი
გაგრძელება იყო. ...პირველი აგვისტოს მომხდარი ამბების
შემდეგ მათ იმედი ჰქონდათ შეწყალების, მაგრამ მომხდარ შე-
ტაკებას, რასაც ისინი თავის ბრალად არ თვლიდნენ, მათთვის
გაუგებრად კადევ ახალი დანაშაული — უფროსების მკვლე-
ლობა დაემატა. ახლა ისინი შეუდრეკელ წინააღმდეგობას
უწევენ მთელ რაზმს, გადაწყვიტეს ცოცხლად დამარხული-
ყვნენ თავიანთ კოშკებში და მხოლოდ მაშინ დანებებულ-
ყვნენ, როდესაც ბრძოლის გაგრძელება შეუძლებელი გახდე-
ბოდა“².

სისხლისმღვრელი შეტაკების მიზეზების გარკვევის შემდეგ
დამცველი სვამს კითხვას — თუ რა ბედი უნდა სწეოდათ
ბრალდებულებს? იგი მართლმსაჯულებას მიმართავს: „თქვენ,

¹ საისტორიო მოამბე, I, გვ. 186—187.

² იქვე, გვ. 187.

ბატონო მოსამართლენო, დღეს აქ უმაღლეს მართლმსაჯულებ-
ის ორგანოს წარმოდგენთ, თქვენს წინაშეა ფაქტები, რო-
მელსაც კანონი უნდა მიუყენოთ, ცხადია, შეგიძლიათ დაინა-
ხოთ დანაშაულთან დასჯის შეუსაბამობა. თქვენ უმაღლესი ხე-
ლისუფლების მიერ მოცემული გაქვთ უფლება დაწვრილებით
გაიგოთ საქმის მდგომარეობა და უმაღლეს ხელისუფლებას
წარუდგინოთ განსახილველად, ამ შემთხვევაში კავკასიის არ-
მიის სარდლობას შეატყობინოთ გარემოებანი, რაც ესოდენ
გასათვალისწინებელია დამნაშავეთა შეწყნარებისათვის. რო-
გორც თვით დანაშაულთა უბედურება, ასევე დამნაშავეთა
სასტიკად დასჯა უდიდესი უბედურება იქნებოდა. შეუგნებ-
ლად და განზრახვის გარეშე ჩადენილი დანაშაული ბოროტ-
მოქმედებად არ ჩაითვლება. ამ შემთხვევაში სვანებს ოდნავი
განზრახვაც კი არ ჰქონდათ ხელისუფლებისათვის წინააღმდე-
გობის გაწევისა, სვანების გაგებით ეს იყო მხოლოდ თავდა-
ცვის განზრახვა, ყოველივე იმის დაცვა, რასაც ადამიანი დი-
დად უნდა აფასებდეს“¹.

დავის შემდეგ დამცველმა სასამართლოს მოახსენა სვანე-
თის ამბებთან დაკავშირებით საქართველოს საზოგადოებრივი
აზრი და განაცხადა, რომ აგვისტოს ამბებმა მთელ საქართვე-
ლოს თავზარი დასცა. ყველა ფიქრობდა, რომ სვანები დამნა-
შავენი იყვნენ და ამიტომ უარს არავინ იტყოდა ხელი მოეწერა
ბოროტმოქმედ დამნაშავეთა სიკვდილით დასჯის განაჩენზე,
მაგრამ გარემოებათა გარკვევის შემდეგ ამ საქმეზე ხალხის
შეხედულება შეიცვალა: „მაშინ არ არსებობდა ის მონაცემები,
რომელთა გარკვევამ შემდეგში შეცვალა საყოველთაო აზრი.
ამ ამბებზე პირველი ცნობების მიღებისთანავე უმაღლესმა
ხელისუფლებამ განკარგულება გასცა სამაგალითოდ დაესაჯათ
დამნაშავენი, მაგრამ ახლა ამ განკარგულების სრულად და
ზუსტად გატარება უაზრო იქნებოდა, ვინაიდან დამტკიცებუ-
ლია, რომ ბრალდებულებს არ ჰქონდათ ბოროტმოქმედების
ჩადენის შეგნებული ნებასურვილი... უკანასკნელ ჟამსაც კი,
როდესაც დამნაშავენი დანებდნენ, ისინი ივედრებოდნენ და
თხოულობდნენ, რომ საქმე მეფისნაცვლისათვის წარედგინათ.

¹ საისტორიო მოამბე, I, გვ. 187.

...უმალეს ხელისუფლებაზე ასეთ შეხედულების გამო საჭირო არ არის მათ მთლიანად მიუხეცნოთ სამხედრო სისხლის სამართლის კანონით გათვალისწინებული მკაცრი სასჯელი. აუცილებლად საჭიროა შუამდგომლობა აღიძრას დამნაშავეთა მწარე ხვედრის შესამსუბუქებლად, მათ შეწყალებაზე. სამართალში მიცემულთა მკაცრი დასჯის მოთხოვნა არავითარ თვალსაზრისით არ იქნებოდა გამართლებული“¹.

დამცველმა ლ. ლოლუამ სასამართლოს შეახსენა, რომ სისხლის სამართლის წესით დასჯის მიზანია საშიშ და გამოუსწორებელ დამნაშავეთა იზოლირება და განდევნა იმ საზოგადოებიდან, რომელთანაც მათი ყოფნა შეუთავსებელია. მაგრამ დამცველის რწმუნებით, სვანები არ ეკუთვნოდნენ საზოგადოებისათვის საშიშ წესრიგის დამრღვევ ადამიანთა კატეგორიას. როდესაც დამცველი შეეხო უმალეს ხელისუფალთა განკარგულებას და შეუდგა მტკიცებას, რომ ბრალდებულთა სამავალითო დასჯა არც საზოგადოებრივი თვალსაზრისით იყო სასარგებლო და არც მთავრობის პოლიტიკისათვის, ამის საპასუხოდ სამხედრო სასამართლოს თავმჯდომარემ დამცველს სიტყვა შეაწყვეტინა და ზომიერებისაკენ მოუწოდა. მაგრამ დამცველი განსასჯელებს მიუბრუნდა და განაგრძო: „ამ ადამიანთა ხვედრი, უდაოდ, მეტად საშინელია. მათი სოფელი, რომელიც ხალდეს სახელს ატარებდა, მიწასთანაა გასწორებული და საბრალდებო აქტშიც ნაჩვენებია — როგორც ყოფილი სოფელი ხალდე, მაშინ, როდესაც თავისი სოფელი ასეთი ხალხისათვის სამშობლოსა და ყველაფერს წარმოადგენს. მააი კუთხე სავსებით განადგურებულია, ისინი ოჯახებით დახეტიალობენ კლდეებზე, რომელიც მხოლოდ გარეული მხეცებისათვისაა მისაწვდომი. ითმენენ შიმშილს, სიცივესა და მათ ახლობელი ადამიანების ტანჯვას. მხოლოდ ეს არის საკმარისი მათი დასჯისათვის. დავტირით რა მომხდარ უბედურებას, ჩვენ მათი სიცოცხლე უნდა შევიწყალოთ“².

სასამართლოზე აჯანყებულთა მეორე დამცველად წარსდგა

¹ საისტორიო მოამბე, I, გვ. 188; ქართული სასამართლო მკვერმეტყველება, გვ. 54—55.

² საისტორიო მოამბე, I, გვ. 188—189; ქართული სასამართლო მკვერმეტყველება, გვ. 55-56.

აკაკი წერეთელი, რომელმაც თავისი გამოსვლის შესავალი ნაწილი პროკურორისა და დამცველ ლ. ლოლუას გამოსვლების შეფასებას მიუძღვნა.

საბრალდებო სკამზე მსხდომთა საქმის გარჩევა ა. წერეთელმა იმის მტკიცებით დაიწყო, რომ საქართველოს ბედუკუღმართობის დროს სვანებმა ცხოვრების ზოგიერთი თავისებური წესი გამოიმუშავეს, რომ მათ მიერ ჩადენილი დანაშაული შეფარდებითია. იმას, რასაც ერთნი დანაშაულად თვლიან და დევნიან, — აღნიშნა ა. წერეთელმა, — სხვები საამაყო გმირობად მიიჩნევენ: „კაცობრიობის წინ წამყვან რეფორმატორებს დამნაშავედ თვლიდნენ და კოცონზე წვავდნენ. ეჭვს გარეშეა, ბატონებო, რომ ასეთი მკაცრი განაჩენის გამომტანი მოსამართლენი დარწმუნებული იყვნენ თავიანთ შეუცდომლობაში. მაგრამ განვლო საუკუნეებმა, შეხედულებანი შეიცვალენ და მომდევნო დრომ მსჯავრი თვით ინკვიზიტორებს გამოუტანა. ასეთია დანაშაულთა უდიდესი ნაწილი“¹.

რაც შეეხება მკვლელობას, იგი, ყოველთვის დანაშაულად იყო მიჩნეული, მას ყველა ხალხი გმობდა და ზიზლით უყურებდა. ჩვენს წინაშე, მიუთითებს ხალდელებზე, მკვლელები სხედან, მაგრამ, დახეთ საკვირველებას, — შენიშნავს ა. წერეთელი, — არავითარ ამის მსგავსს ჩვენ მათდამი არ განვიცდით. „ამ სამი დღის განმავლობაში, — განაგრძო ა. წერეთელმა, — ჩვენ საკმაო დრო გვქონდა დავრწმუნებულიყავით იმაში, რომ მთელი დამსწრე საზოგადოება, განათლებულიდან დაწყებული უკანასკნელ უვიცამდე, მათი ბედიბღლისადმი ერთნაირი თანაგრძნობით იყო განწყობილი. უფრო მეტიც, მიუხედავად იმისა, რომ ბევრი თქვენთაგანი, ბატონო მოსამართლენო, ამ რამდენიმე ხნის წინ მათი ტყვეების სეტყვის ქვეშ იმყოფებოდა, თქვენს სახეზედაც კი ვხედავ მათდამი სიბრალულს“².

ა. წერეთელმა სასამართლოს შემადგენლობის ყურადღება გაამახვილა ხალდეს შეიარაღებული შეტაკების გამომწვევ მი-

1 საისტორიო მოამბე, I, გვ. 189; ქართული სასამართლო მკვერამეტყველება, გვ. 59—60.

2 საისტორიო მოამბე, I, გვ. 190; ქართული სასამართლო მკვერამეტყველება, გვ. 60.

ზეზებზე და დასძინა, რომ ეს საბედისწერო სისხლისღვრა მოულოდნელი და გარდაუვალი იყო, რომ ამ დანაშაულის მიზეზი გახდა ადმინისტრაციის შეჭახება ადგილობრივ მოსახლეობასთან.

იმისათვის, რომ მომხდარ ხოცვა-ჟლეტაში ხალდელების დანაშაული გაემართლებინა, ა. წერეთელმა პართლმსაჯულების ყურადღება შეაჩერა სვანეთის ადმინისტრაციისა და სამხედრო ასეულის უკანონო მოქმედების განხილვაზე. მან აღნიშნა, რომ თავის ზნეობრივი და გონებრივი გაგებით ადმინისტრაცია მალა უნდა დამდგარიყო შედარებით ჩამორჩენილ, კლდეებში გამომწყვდეულ ადგილობრივ მოსახლეობაზე. მას შემდეგ, — დასძინა ა. წერეთელმა, — რაც საქართველო დაკნინდა, სვანეთში ცივილიზაცია ჩაქრა. სვანებმა გონებრივი განვითარება და ქონება დაკარგეს და მხოლოდ ის კოშკები შერჩათ, რომელთა ნაწილი ასე იქნა გაცამტვერებული სამხედრო ძალით*. ჩვენ არც გრძნობამ და არც გონებამ არ უნდა მოგვეცეს უფლება სვანებს ბრალი დავდოთ ამ ჩამორჩენილობაში. შემდეგ ა. წერეთელმა ხაზი გაუსვა ხელისუფლების მიერ სვანეთში უცხო და ახალი კანონების დანერგვის შეუსაბამობას, ამ კანონების ზემოდან თავსმოხვევის ფაქტებს: „კანონს თავის საფუძვლად უნდა ედოს იმ ხალხის ზნე-ჩვეულება და ადათწესი, ვისთვისაც ეს კანონია გამიზნული. სვანების მიმართ კი არაფერი ამის მსგავსი არ ყოფილა მხედველობაში მიღებული.... ადმინისტრაცია ვალდებული იყო მოსახლეობისათვის განემართა მოქმედი კანონის არსი და მნიშვნელობა, მათთვის კანონისადმი დამორჩილების მაგალითი მიეცა“¹.

სინამდვილეში, განაცხადა ა. წერეთელმა, პირიქით ხდებოდა: ადგილობრივი ხელისუფლება კანონებს სრულებით არ ასრულებდა, სვანები კი მათ წინაშე მოწიწებით იხრიდნენ თავს: „გუშინდელ სხდომაზე ჩოფლიანმა მოგვეითხრო, — თქვა

* ასეთი მკვეთრი გამოსვლის გამო ა. წერეთელმა სასამართლოს თავმჯდომარის (კეკელიძის სამხედრო ოლქის სასამართლოს თავმჯდომარის) გენერალ-მაიორ ლეიხტის შენიშვნა — „გთხოვთ გამოთქმებში სიფრთხილე გამოიჩინოთ“ — დაიმსახურა.

¹ საისტორიო მოამბე, I, გვ. 192; ქართული სასამართლო მკვლევარ-ტყველება, გვ. 63.

ა. წერეთელმა, — თუ როგორ გადაუხადა სასამართლოს ბოქაულს ფული, რაც მას ამ უკანასკნელმა მოთხოვა. ჩოფლიანმა თავის ავადმყოფ მამას მოუწვია ექიმი, რომელიც ღამის გასათევად სოფელში დარჩა და თავის ცხენი საძოვარზე გაუშვა. ღამით ცხენი მგლებმა დაგლიჯეს, მიუხედავად იმისა, რომ ამისათვის მასპინძელს არ ევალებოდა პასუხისმგებლობა სვანური ადათის მიხედვით, შემდეგ ექიმმა ისარგებლა ჩოფლიანის სახლში არ ყოფნით და მის მიმართ აღძრა სარჩელი, რაც მომრიგებელმა მოსამართლემ მიიღო.... დიდი ხნის შემდეგ სახლში დაბრუნებული ჩოფლიანი სასამართლოში იქნა დაბარებული... მას იქ წარედგინა სააღსრულებლო ფურცელი და მანაც შეუსიტყვებლად, ყოველგვარი დავის გარეშე, დაკისრებული 60 მანეთის ანგარიშში ბოქაულს გადასცა თოფი, აგრეთვე ძროხა და ხბო. ნუთუ ეს კანონისადმი სვანების უდავო მორჩილებაზე არ მეტყველებს“¹.

ამასთანავე, ა. წერეთელმა ამხილა ხელისუფლების წარმომადგენელთა უკანონო მოქმედების სხვა შემთხვევები, კერძოდ აღნიშნა, რომ ხელისუფლების წარმომადგენლები თ. დადიშქელიანი და სხვები აგრძელებდნენ სამარისპირამდე მიხული ბრალდებულების დევნას, რის უტყუარ მაგალითად დაასახელა ქუთაისში ბრალდებულთა დაცვის მოწმეების გამოცხადებისათვის ხელისშეშლა, მაშინ, როდესაც მოწმეებს შეეძლოთ ისეთი გარემოებანი გაეხსნათ, რაც საქმეს სულ სხვაგვარ მსვლელობას მისცემდა.

მიუხედავად იმისა, რომ ხელისუფლებამ ბრალდებულთა მოწმეებს სასამართლოზე გამოცხადება აუკრძალა, ცალკეულ მონაცემებზე და გამოსვლებზე დაყრდნობით დამკვეთებმა მაინც შეძლეს არა მარტო მეფის ხელისუფალთა უკანონო პოლიტიკის ზოგადი, არამედ ხალდეს სისხლიან ტრაგედიაში სამოქალაქო და სამხედრო ხელისუფალთა ძალმომრეობის მხილებაც.

დაცვით სიტყვაში ა. წერეთელმა ხაზი გაუსვა სამხედრო რაზმისადმი მაიორ ლეუსის მიერ გაცემული განკარგულების უკანონობას, ამხილა სამხედრო რაზმის ლაშქრობა, მის მიერ

¹ საისტორიო მოამბე, 1, გვ. 192.

ერთი სოფლიდან მეორეში გადასვლა, ძარცვა-ჩხრეკა, უდანაშაულო ადამიანების დაპატიმრება და სხვ.

როდესაც ა. წერეთელი სამხედრო რაზმის მიერ შახუბათ ქურდიანის უდანაშაულო შვილების დაპატიმრებასა და პატიმართა ხელშეზღუდვით ტარების ფაქტს შეეხო, სასამართლოს თავმჯდომარემ გენერალ მაიორმა ლეიხტმა ა. წერეთელს კვლავ მოუწოდა, რომ „გამოთქმაში სიფრთხილე გამოეჩინა“, მაგრამ მან მაინც უშიშრად განაგრძო: „უკაცრავად, მაგრამ ფაქტია, რომ ისინი ხელშეკრულნი და თოქჩაბმულნი ხუთი დღის განმავლობაში დაყავდათ სოფლიდან სოფელში და ასე მიაღწიეს სოფელ კალას, სადაც ცნობას ასეთ დაპატიმრებაზე შეუძლებელია არ ჩაესწრო ხელისუფლების წარმომადგენლებისათვის. კალაში ისინი გაჩერდნენ და სოფელ ხალდეში მოციქულებად გაგზავნეს მღვდელი და თარჯიმანი და ხალხს მოთხოვეს გურამაჩის და ჩარგაზას მიგვრა, მაგრამ, როგორც შემდეგ გაირკვა, ისინი სოფელში ნამდვილად არ იმყოფებოდნენ, რის გამო ხალდელებმა მათ მაგივრად ექვსი მძევალი შესთავაზეს და თავს იღვეს ხელისუფალთა წინაშე გურამაჩისა და ჩარგაზის გამოცხადება სექტემბრის თვისათვის... მაზრის უფროსმა მძევლები არ მიიღო და მოითხოვა მთელი სოფელი მასთან გამოცხადებულიყო კალაში. ეს მოთხოვნა ხალდელებმა დაუყოვნებლივ შეასრულეს, მაგრამ, როდესაც ისინი ხელისუფლების წარმომადგენლებს მიუახლოვდნენ და ნახეს, რომ შახუბათის ნაცვლად მისი ბავშვები იყვნენ დაპატიმრებული, შეშინდნენ და უკან დაბრუნდნენ. მათ კვალდაკვალ გაპყვა რაზმი, რომელმაც ხალდეში შესვლისთანავე სოფელს ალყა შემოარტყა. ამან მთელ სოფელს უდიდესი შიშის ზარი დასცა, მით უმეტეს, რომ მაიორის ბრძანებით ხიშტზე იქნა წამოგებული ორი უდანაშაულო კაცი“¹.

მეფის მოხელეები ცდილობდნენ სამხედრო-საველე სასამართლოზე საქმის ნამდვილი არსი მიეჩქმალათ და ყველაფერი ყალბ ჩვენებებზე აეგოთ. სასამართლო პროცესზე საზოგადოებრიობის თვალის ასახვევად მეფის მოხელეები ცდილო-

¹ საისტორიო მოამბე, I, გვ. 194; ქართული სასამართლო მკვლევარ-ტყველება, გვ. 66—67.

ბდნენ დაემტკიცებინათ, რომ შეტაკება ორი ხალხის მიერ
ჯარისკაცების ხანჯლებით დაჭრას მოჰყვა. რაკი ბრალდებულ-
თა ბედის გადაწყვეტაში ამ საქმეს უდიდესი მნიშვნელობა
ენიჭებოდა და სამხედრო-საველე სასამართლოს ამ ფაქტის
პირუკუ წარმოდგენით ბრალდებულთა ფიზიკური მოსპობა
სურდა, ადვოკატებმა, კერძოდ, ა. წერეთელმა სცადა საქმის
ნამდვილი არსი სააშკარაოზე გამოეტანა: „მე საჭიროდ მიმა-
ჩნია, განვმარტო საკითხი — უწინ ჯარისკაცებმა ააგეს სვა-
ნები ხიშტებზე, თუ სვანებმა დაჭრეს ჯარისკაცები. ერთი
მხრივ, — განაცხადა ა. წერეთელმა, — ჩვენ გვაქვს ბრალდებ-
ულთა ჩვენებები, რომლებიც მიუხედავად მოსალოდნელი
საშიშროებისა, აღიარებენ ყველაფერს, რაც ჩაიდინეს და აი
სწორედ ისინი აღნიშნავენ, რომ სვანები ჯარისკაცებისაგან
პირველად იქნენ აგებული ხიშტებზე. ამასვე ადასტურებს,
თარჯიმანი ბაქრაძეც. მეორე მხრივ სახეზეა ბრალდების მოწ-
მეთა ჩვენებები, რომლებიც უფრო იმას ცდილობენ, რომ თა-
ვიანთი დამსახურება გვიჩვენონ. მაგალითად, პევენევის სიტყ-
ვით, მაიორმა ლეუსმა ბრძანა დაეკავებინათ ორი სვანი, რომ-
ლებმაც კოშკში ვერ შეასწრეს, რადგან კარები დაკეტილი და-
ხვდათ. მისივე ჩვენებით ერთ-ერთი მათგანი თითქოს გარე
კედელზე ჩამოკიდებულ თოფს მისწვდა, თითქოს იგი მხარზე
გადაიგდო და კოტლიაროვს მივარდა, თითქოს ამ უკანასკნელ-
მა მას ხელი შემოხვია, ხელები დაუკავა და მანამდე არ გაუ-
შვა, ვიდრე მოწინააღმდეგემ იგი ხანჯლით არ დაჭრა. ეს ჩვე-
ნება, — განაგრძო ა. წერეთელმა — მე ყალბად მიმაჩნია.
თოფს არავინ, და მით უმეტეს სვანი, გარეთ კედელზე არ
ჰკიდებს. თუ სვანი მართლაც მისწვდა თოფს კოტლიაროვზე
თავდასხმისათვის, მაშინ მას რათ დასჭირდებოდა თოფის
მხარზე გადადება? უკეთუ სვანი შებოჭილი იყო კოტლიარო-
ვისაგან, რომელსაც მისი ორივე ხელი ეჭირა, რომელი ხელით
მოახერხა მან ხანჯლის ამოღება და ხმარება? რაც შეეხება
ჯარისკაც პევენევის მიერ სასამართლოში წარმოთქმულ ჩვე-
ნებას, იგი ეწინააღმდეგება მის მიერ წინასწარ გამოძიების
დროს მიცემულ ჩვენებას. წინასწარი გამოძიებისას მან უჩვენ-
ა, — დასძინა ა. წერეთელმა, — რომ კოშკებიდან სვანებმა
სროლა მხოლოდ მას შემდეგ დაიწყეს, როცა ორივე სვანი

შკედარი დაეცა, ახლა კი საწინააღმდეგოს დამტკიცებას ცდილობს. მე კი ვფიქრობ უფრო დამაჯერებელი პირველი ჩვენებაა, რადგან მოწმეს უფრო ემახსოვრებოდა მაშინ, როდესაც შემთხვევა ახალი მომხდარი იყო... ერთი კი ცხადია, — დაასკვნა ა. წერეთელმა, — სვანებმა სროლა დაიწყეს არა შურისძიების ნიადაგზე, არამედ იმის შიშით, რომ დანარჩენებს მთელი ოჯახებით იგივე უბედურება მოელოდათ“¹.

სასამართლო პროცესზე ა. წერეთელი შეეხო საქმის ე. წ. ფორმალურ მხარესაც, რომ ბრალდებულებს პასუხისმგებლობისაგან ვერ იხსნის კანონების უცოდინარობა და რომ ისინი ვალდებული იყვნენ დამორჩილებოდნენ ხელისუფლების ყოველგვარ ბრძანებას, თუნდაც კანონის საწინააღმდეგოს. ამასთანავე ირონიულად დასძინა, რომ ხელისუფლების წინააღმდეგ აუცილებელი მოგერიება დაუშვებელია: „ამ თვალსაზრისით სვანებს, რომლებსაც ხიშტებზე აგებდნენ, — განაცხადა ა. წერეთელმა, — არავითარი წინააღმდეგობა არ უნდა გაეწიათ და მათ უფლება ჰქონდათ მაიორ ლეუსის ბრძანება გაესაჩივრებინათ... სვანებს არ უნდა აეტეხათ სროლა მილიციისათვის, რომელიც ორი დღის განმავლობაში სდევნიდა მათ მთებში და ტყვიას უშენდა“².

ამრიგად, თავის შესანიშნავ დაცვით სიტყვაში ა. წერეთელმა ცხადყო სვანეთში თვითმპყრობელობის სამოქალაქო და სამხედრო მოხელეთა თვითებობასა და ძალადობასთან დაკავშირებული მრავალი ფაქტი. აჩვენა, რომ ხალდეს სისხლიანი ტრაგედია სხვა არაფერი იყო, თუ არა მთავრობის მოხელეთა უკანონო მოქმედების ლოგიკური შედეგი.

დასასრულს ა. წერეთელმა სამხედრო-საველე სასამართლოს წინაშე იშუამდგომლა, რომ ბრალდებულ ხალდელებისთვის სამხედრო დადგენილებათა კრებულის XXIV წიგნის 1234-მუხლი შეეფარდებინა და სამართალში მიცემულთა სასჯელის შემსუბუქებაზე ან სრულ პატიებაზე მთავარსარდლის (იგივე მეფისნაცვლის) წინაშე ეშუამდგომლა: „ამით თქვენ შეძლებთ კანონის სიმტკიცე შეუთავსოთ სამართლიანობისა

¹ საისტორიო მოამბე, I, გვ. 194-195; ქართული სასამართლო მკვლევარ-მეტყველება, გვ. 67-68.

² იქვე, გვ. 68-69.

და ჰუმანურობის გრძნობას, მით უმეტეს, რომ ამ მუხლის გამოყენებას ფართო სარბიელი აქვს მოცემული უმაღლესი გამოთქმით — სიმართლე და შეწყალება სუფევდეს სასამართლოში“¹.

✓ სამხედრო-საჯელე სასამართლო პროცესზე მესამე დამცველად წარდგა ადვოკატი დავით ლორთქიფანიძე. მან საფუძვლიანად გააანალიზა ა. წერეთლისა და ლ. ლოლუას დაცვითი გამოსვლები, რომლებიც ცხადყოფენ სასამართლო პროცესის პოლიტიკურ მნიშვნელობას, ბრალდებულთა ბედზე მთელი საქართველოს მოწინავე საზოგადოებრიობის ზრუნვას, ააშკარავედნენ მეფის მოხელეთა დანაშაულებრივ ძალმომრეობას სვანეთში და, კერძოდ, ხალდეში.

დ. ლორთქიფანიძემ ყურადღება გაამახვილა სასამართლო პროცესზე წარმოდგენილ ყალბ საბუთებზე, მათ შორის ლეჩხუმის მაზრის მომრიგებელი მოსამართლის თანაშემწე ორბელის, ასევე მაზრის უფროსის, განსვენებული გრინევსკის ადრინდელ მოხსენებებზე.

დამცველ დ. ლორთქიფანიძის განცხადებით, სასამართლოზე წარდგენილი საბუთების არსის გარკვევას დიდი მნიშვნელობა ჰქონდა შეიარაღებული შეტაკების მიზეზების დასადგენად და ამდენად ბრალდებულთა ბედის გადასაქრელად: „უკეთუ ხელისუფლების პირთა მიერ შესრულებული იყო ყველაფერი, რასაც კი კანონი მოითხოვდა, და ყველა მოთხოვნა წაყენებული იყო სათანადო წესით, მაშინ ექვს გარეშეა, რომ ბრალდებულებს შეეძლოთ მიხვედრილიყვნენ, რომ სოფელ ხალდეში რაზმის მისვლის ერთადერთი მიზანი — ორი დამნაშავის დაპატიმრება იყო. მაგრამ თუ ამის მსგავსი არაფერი გაკეთებულა, მაშინ ექვსგარეშეა, რომ ხალდელებს არ შეიძლება არ ეგრძნოთ საშინელი საფრთხის მოახლოება“².

სასამართლო პროცესზე დ. ლორთქიფანიძემ ცხადყო, აგრეთვე იმ ბრალდების უსაფუძვლობა, რომ თითქოს პოლიციას მიეღოს მომრიგებელი მოსამართლის ბარათი, რომ ხალ-

1 ქართული სასამართლო მკვერმეტყველება, გვ. 69—70.

2 საისტორიო მოამბე, გვ. 196; ქართული სასამართლო მკვერმეტყველება, გვ. 70.

დეში გაყოლოდა სასამართლო აღმასრულებელს ორი დამნაშავის დასაპატიმრებლად. როგორც ჩანს, ასეთი საბუთი (რომელიც საბრალმდებლო საქმეებში იყო და სასამართლოზე ფიგურირებდა) გამოძიებამ მხოლოდ ხალდეს ამბების შემდეგ შექმნა. პოლიციას საერთოდ არ უცდია ბოქაულს წაყოლოდა ხალდეში (სამხედრო რაზმის მონაწილეობის გარეშე იქ წასვლაზე მტკიცე უარი განაცხადა). ეს იმას ნიშნავს, დასძინა დამცველმა, რომ მათ შეგნებულად აარიდეს თავი საქმის მშვიდობიან მოწესრიგებას და წინასწარ მოამზადეს ყოველივე: „საჭირო იყო, — განაცხადა დ. ლორთქიფანიძემ, — რომ ჯერ ცდილიყვნენ, ხოლო შემდეგ, დაუმორჩილებლობის შექთხევეაში, აქტი შეედგინათ და საქმისათვის კანონიერი მსვლელობა მიეცათ, მაგრამ განა სამსჯავრო გამოძიებისას თვითონ თავადმა თენგიზ დადიშქელაანმა არ თქვა თქვენს წინაშე, რომ ხელისუფლების მხრივ არ იყო გაკეთებული არც ერთი ცდა მშვიდობიანი გზით მიეღწიათ დადებითი შედეგისათვის და, რომ ეგრეთწოდებული ენერგიული ღონისძიებები ერთბაშად მიიღეს“¹.

ბოლოს დამცველმა დაასკვნა, რომ სვანეთში ხელისუფლებამ თავისებურ ხერხს მიმართა. მან ყოველგვარი კანონისათვის გვერდის ავლით ხალდეს წინააღმდეგ სამხედრო ძალა წაიყვანა, რამაც სოფლის მოსახლეობის კანონიერი აღშფოთება გამოიწვია. ნაცვლად იმისა, აღნიშნა დ. ლორთქიფანიძემ, რომ ადმინისტრაციას თავის დროზე ოფიციალურად და წერილობით ეცნობებინა ხელისუფლების მოთხოვნის შესრულება, ხალდელებს მხოლოდ სამხედრო რაზმის მოახლოებისას უცხადებენ გურმაჩი და ჩარგაზი წარედგინათ. ისინი პასუხობენ, რომ ეს პირები სოფელში არ იმყოფებოდნენ. „რა საფუძველი ჰქონდა ხელისუფლებას ამ განცხადებისათვის არ დაეჯერებინა? განა ასეთი მოთხოვნით უწინ უფროსებმა ერთხელ მაინც მიმართეს ხალდელებს? მაშ ხელისუფალთ საიდან შეეძლო ხალდელთა ცრუობის დასკვნა გამოეტანა? ახლა, ამ სასამართლოზე ხომ დადგენილ იქნა, რომ ხალდელები სიმართლეს ამბობდნენ, რომ არც ჩარგაზი და არც გურმაჩი პირ-

¹ საისტორიო მოამბე, 1, გვ. 197; ქართული სასამართლო მკვლევარ-ტყველება, გვ. 72.

ველ აგვისტოს, როცა რაზმი მივიდა, სოფელში არ იმყოფებოდნენ. ამ განცხადების მიუხედავად მაზრის უფროსმა მაინც უბრძანა მცხოვრებლებს — აუცილებლად წარედგინათ გურმაჩი და ჩარგაზი, თორემ იგი მათ მკაცრად მოექცეოდა. განა მაზრის უფროსს ასეთი მოთხოვნისა და მუქარის უფლება ჰქონდა? მე თავს ვიკავებ ამგვარი მოქმედების შეფასებისაგან, მაგრამ სასამართლომ ეს თვითონ უნდა განსაჯოს“¹.

შემდეგ განაგრძო: „ლესის რაზმით გამოცხადებამ გააკვირვა, განაცვიფრა და შეაძრწუნა სვანები. მათ წინააღმდეგობის გაწევის არავითარი სურვილი არ ჰქონდათ, თუ რაზმთან მიახლოებაზე უარი თქვეს, ეს მხოლოდ და მხოლოდ დაპატიმრების შიშით. მათ თვალწინ იყო ხელისუფალთა უკანონო მოქმედების — აშკარა უსამართლობის მაგალითი — შახუბათ ქურდიანის მაგიერ შვილების დაპატიმრების ფაქტი. მე არ მაქვს არც უფლება და არც სურვილი ხელისუფლების პირებს შევეხო, — დასძინა დამცველმა, — მაგრამ უფლება მაქვს და მოვალეც ვარ მათ მოქმედებას და განკარგულებებს შევეხო. მამის დაპატიმრების სურვილით მაზრის უფროსი იქერს და თოკით ბოჭავს შვილებს, თუმცა კარგად იცის, რომ ისინი უდანაშაულონი არიან. ასეთი აღმაშფოთებელი მოქმედების გამო განა ხალდელებს არ ჰქონდათ საფუძველი ეფიქრათ, რომ მათაც ასევე მოექცეოდნენ. აქ გამორკვეული ხელისუფალთა ყველა განკარგულება და მოქმედება ამტკიცებს, რომ ხალდელთა შიში საფუძვლიანი იყო. სოფელ ხალდეს მცხოვრებლებს არ შეიძლება არ დაბადებოდათ ასეთი შიში, როცა მათთან ლესის რაზმი მივიდა“².

„მუქარა იმას ნიშნავდა, განაგრძობს დ. ლორთქიფანიძე, რომ გურმაჩი გასვიანისა და ჩარგაზ ჯოხაძის წარუდგენლობის შემთხვევაში ჯარი იარაღს აიღებდა და მცხოვრებლებს დაერეოდა. ის აზრი, რომ ჯარისკაცები ყველა მათგანს ამოწყვეტდა, არ შეიძლება ხალდელებს არ დაბადებოდათ, ეს დასტურდებოდა ლესის პირველივე განკარგულებით; ამიტომ, რო-

1 საისტორიო მოამბე, I, გვ. 198.

2 იქვე.

გორც ითქვა, ყოველივე, რაც მოხდა, მხოლოდ შიშით აიხსნება“¹.

სამოქალაქო მმართველებისა და სამხედრო ხელმძღვანელების ძალმომრეობის გამოაშკარავების შემდეგ დამცველმა დ. ლორთქიფანიძემ სასამართლოს განუცხადა, რომ ხალდეს მცხოვრებლები იძულებული იყვნენ იარაღისათვის მოეყიდათ ხელი და თავი დაეცვათ: „დაინახეს რა ხალდელებმა, რომ პირველი მსხვერპლი გეგი და გიორგი გასვიანები დაეცნენ, დარწმუნდნენ, რომ მათ მთლიანი ამოწყვეტის საფრთხე ემუქრებოდათ, ამიტომ იარაღი აიღეს და თავდაცვა დაიწყეს“².

ბრალდებულთა მოქმედების ამდაგვარი გამართლების შემდეგ დ. ლორთქიფანიძემ ყველა დამცველის სახელით განაცხადა: „...ჩვენ გთხოვთ, რომ სასამართლომ ყველა თავისი უფლებამოსილება ამოწუროს, სამართალში მიცემულთა ბედი შეამსუბუქოს იმ ფარგლებში, რაც სასამართლოს აქვს მინიჭებული და შემდეგ დიდი მთავრის — კავკასიის არმიის მთავარსარდლის წინაშე იშუამდგომლოს სამართალში მიცემულთა შებრალება და შეწყალება“³.

ბრალდებულთა მეოთხე დამცველმა დ რო ბ ი შ ე ვ მ ა ყურადღება გაამახვილა სვანთა ცხოვრების მძიმე პირობებზე, აგრეთვე მათი ადათ-წესის ზოგიერთ თავისებურებაზე და ხაზი გაუსვა შეიარაღებული შეტაკების გამომწვევ მიზეზებს. ერთ-ერთ ასეთად მან მიიჩნია მთელი სოფლის გაიგივება ჯურმაჩთან და ჩარგაზთან, ამ ორი უკანასკნელის გაქცევას გამო მთელი სოფლის მასთან გამოცხადება. „რატომ მოითხოვა მან ეს, რისთვის დასჭირდა მას ყველა ხალდელი თავის ოჯახით, ვერაფერი გამიგია და არც ახსნა შემიძლია. მას ყველა შესაძლებლობა ჰქონდა სოფელ ხალდეში წასულიყო და იქ მოეთხოვა ჯურმაჩის და ჩარგაზის ჩაბარება. ხალდელებმა იგი თავაზიანად და მორჩილად მიიღეს, სამასპინძლოდ მოემზადნენ, მაგრამ იხვეწებოდნენ, სამხედრო ნაწილი, რომელსაც

1 საისტორიო მოამბე 1, გვ. 198—199; ქართული სასამართლო მკვერ-მეტყველება, გვ. 74.

2 იქვე.

3 იქვე, გვ. 198—199; გვ. 74.

თოკები, წერაქვები, ძალაყინები და დენთი მიჰქონდა, სოფელში არ შესულიყო. ხალდელები დაპირდნენ გურმაჩისა და ჩარგაზის ჩაბარებას, ოღონდ სექტემბრამდე ვადის გაგრძელებას ითხოვდნენ. ამ თხოვნაზე გრინევსკიმ არაფერი უპასუხა და მისი დაკმაყოფილება არ ისურვა. გრინევსკი რომ ამაზე დათანხმებულიყო, ადვილი შესაძლებელია ყველაფერი მშვიდობიანად, სისხლისღვრის გარეშე დამთავრებულიყო. მაგრამ ამას მაიორმა ლეუსმა ენერგიული ზომების მიღებით შეუშალა ხელი. რაზმის პირველი მსხვერპლი გახდა გეგი და გიერგი გასვიანები — ორი უდანაშაულო სვანი. ყოველივე ამის გამო და, აგრეთვე თქმულიდან გამომდინარე, დაცვის მხარისთვის ნათელია, რომ ამ გარემოებებს არ შეიძლება ხალდელები აეძულებინა დანაშაული ჩაედინათ. შექმნილ ვითარებაში მათ არ შეეძლოთ უკეთესი გამოსავალი ეპოვნათ. სწორედ ამიტომ თვლიან თავს სრულიად უდანაშაულოდ და მართლად¹.

ადმინისტრაციისა და სამხედრო ასეულის დანაშაულებრივი მოქმედების მხილების შემდეგ, დრობიშევმა დასძინა: იმისათვის, რათა შეიცინო, რაც ბრალდებულებმა გადაიტანეს და ჯეროვნად შეაფასო მომხდარი ამბები, საკმარისი არ არის ყოველივეს მართო ოფიციალური თვალით უმზირო².

დამცველი შეეხო მცირეწლოვან ბრალდებულებსაც. მისი სიტყვით, ისინი შეტაკების დროს, მართალია, მშობლებთან იყვნენ, თუმცა დანაშაული არ ჩაუდენიათ. ამიტომ მოითხოვს მათ განთავისუფლებას.

დაბოლოს, დამცველმა მხარი დაუჭირა კოლეგებს და ბრალდებულთა შეწყალება და სასჯელის შემსუბუქება მოითხოვა.

დამცველთა ბრწყინვალე გამოსვლებით თავზარდაცემული სამხედრო პროკურორი ხელმეორედ გამოვიდა. მან სცადა აჯანყებულთა წინააღმდეგ მოქმედ მოხელეთა გამართლება, მაგრამ პროკურორმა ვერ მოახერხა ხელისუფლების წარმომადგენელთა და სამხედრო ასეულის მიერ ჩადენილი ბოროტმოქმედების გაქარწყლება. იგი იძულებული გახდა გვერდი

¹ საისტორიო მოამბე, I, გვ. 199.

² იქვე, გვ. 200—201.

აქცია იმ ფაქტებისათვის, რომლებიც დამცველთა დასაბუთებული მტკიცებით ადმინისტრაციისა და ასეულის უკანონო მოქმედებაზე ღალადებდნენ.

დამცველებმა დ. ლორთქიფანიძემ და ლ. ლოლუამ საბოლოო გამოსვლებში კვლავ წინა პლანზე წამოსწიეს საკითხები, რომელთაც, მათი აზრით, განსაკუთრებული მნიშვნელობა ჰქონდათ ბრალდებულთა ხვედრის შესამსუბუქებლად.

დ. ლორთქიფანიძემ განაცხადა, რომ ადმინისტრაციისა და სამხედრო ასეულის ხალდეში შესვლის მომენტში გურმაჩი და ჩარვაზი შინ არ იმყოფებოდნენ და არავის არ ჰქონდა უფლება მათი დაპატიმრება სოფლისათვის დაეკისრებინა. ამასთან დაკავშირებით პროკურორის უკმაყოფილო რეპლიკაზე — რომ ყველაფერი ხალდელების მოქმედებამ გამოიწვიაო, დ. ლორთქიფანიძემ უპასუხა: „ჩვენ არ ვამტკიცებთ იმას, რომ ხელმძღვანელობამ მთელი ეს ისტორია განგებ გამოიწვია... ჩვენ მხოლოდ იმას ვამტკიცებთ, რომ საქმის მთელი ვითარებიდან და ყველა განკარგულებიდან გამომდინარე ხალდელებს მართლა შეეძლოთ ეფიქრათ, რომ ხელმძღვანელობას მათი ამოწყვეტა სურდა“¹.


ლ. ლოლუამ კი კვლავ ხაზგასმით აღნიშნა, რომ ხელისუფლებამ საქმის მშვიდობიანად მოსაწესრიგებლად არაფერი მოიმოქმედა, რომ მაზრის უფროსმა მეტისმეტი ახირება და წინდაუხედაობა გამოიჩინა. დამცველმა თქვა: „ჩემთვის საკმარისია ის, რომ ხელისუფლების არაკანონიერმა მოთხოვნამ მთელი სოფელი შეაკავშირა და მისი მცხოვრებლები გურმაჩისა და ჩარვაზის სოლიდარული გახადა, ჩემთვის საკმარისია ისიც, რომ გიერგა და გეგი გასვლიანები ხიშტებზე ააგეს. ჩემში ცოტაოდენ ეჭვსაც კი არ იწვევს ის, რომ ყველაფერი ეს ძალადობრივი მოქმედებაა. რა უნდა ეფიქრა დანარჩენ მოსახლეობას, როდესაც მათ დაინახეს ხიშტებზე აგებული გეამები — მათ სროლა დაიწყეს“².

აღსანიშნავია ნ. ნიკოლაძის უდიდესი ღვაწლი — ხანგრძლივი და ენერგიული ზრუნვა სვანეთის აჯანყების შეპყრობილ

¹ საისტორიო მოამბე, I, გვ. 203.

² იქვე.

მონაწილეთა დასაცავად სასამართლო პროცესზე, ასევე სასამართლო პროცესის ჩანაწერები, აგრეთვე მსჯავრდადებულთა „ფიზიონომების“ ნიკოლაძისეული წერილობითი აღწერილობანი და გრაფიკული ჩანახატები*.



გურმაჩ გასვიანი

ჩარგაზ ჯოხაძე

სამხედრო პროკურორმა საბოლოო გამოსვლაში სრულებით ხელყო სასამართლო პროცესზე დადგენილი ფაქტები და სამართლიანობა. მისი კვალიფიკაციით, აჯანყებულებმა უდიდესი სახელმწიფოებრივი დანაშაული ჩაიდინეს. ასეთი ცალმხრივი განსჯით, ბრალმდებელმა ხალდელების უმკაცრესი დასჯა მოითხოვა.

* იხ. კ. მარქსის სახ. რესპუბლიკურ ბიბლიოთეკაში დაცული ნ. ნიკოლაძის პირადი არქივი, საქმე — „Судебная хроника“, რომელშიაც აჯანყებულთა სასამართლო პროცესის სხვა მასალებთან ერთად ინახება ნ. ნიკოლაძის ხელით დაწერილი ზოგიერთი ბრალდებულის „ფიზიკურა დახასიათება“ („Физиономии“).

პატიმრობის უმკაცრესმა რეჟიმმა, წინასწარი ძიებისას და სასამართლო პროცესზე წაყენებულმა უმძიმესმა ბრალდებებმა ვერ გატენა ხალღელთა მტკიცე ნებისყოფა. მათ თავი ვაუკაცურად ექირათ, არა თუ ერთმანეთს ადანაშაულებდნენ, არამედ ერთმანეთს ექომაგებოდნენ.

ხუთი დღის სასამართლო პროცესის შემდეგ — 1 დეკემბერს სამხედრო-საველე სასამართლომ 22 კაცს სხვადასხვა, მძიმე სასჯელი გამოუტანა და მისი საბოლოო დამტკიცება იშუამდგომლა. ქუთაისის სამხედრო-საველე სასამართლოს განაჩენი კავკასიის „ოლქის“ მთავარსარდალმა 1877 წლის 8 იანვარს განიხილა და დაამტკიცა. საბოლოო განაჩენით ხალღეს აჯანყების მონაწილე 22 პირს შემდეგი სასჯელები მიეცათ: 35 წლის გურმაჩ ბექას ძე გასვიანს, 55 წლის ბუგა ივანეს ძე გასვიანს, 40 წლის საპო ბექაის ძე გასვიანს, 37 წლის ჯონან გიორგის ძე ჯონაძეს — ქონებაზე ყოველგვარი უფლების აღკვეთა, გადასახლება და მალაროებში მუდმივი საკატორლო მუშაობა.

50 წლის ბელა გეგის ძე გასვიანს — ქონებაზე ყოველგვარი უფლების აღკვეთა, გადასახლება და მალაროებში 20 წლით საკატორლო მუშაობა.

28 წლის ბადრი ბექას ძე გასვიანს, 18 წლის შახან კაციანეს ძე გასვიანს, 28 წლის კაციანე ბექას ძე გასვიანს, 40 წლის გეგი ბიტის ძე ჩოფლიანს, 35 წლის ჩარგაზ გიერგის ძე ჯონაძეს, 25 წლის ჩოფა გუას ძე ჩოფლიანს, 34 წლის მომი დათის ძე ჩეგვიანს, 25 წლის ხეჩლუ ბელას ძე ჩეგვიანს, 32 წლის გუა გიორგის ძე ჩეგვიანს, 28 წლის ლემინ ბადის ძე ჯონაძეს, 20 წლის ბესი კაციანეს ძე გასვიანს, 35 წლის გიორგი გიორგის ძე ჩოფლიანს — ქონებაზე ყოველგვარი უფლების აღკვეთა, ციმბირის შედარებით ახლო ადგილზე სამუდამო გადასახლება.

62 წლის თაზი აბრამის ძე ჯონაძეს, 40 წლის ზურაბ ბადის ძე ჯონაძეს, 41 წლის ერმინე გუეას ძე ჩოფლიანს, გიორგი თაზის ძე ჩოფლიანს (რომელიც 70 წლის მოხუცი იყო და ავადმყოფობის გამო სასამართლო პროცესზე არ ესწრებოდა) — გადასახლება იმპერიის რომელიმე სამხრეთ გუბერნიაში.

ზურაბ გეგის ძე გასვიანს (რომელიც, აგრეთვე მოხუცი-

ბულობისა და ავადმყოფობის გამო სასამართლო პროცესს (როგორც ვხედავთ) — გადასახლება ციმბირის რომელიმე ახლო მხარეში.

დამტკიცდა სასამართლოს გადაწყვეტილება — აჯანყებულებისადმი ჩამორთმეული იარაღის, როგორც კონფისკაციაქმნილის, არტილერიის უწყებისათვის ჩაბარება.

დამტკიცდა აგრეთვე სამხედრო-საველე სასამართლოს დადგენილება — სოფელ ხალდეში ცხოვრების აკრძალვაზე და ხალდეს სახელის ახალი — იფრალის სახელწოდებით შეცვლის თაობაზე.

ამრიგად, საქართველოს ფართო საზოგადოებრიობის მხარდაჭერით, მისი მოწინავე წარმომადგენლების თავგამოდების წყალობით მეფის სამხედრო-საველე სასამართლომ და კავკასიის არმიის სარდლობამ ვერ გაბედა სვანეთის შეიარაღებული აჯანყების მონაწილეთა სიკვდილით დასჯა, გენერალ ციტოვიჩის სამხედრო ექსპედიციის მიერ მიწასთან გასწორებულ სოფ. ხალდეს მცხოვრებ ყველა მამაკაცს სამხედრო-საველე სასამართლომ სამუდამო კატორღა ან გადასახლება მიუხაჯა.

ნათესავეებში გახიზნულ ხალდელ ქალებს, მოხუცებულებსა და მცირეწლოვან ბავშვებს, რომლებიც მარჩენალის, სახლ-კარისა და ლუქმაპურის გარეშე დარჩნენ, სოფელში დაბრუნება და დასახლება აეკრძალათ. საარსებო საშუალებას გარეშე დარჩენილი უმწეო ხალდელები იძულებული გახდნენ გარდაფხაძეებს ან ნათესავეებს შეხიზნებოდნენ.

ასე ტრაგიკულად დამთავრდა სვანეთის ულამაზესი სოფლის ხალდეს ისტორია. მიუხედავად იმისა, რომ კატორღიდან და გადასახლებიდან მხოლოდ ორი ადამიანი — ჩოფა ჩოფლიანი და მომი ჩეგიანი — დაბრუნდა, ხალდემ საბოლოოდ მარცხ არ შეწყვიტა არსებობა. ტრაგედიიდან ხუთი წლისთავეზე ყოფილ სოფელში ერთადერთი ქოხი დაიდგა, შემდეგ კი თანდათან განაშენიანდა.

ხალდეს სისხლიანი ტრაგედია ფართოდ აისახა სვანურ ზეპირსიტყვიერებაშიც. შეითხზა მრავალი მოთხრობა და ლეგენდა. შეიქმნა სიმღერები, რომლებიც დიდების შარავანდით მოსავენ ლეგენდარულ ხალდელ ვაჟაკებს.

დიდებულად და შთამბეჭდავად უღერს ხალდელთა გმი-
რობის სადიდებელი ჰიმნი — სიმღერა გაულ-გავზე¹:

მიჯვრიშ ზაგარ რუსიშ ლაშგარ
ჩუ ლუზორლის, მიჯვრიშ ზაგარ
ჩუ ლუზორლის ლეჩხვამა ვარგალ,
იეზირალდახ ჯალდემ ჯაცას.
უი ლაღსაქმეხ ჯალდემ ჯაცა.
ძღედს იშაღლდახ ჯალდემ დეაქარ,
ჩიდ ხოჩად გურმაჩ ი ჯოხან:
ესეაი ხაფშედეხ, თხუმს ხატყეცდახ,
თხუმს ხაქყერიდახ,
ლჯცას შუდახ...
ფაყვარს ბოფშარ კალაშ იტხერდახ.

გაულ-გავზე (გაღმა გავიხედე)
მიჯვრიშის მთაზე რუსის ლაშქარი
შეკრებილა, მიჯვრიშის მთაზე
შეკრებილა ლეჩხუმის აზნაურობაც,
თათბირობდნენ ხალდეს დაქცევაზე.
მოისაქმეს ხალდეს დაქცევა.
ძლიერ იბრძოდნენ ხალდეს ვაეკაცეპი,
ყველაზე მარჯვედ გურმაჩი და ჯოხანი:
ვისაც ესეროდნენ, თავში ურტყამდნენ
თავსა სჭრიდნენ,
წყალში ყრიდნენ...
ქულები კალის ბავშვებს მდინარიდან
გამოჰქონდათ.

¹ იხ. სვანური პოეზია, I, თბილისი, 1939, გვ. 62—63.

„ვარგისა“ და „გლახის“ საკითხისათვის

სვანეთის შუა საუკუნეების საზოგადოების სოციალური დაყოფის გამომხატველი ტერმინების — „ვარგი“, „ფუსდი“ (გაბატონებული წოდება), „ფამლი“, „ქორსმერდე“, „ლღდინა-ნე“, „ლაჯიირ“, „ხასა“ და „ჯალჩი“ (გლეხთა კატეგორიები), — შინაარსი ისტორიულ ლიტერატურაში ცნობილია*.

ცნობილია, რომ ესა თუ ის საზოგადოებრივი წყობა და ურთიერთობა ერთიმეორისაგან წარმოების წესის ბუნებით განსხვავდება. ფეოდალური წყობილებისა და ურთიერთობის ხასიათი, პირველ რიგში წარმოების მთავარი საშუალების — მიწის საკუთრებისა და მფლობელობის შინაარსისა და ფორ-

* უკანასკნელი ორი ტერმინის ჩვენებურ განმარტება: ა. რობაქიძე არ იზიარებს, თუმცა არც მის საწინააღმდეგო მოსაზრებაა აყენებს. თავის დროზე „ტასა“ ჩვენ მონა მხევალს დავუკავშირეთ და ფეოდალურ საზოგადოებასთან მიმართებაში იგი განვმარტეთ როგორც შინაყმა (მოახლე, მსახური) ქალი. „ჯალჩი“ კი დავუკავშირეთ დასავლეთ საქართველოში გავრცელებულ გლეხთა კატეგორიას — „მოჯალახეს“ (იხ. ვ. გასვიანი, დასავლეთ საქართველოს მთიანეთის ისტორიიდან, თბ., 1973, გვ. 28).

სხვათა შორის, „ჯალჩი“ ჩრდ. კავკასიის სინამდვილეშიც გვხვდება. იქ ამ ტერმინის ცნებაში პრივილეგირებული წოდების — პირველხარისხოვანი „უორკის“ ტერმინის მზიდავი (დამტარებელი) გლეხთა კატეგორია იგულისხმება.

ცნობილია, რომ ადრე სვანეთის „ვარგის“ ადილეთურ „უორკის“ უკავშირებდნენ და იქაურის მიბაძვად მიიჩნევდნენ, რაც მცდარი აღმოჩნდა. ვარგი, როგორც პრივილეგირებული ფენა, ძველ ქართულ წყაროებში ჯერ კიდევ XI საუკუნეშია ფიქსირებული, ხოლო შუა საუკუნეების სვანეთში „ვარგის“, როგორც პრივილეგირებული წოდების წარმომადგენლის არსებობას წერილობითი საბუთები ადასტურებენ.

მის მიხედვით დგინდება. ამდენად, იმისათვის, რომ სვანეთის შუა საუკუნეების საზოგადოებრივი წყობილებისა და ურთიერთობის შინაარსი დაეადგინოთ, აუცილებელია მისი მიწისმფლობელობის ფორმასა და ხასიათში გავერკვეთ. მართალია, საამისოდ უხვი და მრავალფეროვანი მასალა არ არსებობს. მაგრამ XI საუკუნიდან მოყოლებული (განსაკუთრებით XIV—XV საუკუნეების) სვანეთზე მოგვეპოვება წერილობითი დოკუმენტური წყაროები, რომლებიც საზოგადოების სოციალურ-ეკონომიკური სტრუქტურის დადგენის საშუალებას იძლევა.

სვანეთის შუა საუკუნეების სოციალურ-ეკონომიკურ წყობილებაზე ადრეც ვიმსჯელებთ და იმ დასკვნამდე მივედით, რომ აქ ფეოდალური ურთიერთობა ბატონობდა, რომ იქ მიწისმფლობელობის სხვადასხვა ფორმა არსებობდა, სახელდობრ, — ფეოდალური (საერო და საეკლესიო), გლეხური და სოფლურ-კოლექტიური (თემური)¹.

ფეოდალური ეპოქის სვანეთიც კავკასიის მთიანეთში შედის და მისი მოსახლეობის სოციალურ-ეკონომიკური სტრუქტურის საკითხი სადავოა. ზოგიერთი მკვლევარი კავკასიის მთელ მთიანეთს ერთი საზომით უდგება და ირწმუნება, რომ შუა საუკუნეებში კავკასიის მთელ მთიანეთში მიწის კოლექტიურ-განუყოფელი (თემურ-გვაროვნული) მფლობელობა ბატონობდა და რომ სვანეთიც ამ რეგიონში შედიოდა. აღნიშნუ-

სახელწოდება „ვარკი“ მომდინარეობს ვარგისიდან, კარგიდან და სენურში აზნაურის წოდებას შეესაბამება. მას საერთო არაფერი აქვს თუნდაც სომხურ „ვარკ“-თან და „ბარ“-თან (როგორც ამას ზოგიერთი ავტორი მიიჩნევდა).

ამასთანავე, როდესაც „ხასას“ თუ „ჯალჩის“ მნიშვნელობას შევხებით, ჩვენ ამ ტერმინების სადაურობა და ენათმეცნიერული ანალიზი კი არ გვიანტერესებდა, არამედ მათი სოციალური შინაარსი და სვანური გაცემა (ისე როგორც აზნაურის წოდების ძიებისას მთავარია მისი სოციალური შინაარსის გაგება და არა ამ ტერმინის სადაურობა).

ვინც სვანეთის სინამდვილეს იცნობს, ის ვერ იღავებს იმაზე, რომ ტერმინი „ჯალჩი“ და „ხასა“ სვანეთში ცოცხლობენ და გლეხთა მღაბიო კატეგორიას გამოხატავენ.

¹ იხ. გ. გასვიანი, დასავლეთ საქართველოს მთიანეთი, ისტორიიდან, გვ. 76—111.

ლი გარემოების გათვალისწინებით მოცემული საკითხი კვლავაც საგანგებო ყურადღებას იმსახურებს.

ჩვენ არ გამოვუდგებით მიწის მფლობელობაზე ზოგად, თეორიულ მსჯელობას, რადგან ამით საკითხი ვერ გადაიჭრება. შევეხებით კონკრეტულ წყაროებს, რომლებიც სვანეთის მიწისმფლობელობის სტრუქტურის ხასიათსა და შინაარსს ასახავენ.

ერთი „დაწერილი“, რომელიც XIV საუკუნის მეორე ნახევრით არის დათარიღებული, გვაუწყებს ქურდიანსა და ივანე სეტიელს შორის მიწით ვაჭრობის ფაქტს: „ესე დაწერილი ნიშანი ვაჭრობისა და მკვიდრად ნასყიდობისა, მტკიცე და უქცეველი, ყოვლისა მიზეზისა უმიზეზო, და გიწერეთ და მოგეცით შენ სეტიელსა ივანეს და შენსა შვილთა და მომავალთა ჩვენ ქურდიანმან... ჩვენთა შვილთა და მომავალთა, მას უამსა, ოდეს ჩვენგან ყანაი გქონდა ჯანგარაშს. მერმე ავიღე თქვენგან ფასი სრული, რომელსაც შეუჭერდი“¹. აქვე ნათქვამია, რომ ქურდიანმა სეტიელს მიწა მიჰყიდა „სამამულოდ — ყოვლისა კაცისაგან უცილობლად“.

აქ ჩანს არა მარტო მიწით ვაჭრობა, არამედ ისიც, რომ მიწას ყიდის და ყიდულობს არა თემი თუ გვარი, არამედ კერძო ოჯახები.

მეორე „დაწერილში“, რომელიც იმავე ხანას განეკუთვნება, ნათქვამია: „ქ. ესე დაწერილი სყიდულობისა და გიწერე და მოგაკსენე მე, ჯაფარისძემან კახაბერმან და ჩემმან ძმამან ქურსიკ... შენ სეტიელსა და შენთა შვილთა... მას უამსა, ოდეს ლემოშხაში მოგყიდე. ავიღე შენგან ფასი სრული, რომლითა დავეჭერდი. ღმერთმან გიბედნიეროს მკვიდრად და სამამულოდ, ყოვლისა კაცისაგან უცილებლად, გინდა გაჰყიდე, გაამზოთვე, გინდა გასცვალე, რაი გინდა უყავი, ჩემი სასარჩლოი იმა ყანასა შიგან არა დამრჩომია“...².

ნასყიდობის ამ დოკუმენტიდანაც ჩანს, რომ მიწას ჯაფარისძის ოჯახი განაგებდა, რომ მიწა მის მკვიდრ, სამამუ-

¹ პ. ინგოროყვას პუბლიკაცია, სვანეთის საისტორიო ძეგლები, ნაკვ. II, 1941, გვ. 84.

² იქვე, გვ. 78 (ხაზგასმა ჩვენია — გ. გ.).

ლო დ = უცილობელ ქონებას შეადგენდა. ირკვევა, რომ მიწა ყიდვა-გაყიდვის, გამზითვებისა და გაცვლის საგანს წარმოადგენდა.

როგორც ვხედავთ, არც ამ შემთხვევაში გვაქვს საქმე მიწის თემურ-კოლექტიურ-განუყოფელ მფლობელობასთან.

მესამე „დაწერილში“, რომელიც იმავე ხანას განეკუთვნება და ქარდანისა და სეტიელის სახელებს შორის გარიგებას ეხება, ნათქვამია: „ქ. ესე დაწერილი სყიდულობისა, დაგინწერე და მოგეცი მე ქარდანმან სარგის და ფარცმან და ჩუენტა მომავალთა შენ სეტიელსა და შენთა შვილთა ივანეს და მიქელს, მას უამსა, ოდეს ლაკაილას ყანაი მოგყიდე, ავიღე შენგან ფასი სრული, რომლითა შევჭერდი. ღმერთმან გიბედნიეროს მკვიდრად, სამამულოდ ჩემგან და ყოლა კაცისაგან უცილებლად“¹.

აქაც პირდაპირ დასტურდება, რომ მიწას ყიდის და ყიდულობს კერძო მფლობელი, რომ მიწის ყიდვა-გაყიდვა თემზე და გვარზე არ იყო დამოკიდებული, მიწას, როგორც საკუთარ ქონებას, კერძო ოჯახი ყიდდა და ყიდულობდა.

მეოთხე საბუთში, რომელიც ჯათარიძისა და სეტიელის ოჯახებს შორის მიწის მკვიდრად ნასყიდობას ასახავს, ვკითხულობთ: „დაგინწერეთ და მოგაკსენეთ დაწერილი ესე ვაჭრობისა და მკვიდრად ნასყიდობისა, თქვენ სეტიელსა ივანეს, შენსა შვილსა დემეტრეს, თქვენთა შვილთა და მომავალთა, ჩვენ ჯათარიძეთა ჩარგას, ვეშაგ, არლუნ და ჩვენთა შვილთა და მომავალთა... მას უამსა, ოდეს შენსა სასახლეს ზემოთ მუშკიდიანსა ყანაი ჰქონდა ჩვენგან... მათგან ჩვენ დავიკსენით, დამოწმებითა თქვენ მოგყიდეთ, ავიღეთ თქვენგან ფასი სრული, რასაცა შევჭერდით. გინდა გაჰყიდე, გინდა გასცვალე, გინდა დაესახლე... რაი გინდა უყაფ, გიბედნიეროს ღმერთმან მკვიდრად და სამამულოდ, ყოულისა კაცისაგან უცილობლად და უვალალოდ“². აქაც დასტურდება, რომ

¹ ქ. ინგოროყვას პუბლიკაცია, სვანეთის საისტორიო ძეგლები, ნაკვ. 11, გვ. 79.

² იქვე, გვ. 83.

დასახელებული ჯაფარიძის ოჯახი მიწის უშუალო განმკარგულებელია.

სახნავი მიწის ყიდვა-გაყიდვაზე, ე. ი. მიწის კერძო საკუთრების არსებობაზე, სხვა მსგავსი საბუთებიც მოგვეპოვება, თუმცა ჩამოთვლილიდანაც აშკარად ჩანს, რომ სახნავი მიწა კერძო საკუთრებას შეადგენდა.

როგორც ვხედავთ, სეტის მკვიდრი ჯაფარიძეები მიწის მესაკუთრეები და მისი უშუალო განმკარგულებლები იყვნენ. ცხადი ხდება, რომ მიწის ასეთივე მესაკუთრე იყო სეტიელი (სეტიელი ცაიშელის, ცაგერელის მსგავსი სამღვდლო პირი იყო, სეტიელები ფალღანებიდან მომდინარეობენ და სეტის საქორეპისკოპოსოს განაგებდნენ), რომელიც მიუხედავად არა-ახნაურული ჩამომავლობისა, მემამულე იყო.

ანალოგიური წერილობითი საბუთები მოგვეპოვება სათიბის ნასყიდობაზე. ერთ „გადაწყვეტილებაში“, რომელიც გუარამიანისა და სეტიელს შორის გარიგებას ასახავს, აღნიშნულია, რომ „ქუბისა მუქაფად ათას ხუთასად ქორულდაშის სათიბი დაგიდევინა“¹.

XIV საუკუნის მეორე ნახევრის მეორე საბუთი ქოჩორიანსა და სეტიელს შორის სათიბის ნასყიდობას ეხება: „ქ. ესე დაწერილი და ნიშანი ვაჭრობისაი და მკვიდრად ნასყიდისა დაგიწერეთ და მოგაქსენეთ შენ სეტიელსა ივანეს და შენსა შვილსა დემეტრეს, მისთა შვილთა და მომავალთა ჩვენ მოძმე ქოჩორიანთა სირმონ და გიორგი და მისთა შვილთა მტკიცე და უქცეველი... მას უამსა ოდეს ქვაჩხანსა სათიბი მოგყიდეთ... ავიდეთ შენგან ფასისრული, რომლითა შეუჯერდით. გიბედნიეროს ღმერთმან, ვითა მკვიდრად ნასყიდსა ჰმართებს ჰაგრე, ყოულისა კაცისაგან უცილობლად და უვალალოდ“².

აქაც დგინდება, რომ (სახნავი მიწის მსგავსად) სათიბი მიწაც ყიდვა-გაყიდვის, გაჩუქებისა და გამზითვების საგანს შეადგენდა*.

¹ 3. ინგოროყვა, პუბლიკაცია, სვანეთის საისტორიო ძეგლები, ნაკ. II გვ. 82.

² იქვე, გვ. 84.

* მიუხედავად სხვადასხვა გვარეულობისა და სოფლის ინდივიდუალურ

მიწის საკუთრების უტყუარი მაჩვენებელია კერძო ოჯახები. მიერ ეკლესიისადმი მიწის შეწირვა. ერთ საბუთში ასახულია ბენდე და მარიამ ვანთახვიანების მიერ სეტის (მესტიის) მთავარმოწამის ეკლესიისადმი მამულისა და სხვა ქონების შეწირვის ფაქტი: „...მას ჟამსა, ოდეს ჩემითა ნებითა მთავარმოწამე სეტისა და ერთობილი კევი გვიშვილე — და გათუალე ჩემი სახლი, მამულ-ეკლესიანი, ტყე და ველი, მთა და ბარი, უძრავი და მოძრავი, უძებარი და საძებარი, ყოულისა კაცისაგან უცილობლად...“¹.

როგორც ვხედავთ, ეს საბუთი არა მარტო ფორმით, არამედ შინაარსითაც შეესატყვისება ბარის სათანადო საბუთებს. მასში კარგადაა ასახული სვანეთის საზოგადოების ეკონომიკური წყობა. მიუხედავად მწირი და მთიანი მდებარეობისა, სვანეთში ცხოვრობდნენ ისეთი გვარეულობები თუ კერძო ოჯახები, რომლებიც პირადი საკუთრების უფლებით არა მარტო სახნავ-სათიბ მიწას და ტყეს, არამედ ეკლესიასაც განაგებდნენ. ესეც იმის უდავო მაჩვენებელია, რომ სვანეთში კერძო საკუთრება ზატონობდა.

XV საუკუნის სხვა საბუთში ასახულია ივანე და სერგო გელოვანთა მიერ ლაპილის (ლატილის თემი) მთავარანგელოზის ეკლესიისადმი თავის თავის და ორი ადგილ-მამულის შეწირვა.

მიწაზე კერძო საკუთრებისა და მფლობელობის ფაქტს ასახავს ლაპილის სოფლის „საერთობრო“ რომელშიც ნათქვამია: „ვისაც გარეგანისა კაცისა მოვმარება გამოვაჩინოთ, ანუ იდუმალ და ანუ ცხადად, ანუ მთასა და ანუ ბარსა, რა იც უკეთესი ყანაი ედვას იმა კაცსა, პატიჯად და გუ...“

ოჯახთა უპირატესად აზნაურთა და საეკლესიო პირთა მიერ მიწით ვაჭრობაზე ასეთი უტყუარი წერილობითი საბუთების არსებობისა, ეთნოგრაფი მ. ჩართოლანი მაინც ირწმუნება: „...მიწის გასხვისება — გაყიდვა მას (ოჯახს-გ. გ.) თემის ფარგლებს გარეთ არ შეეძლო. ამ მხრივ თემი შეუვალი იყო“, თითქოს „ოჯახი შეზღუდული იყო აგრეთვე მოგვარებისაგანაც. ამ უკანასკნელის დაუკითხავად ოჯახს მიწის გაყიდვის უფლება არ ჰქონდა“ (იხ. კრებული — სვანეთი, თბილისი, 1879, გვ. 104). ასეთი მოსაზრების დასამტკიცებლად მარტო სურვილი და სხვა ეთნოგრაფის დამოწმება არ კმარა, მით უფრო, ზემოვანხილული და სხვა წერილობითი წყაროები ამას არაფრით ადასტურებენ.

¹ იქვე, გვ. 67.

ოც, მთაქარანგელოზისათვის შემოგუიწი-
რავეს“¹.

აქაც და სხვა ანალოგიურ საბუთებშიც ჩანს, რომ მიწის უშუალო განმკარგებელი ეკლესიაც იყო, რომ ოჯახისათვის მიწის ჩამორთმევა უდიდეს სასჯელს წარმოადგენდა. მოცემული საბუთიც იმაზე მიგვანიშნებს, რომ თემი განუყოფელ და საერთო სახნავ-სათიბ მიწას არ ფლობდა. ამას ადასტურებს დადგენილების მუქარა: დამნაშავე ოჯახს რომ მიწა ჩამოერთმევა, ეკლესიას გადაეცემა.

ჩამოთვლილთან ერთად სვანეთში მიწის კერძო და სამამულო მიწისმფლობელობაზე შემოგვეჩანა სხვა საბუთებიც, რომლებშიც ასახულია აგრეთვე მიწის ყიდვა-გაყიდვის ფაქტები და მისი ფულადი გამოსახულება.

მიწის კერძო მესაკუთრეებად სვანეთში პირველ რიგში გვევლინებიან ჩარკვიანები, დადიშქელიანები, რიჩგვიანები, ყიფიანები, გელოვანები, ქურდიანები, იოსელიანები, ვახთანგვიანები, ჯაფარიძეები, ყორყოლიანები და სხვ., რომლებიც პრივილეგირებულ გვარეულობებს შეადგენდნენ. ნიშანდობლივია ისიც, რომ ჩვენამდე მოღწეული მიწის ნასყიდობის საბუთები სწორედ პრივილეგირებული გვარის ოჯახებს ეკუთვნოდა და არა გლეხებს, რაც, ბუნებრივია, იმის დადასტურებაა, რომ მიწის უშუალო მესაკუთრე და განმკარგებელი აზნაურები („ვაჩგები“) და აგრეთვე, ეკლესიები იყვნენ, ხოლო მიწის მფლობელი (სარგებლობის და იშვიათად საკუთრების უფლებფ) — გლეხები.

შესაძლებელია მაღალმთიან სვანეთში მიწის კერძო საკუთრებასა და ვაჭრობაზე. ისევე როგორც მის ფულად ღირებულებაზე, მსჯელობა ვინმეს გაზვიადებულად მოეჩვენოს, ან ის იქ. კაპიტალისტური ურთიერთობის არსებობის დამტკიცების მცდელობად მიიჩნიოს (ისე როგორც გლეხთა გამოსვლებზე და აზნაურთა უფლებების შეზღუდვაზე მსჯელობა ბურჟუაზიული რევოლუციის მსგავსი მოვლენის მტკიცებად), მაგრამ ეს ყოველად უსაფუძვლო ასოციაცია იქნებოდა, რადგან, ჯერ ერთი, მიწის კერძო საკუთრებასა და მიწის ყიდვა-გაყიდვას ფეოდა-

¹ პ. ინგოროყვას პუბლიკაცია, სვანეთის საისტორიო ძეგლები, ნაკვ. 11, 1941, გვ. 6—7.

სა აქეთ, ყველასა ქვე დავადებინეთ, ვინცა ფასითა არ დაიქსნის...“¹.

ამ საბუთში პირდაპირ არაა მითითებული, თუ სოფლის მიწა, რომელიც წყლის ორივე მხარეს მდებარეობდა, რა მიწა იყო; ძნელია იმის გაგებაც, თუ რას ნიშნავს: „ვინცა ფასითა არ დაიქსნის“. სამაგიეროდ, საბუთიდან ნათლად ჩანს, რომ სეტის ოთხი გვარეულობიდან ჯაფარიძეები ერთ მხარეზე დგანან, ხოლო დანარჩენი სამი (ხერგიანები, საგულვებელია აგრეთვე ჩართოლანები და ფალიანები) — მეორეზე.

სამაგიეროდ, იმავე დროის მეორე „დაწერილში“, რომელიც „პატრონი ჯაფარიძის“ სახელითაა გაფორმებული და იმავე საკითხს ეხება, კარგად ჩანს, რომ სოფელი საერთო საბალახო ადგილს ფლობდა: „დაგიწერეთ და მოგაქსენეთ დაწერილი ესე, მტკიცე და უქცეველი, მე ჯაფარიძემან პირნათელ*, ჩემთა შვილთა დოდილ და ივანე, ჩემთა შვილთა და მომავალთა, ყველათა. თქვენ სეტისა სოფელსა, მას ჟამსა, ოდეს ბალყაჩერას** დავიცილენით. მერმე მოუყარეთ მართალნი ფიცებული მოურავნი და ბალყაჩერისა ჭალაი თქვენ დაგრჩათ ყე, და ნაჭირვალისა მუქათა მე გამიჩინეთ და მომეცით“².

ირკვევა, რომ ჯაფარიძეებს სურდათ თემის საბალახო ადგილის დასაკუთრება. როგორც ჩანს, მათ უვარგისი სასოფლო მიწა დაამუშავეს, მაგრამ მათ ცდას — მთელი საბალახო მიწა მიეთვისებინათ — მთელი თემი აღუდგა, მაგრამ მიწის ვარგისად გადაქცევის გამო თემი იძულებული გამხდარა ნაჭირვალის (პრომის) სამაგიეროდ ჯაფარიძეებისათვის გარკვეული ნაწილი მაინც დაეთმო (აღსანიშნავია, რომ სადავო მიწის უდიდესი ნაწილი ჯაფარიძეებმა საბოლოოდ მაინც დაისაკუთრეს).

საისტორიო წყაროებიდან ჩანს, რომ სვანეთში საერთო საძოვარ-საბალახოს განუყოფელი სასოფლო მფლობელობა ჯერ კიდევ ადრე განიცდიდა კრიზისს, მაგრამ მფლობელობის

¹ ვ. ინგოროყვას პუბლიკაცია, სვანეთის საისტორიო ძეგლები, ნაკვ. 11, გვ. 25.

* პირნათელ ჯაფარიძე სეტის ხევისთავი (ხევისარი) იყო.

** ბალყაჩერი ადგილმდებარეობის სახელწოდებაა (ტოპონიმი). ბალყაჩ — თხმელას ნიშნავს. ბალყაჩერის ჭალა რიყიან-ბუჩქნარი საბალახოა და მესტიის მდინარეს ეკვრის.

² იქვე, გვ. 25.

ეს ფორმა, როგორც ახალი ვითარების გაელენის შატარებელი გადმონაშთი, გვიან დრომდე შემორჩა.

უნდა ითქვას, რომ საძოვარ-საბალახო მიწის კოლექტიური მფლობელობა დამახასიათებელია არა მარტო მთისთვის, არამედ ხშირად ბარისთვისაც. მაგალითად, როგორც განვითარებულ, აგრეთვე ნაგვიანევი ფეოდალიზმის ხანაში ბარის საქართველოში არც თუ იშვიათად საძოვარ-საბალახო ადგილები საერთო-სასოფლო მფლობელობაში იყო. მფლობელობის აღნიშნული ფორმა არსებობდა რუსეთსა და დასავლეთ ევროპაში, სადაც კლასიკური ფეოდალიზმი არსებობდა.

კიდევ მეტი, კ. მარქსმა მთელი მიწის კოლექტიურ-თემური მფლობელობის პირობებშიც კი შესაძლებლად მიიჩნია ფეოდალიზმის ბატონობა (აღმოსავლური-მომთაბარული ფეოდალიზმი). მაგალითად, ცხვარზე კერძო საკუთრება კ. მარქსს აღმოსავლეთში მიწის (საძოვრის) კერძო საკუთრების ატრიბუტად მიაჩნდა¹.

ფ. ენგელსი გერმანიისა და მეზობელი ქვეყნების საადგილმამულო ურთიერთობაზე დაკვირვებისას შენიშნავდა, რომ იქ გვიან შუასაუკუნეებშიც კი ერთიმეორის გვერდით საკუთრებისა და მფლობელობის სხვადასხვა ფორმა არსებობდა, რომ გერმანიაში, კერძოდ, ბევარიის რეინში ფეოდალიზმის ბატონობისას მიწათმოწყობის უძველესმა წესმა — მარკის ფორმით (სახნავ-სათიბი მიწის კოლექტიური მფლობელობისა და პერიოდული გადანაწილების სახით) XIX საუკუნის დასაწყისამდე გაძლო, ხოლო ტყე და საძოვარ-საბალახო კვლავ საერთო მფლობელობაში დარჩა².

მთასა თუ ბარში მიწისმფლობელობის ფორმისა და საკუთრების გარკვევაში უდიდესი მნიშვნელობა აქვს აგრეთვე ფ. ენგელსის მითითებას იმის თაობაზე, რომ, მაგალითად, გერმანიაში მიწის კერძო დაპატრონება მთიან და ვიწრობიან ხეობებში უფრო ადრე დაიწყო, ვიდრე გაშლილ ბარ ადგილებში³.

¹ К. Маркс, Формы, предшествующие капиталистическому производству, Журн. «Пролетарская революция», № 3, Госполитиздат, 1939, стр. 165.

² ფ. ენგელსი, გლეხთა ომი გერმანიაში, თბილისი, 1932, გვ. 164—166.

³ იქვე, გვ. 165.

ამა თუ იმ საზოგადოებრივ-ეკონომიკური წყობილების არსებითი ნიშნების დახასიათებისას კ. მარქსმა ხაზგასმით აღნიშნა: ესა თუ ის ფორმაცია სუფთა სახის — ერთფეროვანი არ არის, რომ თითოეული ქვეყნის ამა თუ იმ საზოგადოებრივ-ეკონომიკურ წყობას თავისებურება ახასიათებდა: „ერთსა და იმავე ეკონომიურ ბაზისს — ერთსა და იმავე მთავარი პირობების მიხედვით — უთვალავ სხვადასხვა ემპირიულ გარემოებათა, ბუნებრივ პირობათა, ... გარედან მოქმედ ისტორიულ გავლენათა და სხვათა მეოხებით შეუძლია თავის გამოვლენისას ისეთი დაუსრულებელი ვარიაციები და გრადაციები გვიჩვენოს, რომელთა გაგებაც მხოლოდ ემპირიულად მოცემულ გარემოებათა ანალიზის საშუალებით შეიძლება“¹.

ვ. ი. ლენინი შენიშნავდა, რომ „...ეპოქა სხვადასხვაგვარ მოვლენათა ჯამია, რომელშიც ტიპიურის გარდა მუდამ არის სხვაგვარი“².

ამრიგად, ამა თუ იმ საზოგადოებრივ-ეკონომიკურ ფორმაციას ძირითადის და განმსაზღვრელის გარდა, სხვა — არადა-მახასიათებელი და მეორეხარისხოვანი ნიშნებიც ახასიათებს. ასე იყო სვანეთშიც, სადაც, სახნავ-სათიბი მიწისა და ტყის კერძო საკუთრებასთან ერთად, საძოვარ-საბალახო მიწის სოფლურ-კოლექტიური მფლობელობაც არსებობდა.

ჩვენამდე მოღწეულ საისტორიო წყაროებში, ისევე როგორც მიწის საკუთრებისა და მფლობელობის ფორმა და შინაარსი, არეკლილია სვანეთის საზოგადოების სოციალური სტრუქტურა, მისი ტიპიური სახე და თავისებურებაც.

ერთ „დაწერილში“, რომელიც ჩვენთვის საინტერესო მესტიის ხიდის ეკლესიას (საყდარს) შეეხება, ნათქვამია: „ქ. მთავარ მოწამისა სეტისა თაუსდებობითა და შუვამდგომლობითა, ყოველთა სეტისა საყდართა და ეკლესიათა თაუსდებობითა და შუვამდგომლობითა, დავეწერეთ და დავედევით დაწერილი ესე, მტკიცე და უქცეველი... ჩუენ ჳევმან ერთობილმან მესტიისამან, ერთობითა დიდთა და მცირეთა, ვარგთა და გლეხთა, ყოველთა, ერთმანერთისა ნდომითა და დამოწ-

1 კ. მარქსი, კაპიტალი, ტ. 3, ნაწ. 11, 1959, გვ. 411—412.

2 ვ. ი. ლენინი, თხზ., ტ. 35, გვ. 232.

მეებითა, მას უამსა, ოდეს კიდსა ზედა ეკლესია ავაშენეთ. იგი ეკლესიისა და კიდისადა მთასა ვინცა რაცა შესცოდოს, ანუ სეტის შესაველსა შიგა ვინცა რაცა ვინ შესცოდოს, ერთისა ჯაფარიძისა და ანუ იოსელიანისა სისხლი მისითა სანაჯ შიროთა ეღვას მათა და სისხლად ვერჩოდეთ“¹.

ამ საბუთზე დაკვირვებაც კმარა იმისათვის, რომ სეტის საზოგადოების ორ ნაწილად — ვარგებად და გლეხებად დაყოფა დავინახოთ.

განსახილველ პერიოდში ასეთი საბუთის წერილობითი გაფორმება (ხელს აწერს 72 პირი) იმის დადასტურებაა, რომ სეტის თემის მთელი საზოგადოება აღიარებდა „ვარგთა“ და „გლეხთა“ ცალ-ცალკე არსებობას. „ვარგი“ და „გლეხი“ ერთიმეორისაგან რომ არ ყოფილიყო დიფერენცირებული, მათ რომ სეტის საზოგადოებაში თავიანთი ადგილი არ სჭეროდათ, მაშინ თემს არ მოუხდებოდა ვარგისა და გლეხის ცალ-ცალკე ფიქსირება. ვარგისა და გლეხის ცალ-ცალკე დასახელება იმის უდავო აღიარებაა, რომ საზოგადოების ეს ფენები თავისი ადგილით, უფლებებითა და ინტერესებით ერთიმეორისაგან განსხვავდებოდნენ.

ასეთი მტკიცების უდავო დამადასტურებელია დასახელებული საბუთის დასკვნაც, რომელიც ეკლესიის მკრეხელის ან სეტის მკვიდრთა ცხოვრების შეურაცხმყოფელის სასჯელს შეეხება. აქ ნათქვამია, რომ დამნაშავე დაისჯებოდა „ერთისა ჯაფარიძისა ანუ იოსელიანისა სისხლით — მისითა სანახ შიროთი“.

როგორც ცნობილია, ფეოდალური სამართალი მხოლოდ გაბატონებული კლასის (თუ წოდების) ინტერესებს ცნობდა და იცავდა. ფეოდალური სამართლით და ტრადიციით სეტის საზოგადოებაც სასჯელის საერთო საზომად გლეხის სისხლს კი არ დასახელებს, არამედ ვარგის, თანაც ფეოდალური წესის შესაბამისად „თავისი სანახ შიროთი“. ეს კი იმის მაჩვენებელია, რომ სეტის საზოგადოება ოფიციალურად (ხელმოწერით) აღიარებდა ვარგების (ჯაფარიძისა და იოსელიანის) უზენაესობას, მათი სისხლის უპირატესობას.

¹ სვანეთის საისტორიო ძეგლები, ნ. II, გვ. 53—54.

სხვა საბუთში, რომელიც აგრეთვე „ერთობილი სეტის სოფელს“ ეხება და „ქუეყნის სამაგრობელს“ წარმოადგენს, ნათქვამია: „ქ. სამება სკარეშისა და მთავარ მოწამისა სეტისა თავსდებობითა და შუამდგომლობითა დაუწერეთ და დაუდევით დაწერილი ესე მტეიცე და უქცეველი ჩვენ სეტისასოფელმან ყოველმან, ზ ე მ მ ა ნ და ქ ე ე მ მ ა ნ, ქვეყნისა სამაგრომელი: თუ ვინ მოგვიმაჯნოს, ანუ მთაი, ან ქალაი გაგვიტეხოს, ე რ თ ი ს ა ჯ ა ფ ა რ ი ძ ი ს ა ს ი ს ხ ლ ა დ ვ ე რ ჩ ო დ ე თ ჩ ვ ე ნ ი თ ა შ ე ძ ლ ე ზ ი თ ა“¹.

როგორც ვხედავთ, ამ შემთხვევაშიც თემი დამნაშავეს ვარგი ჯაფარიძის სისხლის საფასურის გადახდევინებით ემუქრება. ესეც იმის მოწმობაა, რომ ვარგის სისხლი საერთო საზომად იყო აღიარებული.

მოცემულ უკანასკნელ ორ საბუთში ყურადღებას იპყრობს აგრეთვე სიტყვები: „დიდთა და მცირეთა“, „ზემომან და ქვემომან“. ჩვენი დაკვირვებით, ეს სიტყვებიც საზოგადოების სოციალური დაყოფის და გათიშვის მაჩვენებელია, ასე ვთქვათ, საზოგადოების ორ სოციალურ წოდებად დაყოფის გამომხატველია. ამაში გვარწმუნებს არა მარტო ვარგისა და გლეხის მოხსენიება, არამედ ვარგის სისხლის საერთო აღიარება და, აგრეთვე, ამ საბუთების იგივე ხანის საქართველოს ბარის შესაბამის საბუთებთან შესატყვისობაც.

დავუშვათ და სიტყვები „დიდთა და მცირეთა“ სეტის მცხოვრებთა ასაკს გამოხატავენ, როგორც ეს ზოგიერთს ეჩვენება. მაშინ რას ნიშნავს იგივე საბუთებში მოხსენიებული „ზემომან და ქვემომან“? ამ შემთხვევაშიც ზოგიერთს ჰგონია, რომ ისინი გეოგრაფიული მდებარეობის ამსახველია. მაგრამ ამ ტერმინების შინაარსის ამდაგვარ გაგებას ეწინააღმდეგება ჩვენთვის ცნობილი ვარგისა და გლეხის, აგრეთვე ვარგის სისხლის ცალკე მოხსენიება და საერთოდ ამგვარი საბუთების გაფორმების ტრადიცია.

ამასთანავე, სეტის საზოგადოების დაყოფას ასახავს სხვა დაწერილიც („საერთობირო“), რომელშიც კვლავ წინა პლანზე არიან ჯაფარიძე, იოსელიანი და საყდრის შვილები. საბუთში,

¹ სვანეთის საისტორიო ძეგლები, ნ. 11, გვ. 43.

რომელსაც თანხმობისა და დამტკიცების ნიშნად 32 პირი აწერს ხელს, ვკითხულობთ: „ქ. მთავარ მოწმისა სეტისა თავსდებობითა და შუვამდგომლობითა, დაუწერეთ და დაუდევით დაწერილი ესე საერთო საერთპირო, ჩვენ ოთხმან თემმან, თ ა ვ ა დ ქ ე უ ი ს ა რ მ ა ნ ჯ ა ფ ა რ ი ძ ე მ ა ნ დ ა მ ი ს თ ა, ი ო ს ე ლ ი ა ნ მ ა ნ დ ა მ ი ს მ ა ნ კ ა ც მ ა ნ, მ თ ა ვ ა რ მ ო წ ა მ ი ს ა ს ა ყ დ რ ი ს ა შ ვ ი ლ მ ა ნ, ე რ თ ო ბ ყ ვ ე ლ ა მ ა ნ...“¹.

ჯაფარიძისა და იოსელიანის სახელდებით მოხსენიებასთან ერთად ამ საბუთიდან ჩანს, რომ სეტის ხელისუფალი ყოფილა ჯაფარიძე, რომელსაც ვარგობასთან ერთად ძალაუფლებაც ეკუთვნოდა. აღსანიშნავია, რომ ჯაფარიძეები და სხვა ვარგები მრავალ შემთხვევაში მელომედაც მოიხსენებიან. ხელისუფლების პყრობა კი ერთ-ერთი საშუალება იყო საზოგადოების სათავეში მოქცევისა. ყოველივე ეს იმაზე მეტყველებს, რომ სეტის საზოგადოებაში ვარგები „დიდნი“ და „ზემონი“ ყოფილან, ხოლო გლეხები „მცირენი“ და „ქვემონი“.

აღსანიშნავია, რომ „~~ვარგისა~~“ და „~~გლეხისაგან~~“ არა მარტო სეტის საზოგადოება შედგებოდა, არამედ მთელი სვანეთი, საბუთების ენით რომ ვთქვათ, — „სრულიად სვანეთის ქვეის“ ანუ „ერთობილი სვანეთის“ საზოგადოება ამგვარადვე იყოფოდა.

ერთ „დაწერილში“, რომელიც საკანონმდებლო ხასიათის დადგენილებას წარმოადგენს და „ქვეყნის სამაგრობელად“ იწოდება, ნათქვამია: „ქ. მთავარ მოწმისა სეტისა თავსდებობითა და შუვამდგომლობითა დაუწერეთ და დავდევით დაწერილი ესე სრულიად სვანეთისა ქვეისა ვუშქულსა და ლალვერსა შვა სამაგრობელი ჩვენ ერთობილმან ქვემან, ვარგმან და გლეხმან, უფროსმან და უმცროსმან, უზედაესმან, უქვემდაესმან, ყველამან...“².

საბუთიდან ჩანს, რომ სრულიად სვანეთის მოსახლეობა — უშგულსა და ლალვერს შორის „ვარგებისა“ და „გლეხებისაგან“ შედგებოდა და ამ დაყოფას სრულიად სვანეთის საკანონმდებლო დადგენილება ოფიციალურად აღიარებდა.

¹ სვანეთის საისტორიო ძეგლები, ნ. II, გვ. 43—44.

² იქვე, გვ. 5.

მთელი სვანეთის საზოგადოების „ვარგად“ და „გლეხად“, „დიდად და მცირედ“, „უფროსად და უმცროსად“, „უზედაესად და უქვედაესად“, დაყოფას სხვა მრავალი საბუთიც ადასტურებს.

საზოგადოების სხვადასხვა ნაწილებად გათიშვაზე მეტყველებს აგრეთვე სისხლის სხვადასხვა („ვარგის“, „საპატიო სვანის“, „საუკეთესო სვანის“ და სხვ.) კატეგორიად დაყოფა.

სეტის საზოგადოების სხვადასხვა ნაწილად დაყოფის თვალსაზრისით საინტერესოა „ლეჭრგესა“ და „ლეგლეხეს“ ცნებები და მათი ლოკალიზაცია. ზეპირსიტყვიერებაში დღემდე შემორჩა მესტიის ორ ნაწილად — „ლეურგედ“ („ლევარგე“ — სავარგე) და „ლეგლეხად“ დაყოფა.

სეტის იმ ნაწილს, სადაც ჭაფარიძეები სახლობდნენ და წმ. გიორგის ეკლესია (იგი თავდაპირველად იყო მონასტერი, რომელიც ორ კოშკთან და სხვა ნაგებობებთან ერთად დიდი გალავნით იყო შემოზღუდული) იდგა, „ლეურგე“ ეწოდებოდა. „ლეურგე“ მოიცავდა მესტიის ვაკობს (სადაც დღევანდელი მესტიის ცენტრია გაშენებული და ჭაფარიძეები ცხოვრობენ), ხოლო დღევანდელ ლეხთაგს და ლანჩვალის უდიდეს ნაწილს, სადაც ხერგიანები, ჩართოლანები, მუტვილიანები, მუშკუდიანები და სხვები სახლობდნენ — „ლეგლეხე“ ეწოდებოდა.

ყველაფერი ეს იმაზე მეტყველებს, რომ სვანეთის მოსახლეობა ორ ერთმანეთისაგან განსხვავებულ მთავარ ფენად იყო გათიშული და თითოეულ მათგანს თავისი ადგილი ეკავა.

წარმოადგენდა თუ არა „ვარგი“ პრივილეგიებულ და ექსპლოატატორულ სოციალურ წოდებას?

როგორც აღვნიშნეთ, წერილობით წყაროებში, მათ შორის იურიდიული ხასიათის საკანონმდებლო ძეგლებში, „გლეხთა“ და „ვარგთა“ მოხსენიება იმის დამადასტურებელია, რომ ისინი ერთმანეთისაგან განსხვავდებოდნენ.

საისტორიო წყაროებში პირდაპირ წერია, რომ „ვარგი“ საზოგადოების „უფროსი“, „უზედაესი“ და „საპატიო“ ნაწილი იყო, ხოლო „გლეხი“ „უმცროსი“ და „უქვედაესი“. სხვა მითითება რომ არ გაგვაჩნდეს შუა საუკუნეების სვანეთის საზოგადოების სოციალურ-წოდებრივი ურთიერთობის გაგებისათვის, ესეც საკმარისი იქნებოდა. მაგრამ, გარდა ამისა, ვარგ-

თა პრივილეგიებზე და მათ მიერ საზოგადოების სათავეში დგომაზე სხვა მრავალი ჩვენებაც მოგვეპოვება.

აქ ვერ გავარჩევთ ვარგის პრივილეგიების მაჩვენებელ ყველა საბუთს, მხოლოდ იმ საბუთების ნაწილს შევხებით, რომლებიც უშუალოდ მესტიელ ვარგებს შეეხება.

XV საუკუნის პირველი ნახევრის ერთ „დაწერილში“, რომელიც ვარგი ჯაფარიძეებსა და გლეხი ხერგიანების ურთიერთობას ასახავს, აღნიშნულია: „...თ უ ხ ე რ გ ი ა ნ ი ა ს ი მ ო ს ა ხ -
ლ ე ი ყ ო ს , ა მ ო რ ი ს ა კ ლ ა ვ ი ს მ ე ტ ი ა რ ა ჰ მ ა რ თ ე ბ -
დ ე ს ; რ ა ც ი ო ს ე ლ ი ა ნ ს ა და მ ა თ ყ მ ა თ ა ს ი გ ე ლ ი
უ დ ე ვ ს“¹.

ამ დოკუმენტში პირდაპირ არის მითითებული, რომ ხერგიანებს წელიწადში ორი მსხვილფეხა საკლავის გადახდის საუკუნო ვალდებულება ეკისრათ და ეს ვალდებულება იოსელიანების ყმათა სიგელის კვალობაზე ყოფილა განსაზღვრული. როგორი სურვილიც არ უნდა გვექონდეს, როგორც არ უნდა დავხუჭოთ თვალები, შეუძლებელია წინადადების — „ი ო ს ე ლ ი -
ა ნ ს ა და მ ა თ ყ მ ა თ ა ს ი გ ე ლ ი უ დ ე ვ ს“ — შინაარსი ვერ გავიგოთ და ეს არაფეოდალური ხასიათის ექსპლუატაციის დამადასტურებლად წარმოვადგინოთ. იგივე ჯაფარიძეები ხერგიანებს ჰპირდებოდნენ: თუ „ნებაყოფლობით“ არ იკისრებდნენ სხვა ვალდებულებას, საკლავების მეტს არაფერს მოსთხოვდნენ. თავის მხრივ, ჯაფარიძეები ხერგიანებს ჰპირდებოდნენ: „სადაცა გუახლდეთ, თქვენ არა ვისი ვარჩიოთ, რომე ჯ ა ფ ა -
რ ი ძ ე ყ მ ი ა ნ ა დ და ი კ ო ც ო ს მ ა შ ი ნ ც ა...“².

რომ არაფერი ვთქვათ ხერგიანების საუკუნო ვალდებულებაზე (რაც წერილობით იყო რეგლამენტირებული), განა აქ პირდაპირ არაა ნათქვამი, რომ ვარგ ჯაფარიძეებს (ისევე როგორც იოსელიანებს) სხვა ყმებიც ჰყოლიათ?!

მიუხედავად იმისა, რომ ჩამოთვლილი და სხვა წერილობითი წყაროები პირდაპირ მიუთითებენ სვანეთში და, კერძოდ, მესტიაში ვარგებსა და გლეხებს შორის ტრადიციულ (წერილობით გაფორმებულ) დამოკიდებულებით ურთიერთობაზე,

¹ სვანეთის საისტორიო ძეგლები, ნ. II, გვ. 15.

² იქვე, გვ. 16.

ზოგიერთი მკვლევარი მაინც ირწმუნება, რომ „ჩამოთვლილი გადასახადები — ფეოდალური გადასახადები არაა“, „ხსენებული სიგელი — ფეოდალური ურთიერთობის გამომხატველი სიგელი არაა“, „ხსენებული ყმა — ფეოდალურ ყმას არ ნიშნავს“ და ა. შ.

ასეთი მტკიცების გასაბათილებლად საკმარისია თუნდაც იგივე სეტის ჯაფარიძისადმი კუთვნილი ერთი „წიგნი“ წავიკითხოთ: „ღმრთისა დედისა თავსდებობითა და შუამდგომლობითა დაგიწერეთ ეს წიგნი ჩუენ მჯაფრიანმან ქელდიშ მუტვილიანსა და მის შვილებსა, ამა პირსა ზედა, რომე ერთი ცხუარი ბეგარა, ერთი მგზავრობა საჯამაგროს იყო, ერთი ხამი. სამი ნადობა — უკუნისამდე“¹. ეს „წიგნი“ თავის დროზე პ. ინგოროყვამ „საყმო გამოსალების“ საბუთად მიიჩნია. მას შემდეგ ამ საბუთს მრავალი მკვლევარი შეეხო, რამდენმა ექვის თვალით შეხედა, რაკი საქმე სვანეთის მთამალალს ეხება, ზოგიერთმაც საკუთარი სურვილით თუ მოძველებული კონცეფციის გავლენით ამ საბუთში ჩამოთვლილი ვალდებულებები ანგარიშში არ ჩააგდო. ფაქტი კი ის არის, რომ ამ საბუთში ასახულია ტიპური ფეოდალური ურთიერთობა: ქელდიშ მუტვილიანის ოჯახს ვარგი ჯაფარიძეებისადმი საუკუნო ვალდებულება ეკისრა: წელიწადში ერთი ცხვარი და ერთი ხამი (ნატურით გადასახადი) ეძლიათ, აგრეთვე ერთი მგზავრობა და სამი ნადობა (შრომითი ბეგარა) ეკისრათ.

მოცემული და სხვა მრავალი საბუთის არსებობის შემდეგ (ფეოდალური ვალდებულება საქართველოში უმეტეს შემთხვევაში წერილობით არც კი ფორმდებოდა, ან ვინ იცის თავის დროზე რამდენი ასეთი საბუთი გაფორმდა და ჩვენამდე რამდენმა ვერ მოაღწია) რანაირად და რა ლოგიკით შეიძლება იმის განცხადება, რომ თითქოსდა ბალსზემო სვანეთში ფეოდალური ურთიერთობა არ არსებობდა, ანდა გადასახადები რეგლამენტირებული და მტკიცედ განსაზღვრული არ იყო?!

ყურადღება რომ არ მივაქციოთ ჯაფარიძეებისადმი გლახთა ვალდებულებით-ფეოდალურ ურთიერთობას, განა იგივე სეტის ვარგი იოსელიანებისადმი გლახთა დაქვემდებარებისა

¹ სვანეთის საისტორიო ძეგლები, ნ. II, გვ. 16.

და ვალდებულებითი ურთიერთობის მაჩვენებელი არ არის „დაწერილი“, რომელშიც ვკითხულობთ: „ქ. მთავარ მოწამისა სეტისა თავსდებოზითა და შუვამდგომლობითა, დაგიწერეთ და გიბოძეთ დაწერილი ესე სამოკეთოი, ჩვენ იოსელიანთა უზბეგ და არღონ, თქუენ სეტელის... დემეტრეს, მტკიცე და უქცეველი, ყოვლისა მიზეზისაგან უმიზეზოი. უთუოი და უთუმციოი, აქაით და უკუნისამდე შეუცვალებელი, მას უამსა, ოდეს მოგინდა ჩუენთა ქელთა გლახად ყოფაი და ჩუენ წყალობაი გიმედეთ... არაი დაგაკლოთ, ვითა ჩუენსა გლახსა ეგრედ დაგადგეთ, თქვენი თავი საუსამართლოდ და სამაჯნოდ არავის მივანებოთ...“¹.

მართალია, აქ არ არის ჩამოთვლილი, თუ დემეტრეს ოჯახს რა ვალდებულება ეკისრა იოსელიანის მიმართ, მაგრამ, სამაგიეროდ, წერია, რომ დემეტრე ეყმო იოსელიანს, რომ დემეტრეს გლახად გახდომა იყო მტკიცე და უცვლელი — „აქაით და უკუნისამდე“, რომ იოსელიანმა ყმად გახდომის სამაგიეროდ. როგორც ეს წესი იყო, დემეტრეს წყალობა და მფარველობა აღუთქვა.

როგორც ვხედავთ, სეტის ვარგების მიერ გლახების დაქვემდებარებაში ახალი არაფერია. ისევე როგორც ყველგან. საქართველოს ბარში, რუსეთში და დასავლეთ ევროპაში, სვანეთის ვარგები გლახებსა და მათ მიწას ეპოტინებოდნენ მოხერხებით იქნებოდა ეს, დაპირებით, მუქარით თუ ძალდატანებით. ასეთ ვითარებაში მატერიალური დოვლათის მწარმოებელი მასა — თავისუფალი მიწათმფლობელიდან მეზეგრედ ან ყმად იქცეოდა.

ზემოაღნიშნული ვალდებულებითი სიგელის საფუძველზე უნდა დავძინოთ, რომ დემეტრეს ოჯახი იოსელიანების „ნებიერი გლახი“ იყო და მათი დამოკიდებულება მიწის კერძო საკუთრებით და პოლიტიკური მფარველობის აუცილებლობით იყო ნაკარნახევი.

ვფიქრობთ, სეტის (მესტიის) სინამდვილის ამსახველი ამ საბუთების არსებობის შემდეგ უხერხულიცაა იმის სერიოზუ-

¹ სვანეთის საისტორიო ძეგლები, ნ. 11, გვ. 14.

ლად მტკიცება, რომ ბალსზემო სვანეთში მხოლოდ თავისუფალი მეთემეები არსებობდნენ, ხოლო ბალსქვემოთ — „ვარგი“ და „გლეხი“. თითქოს ბალსზემო სვანეთის „ვარგები“ ე. წ. „ძლიერი გვარები“ რიგითი გვარებისაგან მხოლოდ გამიჯვნის პროცესში იყვნენ... თითქოს ტერმინები „ვარგი“ და „გლეხი“ „უფროსი“ და „უმცროსი“, „უზედაესი“ და „უქვედაესი“ ბალსზემო სვანეთში ბალსქვემოური დოკუმენტების კვალობაზე და მათი გავლენით იქმნებოდა!.

აქვე ხაზგასმით უნდა დავძინოთ, რომ როგორც ჩამოთვლილი, აგრეთვე დღემდე ცნობილი საბუთების აბსოლუტური უმრავლესობა, რომელშიც ფეოდალური დიფერენციაცია და კლასობრივი-წოდებრივი ურთიერთობა ანახული (ე. ი. „ვარგი და გლეხი“, „უზედაესი და უქვედაესი“, „უმცროსი და უფროსი“, „დიდი და პირველი“, „სიგელი“, „ყმა“, „ბეგარა“ და სხვა ცნებებია გამოსატული) ბალსზემო სვანეთს, ანუ ე. წ. თავისუფალ სვანეთს შეეხება, მის სინამდვილეს ანახავს და არა სვანეთის სხვა რომელიმე ნაწილისა.

ვარგებსა და გლეხებს შორის ურთიერთობა რომ ვალდებულებით ხასიათს ატარებდა, გლეხთა გადასახადები რომ წერილობით იყო რეგლამენტირებული, ვარგები რომ რიგითი გვარებისაგან მტკიცედ იყვნენ გამიჯნული, ეს სხვა წერილობითი საბუთებიდანაც ჩანს, მათ შორის ერთ ფრაგმენტში, რომელიც სეტს ანუ მესტიას ეხება, ნათქვამია: „ღმრთისა თავსდებობითა, კიდს იქით არა გთხოვო ერთი საკლავისაგან მეტი“².

მართალია, აქ არც პრივილეგირებული და არც დამოკიდებული პირი არ ჩანს, მაგრამ ცხადია, რომ საქმე ეხება გლეხის ვალდებულებას — წელიწადში ერთი მსხვილფეხა საკლავი ეხადა.

1 რ. ხარაძე, აღ. რობაქიძე, სვანეთის სოფელი ძველად, გვ. 96, 103, 104, 105 და სხვ.

2 სვანეთის საისტორიო ძეგლები, ნ. II, გვ. 16.

ვარგებისადმი გლახთა დამოკიდებულებას მოწმობს სვანეთის საისტორიო ძეგლებში არაერთგან ფიქსირებული ცნებები: „პატრონი ჩემი არღონ იოსელიანი“, „ოდის პატრონმან (ბატრონმან) გვილატეს ხერგიანთა“, „მებეგრე და ზეგარა“, „ერთად გლახად დაგუთვლია“, „პატრონი ჩვენნი პირნათელ და ჩარგას“ და სხვ.¹ ყოველივე ეს რომ ფეოდალურ ნომენკლატურას, საზოგადოების წოდებრივ დაყოფას და ურთიერთდამოკიდებულებას ასახავს, ამაში უკვე მესტიის მაგალითზე დაკვირვებამაც დაგვარწმუნა.

ვარგებსა და გლახებს შორის საუკუნო საბეგარო და საღალვალდებულებითი ურთიერთობის ამსახველ სხვა საბუთებზე მსჯელობა რომ არ გავაგრძელოთ, ვფიქრობთ, მოტანილი წერილობითი საბუთებიც საკმარისია იმისათვის, რომ ვარგი პრივილეგირებულ სოციალურ წოდებად — აზნაურებად მივიხსინოთ, სხვანაირად, ვარგი სხვა არაფერია, თუ არა აზნაურის სვანეთში დამკვიდრებული სახელწოდება.

როგორც ცნობილია, „ვარგი“ ჯერ კიდევ აღრინდელ ქართულ წყაროებში მოიხსენიება, კერძოდ, თამარ მეფის ისტორიაში. აქ ერთ ადგილას მოხსენებულ ვარგზე ივ. ჯავახიშვილმა შენიშნა, რომ იგი ჯერ კიდევ სოციალურ წოდებას არ უნდა გამოხატავდეს, მაგრამ, მისივე დასკვნით, „ვარგი“ უბრალო ყმა კი არა, არამედ ვარგი და საცნაური ყოფილა².

ვარგი გვხვდება იმავე თხზულების მეორე ადგილასაც. აქ ბასიანის ომში ქართველების გამარჯვებასთან დაკავშირებით „ვარგი“ წარმოდგენილია, როგორც „მეფისაგან შესწავლილი კაცი“³. საგულისხმოა ისიც, რომ აღნიშნულ ადგილას ვარგის გარდა უმაღლესი წოდების სხვა წარმომადგენელი არაა დასახელებული. იქიდან გამომდინარე, რომ ვარგი საცნაური და მეფისაგან შესწავლილი კაცი ყოფილა, ჩვენ იგი აზნაურთა წრიდან გამოსულ სამხედრო პირად მიგვაჩნია.

ვთქვათ, მოცემული თხზულების ამგვარი გაგება სადაეოა. ყოველ შემთხვევაში, სვანეთის „ვარგი“ მრავალმა გამოჩენილ-

1 სვანეთის საისტორიო ძეგლები, ნ. II, გვ. 15, 19, 96, 105.

2 ივ. ჯავახიშვილი, ქართული სამართლის ისტორია, წ. II, ნაწ. I, თბილისი, 1928, გვ. 40.

3 ისტორიანი და აზმანი შარაჟანდეთანი, კ. კეკელიძის გამოცემა, გვ. 128.

მა მკვლევარმა აზნაურად მიიჩნია. ასეთთა შორის იყვნენ: დიმიტრი ბაქრაძე, ექვთიმე თაყაიშვილი, სიმონ ჯანაშია, ივანე ჯავახიშვილი და სხვ.

ვარგს აზნაურად მიიჩნევდა რუს მკვლევართა უმრავლესობაც, რომლებიც ესოდენ აზვიადებდნენ გვაროვნული წყობილების არსებობას, ასევე მის გადმონაშთებს კავკასიის მთიანეთში. ეს მაშინ, როდესაც სათანადო საისტორიო წყაროები ჯერ გამოვლენილი ან ცნობილი არ იყო და სვანეთზე მსჯელობა უპირატესად პირადი დაკვირვების (თვალთ ნანახის) საფუძველზე წარმოებდა.

იმის მიუხედავად, რომ ჯერ კიდევ ბევრი რამ ცნობილი და ნათელი არ იყო, ივ. ჯავახიშვილმა შენიშნა, რომ სვანეთის ვარგები აზნაურებად იწოდებოდნენ. ამაზეც რომ არაფერი ვთქვათ, ჯავახიშვილი წერდა: „აზნაურობასა ქართველოსსახელმწიფოწოდებრივი წყობილებისსაერთომოვლენაიყო და აზნაურნი საქართველოსყოველთემსა და კუთხეში იყვნენ“¹.

მიუხედავად იმისა, რომ სათანადო საბუთები გამოვლენილ-შესწავლილი არ იყო, სვანური ფოლკლორის სპორადული მონაცემების გაცნობამ სიმონ ჯანაშიასათვის ცხადი გახდა, რომ მას ვარგზე ფრიად მნიშვნელოვანი დასკვნა გამოეტანა: „სვანური ვარგი უდრის ქართულ აზნაურს XII საუკუნის მნიშვნელობით“². ე. ი. ეს ის დრო იყო, როდესაც აზნაურთაგან თავადის წოდება არ იყო გამოყოფილი. მას შემდეგ, რაც თავადის წოდება შეიქმნა და ჩამოყალიბდა (ისე როგორც თავის დროზე აზნაურის), სვანურში მისი აღმნიშვნელი „ფუსლ“ ტერმინიც შეიქმნა.

ერთი სიტყვით, სვანეთში აზნაურის წოდების არსებობაზე და ვარგისა და აზნაურის ადექვატურობაზე მრავალი საბუთი მოგვეპოვება.

წერილობით წყაროებში, მათ შორის XI-XII საუკუნეების საეკლესიო წარწერებში, აზნაურის როგორც სვანეთის მკვიდრის მოხსენიება ა. რობაქიძემ უკანასკნელ გამოკვლევაში საექ-

¹ ივ. ჯავახიშვილი, ქართული სამართლის ისტორია, წ. II, ნ. I, 33-34.

² ს. ჯანაშია, შრომები, 111, 1959, გვ. 135.

ვოდ მიიჩნია. მისი განცხადებით, იფარისა და კალის თემების სამი ეკლესიიდან თითქოს მხოლოდ ერთი ეკლესიის წარწერაში გვხვდება ქართული აზნაური და, თითქოს, ისიც „აზნარტას“ („азнарта“) სახით. მოცემულ კონტექსტში მკვლევარი დასძენს: «Наличие двух различных и ясно выраженных социальных терминов в одном и том же историческом регионе в одно и то же время ставит под сомнение возможность их полного отождествления, как это делается в некоторых современных работах»¹.

საქმე იმაშია, რომ „ვარგისა“ და „აზნაურის“ იგივეობის უარყოფით ა. რობაქიძე საერთოდ ცდილობს უარყოს სვანეთის ბალსზემო ნაწილში აზნაურის წოდების არსებობაც.*

ისტორიული წერილობითი წყაროებიც რომ არ გაგვაჩნდეს, საკმარისია თუნდაც სხვადასხვა დროს გამოქვეყნებული სვანური ხალხური ფოლკლორის ნიმუშებს გავეცნოთ, რათა „ვარგისა“ და „აზნაურის“ ცნობების ზუსტი შესაბამისობა დავინახოთ².

სხვათა შორის, დასახელებული ეკლესიის წარწერებში „აზნარტა“ („азнарта“) კი არ წერია, არამედ „აზნაურთა“ (ერთ ეკლესიაში აღნიშნული ტერმინი სრულადაა წარმოდგენილი, მეორეში „ა...ურთა“, ხოლო მესამეში გამქრალია და პირველი ორის და აგრეთვე მოცემული ტექსტის შინაარსითაა ზუსტად აღდგენილი). საკვირველია, ჩვენს ავტორს რატომ გამოორჩა

¹ აკად. ნ. ბერძენიშვილის დაბადების 80 წლისთავისადმი მიძღვნილი კრებული — ძიებანი საქართველოსა და კავკასიის ისტორიიდან, თბილისი, 1976, გვ. 386.

* ასეთი არგუმენტით ვარგისა და აზნაურის იგივეობის უარყოფა მაინც შეუძლებელია, რადგან, ჯერ ერთი, ისინი ერთი და იმავე საბუთში ერთდროულად არ გვხვდებიან; მეორეც, არამც თუ სხვადასხვა, არამედ ერთი და იმავე ენაშიც არაერთი შემთხვევაა, როდესაც ერთი და იმავე წოდება სხვადასხვა ტერმინით გამოიხატება, მაგალითად, რუსულში „დვარიანინი“ და „პამეშჩიკი“, მაგრამ ეს იმას როდი ნიშნავს, რომ ერთი ან მეორე აზნაურის წოდებას არ გამოხატავს; მესამეც, აზნაურთა წოდების მინიკებას „მთური“ თუ „ბარული“ მდებარეობა კი არ განსაზღვრავდა, არამედ მეფისა და ქვეყნის წინაშე დამსახურება.

² სვანური პოეზია, I, 1939, გვ. 44, 62, 72, 100, 118, 164, 174, 200, 222, 230, 260, 262, 266.

მხედველობიდან ის ფაქტი, რომ აღნიშნული წარწერები სხვადასხვა დროს მრავალმა მკვლევარმა და სპეციალურმა ექსპედიციამ შეისწავლა, მათში აზნაურის მოხსენიება არც ერთს საექვოდ და სადავოდ არ გაუხდია. მთავარი მაინც ის კი არ არის, თუ როგორაა ტერმინი აზნაური დაქარაგმებული (შემოკლება თითქმის ყველა აღრინდელი წარწერის დამახასიათებელია), არამედ ის, რომ ეს აზნაურები სვანეთის იმ ხეების (სოფლებსა და თემების) მცხოვრებლებად მოიხსენიებან. სადაც ეს ეკლესიები მდებარეობდნენ.

აი ერთი მათგანი: „ქ. სახელითა ღმრთისაჲთა მოიხატა და შეიმკო წმიდა ესე ეკლესიაჲ საღიდეבלად აზნაურთა ამის ქევისა, ყოველთა დიდთა და მცირეთა, შვილთა და მომავალთა მათთა და სულისა მიცვალებულთა მათისა“¹.

როგორც ვხედავთ, ამ წარწერებში აზნაურთა (და არა „აზნარტთა“) მოხსენიება, მათი სვანეთის ყველაზე მთამალალ ხეობებში ცხოვრება და სხვადასხვა ფენად დაყოფა საექვოდ არ უნდა იყოს. მაგრამ ასეთი ექვიც რომ დაიბადოს, აზნაურები, როგორც სვანეთის ხეებში მცხოვრებლები, სხვა წარწერებშიც გვხვდება. მაგალითად, სოფ. ჩუქულის ეკლესიის ხატზე ვკითხულობთ: „წმიდაო ღმრთის მშობელო, შეიწყალე ესე სოფელი, აზნაურნი დიდნი და მცირენი“². მსგავსი წარწერა არაერთი შემოგვენახა.

ამრიგად, აზნაურთა ცხოვრება სვანეთის ამა თუ იმ თემში ექვს არ იწვევს. სამაგიეროდ, რაკი საქმე სვანეთს (მთას) ეხება, ზოგიერთ მკვლევარს მიაჩნია, რომ აზნაურების გვერდით მოხსენიებული „დიდი და მცირე“ — ასაკის გამომხატველია. მოცემული ტერმინების ამდაგვარი გაგება, პირდაპირ რომ ვთქვათ, გაუგებრობაა, რადგან ერთი და იმავე ტექსტში „დიდსა და მცირეს“ მოსდევს სიტყვები „შვილთა და მომავალთა“ — აქ კი, რასაკვირველია, ასაკსა და შთამომავლობაზეა ლაპარაკი, ხოლო „დიდი და მცირე“ აზნაურთა სოციალური, ქონებრივი,

1 Н. Аладашвили, Г. Алибегашвили, А. Вольская, Госписи художника Тевдоре в Верхней Сванетии. Тб., 1966, стр. 4—6.

2 ექ. თაყაიშვილი, არქეოლოგიური ექსპედიცია ლეჩხუმ-სვანეთში..., გვ. 145.

თანამდებობრივ-უფლებრივი ხარისხის გამოხატულებაა. ასეთ გაგებას ადასტურებს მოცემული წარწერების ბარის შესაბამის წყაროებთან შედარებაც.

ყველაფრიდან ჩანს, რომ ჩვენთვის საინტერესო სვანეთის ბალსზემო თემებშიც ცხოვრობდნენ აზნაურები, რომლებიც გვარჩამომავლობის, ქონებრივი შეძლებისა და სამსახურის მიხედვით ერთიმეორისაგან განსხვავდებოდნენ.

დავუშვათ, სვანეთში აზნაურთა წოდების არსებობაზე ადგილობრივი წერილობითი წყაროები არ მოგვეპოვება, ამ შემთხვევაშიც, შეგვიძლია საერთო ქართული საისტორიო წყაროების მეშვეობით სვანეთში აზნაურთა წოდების არსებობა დავადგინოთ.

თამარ მეფის ისტორიაში ვკითხულობთ: „ვინცა გარდამოვიდეს სუანნი დიდებულნი და მეკევენი“¹. აქედანაც ჩანს, რომ სვანეთში ცხოვრობდნენ აზნაურები, რომელთა შორის არაერთი დიდებული ყოფილა. ამ თვალსაზრისით განსაკუთრებით ბევრის მთქმელაა ისიც, რომ სვანეთის ერისთავთა ყველაზე ძლიერი გვარეულობა ვარდანძე (ფარჯანიან-მარუშნიანი), რომელთაგანაც დადიანთა ძეგლი დინასტია და გურიელი მომდინარეობს, ე. წ. ბალსზემო სვანეთიდან იყო².

სვანეთში და, კერძოდ, მესტიაში აზნაურის წოდების არსებობას უდავოდ ამტკიცებს ჩვენამდე მოღწეული კონსტანტინე მეფის მიერ (XIII ს. ბოლო) განახლებული გოშთელიანის სიგელი: „ქ. ჩუენ მეფეთ მეფესა კონსტანტინეს გუიბოძებია თქუენთუის გოშქოთელიანისათუის თქუენივე ნაქონები ხორხომელისძე. ჰაგრევე ნასისხლად გქონდეს, ვითა პირველ გქონდაყე“³.

ამ საბუთიდან ჩანს, რომ სვანეთის ზოგიერთი მკვიდრა

¹ ისტორიანი და აზმანი შარავანდელთან, ქართლის ცხოვრება, I, გვ. 33.

² Д. М. Бакрадзе. Археологическое путешествие по Гурии и Адчаре С—П., 1878, გვ. 109, 111, 112, 335; ექ. თაყაიშვილი, არქეოლოგიური ექსპედიცია ლეჩხუმ-სვანეთში 1910 წელს. გვ. 24,, 25, 144; ნ. ბერძენიშვილი, საქართველოს ისტორიის საკითხები, VIII, თბილისი, 1975, გვ. 428).

³ სვანეთის საისტორიო ძეგლები, ნ. II, გვ. 113.

დამსახურების სამაგიერო წყალობად მეფისაგან აზნაურის წოდებას იღებდა, რომ აზნაურები ყმებს ფლობდნენ. აქვე დასტურდება ისიც, რომ წინამორბედ მეფეთა მიერ ნაბოძები აზნაურის წოდების შემდგომ განახლება სვანეთშიც ტრადიცია ყოფილა.

აღნიშნული არა მარტო იმაზე მიგვითითებს, რომ სვანეთის საზოგადოება ფეოდალურ-დიფერენცირებული იყო და გლახთა კატეგორიებთან ერთად სხვადასხვა ფენის აზნაურები არსებობდა, არამედ იმაზეც, რომ სვანეთი საქართველოს ერთიანი ფეოდალური მონარქიის ორგანული ნაწილი (ყუთხე, „ქვეყანა“) და მისი სოციალურ-ეკონომიკური და პოლიტიკურ-კულტურული ცხოვრების მოზიარეც იყო.

ყველაფერ ამას არ შეიძლება ანგარიშობა არ გაეწიოს და სვანეთზე კვლავ ხავსმოკიდებულ თვალსაზრისს ვამაგრებდეთ და ხელოვნურად ვალამაზებდეთ.

თუკი წერილობით წყაროებს დავუჯერებთ, სადავო არ არის, რომ განვითარებული ფეოდალიზმის ხანაში სვანეთში და, კერძოდ, მის ბალსხემო ნაწილში აზნაურთა წოდება არსებობდა.

წერილობითი წყაროებიდან ჩანს, რომ სეტის საზოგადოება XIV საუკუნეშიც აზნაურებისა და გლახებისაგან შედგებოდა. ამას რამდენიმე საბუთი ადასტურებს, მათ შორის ორი „დაწერილი“. პირველ მათგანში საქმე ეხება აზნაურთა მიერ გლახებისადმი ლალატს, ხოლო მეორე — ანალოგიურ „წიგნში“ მესტიის აზნაურებსა და გლახებს შორის მკვლელობაზე და სისხლის დაურევებაზეა ლაპარაკი*. ტექსტებიდან კარგად ჩანს, რომ სეტის აზნაურები ერთ მხარეზე იდგნენ, ხოლო გლახები მეორეზე. დოკუმენტები აგრეთვე მეტყველებენ, რომ სეტის მოსახლეობას ღრმად ჰქონდა შეგნებულა თავისი მდგომარეობა: მათი ერთი ნაწილი გლახები იყვნენ, ხოლო მეორე აზნაურები, ანუ ვარგები. ახლა როდესაც საქმე სვანეთის წარსულსა და მისი საზოგადოების დიფერენციაციას ეხება, ზოგიერთ მკვლევარს რატომღაც პრობლემად გაუხდა იმის გარ-

* მართალია, მოცემული ტექსტები ბუნდოვანია, მაგრამ აზნაური და გლახი მკაფიოდაა გამოხატული (იხ. სვანეთის საისტორიო ძეგლები, II, გვ. 110).

კვევა, რისა დადგენაც ფაქტიურად არავითარ სიძნელეს არ წარმოადგენს.

ამრიგად, აზნაურის წოდება სვანეთში ხან საერთო ქართული ტერმინით — აზნაურითაა გამოხატული, ხან სპეციფიკური ტერმინით — ვარგი (სხვა რამ გამორიცხულია).

როცა საქმე სვანეთის საზოგადოების სოციალურ სტრუქტურას ეხება, ხშირად ძალაუფლებურად ერთ სიბრტყეზეა წარმოდგენილი კავკასიის მთელი მთიანეთი და აქცენტი კეთდება ხოლმე სვანეთის ე. წ. ეკონომიკურ სივიწროვეზე, იქ ფეოდალური ექსპლოატაციის შეუძლებლობაზე (თითქოს ზედმეტი პროდუქტის წარმოების სიძნელე იქ შეუძლებელს ხდიდა მის ფეოდალურ მითვისებას და სხვ.).

თუ რამდენად სწორია კავკასიის მთელი მთიანეთის ერთ ყალიბში მოქცევა, მასზე ერთნაირი მსჯელობა, ეს კარგად ჩანს სვანეთის სინამდვილეში (კიდევ უფრო მკაფიოდ გამოჩნდება თუნდაც ტაო-კლარჯეთის, სამცხე-საათაბაგოსა და სხვათა მაგალითზე, რომლებიც განსხვავდებიან თავისი მთიანმწიხრი პირობებით, ამავე დროს მაღალი ფეოდალური იერარქიულობით და განვითარებული კულტურით).

უშეკველია, რომ მთა თავისი ეკონომიკით ბარს ჩამორჩებოდა, რომ მთაში ზედმეტი პროდუქტის წარმოება და მისი მოთვისება ბართან შედარებით მცირე მასშტაბით ხასიათდებოდა. როდესაც სვანეთში ფეოდალური ურთიერთობის ფორმებს ვეხებოდით, ხაზგასმით აღვნიშნეთ, რომ „გეოგრაფიულ-კლიმატური პირობების გამო სვანეთის მეურნეობა შეზღუდული იყო“. მთური მეურნეობის სპეციფიკა მართლაც „აბრკოლებდა და ამუხრუჭებდა სვანეთში ფეოდალური ურთიერთობის განვითარებას“, რომ „მთური მდებარეობის გამო სვანეთის მეურნეობა შეზღუდული იყო, რაც ფეოდალურ ურთიერთდამოკიდებულებას ზღუდავდა და დამოკიდებული წოდების მარტივ და მსუბუქ ვალდებულებას განსაზღვრავდა“¹.

ამასთანავე, მიუხედავად ამისა, „მთურ მდებარეობას“ არ შეეძლო საზოგადოების განვითარების ისტორიული პრო-

¹ გ. გასვიანი, დასავლეთ საქართველოს მთიანეთის ისტორიიდან. გვ. 59, 60, 82.

ცესის შეჩერება, მის ერთ წერტილზე გაყინვა, მით უფრო, რომ სვანეთი წარმოადგენდა სოციალურად და კულტურულად მაღალგანვითარებული საქართველოს ორგანულ და განუყოფელ ნაწილს, რომლის ტერიტორია არც თუ ისე ვრცელი იყო, რომ საქართველოს მთისა და ბარის ცხოვრება ერთიმეორესთან იყო გადაკავანძული. აქვე ანგარიშგასაწევია მარქსიზმის ცნობილი დებულება გეოგრაფიული გარემოს როლზე — რომ გეოგრაფიული გარემო ანელებს (ამუხრუჭებს) ან აჩქარებს (ხელს უწყობს) საზოგადოების განვითარებას. საზოგადოების განვითარებაში გეოგრაფიული გარემოსადმი გადამწყვეტი როლის მინიჭება გაუმართლებელია.

თუ ზოგიერთ მკვლევარს დავუჭერებთ, მთაში, რომლის გარემო რამდენიმე საუკუნეში თითქმის არ შეიცვალა, საზოგადოებაც უცვლელი — პირველყოფილურ დონეზე უნდა გაქვავებულიყო (სწორედ ასეთი შეხედულების ნაყოფია მთაში გვაროვნულ-პირველყოფილური წყობილების ესოდენ გამძლეობისა და ხანგრძლივობის ოდიოზური თეორია), ხოლო ბარის განვითარება ინტენსიურად ზეალმაველი ხაზით უნდა წარმართულიყო. მაგრამ ყველაფერი ასე როდია. სოციალურ-ეკონომიკურ განვითარებას რომ მხოლოდ გეოგრაფიული ფაქტორი, შერბოლ მთური ან ბარული მდებარეობა განსაზღვრავდეს, მაშინ ყველაზე წინ აზია და აფრიკა აღმოჩნდებოდა, ხოლო მთიანი და უფრო მწირი ქვეყნები მუდამ ჩამორჩენილი იქნებოდნენ. არაერთი მაგალითის დასახელება შეიძლება იმის საილუსტრაციოდ, რომ გარკვეულ დროსა და სიტუაციაში ზოგიერთი მთიანი, გნებავთ, მწირი ქვეყანა თავისი განვითარებით გაცილებით მაღლა იდგა და დგას, ვიდრე ხელსაყრელი გეოგრაფიულ-კლიმატური პირობებით განებრვრებული ზოგიერთი ქვეყანა.

აღსანიშნავია, რომ მთიან-მწირი მდებარეობა სვანეთში ფეოდალიზმის განვითარების მასშტაბს ზღუდავდა. ამასთანავე, შეუძლებელია ისეთ პატარა რეგიონში, როგორც სვანეთია, ფეოდალიზმისათვის დამახასიათებელი ყველა ინსტიტუტი, ასე ვთქვათ, კლასიკური სისრულით ყოფილიყო წარმოდგენილი, მით უფრო, რომ ის დამოუკიდებელ ცალკე ქვეყანას

კი არა, არამედ ფოდალური საქართველოს ერთ-ერთ პროვინციას წარმოადგენდა.

ძნელია იმის ზუსტად განსაზღვრა, თუ სხვადასხვა დროს სვანეთის პრივილეგირებული წოდება რა დოვლათს ფლობდა, მაგრამ ჩვენი დაკვირვების სფეროში მოქცეული მესტიელი აზნაურების, ანუ ვარგების ჭაფარიძეებისა და გოშთელიანების მაგალითზე ჩანს, რომ ამ მხრივ ისინი გაცილებით ძლიერნი იყვნენ, ვიდრე მდაბიო წოდების გვარები. მიუხედავად მცირერიცხოვნობისა, ჭაფარიძეები და გოშთელიანები (ეს უკანასკნელნი რამდენიმე ოჯახს თუ შეადგენდნენ) თავის დროზე საკუთრივ მესტიის მიწა-წყლის მნიშვნელოვან ნაწილს ფლობდნენ და გლეხთა მფლობელობაში არსებულ მიწასაც იჩემებდნენ.

ამასთანავე, აზნაურებს გააჩნდათ საკუთარი — საგვარო ეკლესიები (მაგალითად, სოფ. ლანჩვალში ჭაფარიძეებს ეკუთვნოდათ ეკლესია, რომელიც გადმოცემით ჩართოლანებს აუშენებიათ. ამ ეკლესიის ფრესკებზე ჭაფარიძეები დიდკაცურა და მდიდრული სამოსით გამოირჩევიან).

ყველაფრიდან ჩანს, რომ საქართველოს ერთიანობის დროს სვანეთის აზნაურები, ანუ ვარგები თავიანთ უფლებრივ-ქონებრივი და სოციალური მდგომარეობით განირჩეოდნენ და საზოგადოების სათავეში იდგნენ.

საქართველოს ერთიანი ცენტრალიზებული სამეფოს ცალკეულ სამეფო-სამთავროებად დაშლის შემდეგ განკერძოებულობის გზაზე დამდგარ სვანეთში მნიშვნელოვანი პოლიტიკური ცვლილებები მოხდა. ცენტრალური ხელისუფლების მხარე დაპყრის გარეშე სვანეთის პრივილეგირებული წოდების პოლიტიკური და ეკონომიკური ძალა და გავლენა თანდათან მიიკარგა. შესაბამისად თავისუფლდება გლეხოზა, აღორძინებას იწყებს მათი საზოგადოებრივი კავშირები. ცენტრალური ხელისუფლების დასუსტებისა და გაქრობის პარალელურად გლეხთა გაერთიანება (სასოფლო თემი) მნიშვნელოვან პოლიტიკურ ძალად იქცევა. თუ საქართველოს ერთიანობის პირობებში აზნაურობას მეფის ხელისუფლება ზურგს უმაგრებდა და ძალაუფლებას აძლევდა, XVI საუკუნიდან მოყოლებული მარტოდმარტო (თავის ანაბარა) დარჩენილ სვანეთის აზნაუ-

რობას გლეხთა მასები განუდგნენ. კლასობრივი და შინაკლასობრივი ბრძოლის პირობებში აზნაურთა რიგი გვარეულობა (რიჩგვიანი, ბაბიანი და სხვ.) სრულიად გადაშენდა, ხოლო სხვების ძალაუფლება და გავლენა შესუსტდა (ჩარკვიანები, ყიფიანები, ჯაფარიძეები, იოსელიანები, დედარიანები, ყორჯოლიანები, გომთელიანები, ქურდიანები და სხვ.).

ასეთი ვითარება ფეოდალური ხანის მესტიის მცხოვრებ ვარგად წოდებულ აზნაურ ჯაფარიძეებსა და გლეხებსაც შეეხება: „თუ აზნაური ვინი გასცილდეს, თუ გლეხს უღალატოს სახლი დააწუს*, კაცი დაკუცუს**, საქონელი შექამოს ყველამან სეტიელმან ერთობილმან“¹. ანალოგიურ სხვა საბუთში ნათქვამია, რომ თუ ხერგიანის გვარის კაცს აზნაური კაცი შემოაკვდეს, სისხლი ეველა ხერგიანმა გადაიხადოს ერთად, თუკი რომელიმე ხერგიანი აზნაურს შემოაკვდეს და სისხლის ფასი გაილოს — ძირითადი ნაწილი მკვდრის ჳირისუფლის იყოს და დანარჩენი ყველა ხერგიანისო².

აქ ჩანს, რომ ხერგიანები უპირისპირდებიან აზნაურ (ვარგ) ჯაფარიძეებს და ცდილობენ მათი უფლებების შეზღუდვას, ასე ვთქვათ, აზნაურთა ექსპლუატაციისაგან თავდახსნას.

მესტიის აზნაურ ჯაფარიძეებისადმი თავიანთი გლეხების დაპირისპირებისა და აჯანყების ფაქტის ამსახველი გადმოცემა აღწერილი აქვთ ცნობილ მკვლევარებს მ. კოვალევსკისა და ი. ივანიუკოვს, რომელთაც სარწმუნოდ მიაჩნდათ ამ ორ წოდებას შორის ბრძოლის მძიმე შედეგებით დამთავრება³.

ზოგიერთ მკვლევარს მიაჩნია, რომ სვანეთში ამა თუ იმ გვარეულობას სხვები თითქოს იმიტომ უპირისპირდებოდნენ, რომ „ამ გვარებს თემის შაგნით პრეროგატივის გაჩენა სურდათ“, თითქოს „ძლიერი გვარები თემის პირის გატეხას, თემსე აღზვევებს და გაბატონებას ლამობდნენ“, თითქოს „თემურა

* დააწუს — დაწვას.

** დაკუცუს — დახოცოს.

¹ სვანეთის საისტორიო ძეგლები, ნ. II, გვ. 110.

² იქვე.

³ Журнал «Вестник Европы», кн. 8, 1860, стр. 603.

უფლებებით და პრინციპებით განმტკიცებული თავისუფალი სვანეთი ასეთებს არბევდა და ხოცავდა“¹.

ზოგიერთ მკვლევარს სვანეთის ჯაფარიძეების, ჩარკვიანების, გელოვანების, ყიფიანების, ასევე კავკასიის მთიანეთის სხვა რეგიონის ზოგიერთი გვარეულობებისადმი დანარჩენების დაპირისპირება (გლეხთა ამბოხებები) კლასობრივი ექსპლუატაციისა და ჩაგვრის წინააღმდეგ ბრძოლის მაგალითად არ მიაჩნია².

სპეციალური გამოკვლევებიდან, თვით საშუალო სკოლის სახელმძღვანელოებიდანაც კი ჩანს, რომ გლეხთა ბრძოლა „ძლიერ გვარებთან“ (სინამდვილეში პრივილეგირებულ წოდებასთან, სხვაგვარად ძლიერი გვარი გაუგებარია) ყველგან და ყოველთვის ექსპლუატაციას და მის გაზრდას უკავშირდებოდა (ამისი მაგალითებია რუსეთში XI—XII, XVII—XVIII საუკუნეების გლეხთა აჯანყებები და ომები, აგრეთვე გლეხთა ომები გერმანიაში და სხვ. აღნიშნულ აჯანყებებთან შედარებით კავკასიის მთიანეთში გლეხთა გამოსვლები ზღვაში წვეთი იყო). გლეხთა წინააღმდეგობა და კლასობრივი ბრძოლა ყველაზე მეტ გაქანებას იქ იღებდა, სადაც ფეოდალური ურთიერთობა მეტად იყო განვითარებული, მაგრამ ძლიერი ხელისუფლების პირობებში ეს გამოსვლები მარცხით მთავრდებოდა, ხოლო კავკასიის მთიანეთის ზოგიერთ რაიონში გლეხთა გამოსვლები აქ ექსპლუატაციის სიმძიმესთან იყო დაკავშირებული, დროებითი გამარჯვება კი ხელისუფლების სისუსტესთან.

ამდენად, გლეხთა გამოსვლები (ამბოხებები) სვანეთში თემისაგან ზოგიერთი გვარის გამოყოფისა და აღზევების პროცესთან კი არ იყო დაკავშირებული (ეს გვარები რომ დანარჩენებს როდისმე ექსპლუატაციას გაუწევდნენ, ამის შიშით წინასწარი აჯანყებები საერთოდ წარმოუდგენელია), არამედ წოდებრივ უპირატესობასა და ჩაგვრის არსებობასთან. ამის

¹ რ. ხარაძე, აღ. რობაქიძე, სვანეთის სოფელი ძველად, გვ. 109-113.

² გ. მელიქიშვილი, კავკასიის მთიელთა ადრეკლასობრივი საზოგადოების ბუნების საკითხი, ივ. ჯავახიშვილისადმი მიძღვნილი სათუბილეო კრებული, თბილისი, 1976, გვ. 168.

მაგალითია არა მარტო ჩვენთვის ცნობილი გამოსვლები ზემო სვანეთში, არამედ ქვემო სვანეთის გლეხთა რამდენიმე აჯანყება გარდაფხაძეების წინააღმდეგ, როდესაც მათი აბსოლუტური უმრავლესობა ამოხოცეს. ესეც იმის უდავო დადასტურებაა, რომ გლეხობა მათგან გამოყოფის მოსურნე გვარებს, კი არ უჭანყდებოდა წინასწარ, არამედ იმათ, ვინც დიდი ხნის წინ იყვნენ აღზევებული და ვინც მათ სოციალურ ჩაგვრას ეწეოდა.

ცხადია, გლეხთა გამოსვლებს მხოლოდ იმისი წყალობით ეწერა წარმატება, რომ საქართველოს პოლიტიკური დაშლის შემდეგ სვანეთის პრივილეგირებულ წოდებას ზურგის გამმაგრებელი ხელისუფლება არ ჰყავდა, ხოლო მარტოდმარტოს უჭირდა მთელ გლეხობას გამკლავებოდა.

რაც შეეხებოდა ექსპლუატაციის ხარისხს, ამ მხრივ სვანეთი ვერ შეედრებოდა ბარის საქართველოს, სადაც მრავალგვარი ბეგარა-ვალდებულება არსებობდა. გლეხთა უფლებები სვანეთში ისე არასოდეს დაცემულა და გათელილა, როგორც ბარის საქართველოში.

მიუხედავად ამისა, მატერიალური დოვლათის მწარმოებელი მასა სვანეთშიც, როგორც ხელისუფალთა, აგრეთვე საერო პრივილეგირებული წოდების და ეკლესიის მხრივ ექსპლუატაციას განიცდიდა*. ამის უშუალო მაჩვენებელია არა ნარტო ჩვენამდე მოღწეული წერილობითი წყაროების ჩვენება საღალღო-საბეგარო ვალდებულებით ურთიერთობაზე, არამედ ეკლესია-მონასტერთა სიმრავლე (XIX ს. ბოლოს მარტო ზემო სვანეთში 100-მდე ეკლესია და ნაეკლესიარი აღირიცხა) და მათი სიმდიდრე**.

* რა თქმა უნდა, ფეოდალიზმის დროს, კავკასიის მთიანეთში მწარმოებლის პიროვნებაზე კერძო საკუთრება არ არსებობდა, როგორც ამას გ. მელიქიშვილი აღნიშნავს დასახელებულ გამოკვლევაში (იხ. გვ. 165, 169), მაგრამ ეს მოვლენა ფეოდალიზმის საერთო დამახასიათებელ თვისებად არ შეიძლება მივიჩნიოთ თვით ბარშიც. მწარმოებლის პირველბაზე კერძო საკუთრება მონათმფლობელობას ახასიათებდა, და ფეოდალიზმის პირობებში მხოლოდ გამონაკლისს შეადგენდა.

** აკადემიკოს გ. ჩუბინაშვილის მოწმობით, მარტო ზემო სვანეთის ეკლესიებში მთელი საქართველოს ოქრომჭედლობის მეხუთედი შემორჩა (იხ. ძეგლის მეგობარი, № 31—32, თბ., 1973, გვ. 33). ეკლესია-მო

ნიშანდობლივია ისიც, რომ სვანეთის ეკლესია-მონასტრებს სპეციალური მწიგნობრები ჰყავდა როგორც ადგილზე და საქართველოს საეკლესიო ცენტრებში, აგრეთვე უცხოეთის ქაღალთულ ეკლესია-მონასტრებშიც. აღსანიშნავია ისიც, რომ სვანეთის საერისთავოს ხელისუფლები და აზნაურები დიდძალ სიმდიდრეს სწირავდნენ უცხოეთის ქართულ ეკლესიებს, აგრეთვე ისიც, რომ XIV—XV საუკუნეებში მთელ სვანეთში მწიგნობრული მუშაობა იყო გაშლილი (ამ დროის 50-მდე მწიგნობრის ვინაობამ მოაღწია ჩვენამდე).

ხშირად, როდესაც სვანეთის შუა საუკუნეების საზოგადოების ბუნებაზეა მსჯელობა, საქმეს საგლახო რეფორმის საკითხსაც უკავშირებენ. რაკი რეფორმისას მეფის მთავრობამ სვანეთის აზნაურთა უფლებები უგულვებელყო, ზოგიერთს ეს იმის საბუთად მიაჩნია, რომ იქაურ აზნაურებს გლახობისადმი სამამულო უფლებები არასოდეს ეკუთვნოდათ და საერთოდ პრივილეგიებულ წოდებასაც არ განეკუთვნებოდნენ. სვანეთში თუ საერთოდ კავკასიის მთიანეთში ფეოდალური ურთი-

ნასტრები ქონების ნაწილს შეწირულობის სახით იღებდნენ უპირატესად აზნაურებისაგან, ნაწილს კი მწარმოებელი მასის ექსპლუატაციით, მაგალითად, უშგულის მკვიდრმა ჯანყვით ჩარკვიანმა XVII საუკუნეში სვანეთის ეკლესიას 30 ათასი თეთრი შესწირა, იმდენი, რამდენიც ციოყ დაღიშქელიანმა (იხ. ეურნ. „მაცნე“, ისტორიის... სერია, 1972, № 2, გვ. 113-119).

მ. ჩართოლანის განცხადებით, ზემო სვანეთში თითქოს „ეკლესიები და სასაფლაოები გვარის ხელში იყო და არის, ზოგან კი იგი რამდენიმე გვარის გაერთიანებას ეკუთვნოდა...“ (იხ. კრებული — სვანეთი, 1979, გვ. 104). როგორც აღვნიშნავთ წერილობითი წყაროები (იხ. სვანეთის საისტორიო ძეგლები, ნ. II, გვ. 6, 8, 14, 16, 17, 18, 19, 20 და ა. შ.) და გვიანდელი სინამდვილე მტკიცებებს, ასეთი მტკიცება ყოვლად უსაფუძვლოა. როგორც წესი, ეკლესია-მონასტრები სვანეთში სხვადასხვა გვარეულობისაგან შემდგარი სოფლის ან მთელი თემის (რამდენიმე სოფლის) კუთვნილებას შეადგენდა, ხოლო რიგითი გვარისადმი ეკლესიის კუთვნილება იშვიათი გამონაკლისი იყო. მაგრამ, თუნდაც ამ გამონაკლისს (რიგითი გვარის მიერ XVII საუკუნეში ეკლესიის აშენებას და ფლობას) არავითარი ლეგიტიმაცია არ შეიძლება ჰქონდეს გვაროვნულ წყობილებასთან და მის გადმონაშთთან, პირიქით, უამრავი ეკლესია-მონასტრის არსებობა (თუნდაც რიგითი გვარის მიერ ეკლესიის აშენება და ფლობა) სვანეთში ფეოდალური იდეოლოგიის — ქრისტიანობის ბატონობაზე მიუთითებს.

ერთობის არსებობის უარყოფა ამ არგუმენტით შეუძლებელია.

ცნობილია, რომ მეფის მთავრობა თავდაპირველად წინააღმდეგი იყო ეცნო ამიერკავკასიის სხვადასხვა ხალხის პრივილეგირებული წოდების ის წარმომადგენლებიც, რომლებიც რუსეთთან შეერთების მომხრე იყვნენ.

მაგალითად, მიუხედავად იმისა, რომ საქართველოს ბარში ბატონყმობის არსებობა ეჭვს არ იწვევდა, მეფის მთავრობა მას არ ცნობდა. აქაურ თავადაზნაურობას ნახევარი საუკუნის მედგარი ბრძოლა დასჭირდა თავისი უფლებების ოფიციალური აღიარების მისაღწევად*. ამდენად გასაკვირი არ უნდა იყოს მეფის მთავრობის მიერ კავკასიის მთიელთა პრივილეგირებული წოდების უფლებების იგნორირება, რადგან თვითმპყრობელობის წინააღმდეგ მან აშკარა თუ ფარული ომი გააჩაღა (მაგ., კავკასიის ომი), ამასთანავე მათი პრივილეგიების უგულვებელყოფა მთავრობის ფისკალურ ინტერესებსაც შეესაბამებოდა.

სხვათა შორის, რუსეთთან შეერთების საქმეში არც სვანეთის წვრილ აზნაურობას ეკუთვნის რაიმე მნიშვნელოვანი დამსახურება. თანაც სვანეთი რუსეთს საქართველოს კუთხევებს შორის ყველაზე გვიან შეუერთდა. ამიტომ თვითმპყრობელობა სვანეთის აზნაურებს მაინცდამაინც დიდი სიმპატიით

* ქართველმა თავადაზნაურობამ რუსეთთან შეერთებისთანავე მოითხოვა თავისი პრივილეგიების აღიარება იმპერიის თავადაზნაურთა უფლებებში. საქმის გადასაწყვეტად მთავრობამ ოფიციალური სიგელები მოითხოვა, მაგრამ იგი იშვიათად თუ ეინმეს აღმოაჩნდა. ამ საბაბით მეფის მთავრობა მათი უფლებების აღიარებაზე უარს აცხადებდა. საქმის გასარკვევად არაერთი კომისია გამოიყო, მათ შორის XIX ს. 40-იან წლებში მომუშავე კომისიის წევრთა ნაწილი — სენატორ განის მეთაურობით — საერთოდ უარყოფდა საქართველოში ბატონყმობის არსებობას და ამდენად თავადაზნაურთა მებატონურ უფლებებს. ხანგრძლივი დავისა და ენერგიული პროტესტის შემდეგ თავადაზნაურობამ მთავრობას პირვანდელი გადაწყვეტილება შეაცვლევინა, თავისუფლების მაძიებელ გლეხს მოეთხოვა საბუთი, რომ არც თვითონ და არც მისი წინაპარი მოღავე პირის ყმა არ ყოფილა. ცხადია, ასეთი საბუთი გლეხს არ გააჩნდა. ბოლოსდაბოლოს საკითხი მხოლოდ რეფორმის დროს გადაწყდა. ათეული წლების შემდეგ, როგორც იქნა, მთავრობამ ქართველი თავადაზნაურობის აბსოლუტური უპრავესობის უფლებები აღიარა, ნაწილის კვლავაც გადაუჭრელი დარჩა.

როდი ეკიდებოდა. ცხადია, მეფის მთავრობა რეფორმის პერიოდში ამით ხელმძღვანელობდა სვანეთის პრივილეგირებულ წოდებისადმი დამოკიდებულების საქმეში.

მაინც რა დამოკიდებულება არსებობდა რეფორმის დროს სვანეთში?

ე. წ. სადადიშქელიანოსა და ქვემო სვანეთში ფეოდალურ-ბატონყმური ურთიერთობა სახეზე იყო (თუმცა ქვემო სვანეთის ლაშხეთის თემში ეს ურთიერთობა ნაწილობრივ გაქრობის გზაზე იდგა და უფრო სიმბოლურ ხასიათს ატარებდა), ამიტომ მეფის მთავრობამ ეს ბოლოსდაბოლოს ცნო. მართალია, თავისებური ფორმით, მაგრამ დადიშქელიანებმა, გელოვანებმა და გარდაფხაძეებმა რეფორმის შედეგად გლეხთა ვანთავისუფლებაში და მიწაში სათანადო საზღაური მიიღეს.

რაც შეეხება ე. წ. თავისუფალ სვანეთს, აქ რეფორმის პერიოდში ფეოდალურ-ბატონყმური ურთიერთობა ფაქტიურად სიმბოლურ ხასიათს ატარებდა. მოცემულ პერიოდში აქ ყპურ მდგომარეობაში მხოლოდ შინაყმები იყვნენ, ხოლო გლეხთა უდიდესი ნაწილი უკვე პირადად თავისუფალი იყო და აზნაურობას 20 კაპიკიდან 5 მანეთამდე ღირებულების გადასახადს უხდიდა, წელიწადში ერთხელ უმასპინძლდებოდა და სხვ.

სვანეთში შექმნილ ვითარებაზე თავის დროზე არაერთხელ აღვნიშნეთ, რომ დროთა ვითარებაში ბალსზემო სვანეთის აზნაურთა პოლიტიკური და ეკონომიკური გავლენა თანდათან შესუსტდა, გლეხობამ ნაწილობრივ თავი დაიხსნა ფეოდალური დამოკიდებულებისაგან და სხვ.

ზოგიერთ მკვლევარს საეჭვოდ მიაჩნია სვანეთის აზნაურთა სამამულო უფლებების დაცემა და აცხადებს, რომ იქ, სადაც ამგვარი უფლებები ნამდვილად არსებობდა, თითქოს ამგვარი რამ არ შეიძლებოდა მომხდარიყო, რომ ასეთ გამონაკლის შემთხვევას ადგილი არსად არ ჰქონია. არა მარტო სვანეთსა და აგრეთვე ჩრდ. კავკასიის მთიანეთის ზოგიერთ კუთხეში, სადაც საზოგადოებრივ ურთიერთობაში კლასობრივი ბრძოლის შედეგად მნიშვნელოვანი ცვლილებები მოხდა, სადაც პრივილეგირებული წოდების მრავალი გვარეულობა გაქრა და ჩამოქვეითდა (ზოგიერთი ცვლილება შეინიშნება აღმოსავლეთ საქართველოშიც — ქიზიყში, ახმეტასა თუ სხვ.),

არამედ მსგავს მოვლენებს ჰქონდა ადგილი რუსეთსა თუ დასავლეთ ევროპაშიც.

ფ. ენგელსი მიუთითებდა, რომ გერმანიაში წინანდელთან შედარებით XIII საუკუნის შუახანებიდან მოყოლებული (ჯვაროსნულ ლაშქრობათა შედეგად) გლეხთა მდგომარეობა მნიშვნელოვნად გაუმჯობესდა: „მრავალი ომში მიმავალი შემამულე პირდაპირ ანთავისუფლებდა თავის გლეხს; სხვები ომში დაიხოცნენ, დაიღუპნენ, თავადაზნაურობის გვარები ასობით გაქრა, მათი გლეხებიც ხშირად თავისუფლდებოდნენ“. უფრო გვიან, XV საუკუნეში, — აღნიშნავდა ფ. ენგელსი, — გლეხთა მდგომარეობა კვლავ გაუარესდა, უზომოდ გაიზარდა ლალა და ბეგარა, განახლდა ცდა, რომ თავისუფალი გლეხები მებეგრეებად ექციათ, მებეგრეები — ყმებად, ხოლო საერთო მარკა — საბატონო მამულად¹.

ამის გამო, XV საუკუნის დასასრულიდან შვაბიაში, ზავარიაში, ფრანკონიაში, ელზასში და სხვაგან გლეხთა მრავალი აჯანყება მოხდა, ხოლო XVI საუკუნის 20-იან წლებში გერმანიაში გლეხთა ომმა იფეთქა, რომელშიაც თავადაზნაურობამ გაიმარჯვა. ამიერიდან გერმანელ გლეხებს შორის საყოველთაოდ ვრცელდება განახლებული ბატონყმური ურთიერთობა².

მსგავს მოვლენებს ჰქონდა ადგილი რუსეთშიც, სადაც კლასობრივ თუ შინაკლასობრივ ბრძოლაში მრავალი თავადაზნაურული გვარეულობა დასუსტდა ან საერთოდ გაქრა. ცალკეულ აჯანყებასა და გლეხთა ომში მრავალი გლეხი იღუპებოდა, ყმევდებოდა და ზოგიერთიც დროებით თავისუფლდებოდა (კაზაკობა, „სლობოდები“ და სხვ.).

რა თქმა უნდა, მსგავს მოვლენებს, მეტ-ნაკლები მასშტაბით, ადგილი ჰქონდა კავკასიაშიც, სადაც პოლიტიკური ვითარების მნიშვნელოვანი შეცვლა შესაბამის ძვრებს იწვევდა პრივილეგიებულ და მდაბიო წოდებათა ურთიერთობასა და ძალთა თანათარღობაში.

¹ ფ. ენგელსი, გლეხთა ომი გერმანიაში, გვ. 146—147.

² იქვე, გვ. 146 (ხაზგასმა ჩვენი — გ. გ.).

პოლიტიკური ვითარების ცვლილების შედეგად რეფორმის დროისათვის ლენტეხის თემისა და ჩუბხევის ადგილობრივი აზნაურების გვარეულობები სრულიად გაქრნენ, ლაშხეთის თემის აზნაურთა ნაწილი და ბალსზემო სვანეთის აზნაურობა დაკნინდა.

მიუხედავად ამისა, საარქივო დოკუმენტები და ოფიციალური სტატისტიკური მასალები მოწმობენ, რომ ე. წ. თავისუფალ სვანეთში რეფორმის დროს დაახლოებით 800 კომლიდან 61 აზნაურთა გვარეულობებს ეკუთვნოდა (როცა მოსახლეობის აღრიცხვა ხდებოდა თავადი და აზნაური ოფიციალურად მოიხსენიება)¹.

მნიშვნელოვანი პოლიტიკურ-ეკონომიკური ცვლილებების მიუხედავად რეფორმის დროისათვის აზნაურთა ოჯახები პირადად ფლობდნენ 15—20 ქევეა სახნავ-სათიბ მიწას, ტყეა, აგრეთვე სხვა უძრავ-მოდრავ ქონებას.

ამასთან აზნაურის სისხლი ((დაახლოებით 200 ძროხად ფასობდა) და ნაჰვლაში (საცოლისა და მისი მშობლებისათვის წინდაწინ მისართმეველი ქონება) გლეხთან შედარებით ორმაგი ღირდა. საერთო საქმის გადაწყვეტის დროს აზნაურის ხმას გადამწყვეტი მნიშვნელობა ენიჭებოდა ან ორი გლეხის ხმას უდრიდა.

ამასთან ერთად, ოფიციალური სტატისტიკით თითოეული აზნაურის კომლზე საშუალოდ 5 შინაყმა მოდიოდა, ხოლო გლეხთა ნაწილს მათთვის წელიწადში 20 კაპიკიდან 5 მანეთამდე ღირებულების გადასახადი უნდა ეძლია*, ამას გარდა წელიწადში ერთი სადილი უნდა გაემართა და ნაღობაში გამოცხადებულიყო.

აზნაურები განსხვავდებოდნენ ყოფა-ცხოვრების წესით, მალალი წოდებრივი ღირსების გამო ისინი გლეხობასთან ქორწინებასა თუ სხვა ნათესაურ ურთიერთობასაც გაუბრუნდნენ.

საინტერესოა სვანეთის აზნაურების შედარება ბარის აზნაურებთან. რასაკვირველია, თავისი ქონებრივი შეძლებითა და გავლენით სვანეთის აზნაურები ბარის მდიდარ აზნაურებს

¹ საქ. სსრ ცსა ქუთაისში, ფ. 1, ან. 2, ს. 27.

* 5 მანეთი ძროხის ფასი იყო.

ვერ შეედრებოდნენ, სამაგიეროდ, ისინი დასავლეთ საქართველოს ბარის წერილ აზნაურობას არაფრით არ ჩამოუვარდებოდნენ.

რეფორმის დროს სამეგრელოს აზნაურების: დგებუაძეების, ბუაძეების, ხეტიების, იაშვილების, გაბუნიებისა და გუგუშვილების 28 ოჯახი არც ერთ ყმა გლეხს არ ფლობდა, ამასთანავე სიღარიბითაც განირჩეოდნენ. მსგავს მდგომარეობაში იყვნენ ისინიც, ვინც აზნაურობას იჩემებდა, მაგრამ მეფის მთავრობის კომისიამ აზნაურთა წოდებაში არ დაამტკიცა და საეკლესიო უწყებას გადასცა. თუკი სამეგრელოს უდავო აზნაურების ყმათა რაოდენობას დავიანგარიშებთ, ვნახავთ, რომ აზნაურის ერთ ოჯახზე საშუალოდ ყმა გლეხთა 3—4 კომლი მოდიოდა. მაგალითად, მარიამ დადიანისადმი დაქვემდებარებულ აზნაურთა 68 ოჯახზე სულ გლეხის 244 ოჯახი მოდიოდა, სოფიო დადიანის აზნაურთა 32 ოჯახზე — გლეხის 160-მდე ოჯახი და ა. შ.¹

სამეგრელოს მსგავსი სურათი იყო გურიაში, სადაც აზნაურთა მნიშვნელოვან ნაწილს ორი ყმა გლეხი ეკუთვნოდა, ხოლო ნაწილი სრულიად უყმო და უმიწაწყლო იყო².

ასეთივე სურათი იყო იმერეთშიც, სადაც აგრეთვე აზნაურთა უმრავლესობა ღარიბი იყო. როგორც წოდებაში დამტკიცების სპეციალური კომისიის მასალებიდან ჩანს, XIX საუკუნის 30—40-იან წლებში იმერეთში ბევრი იყო არა მართო უყმო, არამედ უმიწაწყლო აზნაურიც, რომელიც მხოლოდ გვარჩამომავლობით (წოდებრიობით) განსხვავდებოდა გლეხებისაგან. იმერეთის აზნაურებზე გარკვეულ წარმოდგენას გეაძლევს გამოჩენილი კლასიკოსი მწერალი დავით კლდიაშვილი, რომელიც ეკონომიკური მდგომარეობის სივიწროვისა და თავისებური ცხოვრების გამო იმერეთის აზნაურთა ნაწილს „შემოდგომის“ აზნაურებს უწოდებდა.

აღსანიშნავია ისიც, რომ XIX საუკუნეში საქართველოს აზნაურობა, როგორც დამოუკიდებელი მეურნე, უკვე გაქრა. მათი უმრავლესობა თავადობამ დაიქვემდებარა.

¹ საქ. სსრ ცსა (ქუთაისში), ფ. 1, ან. 2, ს. 27.

² შ. დ. უმბაძე, დასავლეთ საქართველო XIX ს. პირველ ნახევარში, გვ. 83.

ყოველივე ეს მეტყველებს იმაზე, რომ სვანეთის პირველ-ყოფილურობის თუ გვაროვნულობის (აგრეთვე სამხედრო დემოკრატიის საფეხურზე დგომის, გვაროვნული წყობილების მრავალრიცხოვანი და მნიშვნელოვანი გადმონაშთებისა და სხვ.) კონცეფცია, სვანეთის სოციალურ-ეკონომიკური განვითარების საუკუნეებით ჩამორჩენილობის „თეორია“ უღელქური აღმოჩნდა, რომ ესა თუ ის კონცეფცია და ისტორიულ მოვლენათა ინტერპრეტაცია სათანადო წყაროების მონაცემების დეტალურ ანალიზს და ობიექტურ შეფასებას უნდა ემყარებოდეს. ყოფითი ეთნოგრაფიული რეალიების ტენდენციური შერჩევა და ასეთივე ინტერპრეტაცია პირუღვენელ კრიტიკას ვერ უძლებს, მეცნიერებას ახალი ფაქტებითა და აზრებით ვერ ამდიდრებს. შუა საუკუნეების სვანეთის ისტორიის კვლევის პროცესში ქვეშარიტებიდან აშკარად გადახვევის აშკარა რეციდივები თავის დროზე, როგორც ცნობილია, სამართლიანად დაგმო აკად. ნ. ბერძენიშვილმა, რომელმაც სვანეთის ისტორიული პროცესის შემდგომი შესწავლის პერსპექტივაც მკაფიოდ დასახა¹.

ფეოდალური ხანის სვანეთის გვაროვნულობის თეორიის ზოგიერთი თანამედროვე მიმდევარი ვერ უარყოფს ბალსზემო სვანეთის საზოგადოების სოციალურ დიფერენციაციას, ანუ გლეხისა და ვარგის (აზნაურის) წოდებათა წარმოქმნას; მაგრამ დაბეჯითებით ირწმუნება, თითქოს „გლეხი და ვარგი თანასწორი უფლებით ფლობდა მიწას“, რომ „კერძო პირთა აღზევებას თემი აჩერებდა“, თითქოს, „მმართველობაში გლეხი და ვარგი თანასწორი უფლებით გამოდიოდნენ“. საკითხავია, ამგვარ საზოგადოებას, როგორადაც მ. ჩართოლანის მიერ ბალსზემო სვანეთია წარმოდგენილი, რა საერთო აქვს, თუნდაც ადრეფეოდალურ საზოგადოებასთან? ნუთუ, ადრეფეოდალურ ურთიერთობაში ფეოდალური არაფერია! ნუთუ, ადრეფეოდალურში ისეთი აზნაური იგულისხმება, რომელსაც არც ეკონომიკურ-პოლიტიკურ-უფლებრივი უპირატესობა აქვს მოპოვებული და არც ექსპლოატაციის უფლება; აგრეთვე ისე-

¹ ნ. ბერძენიშვილი, საქართველოს ისტორიის საკითხები, V, 1971, გვ. 66-68.

თი გლეხი, რომელიც სხვას არაფრით ჩამორჩება! რა თქმა უნდა, ადრეფეოდალურ საზოგადოებაში უკვე ასეთი თანასწორობა და თანასწორუფლებიანობა არ შეიძლება სუფევდეს. ამ თვალსაზრისის ავტორი, მ. ჩართოლანი, აცხადებს: „ფეოდალის ბატონობაზე დაბალი დონე როდია სახალხო მმართველობა“¹. ამგვარ არჩევანთან და განსჯასთან ერთად, ისტორიის კვლევაში რამდენადმე დამაფიქრებელია ჩვენი ავტორის ის მეთოდიც, რომლის თანახმად ფეოდალური ხანის სვანეთის ისტორიის კვლევისას „ეთნოგრაფიული მასალა პირველხარისხოვანი წყაროა, განსაკუთრებით მნიშვნელოვანია ხალხური არქიტექტურული ძეგლები“². ხოლო, იმავე ხანის წერილობითი წყაროები, ასევე X—XV საუკუნეთა უამრავი ქრისტიანული ეკლესია-მონასტერი არა თუ გათვალისწინებას, არამედ მოხსენიებასაც არ იმსახურებენ.

ეთნოგრაფ-მკვლევარ მ. ჩართოლანის შეფასებით, ფეოდალური ხანის სვანეთის „არქიტექტურულ ნაგებობათა მფლობელობისა და საკუთრების ფორმა ადრეფეოდალური ხასიათისაა...“³, „ფეოდალმა ეკლესია ვერც ქვემო სვანეთში და ვერც ბალს ქვემო სვანეთში ვერ წაართვა გლეხობას...“⁴. „ამ რიგის მასალებში (მონაცემებში — გ. გ.), — დაასკვნის მ. ჩართოლანი, — არ შეიძლება არ დავინახოთ გვაროვნული წყობილების გადმონაშთებიც და საზოგადოებრივი ურთიერთობის მანიშნებელი ძველი ინსტიტუტებიც, როგორცაა სასოფლო თემი, საოჯახო თემი (დიდი ოჯახი), პატრონიმული გაერთიანებანი და სხვ.“⁵.

მცდარია ავტორის ასეთი განცხადებაც: „იქ, სადაც ფეოდალიზაცია მოხდა, სვანეთმა თავისი ტერიტორიის გარკვეული ნაწილი დაკარგა და იმ ტერიტორიაზე ნასვანარი ადგილები-

1 მ. ჩართოლანი, ისტორიისა და კულტურის ძეგლები სვანეთში (იხ. კრებული „სვანეთი“, თბილისი, 1979, გვ. 105.

2 იქვე, გვ. 105.

3 იქვე, გვ. 103.

4 იქვე, გვ. 104.

5 იქვე.

და დარჩა. ასე მოხდა ჩრდილო კავკასიაში: ბაქსანის, თერგის და ყუბანის სათავეებში...“¹.

ვფიქრობთ, ყველაფერი ეს ვრცელ კომენტარს არ საჭიროებს. მ. ჩართოლანის ინტერპრეტაციით, შუა საუკუნეებში სვანეთი, სახელდობრ ბალსზემო სვანეთი „სამხედრო დემოკრატიის“, „სახალხო მმართველობის“, „თავისუფალ მეთემეთა“, „თანასწორუფლებიანი საზოგადოების“, „სასოფლო და საოჯახო თემების“, „პატრონიმული გაერთიანების“ ფარგლებს (ე.წ. „ადრეფეოდალურ ურთიერთობას“) ვერ გასცდა, ხოლო სვანეთის საზღვრებში — „ჩრდილო კავკასიაში: ბაქსანის, თერგისა და ყუბანის სათავეებში ფეოდალიზაცია მოხდა...“. აი სადამდე მიდის ზოგიერთი ავტორი. სვანეთის სოციალურ-ეკონომიკური სტრუქტურის ამგვარ შეფასებასა და გაგებას სინამდვილესთან საერთო არაფერი აქვს.

მ. ჩართოლანი
სვანეთი.

¹ მ. ჩართოლანი, ისტორიისა და კულტურის ძეგლები სვანეთში, (იბ. კრებული „სვანეთი“), თბილისი, 1979, გვ. 105.

შინაარსი

შესავალი	3
თავი პირველი	
სვანეთის მოსახლეობა და შეურნეობა XIX ს. 30—70-იან წლებში	16
თავი მეორე	
სვანეთის რუსეთთან შეერთება და სასოფლო-სათემო მმართველობის შემოღება	36
1. რუსეთთან შეერთება	36
2. სასოფლო-სათემო მმართველობის დაარსება	61
თავი მესამე	
გლეხთა აჯანყება	84
1. მღელვარების დასაწყისი	84
2. შეიარაღებული აჯანყება და ხალდეს ტრაგედია	127
3. აჯანყებულთა გასამართლება	152
დამატება	186
ვარგისა და გლეხის საკითხისათვის	186

რედაქტორი ნ. გონაშვილი
მხატვარი ე. ონიანი
მხატვრული რედაქტორი აკ. ტუხაშვილი
ტექნიკური რედაქტორი ნ. აფხაზაია
კორექტორი ლ. არეშიძე
გამომშვები დ. იამანიძე

ს. ბ. № 16642

გადაეცა წარმოებას 19.1V.79 წ. ხელმოწერილია დასაბეჭდად
16./VII.79 წ. საბეჭდი ქაღალდი № 1. 84×108¹/₃₂. გარნიტური
ენა. ბეჭდვა შალაღი. პირობითი ნაბეჭდი თაბახი 11.97. სააღრ.-
საგამომცემლო თაბახი 10,69.
უე 12429. ტირაჟი 1000. შეკვ. № 564.
ფასი 1 მან. 50 კაპ.

გამომცემლობა „საბჭოთა საქართველო“
თბილისი, მარჯანიშვილის 5.

საქართველოს სსრ გამსახკომი. თბილისი, № 4 სტამბა
380060, მედქალაქის 11 კორპ.
Грузинской ССР. Тбилиси 380060. Медгородок II корп.
Тбилисская типография № 4 Госкомиздата